

BENEDICTI
PERERI
VALENTINI

E Societate Iesv.

ADVERSVS FALLACES
& superstitiosas artes,

ID. EST,
DE MAGIA, DE OBSERVATIONE
Somniorum, & de Diuinatione Astrologica.

LIBRI TRES.




VENETIIS, MDXCII.

Apud Ioan. Baptistam Ciottum, Senensem.

Sub signo Minervæ. 18

7440 P235



BK



4.3721

CAMILLO CAETANO

PARTRIARCHÆ ALEXANDRINO.



Benedictus Pererius S. D.



RIA sunt genera rerum, CAMILLE Patriarcha Illustrissime, in quarum studio & observatione mortalium animi vesana quadam libidine vel potius rabie noscendi que futura sunt, fœdis & noxijs illuduntur fallacijs atque impijs erroribus illigantur: Somnia, & natalitia Astrologorum Prædicta, atque Artes Magica. Neque verò earum rerum pestilens vis, priuatos tantum aut singulos homines, verum etiam Prin-

A 2 cipes

*cipes ac Reges ipsasq; ciuitates & Re-
publicas inuasit, infecit, ac perdidit.
Ac licet has generis humani pestes om-
nibus ferè sæculis tum sapientes viri
firmissimis rationibus profligare, tum
prudentes Rerum publicarum rectores
ac principes seuerissimis damnatas edi-
ctis & atrocissimis pœnis addictas, è so-
cietate hominum exterminare flagran-
tissimè cupiuerunt, obnixèq; contende-
runt: perparum tamen adhuc profe-
ctum est. Adeo enim malum hoc in ani-
mis hominum hæret infixum, ut peni-
tus extrahi vix queat, nec eius sanandi
potens atque efficax ullum iam reme-
dium inueniri posse credatur. Itaque
hic usu venit quod de Mathematicis
scite quidam vereq; dixit: Genus homi-
num, inquit, potentibus infidum, spe-
rantibus fallax: quod in ciuitate nostra
& vetabitur semper, & retinebitur.
Sed nihilominus tamen mihi quidem
valde utiliter ac salutariter fecisse vi-
si sunt, qui doctis aduersus eas artes edi-
tis*

Tacitus
historia-
rū lib. I.

zis libris, vanam & fallacem ac perniciosam esse hominum generi, nimis curiosam & superstitiosam earum rerum observationem, aperte demonstrarunt. Quorum ego prudens consilium, piumq; studium, atque utilem conatum emulatus, tres aduersus eas artes libros confeci, unum de Magia; alterum de Observatione somniorum; tertium de Diuinatione Astrologica. Ac primus quidem liber planè nouus est fœtus, nunc primum lucem aspiciens: quæ reliquis autem duobus libris disputantur, ea ferè sunt in Commentarijs nostris partim in Daniele, partim in Genesim explicata. Sed quia non pauci eos Commentarios non legent, aut quod eos propter studiorum diuersitatem non iuuat legere, aut quia non vacat propter occupationes, putauit me pergratum plurimis faciendum, si, quo latius horum librorum pateat utilitas, separatim eas disputationes, atque unum in volumen, idq; modicum inclusas, typis excuden-

*das curarem: ratus scilicet fore, ut eas
ipsas disputationes, tum propter exquisi-
tam multisq; optatam eiusmodi rerum
cognitionem, tum etiam propter parui-
tatem commoditatemque voluminis ,
& plures , & avidius atque utilius le-
gant. Has ego lucubratiunculas appa-
rere volui sub tuo nomine C A M I L-
L E Præsul ornatissime : quem omnes
qui norunt, non possunt non amare pro-
pter singularem ingenij ac morum sua-
uitatem; & quod vera animi bona cum
amplissimis naturæ ac fortune bonis
adequasti, admirari & observare co-
guntur. Video sanè perexiguum esse
munus, nec dignum tuæ nobilitatis ac
dignitatis amplitudine: sed est tamen
amoris & observantiæ plenissimum; &
quanti ego te faciam, quantumque
Caetanam familiam colat Societas no-
stra, certissimum testimonium.*

B E N E-

BENEDICTI^I PERERII,

LIBER PRIMVS,

qui est

D E M A G I A .



VPLICEM esse Magiam hic liber ostendit alteram quidē Naturalem & veram, ex occultis rerum naturis & virtutibus profectam, intimamq; ac præstantissimam Philosophiæ partem, & admirandorum effectricem operum, ab omniq; aliena superstitione, & à Dæmonū artificio ac maleficio puram; sed paucissimis tamen mortaliū exploratē perceptam: Alterā verò (quæ vulgo iactatur & celebratur) ab omni rōne ac veritate vacuam, fallacem item & noxiam, Dæmonumq; fraudibus & maleficijs implicatam, ob idq; meritò infamem & abominabilem, & è societate hominum exterminandam. Hinc præterea cognoscet lector, quatenus vtraque Magia progredi, & qualia quantavè opera possit facere, & an mirā quæ videtur facere posterior Magia, verè talia sint, qualia spectantibus videntur an verò præstricta oculorum acie, spectantium fallant existimationem, nec veram habeant earum rerum quas repræsentant vim & naturam,

sed nudas tantum atque inanes earum rerum similitudines & imagines ferant : Denique quæ videntur & vulgo creduntur Magorum miracula , quibus rebus differant à veris miraculis, quibusue notis & signis facile diiudicari & internosci queant. Libuit autem ante ipsum operis vestibulum, velut in conspectu lectoris ponere generales sententias & capita disputationum quæ hic tractantur , quò scilicet cupidius ille, huius libri lectionem adeat , & ex ipsa lectione eam capiat vtilitatem, cuius ei afferendæ vtilitatis flagrans desiderium, nec dubia spes ad huius nos voluminis scriptionem impulit.

INDEX CAPITVM ET DISPVTATIONVM LIBRI PRIMI,

Qui est de Magia.

- I. **A** Nomnia quæ feruntur à Magis facta , sine vel ab illis, vel ab alijs conficta.
- II. An omnes effectus Magia reuera tales sint quales videntur.
- III. An sit aliqua Magia naturalis, & quæ, aut qualis ea sit, & vnde eam homines discant.
- IV. An sit aliqua Magia non naturalis, & Dæmonum magisterio atque artificio hominibus tradita.
- V. An spiritus illi, quorum magisterio & auxilio mira faciunt Magi, sint boni an mali.
- VI. Quæ opera admiranda possint Dæmones, aut per se ipsos, aut per Magos facere.
- VII. Quas

- VII. *Quas res Damon nec per se, nec per Magos possit efficere.*
- VIII. *An opera Magorum sint vere miracula, & quæ admodum à veris miraculis differant & inter nosci queant.*
- IX. *Quotuplex sit Magia, & primo de Magia Astronomica.*
- X. *De Arte Cabalistica.*
- XI. *De Necromantica, id est, Mortuorum ex Inferis ad viuorum conspectum & colloquia euocatione.*
- XII. *An per artem magicam possit verum aurum fieri ab Alchimijs.*
- XIII. *De origine Magia, & his qui in ea clari ac nobiles fuerunt.*
- XIV. *An Magia studium & usus sit licitus.*
- XV. *De Magis Pharaonis, quorum mentio fit in libro Exodi: & qui nominatim fuerunt illi qui restiterunt Moysi.*
- XVI. *An prodigia qua Magi Pharaonis fecerunt, reuera fuerint talia, qualia videbantur, nec ne.*
- XVII. *Qua ratione & artificio, prodigia illa fuerint à Magis facta.*



DE MAGIA
CAPVT PRIMVM.

AN QUAE A MAGIS FACTA
esse vel sermonibus vulgi feruntur, vel à
scriptoribus mandata sunt litteris, omnia
sint fabulosa, ficta, & falsa; an verò aliqua
fuerint, vti narrantur, verè ab illis gesta.



ON est dubium quin eorum quæ de
Magis aut dicuntur aut scribuntur,
quamplurima sint ficta & falsa: nam
plerique hominum nimis sunt credu-

Arist lib. li & superstitiosi, & rebus admirandis facile ca-
1. Meta- piuntur; cum etiam docti viri & Philosophi, vt
phys. inquit Aristoteles, quoniam fabula cōtinet ali-
quid nouum & mirabile, fabulis oblectentur.

Quis enim non videt, quæ Ouidius narrat in li-
bris Metamorphoseos, omnia ficta esse à Poe-
tis, sicut illa de Circe & Medea; & de socijs Dio-
medis in aues conuersis, quæ lōgo post tēpore
circa templum Diomedis volitabant; de socijs
Vlyssis, quos Circe mutauit in bestias; de Arca-
dibus qui traiecto quodam stagno vertebantur
in lupos; de socero Medæ, quem illa à senectū-
te ad iuuentutē reuocauit, de draconibus, qui-
bus simul iunctis Medea volauit per aera, & de
alijs id genus fabulis, quas Poetæ cum ad oble-
ctationem legentium, tum ad mysticam homi-
num eruditionem adinuenerunt? Negari ta-
men non potest multa miratu dignissima verè à
Magis esse facta. Nam scriptura in Exodo com-
memorat opera Magorum Pharaonis, & 1. Reg.
cap. 28. scribitur de Pithonissa quæ suscitauit

Samue-

Samuelem, & Psalmo 57. de venefico incantante sapienter aspidem, ob id obturantem aures suas: & Matth. 24. *Surgent, inquit Dominus, pseudoprophetae, & dabunt signa & prodigia,* non vti que alia arte quàm magica. Ex historijs Ecclesiasticis notum est, quæ opera admiranda Simon Magus ediderit magicis incantationib. quâobrem (vt fertur) à Romanis publicam statuatam meruit hac inscriptione: Simoni Deo Sancto: vt narrat Iustinus martyr in Apologetico, Irenæus libro primo contra Valentinum, Tertulianus in Apologetico, Eusebius libro secundo historiæ Ecclesiasticæ. Propter quæ prodigia idem Simon tanta in admiratione fuit apud Samaritanos, vt quemadmodum Lucas scribit in Actis Apostolorum capite octauo, de illo diceretur: *Hæc est virtus Dei quæ vocatur magna.* Narrat B. Hieronymus in vita Hilarionis, cum quidam iuuenis virginem Deo sacram ad turpes amores illicere nulla ratione potuisset; eū ad magicas artes conuersum, quas apud Memphis Aegypti didicerat, adeo illis profecisse, vt virgo infano illius iuuenis amore fureret. Porro quæ de Strigib. vulgo circumferuntur, non sunt in totum falsa, sed multa illis miranda accidere, qui ea compererunt, viri fide digni, sicut Syluester in opere suo de Strigibus, & Alphonsus de Castro in eo quod scripsit de punitione hereticorum, non illi quidem tanquam dubia & incerta, sed tanquam sibi notissima & exploratissima tradiderunt.

*Iustinus
martyr.
Irenæus.
Tertul-
lian.
Eusebius.*

MIRA sunt quæ Philostratus in libris De vi-
ta Apol-

*Mira opa
ra Mago-
rum, ex*

Philostratus
10.

ta Apollonij memorat vel Brachmanas Indorum. vel Gymnosophistas Aethiopū, vel ipsum Appollonium gessisse. Tale est illud quod is narrat libro tertio & capite tertio, vidisse Apollonium apud Indos gemina dolia, vnum imbriū, alterum ventorum; illud, cum nimia siccitate India præmebatur, apertum, nebulas emittebat vniuersam illam terram humectantes: nimios autem imbres occlusum cohibebat: alterum ad apertum, efflabat ventos regionem perflantes, quò salubrius esset coelum. Tale etiam est illud quod ab eodem proditur libro tertio, capite octauo, cum Apollonius cum Iarcha & alijs Brachmanis mensæ accubuisset, tripodes lapideos sua sponte fuisse motos, & ab æreis pincernis calices in gyrum circumlatos esse certa mensura vinum & aquam miscentes & cyathos proferentes. Nec sileri debet quod Philostratus libro quarto, capite decimosexto scribit de puella, quæ tanquam mortua portabatur ad sepulchrum: cuius funeri occurrens in via Apollonius, tanquam secreto quædam illi admurmurans & insusurrans, ad vitam & integram valetudinem reuocauit. Nec minus mirabile est quod idem auctor narrat libro sexto, capite tertio de statua Memnonis, quam cum radius solis circa eius exortum attingebat, & ad os eius perueniebat, statua more hominum loquebatur. His adde quod ab eodem memoratur eiusdem libri sexti capite quinto, iussu Vespesionis, qui princeps erat Gymnosophistarum apud Aethiopes, vltimum quandam uoce quidē clara & distincta sed tenui admodum & quasi foeminea salutasse Apol-

Apollonium. Sed illud miratu dignissimum, quod Philostratus tradit capite secundo, libri octauī, Apollonium cum esset in prætorio Domitiani Imperatoris, vt putabatur, ab eo cōdemnandus, repente ex omnium oculis euanuisse. Quamobrem tanto in honore fuit Apollonius apud posteros, vt eum Hierocles cum Christo Domino nostro conferre ausus fuerit. Sed eius audaciam fregit, insaniamque coar. guit Eusebius Cēsariensis: Alexāder aut Mameas Imperator Romanorum, in suo Larario imagines Christi, Abrahæ & Apollonij habebat, quòd hos tres maximè omnium miraretur & coleret.

*Eusebius
in lib con
tra Hiero
clem.*

VERVM, sicut à principio dixi, eorum quæ Magi fecisse dicuntur, quamplurima falsa sunt, vel ab ipsis vel ab alijs conficta, & superstitionis nimiumque credulis hominib. persuasa. Quis enim vera concedat quæ Maga illa apud Virgilium libro quarto Aeneidos promississe dicitur:

*Hæc se carminibus promisit soluere mentes
Quas velit; aſt alijs duras immittere curas,
Sistere aquā fluuijs, & uertere sidera retro,
Nocturnosq. ciere manes, mugire videbis
Sub pedib. terrā, et deſcēdere mōtib. ornos.*

Quocirca Plinius nullam esse putauit Magiæ vim atque potestatem, & quæ de Magis feruntur, omnia esse vana falsaque: totamque Magiā reijcit & damnat. Nam libro 30. capite 2. Immensum, inquit, & indubitatum exemplum est falsæ artis quam dereliquit Nero. Non enim ad eam discendam Neropi defuit vel ingenium,

*Plinio
nulla est
magia.*

vel

vel diligentia, vel quolibet facultas, nec studiū cum eius discendæ audivissimus esset: quin etiam ad eam docendam Tyridates Armeniorum rex nobilissimos Magos secum ducens venit ad eum, cænisque magicis eum initiauit: sed is regnū quidem à Nerone accepit; Magiam aut quæ nulla est, docere eum nō potuit. Proinde ita persuasum sit, intestabilem, irritam, inanem esse, habentem tamen quasdam veritatis, ymbras, sed in his veneficas artes pollere, non magicas. Hec Plinius. Cui ut concedo plurima Magorum esse vana & falsa; ita esse talia omnia non assentior. Esse autem pleraque Magorum promissa non solum inania & falsa, sed etiam incredibilia & ridicula, demonstrat Plinius lib. 26. cap. 4. his exemplis; Magi aiunt Aethiopide herba amnes ac stagna ficcari: coniectu, tactu, clausa omnia aperiri: Achimenide coniecta in aciem hostium, trepidare agmina, ac terga vertere: Latacem dari solitam à Persarum Rege Legatis, ut quocunque venissent, omnium rerū copia abundaret. Apud Democritum inuenitur compositio medicamentum, quo pulchri, bonique & fortunati gignantur liberi. Et lib. 25. c. 9. Circa herbam, inquit, quam nostri Verbenacam vocant, Magi mire infantiunt: hac perunctos impetrare quæ velint, febres abigere, amicitias conciliare, nullique non morbo mederi. Lege apud Aul. Gellium lib. 10. c. 12. & apud Plinium lib. 28. c. 1. quæ fabulantur Magi de Chameleonte tradita à Democrito magicæ artis principe, qui, quo tēpore Hippocrates medicinam, eodem magicas artes in Græcia celebravit, hoc est, circa bellum Peloponesiacum,

anno

*Figmenta
Magorum
Plinio.*

*Aul. Gellius.
Plinius.*

anno post Romam conditam trecentesimo: vt auctor est Plinius lib. 30 cap. 1.

CAPVT II.

AN OMNES EFFECTVS MAGIAE sint simulati & tantum apparentes, hoc est, non tales reuera quales videntur; an verò sint aliqui eius effectus etiam veri, & naturales nempe tales reuera quales videtur.

NONNVLLOS effectus Magorum naturales & veros esse, tum ex sacris literis, tum ex alijs probatis historijs compertum est. Nam opera Magorum Pharaonis vera fuisse, satis indicat scriptura c. 7. Exodi; itaque sentiunt Origenes & Augustinus. Id quoque declarat Samuel à Pithonissa suscitatus; quem fuisse verum Samuelem, licet nonnulli in dubium verterint, tamen auctor libri Ecclesiastici c. 46. nos dubitare *Matth.* non finit. Ad hæc Dominus noster ait venturos ^{24.} pseudopphetas tempore Antichristi, qui faciant prodigia & portenta magna: quæ S. Paulus ^{2. Theff.} vocat mendacia, non quod omnia per se & sua ^{2.} natura sint futura falsa; sed quòd fient ad persuadendum falsum, & ad decipiendos homines, & quòd putabuntur esse vera miracula, hoc est, supernaturalia opera, cum non sint talia. Nonne Deus Deuteronom. 13. denunciat venturos pseudopphetas prædicetes futurum aliquod portentum, quod ita veniet, vt ab illis fuerat prædi.

prædictum ? Dæmones item naturali solertia, quæ summa illis est, & scientia cunctarum rerum naturalium quam propter peccatum non amiserunt; denique longissimi tēporis experientia qua pollent, occultas & admirandas rerum facultates & virtutes, ipsarumque rerum inter se vel sympathiam vel antipathiam, & quemadmodum inuicem applicari & temperari debeant, quò mirabiles & inusitados effectus producant, optimè norunt, & per Magos ministros suos præstare possunt. Atque hæc est doctrina B. Augustini in lib. 3. de Trinitate, c. 7. & 8. in libro Octogintatrium quæstionum, q. 79. & in quæstione 22. in Exodum, à Christianis Philosophis iuxta & Scholasticis Theologis recepta. Neque possumus negare, (sunt enim multis Romanæ historiæ scriptoribus prodita) duarum Romanarum mulierum duo facta perquam memorabilia. Cum enim Mater deorum ex Pessimunte Phrygiæ, naui adueheretur Romam, ita dicitur hæsisse in Tiberi, vt non hominum, non bouum vi moueri loco posset. Q. Claudia vestalis quò suam castitatem probaret, discinxit se, zonamque naui alligans, eam quo volebat, deduxit. Thucia quoque vestalis quò suam etiam probaret pudicitiam, aquam Tiberi haustam cribro tulit vsque ad Capitolium, anno vrbs conditæ sexcentesimo nono, vt tradit Plinius lib. 28. cap. 2. Nec possumus inficiari, opera Magorum homines foemina suè inflammari ad libidines, & ad amores antè exosos; cuius rei exemplum affert S. Hieronymus in vita Hilarionis à nobis supra commemoratum. Quanquā duo illa quæ
virgi-

virgines illas uestales egisse diximus, putat S. *Notabilis*
 Thomas in Quæstionib. de potentia, quæst. 6. *sententia*
 art. 5. etiam ministerio bonorum Angelorum, *B. Thom.*
 Deo sic volente, castitatis uirtutem & præstan-
 tiam commendare & probare hominibus, fieri
 potuisse.

CETERVM plurima Magorū opera esse
 simulata, fallentia oculos spectantiū, nudam quæ
 tantum eorum quæ repræsentant imaginem,
 non autem ueram naturam habentia, multi tra-
 diderunt atque compereuerunt; & ego facile credo.
 Tales fuerunt (si tamen fuerunt) admirandæ me-
 tamorphoses, quas à Varrone proditas comme-
 morat B. Augustinus lib. 15. de Ciuitate Dei, c.
 17. & 18. de socijs Vlyssis à Circe mutatis in va-
 rias bestias, de socijs Diomedis in aues conuer-
 sis, de Arcadibus trajecto quodam stagno trans-
 formatis in Lupos, de stabularijs quibusdā mu-
 lieribus, quas narrat B. Augustinus suo tempore
 in Italia viatores quibus caseum dabant venefi-
 cijs imbutum, mutare solitas in iumenta, eo-
 rumque opera ad portanda onera aliquamdiu vi-
 sas, rursus in pristinas hominum figuras refor-
 masse.

Tale quoque fuit quod Philostratus lib. 4. ca- *Lamiarū*
 pite 5. tradit accidisse Apollonio: erat enim *ingenium*
 quædam lamia quæ speciem gerēs pulchræ mu- *et libido.*
 lieris, simulabat se captam amore cuiusdā Me-
 nippi iuuenis formosi, ei que uelle nubere. Die igitur
 nuptijs dicato, mulier illa conuiuium appa-
 rauit lautissimum, maxima auri, argenti, orna-
 metorum, omnis generis uini & dapum copia
 instructissimum, quo cum ingressus esset Apol-

lonius, ad eos qui aderant conuersus, inquit: Tantalii hortos videtis, qui sicut Homerus scribit, apparebant esse aliquid, cum nihil tamé essent: talem enim esse hunc omnem apparatus existimare debetis: neque enim quæ apparet materia; ulla subest, sed materiæ duntaxat simulachrum est & imago. Hæc autem sponsa, una est è numero lamiarum, quas aliqui laruas, aliqui lemures appellant. Sunt autem ad amorem & venerem pronæ, & humanas carnes vehementer expetunt, venereorum cupidine allicientes eos quos cupiunt postea deuorare. Atque his dictis totus ille apparatus ex oculis omnium euauit: & illa mulier sese Lamiam esse confessa est, & voluisse Menippum voluptatibus explere, ut eius postea corpus deuoraret: consueuisse enim pulchrorum iuuenum corporibus vesci, ubi ad summam sanguinis abundantiam peruenissent. Non sunt admodum dissimilia quæ 26. quæst. 5. cap. Episcopi, de nonnullis stry gibus narrantur, quas dæmones delusa earum imaginatione credere faciebant, longa terrarum spatia per aëra equitando cōficere, & cum Diana, & Herodiade in amœnissimis locis iucundissimè epulari & ludere; cum neque verè transferrentur, neque personis, quibus credebant, adessent, sed tantum imaginationum ludificatione.

Hoc etiam euidentissimis rationibus probari potest. Magi enim promittunt se ex lapidibus uel lignis leones vel lupos subito producere posse; & nonnunquam in spectaculis ex terra faciunt subito existere leones vel lupos: cōstat autem

autem eiusmodi animalia perfecta citra super-
 naturalem Dei potentiam nulla ratione gigni
 posse nisi ex semine; nec ad iustam magnitudi-
 nem, nisi statis tēporum interuallis peruenire
 posse. Dicuntur etiam mortui à Magis reuocari
 ad vitam, sicut traditum est de puella illa quam
 Apollonius reuiuiscere fecit, & de Alceste quō-
 dam ab Hercule ad vitā restituta. Plin. etiā lib. 7.
 c. 37. narrat Asclepiadem celeberrimū tempore
 Pompeij Magni medicū, quenda hominē mor-
 tuū ē funere retulisse & seruasse. Non posse autē *Nulla vi*
 Magos verē mortuos ad vitam reuocare, ita cō *& arte*
 cluditur: Si animus hominis est mortalis, non *magica*
 potest semel extinctus idem numero reuiuiscere; *posse mor-*
 sin autem est, uti uerē est, immortalis, nō po- *tuos reuiu-*
 test ullis hominum vel dēmonum artificijs, uel *iscere.*
 ullis naturalium agētium viribus rursus ad cor-
 pus suum animandum viuificandumq; reuoca-
 ri: nam cum sit immaterialis & incorporeus, est
 supra omnis naturæ corporeæ facultates; nec
 ullius rei creatæ potestati subiacet. Necesse est
 igitur, resurrectiones mortuorum quæ a Magis
 factæ narrantur, uel esse fābulosas, uel fuisse si-
 mulatas, & tantum in speciem factas.

CAPVT III.

AN SIT ALIQUA MAGIA
naturalis.

LICET iam vsus obtinuerit vt nomen Ma-
 giæ ferē in malā partem accipiatur, pro ea
 nimirum arte quæ opera, & adminiculo dēmo-
 num res mirabiles uel facit, uel facere simulat;

& Magi vulgo dicantur qui ex cōmercio quod habent cum dœmonibus, res stupendas efficiāt. veluti sunt præstigiatores, incantatores, necromantici, & alij malefici homines: attamen nec nomen Magiæ absolute & præcise sumptum hoc significat, nec à principio sic fuit vsurpatum, sed vniuersè pro quadam facultate, per quam homines efficiebant res inusitatas & admirandas ratione quadam occulta, & alijs hominibus incognita. Sic generaliter sumpta Magia, dupliciter diuidi potest: altera enim est naturalis, altera non naturalis. Naturalem voco, quæ cognitione & applicatione quarundam singularium virtutum, quæ sunt in rebus naturalibus, quæq; latent ferè mortales, agentia & patientia suo loco & tempore, & sicut opus est inuicem componendo & temperando, effectus quosdam inusitados & admirandos, & quorum ratio videtur incomprehensibilis, moliuntur. Magia autem non naturalis dicitur, quæ etiam mira efficit, verumtamen non vtens uiribus agentium naturalium, sed sola dœmonum opera & ope. Naturalis autem Magia rursum triplex tradi potest: alia enim dici potest humana, quia humano studio & diligentia comparatur, altera Diuina, quæ per reuelationem uel à Deo, uel ab Angelis bonis percipitur: Tertia, Dœmoniaca quam dœmones tradunt ijs hominibus, qui se illis impia societate & foedere deuinxerunt.

*Triplex
Magiana
naturalis.*

*Essenatua
uale quã
dam Ma
giam.* ESSE autem Magiã quandam naturalem, quæ est secretior quædam & abstrusior sapientiæ pars, & quæ occulta quadam cognitione & vsu quarundam rerum naturalium mira perficit,

cit, nullo modo viris doctis dubitandum est. Quis enim vel tinctus duntaxat literis philosophicis, nescit esse multas virtutes rerum naturalium occultas, mirabiliū rerū effectrices, quas si quis benè nosset, & ad vsum accommodare sciret, haud dubie mira posset efficere. Multa sunt naturæ miracula incompertē adhuc rationis, & (vt Plinij verbis vtar) in naturæ maiestate penitus abdita: hæc si quis hominum illis rebus naturalibus occultè vtens, faceret, Magus vulgo diceretur, & non nisi auxilio dæmonum talia facere crederetur; cum tamē opera illa essent naturalia, & naturaliter à causis naturalibus profecta. De miraculis naturæ integrum librum scripsit Aristoteles, qui inscribitur, De admirandis auditonibus; quanquam eum nonnulli adscribunt Theophrasto. Plinius cum aliis libris multa, tum plurima secundo libro Naturalis historiæ prodidit, & Proclus in lib. De Sacrificio, & Magia, & B. Augustinus lib. 2. De Ciuitate Dei, cap. 4. & 5. Albertus Magnus lib. 2. Mineralium, Tractatu 2. c. 1. 11. & 17. & Fracastorius in lib. De Sympathia, & Ficinus libro 4. Theologiæ Platonis, c. 2. multaque eius generis sparsa leguntur in libris Cardani de subtilitate & varietate rerum; quorum hic nonnulla ex Plinio recensebo lib. 2. cap. 96. Iuxta Harpaga oppidum Asiæ, cautes itat horrenda vno digito mobilis, eadem, si toto corpore impellatur, resistens. Duo sunt montes iuxta flumē Indum, alteri natura est, vt ferrum omne trahat, alteri, vt respuat; Itaque si sinē clauī in calciamēto, in altero auelli non posse, in altero sisti. Et

Miracu-
la natu-

cap. 105. Hæc est natura Naphtæ circa Babylo-
 niam profluens bituminis liquidi modo, vt in
 eam vndecunq; visam protinus transfiliat ignis.
 Ita ferunt à Medea pellicem crematâ, postquâ
 sacrificatura ad aras accesser at, corona igne ra-
 pta, & cap. 107. In Nymphæo exit è petra flam-
 ma quæ pluuijs acceditur, & c. 103. In Dodone
 Iouis fons cùm sit gelidus, & immerfas faces
 extinguat; si extinctæ admoueantur, accendit.
 In Illyrijs supra fontem frigidû expansæ vestes
 accenduntur. Idem Plinius libro vltimo, cap. 4.
 Adamas (sic Græcè dictus, quòd nec ferro, nec
 igne dometur) hircino tamen rumpitur sangui-
 ne: & cum magnete lapide in tantum dissidet,
 vt iuxta positus ferrum non patiatur abstrahi;
 aut si admotus magnes apprehenderit, rapiat
 atq; auferat. Verùm nihil esset mirabilius ma-
 gnete, si vis eius nō adeo nobis esset nota & ex-
 plorata. Nam rationē cur ferrum ad se trahat,
 & acum nauticam sua vi tactâ eatenus agitet,
 quoad illa directo Septentriones spectet, quis
 nobilium philosophorum non diligentissimè
 inuestigauit? quis autem adhuc comperit aut
 satis explicauit? Sed omnia excedit miracula
 Echneis pisciculus quem Latini vocant Remo-
 ram, cuius meminit Aristoteles lib. 2. De Histo-
 ria animalium c. 14. sed Plinius lib. 32. cap. 11.
 non solum ab antiquis de eo prodita, sed etiam
 sibi suiq; tēporis hominibus planè cognita &
 explorata tradens, ait eum semipedalē esse, li-
 maci magnæ similem, adhærentemq; nauigijs,
 licet ea sint ingentia cursuq; incitatissimo fero-
 tur, eorum tamen ita frenare impetum, vt stare
 cogat,

*Remora
piscus.*

cogat, non labore vlllo, nec renitendo, nec aliter quàm adhærendo. Fertur Aſtiaco bello tenuiſſe Prætoriam nauim Antonij properantis circumire, & exhortari ſuos, donec iret in aliã. Ideoq; Cæſariana claſſis impetu maiore protinus venit. Tenuit etiã eius memoria Caij principis ab Aſtura Antium remigantis quinquiremem quadringentorum remigum viribus propulſam, eiufq; adhærens gubernaculo: feruntq; Cæſarem peculiariter miratum quomodo adhærens tenuiſſet, nec idem polleret in nauigiũ receptus. Hactenus ex Plinio. Nec modo quæ ratione carent, ſed etiam homines mira edere & non cernentibus incredibilia cùm alij teſtificati ſunt, tum haud dubium reliquit S. Auguſtinus multis certisq; eius rei poſitis exẽplis. No- uimus, inquit, lib. 14. de ciuitate Dei, c. 23. hominum quorundam naturas multum cæteris diſpares, & ipſa raritate mirabiles, quædam vt volût de corpore ſuo facientium, quæ alij nullo modo poſſunt; & audita vix credunt. Sunt enim qui aures mouent, vel ſingulas, vel ambas ſimul. Sunt qui totam cæſariem, capite immoto quantum capilli occupant, deponunt ad frontem, reuocantq; cùm volunt. Sunt qui eorum quæ deuorauerût, incredibiliter plurima & varia, paululum præcordijs cõrectatis, quod placuerit, integerrimum proferunt. Nonnulli ab imò ſine pædore vlllo, ita numerosos pro arbitrio ſonitus edunt, vt ex illa etiam parte cõtare videantur. Ipſe ſum expertus ſudare hominem ſolere cum veller, notum eſt quosdã flere cùm volunt, atque vbertim lachrymas fundere.

Presbyter fuit quidam nomine Restitutus in parœcia Calamensis Ecclesiæ, qui quibuscunque volebat, ita se aufererat a sensibus & iacebat simillimus mortuo, vt non solum vellicantes & pungentes minime sentiret, sed aliquando etiam igne vreretur admoto, sine vlllo doloris sensu: nec in eo vllus inueniebatur anhelitus. Hæc ibi Augustinus.

*Sphæra
Archimedis.*

I A M verò Sphæra illam quam tradit Cicerone primo libro Tusculanarum disputationum, & secundo libro de Natura deorum ab Archimede primum, & deinde à Possidonio factam, omnes cœlestium orbium conuersiones suis motibus clarissime perfectissimeq; representantem, quis humanum ac non potius diuinum aut dæmoniacum inuentum & opus credidisset? Huc etiam referri potest quod Albertus capite tertio libri sui De moribus Animalium cōmemorat, duos in Germania natos esse pueros, quorum altero iuxta domorum ostia incedente, omnia ostia versus sinistrum illius aperiebantur, tametsi clausa essent: idemq; contingebat alteri puero illius fratri, versus latus eius dextrum; & hoc dicit vidisse multos, negatq; id referri posse aliò; quàm in proprietatem occultam quæ utriq. in eorum ortu indita est à cœlo: quanquam ego vereor ne illud non fuerit verum. Aut si fuit, non puto id naturaliter sine interuentu & opera dæmonum fieri potuisse.

*Quales
Magi Persarum.*

S I igitur tā mira sunt naturæ opera; cur nō sapiens reconditori naturalium rerum cognitione vsuq. præditus similia facere posset? Atq; hæc est Magia naturalis. Tales erāt apud Persas

Magi

Magi (ait Philo in libro, Quod omnis prob. sit liber) naturæ scrutatores, præ veritatis cognoscendæ studio, qui per otium diuinas virtutes contemplantur clarius, & alios ijfdem initiant mysterijs. Et in libro De specialibus legib. Veram, inquit, Magiam, hoc est, Perspectiuam scientiam, per quam Naturæ opera cernuntur clarius, vt honestam expetendamq. non plebeij solum testantur, sed etiam Reges regum maximi, præsertim Persici, tam curiosi harum artium, vt regnare non liceat nisi familiariter cum Magis versato. B. Hieronymus exponens secundū Danielis caput: Magi, inquit, sunt, qui de singulis philosophantur, nec malefici sunt, sed Philosophi Chaldæorum, & ad artis huius scientiam reges quoque & principes eiusdem gētis omnia faciunt. Vnde & Magi in Saluatoris nostri natiuitate primi, ortum eius intellexerunt, Huius artis excellenti peritia, censet Philostratus Apollonium Tyaneum mira quæ de eo narrantur, effecisse, idemq. sensit de illo Iustinus martyr in Quæstionibus ad Orthodoxos, quæstione vigesimaquarta ita scribēs: Apollonius, vt vir naturalium potentiarum & dissensionū atque consensionū earum peritus, ex hac scientia mira faciebat, non auctoritate diuina. Hanc ob rem in omnibus indiguit assumptione idonearum materialū, quæ eum adiuuarent ad id perficiendum quod efficiebatur. Et Apollonij quidem opera quoniam facta sunt ex scientia rerum naturalium ad corporalem actionē hominum, non euerit Deus. Sic ibi Iustinus. Huius Magiæ naturalis fiducia ausus est Archi-

Matth. 2.

*Iustini
martyris
testimo-
nium de
Magia A
pollonij
Tyanei.*

medes admirandum illud theorema ponere .

*Archime-
dis scien-
tia poten-
tia.*

QVANTVM LIBET onus quibuslibet viribus mouere: nec posuit modo, sed & apertissimè demonstrauit: & quia id regi Hieroni incredibile videbatur, speculationē illam ad praxim traduxit, ingentem nauem onerariā quam ingens hominū turba, vix maximo labore mouere poterat, hominibus multis ponderibusq; impositis, procul assidens, quieta impellens manu, vi quadam multifidæ machinæ, tranquillo quasi mari prolaberetur, ad se adduxit. Cumq; Marcellus maximo exercitu terra mariq; Syracusas obsideret; Archimedes ad vrbis propugnationem, mirabiles terribilesq; omnis generis machinas telaq; huius Magiæ naturalis sciētia adinuenit, quibus tātas hostium strages passim edebat, vt Romani incredibili admiratione terroreq; perculsi, dicerent se nō contra homines, sed contra Deos pugnare. Quid dicam de stupendo illo Architæ Pythagorici commento? à quo plerique nobiliū Græcorum tradunt, & apud Aul. Gellium lib. 10. cap. 12. Phauorinus Philosophus pro certo confirmat, simulachrum columbæ è ligno ratione quadam mechanica factum, volasse; ita erat scilicet libramētis suspensum, & aura spiritus inclusa atque occulta concitum. Hac etiam arte ferunt Albertum Magnum, caput æneum, quod maxima spectantiū admiratione loqueretur, fabricasse. Seuerinum etiam Boetium, in epistola quadam siue a Casiodoro, siue à Theodorico ad eum scripta, dicitur, huius artis vi, miracula fecisse, hoc

*Plutar-
chus in
Marcel-
lo.*

*Columba
ligna vo-
lans.*

*Caput æ-
neum lo-
quens.*

*Mira ope
ra Boetij.*

auces

aves simulatæ 'dulcissimè canerent, homines ærei in aere buccinarentur. Verùm de his satis, illudq; ratum & indubitatum sit, esse quandam Magiam naturalem, quam qui tenent (paucissimi autem benè tenēt) possunt mira facere, quæ rude vulgus putat opera & auxilio dæmonum fieri: tum quia opera illa sunt inusitata; tum quod secreta quadam ratione & alijs occulta fiant. Quamobrem plerique putant eiusmodi homines habere consortium cum dæmonibus, & nō nisi eorum ope illa præstare. Talem de se fuisse hominum opinionē, quodam loco scribit Galenus; & Boetius lib. 1. de consolatione, prosa quarta, queritur se, propter reconditis Philosophiæ cognitionem, & quarundam rerum mirabilium effectum, tanquam magicis & maleficis artibus imbutum, fuisse, accusatum, & damnatum.

MAGIAE autem naturalis, non humano *Natura-* studio partæ, sed à Deo vel Angelis bonis accedens *Magia* partæ, manifestum est argumentum perfectissima *Salomo-* rerum omnium naturalium scientia diuinitus *nis. 3. Reg* infusa Salomoni: per quam verisimile est, eum 2. mira effecisse, aut certe si voluisset facere potuisset. Iosephus certè lib. octauo de Iudaicis antiquitatibus ait, Salomonem instituisse occulta quædam remedia ad pellendos morbos & fugandos dæmones. Incantationes, inquit, composuit quibus morbi pelluntur, & coniurationum modos reliquit scriptos, quibus ita fugantur dæmones, ut deinceps nūquam reuerti audeant: atq; id sanationis genus etiam suo tempore apud Iudæos in usu esse; & se vidisse Eleazarum

zarum Iudeum, præfente Vespasiano alijsque Principibus, multos à demonibus vexatos, hac ratione liberaſſe. Modus curationis erat hic: admoto naribus dæmoniacci annulo, sub cuius figillo incluſa erat ſpecies cuiuſdam radicis à Salomone indicatæ, ad eius olfactum, per naſum contrahebatur dæmoniũ, & collapſo mox homine, adiurabatur dæmonium ne amplius rediret, Salomonis mentione facta, & incantationibus eius recitatis. Diſceſſus autem dæmonis ab homine, illud erat indicium, quod iuſſu Eleazari egrediens, vas plenum aqua ibi poſitũ, inuiſibiliter euertebatur. Hæc ex Iosepho. Sed proſecto illa ratio eiſciendi dæmonem, non ex Magia naturali, ſed ex ſuperſtitioſa & Diaboli artificio, compoſita proficiſcebatur; nec eam credibile eſt inſtitutã eſſe à Salomone, niſi for-

3. Reg. II

te poſtquam is Dei gratiam perdidit, in cultũ idololatriæ prolapſus. Iuuenis etiã Tobias, mirabilem vim eius piſcis quem in Tigri ceperat, Angelo Raphaele docente, cognouit. nam ſic Tobie dixit Raphael (vt legitur. c. 7. illius libri) *Cordis eius particula ſi ſuper carbones ponas, fumus eius extricat omne genus dæmoniorũ, ſine à viro, ſine à muliere, ita vt ultra nõ accedat ad eos: ſel autem eius, valet ad vngendos oculos, in quibus fuerit albugo, et ſanabũtur.* Simili remedio piſcis, Gregorius Turonenſis Epiſcopus, cũ puer eſſet, diuinitus admonitus, patrem ſuum à grauiffimo morbo liberauit.

NON NVNQVAM etiam Magiã naturalem diſcũt homines à dæmonibus. Sic enim Magos

Pha-

Pharaonis eam didicisse, certū est. Immo ferè, qui hanc Magiam tenent, cum sint homines minime probi, & Philosophiæ aliarumq; liberarū doctrinarū rudes, & imperiti, non dubiū est, quin uel ipsi eam artem à dæmonibus didicerint, uel ab his quibus eam dæmones tradiderunt. Vix enim ulli mortalium, aut certè paucis simis, nec nisi ijs qui acerrimo fuerint ingenio, & longinqui temporis diligenti obseruatione usi, talis Magia naturalis contingere potest.

CAPVT IIII.

*AN SIT ALIQUA MAGIA
non naturalis, hoc est, qua non ad natu-
ram, sed ad dæmones necessa-
riò referri debeat.*

MULTA faciūt Magi, quæ nullo modo effici possunt per causas naturales, sed ea necessariò referri debēt ad aliquas substantias incorporeas, quæ occultè cum ipsis Magis & per ipsas operantur. Magi enim nonnunquam faciunt statuas è ligno uel alia materia factas, nullo extrinsecus impellente, moueri ex se motu progressiuo & humano, quinēt loqui & respondere ad quæstiones de varijs rebus propositas: si id fieret naturaliter, cum natura nunquam det operationem aliquam, nisi dando formam, ex qua illa operatio procedit, supradictæ vero actiones, sint tantummodo animalium perfectorum, & quædam propriæ hominis, oporteret in illa statua productam fuisse animam sentientē perfectam, & animam rationalem. At nec huiusmodi

iufmodi animæ poſſunt eſſe ſubiectiuè in tali materia, qualem habent illæ ſtatue, quippe quæ carèt uita & ſenſu; nec animalia perfectæ poſſunt generari niſi ex ſemine à ſui ſimilibus, nec poteſt natura ſimul & generare animal perfectum, & perfectam illi magnitudinem dare: Neceſſe igitur eſt, prædictas operationes ſtatuarum, non à natura, ſed ab aliquo dæmone, qui intra illam ſtatuum latet, proficiſci. Deinde, Magi quædam manifeſtant occultiſſima; & quæ ratione humana nota eis eſſe non potuerant, ueluti furta clam facta, theſauros alicubi reconditos, res quæ in remotiſſimis regionibus geruntur, quæ quiſq; olim uel dixit uel fecit, denique prædicunt quædam futura: hæc autem opera ſunt mentis, & quidem ſublimioris atque præſtantioris, quam eſt humana. Præterea Magi cū uolunt mira illa facere, certis quibuſdam uestibus induuntur, ducunt quaſdam lineas, deſcribunt figuras, pingunt characteres, & alia quædam adhibent, quæ per ſe nec uim habent naturalem producendi illos effectus, nec præparandi materiam ad illos producendos, aut accipiendos: non igitur Magi opera illa faciunt per cauſas naturales.

AD HAEC, ſupra omnis naturæ corporeæ poteſtatem eſt, illud quod nonnunquam faciūt Magi, ut ad eorum præſentiam, & fores & alia loca quæ clauſa ſunt, repente pateſcant, interdum etiam ſe uel alios repente ex hominū conſpectu ſubducunt, quod de Apollonio Tyaneo memoriæ proditum eſt: is enim cum ſiſteretur in Prætorio ante Domitianum Imperatorem.

repente

repente ex oculis omhium euanuisse dicitur. His accedit quod Magi non faciūt hęc, nisi pronuntiando certas qualdam voces & uerba, in quibus totam illi, uel maximam uim artis Magicę ponunt; voces autem & uerba, cum ex se non habeant aliam uim quàm significandi, uel quodammodo afficiendi auditum, nō possunt esse causa ut aliquid fiat, nisi dupliciter, uel ratione rerum quę illis uerbis dicuntur, quę res intellectę ab audientibus, eos uariē afficiūt & mouent, præsertim adiuncta decenti conueniētiq; actionis & pronuntiationis ratione; & hoc modo oratorum & concionatorum uerba, mouere solent audiētes, sed hic modus mouendi, non nisi ad audiētes qui intelligunt, pertinere potest. Vel mouent uerba, propter suauitatem modi, quo modulatē & artificiosē cum suauitate & dulcedine auditum afficiunt; qua ratione non solum homines, sed etiam animalia uocibus musicis uariē affici & permoueri cernimus: neutrum autem horum reperitur in uocibus Magorum, non igitur per illas uoces, tanquam per causas naturales, illos suos effectus prōducunt. Iam uerò, cum Magi ad faciendum quod uolūt, adhibeant qualdam inuocationes, obtestationes, comminationes, sacrificia, prostrationes corporum, & alia eiusdem generis; quis non liquido cernit hęc non posse referri ad naturam corpoream, ratione & intelligentia carentem, sed ea naturę alicui incorporeę & intelligenti, cuius Magi opem implorant, & sine cuius concursu, quod intendunt efficere non possunt, exhiberi?

Quomodo voces possunt esse causa efficientes aliquarū rerum.

Postre-

Postremò , ne quis uel ambigendi, uel cauil-
landi reliquus sit locus, illud meo iudicio om-
nem tollit dubitationem, quod non solum Ma-
gi miràda illa opera per seipfos faciūt, sed qua-
si quædam dictata tradentes alijs, eadem per il-
los perficiunt: quin etiam usu venit quosdam
planè ignoràtes, an illa essent uel à dæmone tra-
dita, uel magicis prauitatibus infecta, fidem ta-
men habentes illis sibi dictatis, eisq; utètes, mi-
ra etiam fecisse, quod apertè demonstrat, facul-
tatem eiusmodi res perficiendi non esse natura-
lem. Non me fugit, Petrum Apponensem, Car-
danum, maximè verò Pomponatium in libro
De Incantationibus, eiusmodi op era Magorū,
exclusis dæmonibus, ad solas causas naturales
conatos esse referre; sed frustra & infelicitè.
Verum eorum opinionem infrà explicabimus
& refellemus. Sciendum autem est, hanc no-
stram sententiam quam hic docuimus & con-
firmauimus, ab omnibus Platonicijs fuisse pro-
batam & literis traditam, hoc enim sensit Ploti-
nus, Porphyrius, Iamblicus, Proclus: hæc etiam
fuit & Pythagoreorum doctrina, immò ante
hos omnes idem in Primandro, sensit &
docuit Mercurius Trisme-
gistus.



AN SPIRITVS ILLI QVORUM opera & auxilio Magis irafaciunt, sint boni, vel an mali.

SUBSTANTIAS incorporeas quæ fauēt Magis, eosq. iuuant, ad illa opera faciēda, quæ non fiunt per causas naturales, sed excedūt naturæ corporeæ potestatem, non esse bonos Angelos, sed malos, quos trito iam vocabulo Dæmones appellamus, multis sanè firmis manifestisq; argumentis ostendi & concludi pōt. Primo, eiusmodi spiritus iubent se à Magis adorari tanquam deos, sibiq; sacrificia fieri; hoc autē est proprium dæmonum, qui honorem diuinitatis, quem à principio affectantes assequi non potuerunt, decipiendis hominibus, aliquo modo obtinere cupiunt. Boni autem Angeli, eiusmodi honores non solum non optant, sed etiā vehementer auersantur. Vnde legimus in Apocalypsi, Angelum quendam prohibuisse ne Ioannes ipsum adoraret, dixisseq; : *Vide ne feceris; cōseruus enim tuus sum, &c. Deū adora.* Apor. 19. Deinde Magi sunt homines flagitiosissimi, & artibus magicis abutuntur ad inferendū exitium alijs, hoc est, ad patranda adulteria, furta, homicidia, atque adeo infanticidia: boni autem Angeli, nec maleficis hominibus fauent, & ab eiusmodi celeribus abhorrent. Posthæc, Magi multa miscent mendacia multasq; fallacias, quibus homines circumueniunt, & decipiunt: ad quod Angeli boni cooperari non possunt. Præterea,

C Magi

*Quomo-
do Magi
Demoni-
bus impe-
rent.*

*Matt. 12
Luc. 11.*

Magi inuocando eos quorum abutuntur opera, minantur illis quædam impossibilia nisi venerint: & cum venerunt; imperant illis, & cogunt ne inde discedant; hoc autem imperium non possunt habere homines in Angelos bonos: habent autem in Dæmones, vel quia superior dæmon, cum quo Magi habent societatem, & fœdus fecerunt, cogit inferiores dæmones parere iussis Magorum, uel simulant dæmones se cogi à Magis, cum tamen id voluntarie faciant, nec ab illis cogi queant, quò facilius decipiant homines, tantam vim & auctoritatem Magorum admirantes, & illis fidem adhibentes. Quod autem Dominus noster argumentatur, se non eijcere dæmones potestate principis dæmonum quia non potest Satanas Satanam eijcere, alioqui regnum eius diuideretur, nec diu stare posset; intelligendum est de perfecta eiectione dæmonis ab homine, hoc est, tam ex corpore eius quàm ex animo; vel de eiectione quæ proficiscitur ex odio dæmonis, & desiderio euerendi imperium quod habet in homines. His adde, quia ut benè, inquit Eusebius lib. 5. De præparatione Euangelica c. 7. vnde potuerunt Magi discere verba illa & cæremonias quibus dæmones aduocant, eosq; vel loco, uel annulo, vel vasi, uel statuæ uel alijs rebus adesse cogunt. Vnde scire quibus sacrificijs, libamentis aut suffimentis dæmones auertantur & fugentur, uel oblectentur & alliciantur? & alij quidem dæmones alijs rebus, vnde, inquam homines hæc discere potuissent, nisi ab ipsis dæmonibus?

QVID

QVID qđ non est credibile, hominem posse imperare Angelis bonis, eosq. uel reluctantes cogere & compellere ad aliquid faciendum, quod tamen Magos facere disertissimis uerbis declarauit Porphyrius Phylosophus in epistola ad Anebonum Aegyptium, quā Eusebius lib. 5. De preparatione Euangelica capite sexto scriptis suis inseruit, ex ea verò nonnulla quæ ad rem præsentem maxime pertinent, hic ascribam. Proponit autem in ea epistola Porphyrius nonnullas dubitationes circa ea quæ Magi faciunt Dæmones inuocando. Prima dubitatio est,

Dubitationes nonnem Porphyrij de ijs quæ faciunt aut dicunt Magi inuocando Dæmones.

Quomodo Magi inuocant & obsecrant dæmones tanquam superiores, & eisdem tamen tanquam inferioribus imperant, & quod volunt, facere eos cogunt. Secunda: Cur Dij Magorum iubent homines esse iustos, ipsi autem a Magis iussi, multa patrant iniqua, & flagitiosa. Tertia: Nolunt illi exaudire Magū, qui nō multis diebus ante se abstinuerit à Venere, ipsi tamen iussu Magorum illiciunt & incitant homines ad turpes & nefandas libidines. Quarta: Volunt Magum inuocaturum ipsos, ante ab esu carnium abstinere, cum ipsi tamen nidore ac sanguine cætorum animalium maxime oblectentur. Quinta: ei qui mortuum tetigit, ad operationes magicas accedere nō licet, cum tamen mortuis & cadaueribus animalium res magicæ ferè peragantur. Sexta: Magi minantur Soli & Lunæ & Dijs cælestibus, dicentes se conciluros cælū & arcana Isidis educturos, & Osiridos mēbra Typhoni tradituros, nisi Dij adueniant & respondeant ipsis: absurdū tamē uidetur, Deos quasi

infantes, eiusmodi fictis minis & terroribus commoueri. Moueri autem eos istis minis, Chermō sacer scriba testatur, & hæc esse illa inquit, quibus Dæmones maxime coguntur. Septima: preces autem & orationes, quibus vtuntur Magi inuocantes suos Deos, inanes & ridiculæ videntur, sic enim eos compellant: Tu, inquit, qui è limo emerfisti, qui sedes in loco, qui nauigio nauigas, qui singulis horis formam commutas, & in singulis Zodiaci signis commutaris. Atq; his precationibus & adiurationibus aiunt Deum se hominis visui subijcere. Octaua; Quid sibi volunt verba illa barbara, & nihil planè significantia, quibus Magi vtuntur ad deos suos aduocandos? nam si ad verborum significationem Dij respiciunt, quacumq; voce eadem res significetur, mouebuntur: non enim dij sunt Aegyptij vel Scythæ, vel illis linguis vtuntur, aut illas tantum norunt. Nona: cùm dæmones sint supra ordinem rerum sensibilium, quomodo possunt rebus sensibilibus vel allici, vel etiam cogi? quare aut Magorum malignitate hæc omnia sunt excogitata, qui nostras passiones Deo attribuere ausi sunt: aut aliter homines de Deo cogitant, quàm rei veritas habeat. Hæc in illa epistola Porphyrius. Iamblicus autem, quem Simplicius & alij ob magnam peritiam rerum diuinarum, cum incredibili studio & religione coniunctam, diuum prænominare solent, in libro, quem De Mysterijs Aegyptiorum scripsit, ad supradictas omnes Porphyrij dubitationes respondere conatur: sed eiusmodi sunt omnia eius responsa, vt mihi quidem videantur esse
magis

magis incredibilia & absurda, maioribusq. implicata difficultatibus, quàm illæ ipsæ, quæ propositæ sunt dubitationes.

SED quæret aliquis, cur Dæmones non nisi sub certis quibusdam cœli constellationib. & nō nisi certis quibusdam, vel lapidibus, vel herbis, vel figuris, aut alijs signis adhibitis, aduocentur à Magis, nec aliter opera magica fiant? *Notabilis dubitatio.* Respondeo, id quidem facere dæmones varias ob causas. Primo vt inducant homines in eum errorem, vt credant esse aliquod numen & diuinitatem in stellis, easq. pro Deo adorent & colant. Deinde, vt simulâdo per stellas multa maleficia, multaq. incommoda & detrimenta inferri hominib. infament eas, & exosas reddant hominibus. Præterea, quia dæmones, cum non nisi per causas naturales operentur, animaduertunt, secundum certas aliquas constellationes, materiam circa quam operari volunt, magis affici & præparari ad effectus illos accipiendos. Hinc fit, ut nonnunquam dæmones secundum incrementa Lunæ, maximè quosdam vexent, qui propterea vocantur Lunatici, quos Dominus sanasse dicitur in Euangelio Matthæi cap. 4. & 13 cum enim cerebrum hominis, auctore Aristotele, sit omnium corporis partium humidissimū, ideoque maxime subiiciatur potestati Lunæ, quæ magnam habet potentiâ & vim commouendi humores, in cerebro autem perficiantur actiones interiorū sensuum, hinc fit, ut dæmones secundum incrementa Lunæ, maxime perturbent phantasiam hominis, quia uident tūc cerebrum eius ad id esse magis præparatū.

Porro dæmones, sicut dixit beatus Augustinus
 21. De ciuitate Dei, cap. 6. alliciuntur herbis, la-
 pidibus, animalibus, carminib. alijsq; cæremonijs,
 non tãquam animalia cibis, sed vt spiritus
 signis, ea ratione, ut hæc illis exhibentur in si-
 gnum diuini honoris, cuius illi sunt cupidissi-
 mi. De hoc vide S. Thomam prima parte, quæst.
 115. art. 5

CAPVT VI.

*QVÆ OPERA ADMIRAN-
 da possint facere Dæmones vel per se-
 ipsos, vel per Magos.*

DVO sunt hic ponenda ex sacris literis satis
 manifesta, vnũ est; Dæmones per se ex
 vno loco in alium moueri, & quidem maxima
 celeritate. Legimus enim in libro Iob, Satan
 Deo interroganti vnde veniret, respondisse:
Circuiui terram & perambulauit eam, & Do-
 1ob. 1. &
 2. minus in Euāgelio ait quendã spiritũ nequã e-
 Mat. 12.
 1. Pet. 5. gressum ab homine quem tenebat, perambu-
 lasse per loca arida & inaquosa, & iterũ assum-
 ptis alijs septem spiritibus nequioribus se, ad
 eundẽ illum hominem reuertisse: & Petrus ad-
 monet fideles vt sobrij sint & vigilent, quoniã
 aduersarius eorum diabolus, tanquam leo ru-
 giens circuit, quærens quem deuoret. Alterum
 quod hoc loco ponimus est, dæmonem non so-
 lum posse mouere seipsum, sed etiam alia cor-
 pora, ex vno loco in alium transferendo. Id
 quoque ex sacris literis certum est: Dæmones
 enim per peccatum non perdiderunt dona na-
 turalia:

turalia: sicut igitur Angeli naturali vi mouent
 orbcs cælestes, sic Dæmones possunt mouere
 alia corpora: & sicut Angelus ille Prophetā Ha *Dan. 14.*
 bacuch capillo capitis apprehensum, ex Iudæa.
 Babylonem vsq; transportauit, indeq; reporta-
 uit in Iudæam, ita posset dæmon idem facere;
 quinimò id eum fecisse certum est: legimus e-
 nim diabolum, Dominum nostrum tulisse in *Matt. 4.*
 pinnaculum templi, & in montē excelsū. Nec
 hoc loco disputandum est, an talis virtus moti-
 ua dæmonis, sit distincta ab intellectu & volun-
 tate eius: nam distinctam esse equidē arbitror,
 licet pleriq; negent. Verū eius quæstionis tra-
 ctatio aliena est huic loco. Nec definitio nunc
 quāta sit virtus motiua dæmonis, uel quot cor-
 pora aut quanta mouere queat, & nō amplius,
 id enim incognitum mortalibus puto: existimo
 tamen in dæmonibus superioribus maiorem ef-
 se hanc vim motiuam, inferioribus verò mino-
 rem: sicut enim eorum naturæ sunt vel perfe-
 ctiores uel imperfectiores, ita quoq. eorum po-
 tentiæ sunt vel fortiores uel imbecilliores. Nam
 quia Angelus est terminatæ speciei & definitæ
 naturæ & perfectionis, ideo nec potest esse ubi
 que locorum, neq; potest quantacunque velo-
 citate quantumlibet corpus mouere. Præterea
 sciendum est, duplicem esse dæmonum actio- *Duplex æ*
 nem, quæ à Philosophis uocatur transiens, alte- *ctio dæmo*
 ram immediatam quæ immediatè proficiscitur *num traa*
 à dæmone, & hæc est motus localis quo mouet *sens.*
 corpora, nam sicut intelligentiæ non per aliqua
 media instrumenta, sed immediatè mouent or-
 bes cœlestes, sic dæmones immediatè possunt

mouere corpora secundum locum. Altera eorum operatio transiens, est mediata, nempe quæ motionem localem ab ipsis factâ consequitur: demones enim afferendo ex varijs locis & inuicem applicando causas naturales & agentia inuicem & patientia componendo, varios produciunt effectus, qui effectus immediatè quidè existunt ex causis naturalibus, mediate verò à dæmonibus qui illas causas præsentēs fecerūt, & materijs quæ ab illis aptæ sunt pati accommodarunt. His positis, quæ nam opera mira dæmones possint facere, demonstramus.

*Opera q̃
possūt Dē
mones fa
cere.*

Iob. I.

PRINCIPIO, per motum localem multa possunt dæmones facere, quæ fidem excedere videantur, quorum nonnulla hic subiiciam exempla. Primo possunt ignem ex superiore aeris parte demittere, quo multa consumant & perdāt: possunt et immittere vehementes & turbulentos ventos, qui magna diruant ædificia, sicut fecisse legitur dæmon aduersus Iob: *Cecidit (inquit scriptura) ignis de cælo & cecidit oves puerosq; cōsumpsit: et repētē uētus irruit a regione deserti, & cōcussit quatuor angulos domus, q̃ corruēs oppressit liberos, et mortui sūt.* Pōt dæmō grauissimas tēpestates & pcellas in mari excitare, vel aquas maris ab imo cōmouēdo, uel per concitatissimos ventos. Potest terrā magnis motibus concutere, uel immittēdo vehementem aliquem spiritum in cavernas terrę, vel in illis inclusum vehementissime agitando. Sic fortasse fieri potuit, quod narrat Philostratus de duob. dolijs, quæ vidit Apollonius apud Indos,

Indos, quæ aperta, imbres & ventos emittebāt; clausa uerò eadem cohibebant atq. compescebant. Secundo potest transferre ex uno loco in alium quantumuis remotum, vel homines, vel animalia, vel quæuis alia corpora. Sic Diabolus *Matt. 4.* Christum tulit in pinnacula templi, & in montem excelsum, & historia Ecclesiastica narrat, Simonem Magum à Dæmonibus per aëra euectum esse in cœlum. In historijs etiam Gentiliū traditum est, nonnunquā visos esse serpentes, dracones, & homines per aëra uolantes, quin etiam Albertus tradit nonnunquam boues seu vitulos pluisse: quod hac ratione factum esse existimandum est. Tertio potest dæmon subito res præsentès è conspectu hominum subtrahere, atque ita reddere inuisibiles, sicut Apollonius cum esset in conspectu Domitiani Imperatoris, repente ex oculis omniū excessit, & nisi volumus fabulam fuisse id, quod de Gyge memorāt Plato & Cicero, hac etiam ratione dicemus, Gygem cum volebat, potuisse latere oculos præsentium & spectantium, idq. fecisse, nō vi & potestate eius annuli quē gestabat, ut illi tradunt, sed potius Dæmonum artificio. Quarto potest facere, ut statuae vel aliæ res inanimatæ *Statua p. se incedētes.* ambulent & incedant more hominum, Dæmone illas mouente, & motum moderante: sic factum est quod ex Philostrato supra commemorauimus, de tripodibus lapideis, & pincernis æreis, qui apud Iarchā præsentē Apollonio, in conuiuio per se mouebantur, & more famulorum ministrantium mensis, & pocula & fercula conuiuii suo loco & tēpore præbebāt. Quinto:

*Statua lo-
quentes
more hu-
mano.*

possunt facere, vt statuæ, arbores, animalia lo-
quantur more humano, qua ratione fieri po-
tuit, quod narrat Valerius Maximus lib. 1. cap.
vlt. de simulachro Iunonis Monetæ, quod Ro-
mani Veijs Romam transferre religionis ergo
cupiebant. Cùm enim quidam militum per io-
cum interrogaret illud simulachrũ an Romam
migrare vellet; velle se respondit: qua voce au-
dita, iustas in admirationem & religionem ver-
sus est. Simulachrum etiam Fortunæ muliebris,
à matronis Romanis cum æde sua consecratũ,
bis locutum esse, idem Valerius auctor est, his
verbis: Ritè me matronæ vidistis, ritè me con-
secrastis. Et Caio Volumnio & Seruio Sulpitio
Coss. dicitur, bos humano sermone locutus;
bello etiam Punico secundo, fertur Cneo Do-
mitio, bouem dixisse: Caue tibi Roma. Huc
quoque pertinet quod narrat Philostratus, cum
Apollonius esset cum Gymnosophistis Aethio-
pum, quorum princeps erat Trespecion, eius
tacito iussu, arborem vlmum humana voce A-
pollonium salutauisse. Nec putandum est vel
leones, vel arbores, vel alias res inanimas mo-
do hominũ loqui posse, sed Dæmonẽ esse qui
sermone illos articulatos & humanis similes in
aère formet, iuxta, uel intra illa corpora: Sic An-
gelus qui occurrit Balaam ei mortem intentãs,
fecit vt eius asina loqueretur: nam etiam vide-
mus esse quosdã qui per organa vel alia instru-
mẽta musica, tanto artificio modificare ac tem-
perare possint statim quo illa pulsantur & reso-
nant, vt voces & cantus hominũ emulari & red-
dere videantur. Sexto: possunt facere vt animalia
mirabili

mirabili quadam ratione se ipsa moueant, & quadam agant, quæ sine intelligentia & ratione, nec ea quidem vulgari, sed admodum solerti & prudenti minimè fieri posse videantur: tale est quod narrat Valerius lib. 1. cap. 8. quod est de Miraculis, de serpente illo AEsculapij, quæ Romani quasi volentem & intelligentem, & quædam rationis ac religionis, nec non diuinitatis cuiusdam signa dātem, Epidauro Romam aduexerunt. huius etiam generis est quod narrat Philostratus lib. 5. c. 15. de Leone quodam man
fuetissimo, qui loro, veluti canis, in AEgypto
per vrbes ducebatur, contrectantib se nō modo
non nocens, sed etiam blandiens; qui ad genua
Apollonij modo supplicantium hominum humiliter se abiecit: quem aspiciens Apollonius, ad eos qui aderant, Hic, inquit, leo me rogat vt vos doceam hominis animam illum habere: fuit enim hic quondā Amasis AEgypti rex, quæ simul atque dixit Apollonius, leo miserabiliter fremens, lachrymabilem rugitum edidit, tum dentibus infrensens, cum plorare videretur, vbertim lachrymas fundebat. Hunc, inquit Apollonius Leonem, censeo Leontopolim mittendum, & in templo collocandum: regem enim in regiam belluam conuersum, tanquam egenum mendicare indignum iudico. Hæc ille, quæ omnia arte magica Apollonij & opera Dæmonum facta sunt, quò facilius error Pythagoricus de transmigratione animarum humanarum in varia bestiarum genera, hominibus persuaderetur. Septimo: quod in historijs Romanorum legitur, & à nobis supra est commemoratum,

*Fabula
Leonis,
Apollonij.*

ratum, Claudiam mulierem Vestalem, quò suā
 pudicitiam probaret, nauim ita hærentem in
 Tiberi, ut multi eam homines loco mouere nō
 possent, Zona sua quo volebat, nullo labore tra-
 xisse: Et Tucciam item Vestalem, aquam Tiberi
 haustam, ad Capitolium vsque cribro tulisse;
 hæc inquam, facta sunt opera Dæmonis, qui &
 nauim occultè promouebat, & aquam ne per
 cribrum dilaberetur, suspensam tenebat. Octa-
 uo: pōt facere, ut subitò globus aliquis igneus
 uel flamma appareat, uel circum aliquem ful-
 gear, sicut Plinius lib. 2. cap. 107. Seruio Tullio
 dormienti, ex capite flammam emicuisse, & L.
 Martio in Hispania interemptis Scipionibus cō-
 cionanti, & milite ad ultionem exhortanti, ar-
 sisse simili modo. Nono: potest aquas fluminū
 dirimere & eas retro pellere, ita vt flumina re-
 tro fluere uideantur: quod Plinius suo tempore
 accidisse scribit, lib. 2. cap. 203. his verbis: Am-
 nes retro fluere, & nostra vidit ætas Neronis
 principis annis supremis, sicut in rebus eius re-
 tulimus. Decimo: potest Dæmon varia corpo-
 ra variè formata asumere, eaque mouere, ita vt
 homo vel Angelus, vel leo, aut aliud quoduis
 animal videatur, idq; facit vel ad exterrendos,
 vel ad decipiendos homines. Legimus enim B.
 Antonio dæmones in uarijs animalium formis,
 & quidem horribilibus ac terrificis, ad eū per-
 terrefaciendum & à sancto proposito remouē-
 dum apparuisse. Sic accipiendum est quod scri-
 bit Valerius Maximus lib. 1. cap. 8. Romanis a-
 pud lacum Reginum pugnantibus cum acie
 Tusculanorum, Castorem & Pollucem Roma-
 narum

narum partium propugnatores, visos hostiles copias penitus fudisse: & Publ. Vatinio noctu urbem petēti, obuios esse factos duos iuuenes, excellenti forma, albis equis insidentes, nuntiātes illo ipso die Persen regem à Paulo fuisse captum. quod ita euenisse postea compertum est. Undecimo: potest Dæmon representare varias figuras cuiuslibet rei, vel auri, vel gemmarum, vel dapum, vel hominum. Nam sicut fictores sculptoresue ex materijs sibi subiectis, varias formas & figuras rerum effingunt, & interdum tales, vt veræ ac naturales videantur, sicut traditur de illis vuis à Zeuxide pictis, adeo perfecte naturales vuas reddentibus, vt eas ab auibus appetitas esse dicatur. Sic Dæmon ex ære condensato vel alia quauis materia, cuiuslibet rei figuram effingere potest: cuius rei supra ex Philostrato exemplum posuimus, lamix cuiusdam, quæ Menippo quem decipere uolebat, maximas opes, pretiosa ornamenta, magnam copiam vini & epularum ostentabat, quæ Apollo nius ostendit esse tantum inania simulachra, & imagines earum rerum quæ videbantur. Duodecimo: possunt concitare & conturbare humores, vel spiritus qui sunt in corpore humano, disungere etiam atque distrahere partium compages & connexiones, qua re grauissimos morbos & acerbissimos cruciatus efficiunt; sicut in ijs qui à Dæmonibus torquentur, cerne-re licet. Decimotertio: possunt etiam spiritus animales, qui interiorū sensuum functionibus peragendis inserviunt, ita mouere & conformare, vt res quasdam uel præteritas, uel præsentes,

vel

Plinius li
bro 35. ca

10.

vel futuras repræsentent: possunt etiam eosdē spiritus, quibus insunt species rerum sensibilibus, extrinsecus per sensus exteriores impressæ, usq; ad ipsos sensus exteriores deuoluere, ita ut etiam qui vigilant, uideantur sibi aliquid videre, & audire facere quod reuera non est: hoc enim videmus accidere phreneticis: quod igitur homini vi alicuius morbi contingit, dubitandum non est etiam id dæmonum artificio in homine effici posse. Decimoquarto: possunt dormientium phantasmata mouere & conformare ad repræsentandum aliqua futura quæ dæmones cognoscunt esse futura, ut ita decipiant homines fidem habentes somniis, & ex ipsis actiones humanas uel suas, uel aliorū cognoscere & dirigere velint: atq; hinc quidem ortū duxit diuination per somnia, cuius diuinationis exempla sunt quamplurima apud Valerium Maximum lib. 1. & apud Ciceronem in libris de Diuinatione. Simili Dæmonum artificio, fidem & veritatem inuenit apud Gentiles Augurū & Aruspicum disciplina, per volatū uel garritum auium diuinans, uel per inspectionem extorum animalium cæsorū, uel per electionē sortiū: eiusmodi enim rebus Dæmon se ingerit & immiscet, quō mentes hominum superstitionibus imbuat, & uarijs errorib. implicet. Nam quod in Romanis historijs traditur, in Victimæ opimæ quam Iulius Cæsar immolauerat, extis non esse inuentum cor, & in alijs uel iecur, uel principem aliam partem corporis nō esse repertā, nō alia ratione quā Dæmonis occulta vi, partes illas ablatas esse credendum est. Decimo-

quinto:

quinto: possunt Dæmones sensus exteriores immutare & seducere dupliciter, Primo extrinsecus, obijciendo sensibus uaria sensibilia non vera, hoc est, non talia qualia videtur, sed solas eorum imagines & simulachra; vel intrinsecus commouendo spiritus & humores, quorū comotione etiam sensus exteriores variè afficiuntur & turbantur, vt non rectè iudicent de suis obiectis; id quod cernimus sensibus exterioribus phreneticorum accidere. Decimosextò: possunt varias passiones uel amoris uel odij, uel timoris vehementer excitare in homine, idq; facere dupliciter, vel obijciendo species rerū, quæ ad tales passiones excitandas plurimū valent; vel interius mouendo phantasmata ad similes res representandas, vel agitando & accedendo humores qui sunt harum passionū materia, nimirum vel sanguinem, uel atrā aut flauiam bilem. Atque hæc sunt & alia horum similia quæ Dæmones per motum localem facere possunt, & interdum quidem faciunt: neque enim quęcumque possunt facere, licet eis facere, sed quantum eis per diuinā prouidentiam permissum est. habent enim potentiam à Deo restrictam & quasi ligatam, quam eis interdū laxare solet Deus, uel ad exercendos bonos, ut aduersus Iob; uel ad puniēdos malos ut aduersus Achab & Prophetas eius. Sicut enim Dæmones, permissu Dei, ingressi in porcos, præcipitarunt eos in mare: sic homines in omnia malorum tam culpæ quàm poenæ genera deturbarent, si eis Deus quantam uellent potentia ac malitiæ suę exercendæ potestatem faccret.

PER

Iob. 1. 6

2.

3. Reg. 22

sup. 18.

Per alteram porrò actionem Dæmonum, quæ non est motus localis eorum, sed eum consequitur, hoc est, per actiones causarum naturalium, quas Dæmones inuicem applicarunt & temperarunt, mira quoque Dæmones possunt efficere. Sunt enim singulares quædam virtutes occultæ & ignotæ hominibus, sunt, inquam, in certis quibusdam aquis, terris, succis, gemmis, lapidibus, herbis, lignis, animalibus, & in ipso hominis corpore mirabilium ac penè incredibilem operum effectrices: quarum rerum exempla, supra tractando tertiam quæstionem, nonnulla posuimus, sed plurima reperiuntur apud Solinum, Plinium, & Albertum, in lib. de Mineralibus, & Animalibus. Hæ virtutes quibus in rebus naturalibus insunt, ubi locorum lateant, quibus cum rebus componi & misceri ac temperari debeant, quo tempore tempestiuè & opportunè ad operandum adhiberi oporteat, notissimum est Dæmonibus; quas etiam vndecumque & quocumque voluerint, maxima facilitate, celeritateq; clam homines transferre possunt. Huiusmodi autem effectus, quatuor ob causas sunt hominibus admodum mirabiles. Primo, quia sunt noui, & inusitati. Secundo, quia modus quo Dæmon illos molitur, est occultus & inuisibilis. Tertio quia sicut homines variè temperando & accommodando res naturales possunt aliquos effectus producere, quos nonnunquam per se causæ naturales produxissent, sicut patet in arborum insitionibus, in distillationibus aquarum, ciborum & condimentorum confectionibus, & in medicamen-

torum

torum compositionibus: sic Dæmones, effectus aliquos singulares, per causas naturales possunt producere, quos ipsæ per se nunquam produxissent. Quarto quia ut inquit S. Thomas 3. lib. aduersus Gentes, c. 103. & prima parte, quæst. 110 art. 2. ad 3. cum Angeli vel Dæmones adhibent causas naturales ad effectus aliquos procreandos, vtuntur eis tanquam instrumentis, nõ secus quàm medicus vtitur herbis ad sanandũ, ex instrumento autem procedit effectus, non tantum virtuti eius respondens, sed etiam ea superior, & præstantior, nempe respondens uirtuti principalis agentis à quo mouetur ad operandum illud instrumentum, quemadmodum securis non solum secat, sed etiam facit lectum vel mensam, uel hominis statuam, ut est instrumentum hominis ex arte operantis: & calor naturalis qui est in semine, uel in animali, non solum calefacit, rarefacit, aut segregat, sed etiam generat sanguinem carnes, & ossa, in uirtute animæ uel animalis cuius est instrumentum. Sic etiam causæ naturales interdum producant effectus præstantiores suis, ipsarum uirtutibus, ex eo quod sunt instrumenta Angelorum vel Dæmonũ à quibus mouentur, & reguntur. Posset igitur Dæmō plurimos morbos arte medicinę quā homines callent incurabiles, magna celeritate ac facilitate sanare: tum quia nouit optimè omnes morborum etiam abstrusorum causas, & affectiones, tum quia scit omnia genera remediorum, & idoneam eorum applicationem; sed nõ omnes tamen posset sanare, quia sunt morbi aliqui simpliciter incurabiles.

CAPVT VII.

*QVAS RES DOEMON NEC
per Magos, nec per seipsum possit
efficere.*

PER motum localē, qui est immediata eius operatio transiens, multa non potest facere Dæmon. Primo enim, vt inquit S. Thomas in Quæstionibus de Potentia, quæst. 16. art. 8. & 3. libro aduersum Gentes, cap. 108. non potest destruere aut subuertere ipsum vniuersum, sunt enim Dæmones partes vniuersi, pars autem nō habet vim atque potestatem in totum cuius est pars, & vt inquit Paulus ad Hebr. 2. *Non subiecit Deus Angelis orbem terrę.* Nec possunt peruertere ordinē vniuersi, cum auctore Aristotele, bonū vniuersi sit ordo: Non possunt item perturbare, vel suis locis commouere principes partes mundi, ex quibus eius integritas coalescit. Non possunt sistere cœlum vel motum eius in contrarias partes agere. Non possunt elemētum aliquod ex vno loco in alium transferre. Non possunt facere vt detur vacuum, cum vacuum tollat cōiunctionem, connexionem atq; subordinationem omnium partium vniuersi, in quo eius conseruatio atque gubernatio consistit. Dixi non posse Dæmonem eiusmodi res facere, vel simpliciter, vel secundum potentiam ordinariam eis à Deo concessam, & quam eis concedi poscit æquissima diuinæ prouidentię ratio. Et cum Dæmones habeant vim motiuam definitam, alij quidem maiorem, alij ve-

rò minorem, non possunt quantumlibet corpus, quantalibet velocitate mouere, nedum in instanti. Non possunt facere vt duo corpora sint simul in eodem loco, vel vnum corpus in duobus locis simul, vel vt vnum penetret dimensiones alterius. Nec potest Dæmon distās à corpore, illud mouere secundum locum, quia mouēs & mobile debent esse simul: alioqui posset mouere per vacuum, & per quantamcunq; distantiam. Non potest transferre corpus de extremo ad extremum, & non per medium.

M V L T A quoq; sunt, quæ per alterā actionem Dæmonum quam mediatam diximus, cuiusmodi est naturalis alteratio, corruptio, generatio rerum naturalium, non possunt à Dæmonibus effici. Non enim potest Dæmon immediate producere vllam formam substantialem vel accidentale; cum enim sit incorporeus, non potest immediate alterare materiā corpoream, vnde formæ naturales educuntur. Secundo, nō potest aliquid creare ex nihilo, tum quia id requirit infinitam virtutem actiuam, qualē Deus solus habet, tum quia nec motus localis Dæmonis, nec operatio quam per causas naturales exercet, in nihilo recipi, aut circa nihil versari possunt. Tertio, non potest ex quolibet facere quodlibet. Quarto, nec per quamlibet causam vel instrumentum potest quemlibet effectum producere: sicut medicus non potest per quamlibet medicinam, quemlibet morbum sanare, nec artifex per quæuis instrumenta, quodcunq; voluerit opus perficere: atque hoc est quod Augustinus compluribus locis docet, nec Dæmo-

nes nec Angelos esse creatores rerū, nec posse transmutare formas rerum, nec materiam corporalem ad nutum illis obedire. Quinto, non possunt Dæmones producere formas substantiales non præuijs alterationibus & præmissis dispositionibus. Sexto, nec possent eas in instanti, aut quantumlibet paruo tempore producere. Septimo, non possunt quamlibet rem naturalem immediatè in quamlibet aliam transmutare, etiam adhibendo causas naturales. Octauo, non possunt animalia perfecta sine semine producere; quare si visi sunt vnquam vel ex lapidibus & lignis producere equos vel leones, vel ex nubibus pluere vitulos, non est putandū sic eos fuisse generatos, sed vel aliunde inuisibiliter per Dæmones illuc translatos, vel non fuisse vera animalia, sed eorum tantum imagines & simulachra cernentium oculos fallentia. Nono, nec potest animal producere subitò secundum perfectam magnitudinem & virtutē eius; deniq; quod superat vires agentium naturalium, quodq; naturali eorum dispositioni & ordinī repugnat, & ad quod virtus agentium naturalium nullo modo se extendit, id fieri à Dæmone nequaquam potest. Decimo, non potest peruertere atque immutare ordinem qui est inter formas & dispositiones rerum naturalium, ut possit posteriores inducere non inductis prioribus, aut extremas non inductis medijs. Vndecimo, non potest mortuos, ad vitam reuocare propter causam supradictam. Duodecimo, non potest impedire ne agens naturale habens omnia requisita ad agendum, non agat. Disputari posset

posset hoc loco an vlla res naturalis habere pos-
sit vim in Dæmones; expellendo eos, vel etiam
actiones impediendo, propter id quod dicitur
in libro Tobix, cap. 6. & 8. de iecore cuiusdam
piscis cuius fumo fugabantur Dæmones in per-
petuum, & de melodia Dauidis qua expelleba-
tur spiritus malus à Saul. Vide 1. Reg. cap. 16.
& 4. Regum, cap. 3. Lyranum & Burgensem su-
per primum Regum, cap. 16. & ibidem Tostatū
quæst. 40. Vide Iosephum octauo Antiquitatum
de radice Salomonis, cuius odoratu Dæmon
exibat per nares eius hominis quem tenebat.
Verum hac de re nostram lector disputationem
& sententiam reperiet in alio libro qui hunc
proxime sequitur, & in quo eam quæstionem
tractamus explanantes illa verba quæ sunt in
Cantico trium puerorum: *Benedicite cete &
omnia quæ mouentur in aquis, Domino.*

CAPVT VIII.

*AN OPERA MAGORVM SINŢ
vera miracula, & quomodo à veris mi-
raculis differant ac dignoscantur.*

AD MIRANDA Magorum opera non
solū Ethnici, sed et nostri Theologi inter-
dum vocant miracula, vel quia verorum mira-
culorum sunt simillima, vel estimatione homi-
num, quod ea ipsi nec facere, nec quemadmo-
dum facta sint intelligere possunt, non naturæ,
sed diuinitatis opera existimantium. Et sanè
nonnulla faciunt Magi in speciem non dissimi-

Exod. 7. lia eorum quæ faciunt sancti: namq; Magi Pharaonis similiter vt Moses, & virgas suas vertunt in serpentes, & aquam mutarunt in sanguinem; & magnam ranarum vim subito produxerunt. Sanant interdum Magi agrotos, & Demones ex corporibus hominum eijciunt. Nec tamen hæc operum similitudo facit vt Magorū opera vera sint miracula; alioquin miraculum non esset idoneum declarandæ probandæq; Deitatis atque veritatis argumentum; quare ratio fidei & doctrinæ Christianæ, quæ miraculis tantquam veris diuinæ potentiaæ sigillis obsignatur, & quasi quibusdam fulcris quodammodo sustinetur, omninò periret. Docere igitur conuenit hoc loco, cur eiusmodi. Magorum facta non sint miracula, & quibus rebus differant, quibusuè notis atque insignibus à veris miraculis internoscantur.

*Quid sit
miraculum.*

TRIPLICITER igitur potest intelligi aliquid esse miraculum. Primo simpliciter & absolute, nèpe cōparatione cuiuslibet naturæ; hac significatione, nullum plane est miraculum: nihil enim est, quod diuinæ potētiaæ & sapiētiaæ cōparatione, miraculum dici queat. Nam miraculū alicui dicitur, q̄ eius & facultatē & intelligētiā excedit: Deus autē nihil est qđ admirari possit, quippe cum & causas omniū quæ sunt, optime nouerit, & ipse princeps causa sit efficiendi

Prou. 8. oīa. Nā qui per ludū & iocum (vt est in Prouerbijs Salomonis) ex nihilo mundum condidit, quid ei magnum, ne dum miraculū esse queat? cum vt est apud Esaiam cap. 40. & in libro Sapientiaæ, cap. 9. Omnes gentes totusq; terrarum orbis

orbis apud ipsum sic tanquam gutta roris ante-
 lucani, & quasi puluis, & tanquam inane, & ni-
 hil. Deinde potest appellari miraculum respec-
 tu hominum, qui quæ sunt ipsis inusitata, &
 quorum causas ignorant, quoniam ea maximè
 admirantur, dicunt miracula: qua ratione non
 modo Dæmonum, & Magorum, sed etiam sa-
 pientum hominum inuenta quædam noua, & ar-
 tificiosa opera, qualia fuerunt illa Architæ, &
 Archimedis, quæ supra commemorauimus, mi-
 racula nominantur. Sed uerè ac propriè miracu-
 lum dicitur, opus quod ideo uerè ac meritò mi-
 randum est, quia omnis naturæ creatæ uim at-
 que potestatem excedit. Hoc autem multis mo-
 dis potest euenire: namque excessus naturæ *Tres gra-
 dus uero*
 creatæ, vel est in eo quod fit, quale nullo modo *rum mi-
 raculo*
 natura potest facere; cuiusmodi est, ut duo cor-
 pora simul sint in eodem loco, & sic permeent, *rum.*
 vel ut corpus humanum euadat immortale, im-
 passibile, & gloriosum: atque hæc tenent pri-
 mum locum, & gradum in miraculis. Vel ex-
 cessus est nō in eo quod fit, sed in eo vel ex quo
 vel in quo res fit: potest enim natura producere
 aurum vel arborem, sed non ex nihilo: potest
 dare vitam, sed non mortuo; potest item facul-
 tatem videndi largiri, sed non nato cæco: & hæc
 secundum locum in miraculis tenent. Vel exces-
 sus nec est in eo quod fit, nec in eo ex quo aut
 in quo fit, sed vel in modo, uel in ordine, uel in
 alia quapiam circumstantia, alijsue rebus cum
 quibus omnibus naturaliter opus illud fit: E-
 xempli causa, potest medicus sanare ægrotum,
 verum non subitò, nec absque medicina: potest

Magus vel Dæmon, vel etiam natura ex ligno
 producere serpentem, verum non immediate:
 atque hic est infimus miraculorum gradus & lo-
 cus. Sed quia hæc breuiter diximus, vereor ne
 obscure dicta sint, quare quò melius intelligen-
 tur, latius explicabuntur. Dæmonum & Mago-
 rum miracula non vera, differunt à veris mira-
 culis, quæ in scripturis & historijs Ecclesiasticis,

*Quinque
 differētia
 verorum
 miraculo-
 rum à fal-
 sis & simu-
 latis.*

à seruis Dei facta legimus, his quinque modis,
 Dignitate virtutis efficientis, Qualitate eorum
 qui faciunt, Diuersitate factorum, Modo facien-
 di, & Fine cuius gratia fiunt vera miracula, cum
 (vt supra diximus) omnis naturæ creatæ vim
 exuperent, solius Dei potestate possunt effici:
 nam quamuis per Angelos vel seruos Dei fieri
 videantur, illi tamen non agunt virtute sua, sed
 Dei cuius sunt administri & tanquam instrumē-
 ta. Magi autem opera sua faciunt, vel virtute
 quarundam rerum naturalium quibus vtuntur
 occultè, vel opera Dæmonum, qui clam Magis
 auxiliantur. Vera miracula licet interdum faci-
 ant etiam homines mali, rarò tamen, nec nisi ad
 confirmationem ueritatis, & diuinæ uirtutis de-
 clarationem: ferè autem magi homines sunt fla-
 gitiosi & malefici, quos proinde diuinis huma-
 nisque legibus consulere & adire prohibemur.
 Quæ faciunt Magi, vel sunt tantum phantastica
 & simulata, & ideo nec diuturna, vel sunt perni-
 ciosa, vel inutilia: vera autè miracula, sunt ope-
 ra solida & vera, utilissima hominibus, & non
 nisi magna aliqua necessitate & utilitate facta.
 Magi, opera sua faciunt vel per causas natura-
 les, vel ope Dæmonum, vtuntur multis præsti-
 gijs,

gijs, mendacijs, ludificationibus hominum, figuris, characteribus, verbis, vel nihil, vel absurda significantibus, alijsque superstitionis caeremonijs, miscentque sacra profanis: namque nonnulla verba sacra quæ vsurpant, adiunctis superstitionibus foedant & contaminant. Docent enim ea dici debere sub certo quodam constellationum situ, certoque loco & tempore, toties signo crucis facto, tot candelis accensis adhibitis, vel filis, aut velis, aut chartis, quas vel pueri vel virgines tantum tetigerint: adhibent etiam quædam, quæ nihil prorsus ad effectum producendum pertinent, sed ridiculam habent uanitatem, dicunt enim oportere tali hora & toties, & tali aqua lauare faciem, radere capillos, hac, vel illa veste indui. Sed quod impietatis plenissimum est, sanguinem ex humano corpore mittunt, eoque libamina quædam consecrant, nomina quorundam demonum vsurpant, quibusdam animalibus familiariter vtuntur, & cum eis colloquuntur, demonibus sacrificant, nomen & fidem Christi abiurant, prohibent homines signare se signo crucis, & alia faciunt partim superstitionosa, partim ridicula, partim penitus execranda. Nihil tale sancti faciunt edendis miraculis, sed vel interiore vel etiam exteriori supplicatione & inuocatione diuinæ virtutis, uel facto signo crucis, vel aliquibus verbis sacris recitatis, miracula operantur. Ad extremum, cur vel Demones vel magi faciant illa sua miracula, non est obscurum, nimirum uel lucri, vel gloriæ & honoris cupiditate, sibi diuinum nomen & cultum aucupantes, vel ut veritatem peruertant & falsitatem

rem hominibus persuadeāt; vel ad patranda maleficia, Veluti furta, adulteria, homicidia. Sancti autem faciunt miracula, nō sua causa, cum & divitias contemnant, & honores fugiant; sed ut Deum honorent, Ecclesiam ædificent, hominesque nō solum corpore, sed multo etiam magis animo iuvent. Qui igitur sanæ mentis est, & studiosus veritatis nam torque virtutis, non erit ei difficile vera miracula à falsis discernere: qui autem flagitiosè vivit, & Christi doctrinam odit, nec studio veritatis, sed vanæ curiositatis cupiditate miracula quærit; is iusto Dei iudicio permittitur, ut quia veritati consentire & acquiescere noluit, circumveniatur mendacijs & falsis miraculis persuasus, perversam doctrinam falsaque dogmata, pijs verisque repudiatis, amplectatur. Hoc est enim quod docuit Beatus Paulus in 2. epist. Ad Thessal. c. 2. præmonens venturum Satanam vel Antichristum in omni virtute, in signis & prodigijs mendacibus, & in omni seductione iniquitatis, non quidem omnibus, sed ijs qui charitatem veritatis nō receperunt, ut salvi fierent, his. n. mittet Deus operationem erroris ut credant mendacio, & iudicentur oēs qui non crediderunt veritati, sed cōsenferunt iniquitati.

CAP V T I X.

QUOTV PLEX SIT MAGIA.

VARIAS Magiæ species, ne hanc artem in totum vel commendemus, vel damnandā execrandamque exilitemus, & ne hoc institutū tracta-

tractationi desit, uel tantum indicare conuenit.

Ac primò, quam alij Magiæ varietatem tradiderint, ostendamus. Plinius lib. 30. cap. 2. complures Magiæ species ab Osthane principe eius artis doctore traditas esse commemorat. Namque ait, & ex aqua, & ex sphæris, & ex aëre, & stel-

Varia species Magia.

lis, & lucernis ac peluibus, securibusq; & multis alijs modis, diuina promittit: præterea umbram, inferorumq; colloquia. Hæc ibi Plinius. Sed Iamblicus in libro suo de Mysterijs Aegyptiorum, Proclus in libro de Sacrificio & Magia, & Porphyrius in libro de Sacrificijs duplicem faciunt Magiam, sicut etiam ex Porphyrij doctrina refert beatus Augustinus lib. 10. de Ciuitate Dei, cap. 9. Alterum vocant Theurgiam, nempe bonam & laudabilem, qua certis quibusdam hostijs & sacrificijs, munditia quadam animæ & corporis alijsq; sacris ceremonijs, bonos ac beneficos dæmones inuocant, quorum afflatu & auxilio, & occulta manifestant, & futura prænunciant, & mira edunt opera, quæ supradicti scriptores miris laudibus in cælum efferunt. Alteram appellant Goëtiam, & Necromantiam quæ mortuos excitat & cōsulit, & per eos responsa de rebus occultis vel futuris reddit. Dicitur Goëtia à planctu, quo circa mortuorum sepulchra eorum animæ ex inferis euocantur: Necromantia verò, quia sit diuination ex mortuis euocatis petita. Suidas autem distinguit Magiam, quam ait Persarum esse inuentum, in Goëtiam, Magiam proprie dictam, & Pharmatiam. Magia, inquit, est inuocatio Dæmonum, scilicet beneficorum ad aliquod bonum

num conficiendum; cuiusmodi Apollonij Tyane predictiones fuerunt. Goëtia fit per coactionem & inuocationem mortuorum; sic enim dicta est à planctu qui fit circa sepulchrū, Pharmacia verò fit, cum aliquid porrigitur alicui sumendum ore, quod mortem ei sit allaturum; vel vehementes aliquas perturbationes & mutationes, aut corporis aut animi in eo fit effectum, certis incantamentis præparatum, Hæc Suidas.

NOBIS autem omnes Magiæ species hac ratione & ordine distingui posse videntur. Magia, alia est Naturalis, quæ per res naturales singulari quorundam hominum artificio adhibitas mira facit: Altera est non naturalis, quæ Deum inuocatione & ope vitur ad operandum Hæc in Treurgiam & Goëtiam & Necromantiam, de quibus paulò ante diximus, rectè diuiditur. Nam si quæ sunt aliæ, ad has species commodè reuocantur. Illa, quam naturalem diximus, partim est physica, cuius nomine medicinâ et cōplectimur, quæ circa occultas rerum naturalium virtutes, rerum mirabilium effectrices, versatur; partim est Mathematica; cuius excellenti peritia, quam mira fecerint Architas & Archimedes, supra commemorauimus. Rursus Magia tam naturalis, quam non naturalis, bipartito diuiditur: altera enim hæt veros & naturales effectus altera simulatos tantum, nec tales reuera quales videntur: hæc vno vocabulo Præstigiatriæ appellamus, suis enim præstigijs adeo præstringit & eludit sensus humanos, vt faciat videre quod non sunt, & non videre quæ sunt idque vel interuen.

reruentu & adminiculo Dæmonum, vel operatione naturalium agentium, vel incredibili tractu atque agitatione manuum. Itaque qui edit panem, uidetur farinam spueri: qui vinum bibit, per frontem aut iugulum id reijcere; videntur gladij vorari, ingens vis euomi acuum minorum, & zonularum, quarum rerum circulariores miri sunt artifices. Hæc diuiditur in Opticam, & Pharmaticam: illa, manuum, digitorum aliarumq; partium corporis incredibili agilitate, & motione, defixum in res obtutum spectantium frustratur, hæc collyrijs, suffumigationibus, alligationibus, potionibusq; sensus interiores & exteriores ita perturbat, vt secus quàm reuera est, iudicent de sensibilibus exterioribus. Vtitur etiam illa prior laminibus, annulis, imaginibus, speculis vario situ varioque modo positis & transpositis.

M A G I A E porrò Naturali, quidā duas alias species adiungunt, alteram vocant Astronomicam, alteram Cabalisticam, quæ an sint meræ nugæ & quorundam hominum commenta, an reuera aliquid solidi habeant & præsent, nunc paucis diiudicandum est. Astronomicam appellāt, quæ certas quasdam imagines & figuras, annullos, figilla, statuas & alia quædam horum similia fabricātur, in quibus, eius cultores & defensores affirmant, cœlestium corporum virtutes & influxus recipi, receptosq; miros effectus præstare. Sed hæc vana sunt, nec modo a christiana veritate & pietate, sed etiam à philosophica ratione & disciplina longè remota. Virtus enim cœlestis per se vniuersalis est & indeterminata

*Contra
Magiam
Astronomicam.*

nata ad hunc vel alium quemlibet effectū producendum, determinatur autem per causas naturales particulares: Illæ autem imagines & figuræ astronomicæ, non sunt causæ naturales, nec habent vim, aut efficiendi quippiā, aut præparandi materiam ad hunc vel illum effectum recipiendum. Deinde cœlum naturaliter operatur; illæ autem imagines sunt ingenio & artificio hominū inuētæ, & pro eorum arbitrio adhibitæ; non igitur per illas, virtus cœlestis modificari aut determinari potest. Postea, lignum quocunque modo figuretur, non potest in se recipere immediatè formam equi vel leonis: nec vitrum aut aurum formam plantæ: multo igitur minus huiusmodi materiæ, propterea quod ab ipsis Astronomis variè figurentur, idoneæ habilesq; reddentur ad certas quasdam virtutes siderum recipiendas, & ad aliquos mirabiles effectus producendos. Adhæc, quæ est naturalis conuenientia illarum Astronomicarum imaginum cum cœlo? neque enim est vel secundum figuram, vel secundum naturam, vel motum vel qualitates; quomodo igitur res naturales sine ipsis figuris nō sunt idoneæ ad diuinos illos siderum influxus accipiendos, signatæ autem & adornatæ istis imaginibus, statim fiunt idoneæ? His accedit, quod insignia uisu effectūq. sidera, si Mathematicis demonstrationibus credimus, ampliora sunt quàm uniuersa terra, quomodo igitur influxus illorum ad unam imagunculam astronomicam restringitur, ut non etiam per alias res quamplurimas tali figura carentes diffundatur? Nullus igitur nouus effectus ab huiusmodi

iufmodi Magia aftronomica proficifcitur ; & fi quis fortè cernitur aliquando, is non earū imaginum aut fiderum potentia, fed occulta dæmonum opera, quò eiufmodi fraudibus mortales circumueniant, proficifcitur.

CAPVT X.

DE MAGIA CABALISTICA.

SED venio ad Cabalifticam, quam Philofophi quidam Iudeorum, & de noftris nonnulli vanitatis magis quàm veritatis ftudiofi, & res curiosas atque inauditas quàm veras & folidas difcendi audiores, affirmant scientiā effe Mofi primū à Deo in monte Syna traditam; deinde non quidem literarum monumentis, fed orete, nus à prioribus, per quandam veluti manuum traditionem & receptionem, pofteris traditam, adhuc fuiſſe conſeruata: ideoq; dictam effe cabala, quod verbū Hebraicè idem fonat quod Latinè recipio; nimirum eam doctrinam pofteriores à prioribus ore tenus auditione accipiebant, & animo memoriaq; cuſtodiebant; quæ etiam ratione ferunt veteres, difciplinam Pythagoricam multis ſæculis effe conſeruata. Complectitur autem hæc Magia Cabaliſtica vniuerſam Philoſophiā, diuinam & humanam, necnon & naturalem: omniumq; rerum doctrinam myſticè ac ſymbolicè cōtinet, nō eam, more aliarum humanarum diſciplinarum, rationibus & argumentis diſputationibusq; tractans, ſed numeris, figuris, ac Symbolis: itaq; in ea ſingulæ literæ, figuræ, nomina, elementa, apices,

*Exo. 4. 17.
seq.*

Gen. 2.

pices, lineæ, puncta, accentus, spiritus, & si quid aliud est minutius, profundissimam quandam & abditissimam ingentium rerum significatricē doctrinam habent. Hanc Magiam qui benè teneat, cum nihil non pollere aiunt, omnia scire & præscire, naturæ imperare, cunctasque res ei obedire; hac Moſen prodigia illa fecisse in Aegypto, & in deserto; hac Iosue, Eliam, Eliseū, Isaïam, Danielem, Samuelem tot tantaq; fecisse miracula. Dicunt enim, nomina quæ Deus per Adamum cunctis rebus secundum suas cuiusq; rei proprietates imposuit, fuisse Hebraica, quibus rerum omnium substantiæ, qualitates & proprietates exprimantur: quocirca his nominibus naturales res appellanti, confestim res omnes se illi subiiciunt, & eius obsequio se totas addicunt. Huius amentię expers non fuit VViclef, qui vt memorat Thomas VValdenſis in opere suo de Sacramentalibus, dixit, in statu innocentię Adam imposuisse nomina animalibus secundum naturales eorum proprietates; quibus nominibus appellata ab homine, statim ei obediissent, eiusq; omnia iussa fecissent: & huius rei reliquias remanere in exorcistis, & incantatoribus, & ad id magnam vim habere voces Hebræas. Cuius sententię doctam copiosamq; refutationem lege apud ipsum VValdenſem.

*Refellitur Cabalistica
ars.*

VERVM adeo est inerudita, insulsa, & ridicula hæc Cabalistarum opinio, ut nihil equè mirum sit quàm vlli hominum sanæ mentis aliquādo eam probari, & persuaderi potuisse, sed ita est profecto, sunt ingeniorum similiter ut hominum monstra quædam, & portenta è quibus eiusmodi

eiusmodi opinionum cōmenta & deliramenta proficiscuntur. Principiò, nonne incredibile est, Solem & Lunam, & cætera astra, elementa item & stirpes cū ratione careant, diuinam illam vim quæ latet in vocibus Hebræis sentire, eaq; sic affici & permoueri, vt homini pro eius arbitrio pareant? Sed esto, nouerint illam vim, vel omnes res naturales, vel certè animâtes aut homines; num ideo eiusmodi nominum appellatione eas continuò moueri necesse est? Si quis mihi proponeret nomen, totam meam substantiam omnesq; proprietates perfectissimè declarâs, num eo nomine appellatus ab illo, cogerer eius imperio obsequi, & quacunque ille vellet, facere? Si reconditissimâ illâ vim & efficaciam vocum hebræarum quam iactant Cabalisticę, paucissimi hominum intelligunt, nec nisi quia illa eadem ante sunt initiati, quomodo eā agnoscent & sentient bruta, cæteraq; non ratione modo sed etiam sensu carentia? Cur tribuunt tantam vim vocibus & characteribus hebrææ linguæ, quam omnium vetustissimam & primâ ferunt, cum certè constet alios esse characteres hebræos qui nunc extant, quàm qui olim fuerant ante captiuitatem Babylonicam? quod Beatus Hieronymus in Prologo galeato affirmate scribit. Certum, inquit, est, Efdram post captam Hierosolymam, & restorationem templi sub Zorobabele, alias literas reperisse, quibus nunc vtimur, cum ad illud vsque tempus idem Samaritanorum & Hebræorum characteres fuerint. Nec verum est, in lingua hebræa reperiri voces quæ omnium rerum natu-

ras, infimasq; differentias & proprietates expriment, nec in declarandis rebus vberior est aut significatior hebræa lingua quàm græca vel latina: nec vllum est nomen in vlla lingua, quod simul alicuius rei & substantiam & differentias atque proprietates tam genericas quàm specificas atque indiuiduales aperiat: nec in vocibus hebræis per se sumptis, plura maiorave latent mysteria, quàm vel in Græcis vel in Latinis. Legimus in scriptura, quomodo Moyſes & Aaron per virgam eis à Deo traditam plurima maximaq. fecerint prodigia. Legimus Iosue retinuisse curſum Solis & Lunæ, cùm dixiſſet: *Iosua 10.* *Sol cōtra Gabaon ne mouearis, & Luna cōtra vallē Aialon, Stetitq; Sol in medio Cēli, & non feſtinauit occumbere ſpatio vnus diei. Nec fuit antea & poſtea tam longa dies, obediēte Dño voci hominis et pugnāte pro Iſrael.* Narrantur et Samuelis, Eliæ, Eliſæi & Danielis miracula, nec tamen vſquā de iſtis Cabaliſticiſ myſterijs ulla mentio aut verbum fit, ſi tanta eſt Cabaliſtica Magiæ uis & poteſtas, vt cœlis imperet, ſolem ſiſtere aut retrocedere cogat, maria diuidat, flumina ſiccet, totamq. naturā cōmutet, & ſibi ad nutum obedire faciat, cur iſti ſapientes Cabaliſtæ, eius artis peritiſſimi, talia nūquam patrarunt, uel etiam nūc patrare poſſunt? Certè Philoſophi Iudæorum qui ſibi hanc ſapientiam arrogant, ſi quid ea pollerent, ad excutiendum iugum duriffimæ ſeruitutis, quo miſeri iam mille & quingentis annis oppreſſi tenentur, uti debuiffent.

DE NECROMANTIA.

DE Necromantia nōnihil dicamus, ut qualis quantaue sit eius uis, uel potius fraus, & fallacia, ostendamus. Necromantici profitentur se animas mortuorum euocare posse, ex ijsque cognoscere multa quæ sunt occultissima, uel etiam futura; animas autem mortuorum, præsertim eorum qui flagitiosè uixerunt, aut uiolenta morte de uita deturbati sunt, Magis eas inuocantibus adesse, respondere, multaque manifestare docet Porphyrius lib. 2. De Abstinentia animalium, nam cum de prauis, & fallacibus demonibus dixisset, mox subdit hæc de animabus: Tales, inquit, sunt & animæ mortuorum, quæ uicijs oppletæ è corpore migrarunt; conflantur enim etiam tunc, iræ, & concupiscentiæ, perturbationibus, & in naturam conuersæ demonum, similes illorum redduntur, noxiæ ac turbulentæ, in varias se uertunt formas, ac modo conspicuas se oculis præbent, modo recondunt, & ita eludunt aciem tum intuentium, tum etiam cogitantium. Et quodam alio loco: Præua, inquit, anima quæ corpus suum uiolenter reliquit, expoliata ad hoc ipsum deinde se ad-mouet, ibique moras trahit. Vnde nonnunquā uisæ sunt animæ lamentari: nam animæ carentium sepultura, circa corpora immorantur, quibus malefici sæpius abutuntur ad ministerium suum explendum, compellentes, animas à positione corporis vel partis cuiusdam assumptione. Quocirca qui uaticinantium animalium in-

*Porphy-
rius de re
uocatione
animarū
ex infe-
ris.*

sinuari sibi animas optant, præcipua illorum membra deglutiētes, veluti ceruorum vel talparum, vel aliorum accipiunt, & ita præsentem sibi faciunt animam, Dei ritu vaticinantem: talis enim anima vnà cum sui corporis integra sumptione, in corpus humanum se penitus ingerit. Hæc Porhyrius.

An fuerit verus Samuel qui per Pythonis sam representatus est Sauli. M A G N A M sanè huic arti fidem facere videtur, quod legitur primi libri Regum, capite vigesimo octauo Pythonissam rogatu regis Saulis, excitasse à mortuis animam Samuelis, fecisseq; vt Sauli de euentu impendentis belli cōsulerenti, quæ mox ei euentura erant prænūciaret. Et quidem Beatus Augustinus libro 2. ad quæstiones Simpliciani, respondens ad tertiam quæstionem, & in libro de octo Dulcitij quæstionibus, quæstione sexta disputat in vtramque partem, an fuerit ille verus Samuel, an potius Dæmon specie, & figura Samuelis, propensior tamen est ad credendum, illum non fuisse verum Samuelem, sed eius imaginem, & simulachrum, arte diabolica formatum, & aspectui Saulis præsentatum: appellari autem in scriptura Samuelem, quòd illum habitu, specie, & auctoritate repræsenteret. Non enim raro tum in cōmuni hominum loquendi consuetudine, tum in sacris literis rerū imagines, & simulachra, nominibus ipsarum rerum appellantur. Hoc idem citra dubitationem ullam traditur in libro secundode Mirabilibus sacræ scripturæ, capite secundo, & in libro Quæstionum veteris, & noui Testamenti quæst. 27. qui libri, nomine Beati Augustini in eius Operibus numerantur. Ter-

tullianus

tullianus in libro De Anima, non solū hoc probat, sed contrariam sententiam omninò improbat: nam loquens de Samuele, hæc scribit: Ecce hodie eiusdem Simonis hæreticos tanta præsumptio artis magicæ extollit, ut etiam Prophetarum animas ab inferis mouere se spondeant: & credo, quia mendacio possunt; nec enim Pythonico tunc spiritui minus licuit animam Samuelis effingere post Deum mortuos consulente Saule. Absit autem vt animam cuiusquam sancti, nedum Prophetæ, à dæmonio credamus extractam, certi quod ipse Satanæ transfiguretur 2. *Cor.* in angelum lucis, nedum in hominem lucis, et 11. Deum se asseueraturus, signa q̃; portentosiora editurus, ad euertendos, si fieri possit, electos. Hæc Tertullianus. Quibus verbis alijs q̃; proximè consequentibus, apertè docet, non fuisse illum verum Samuelem. S. Thomas prima parte quæst. 89. art. 8. & secunda secundæ quæst. 95. art. 5. ad 2. & quæst. 174. art. 5. ad 4. dubitanter de hoc loquitur, secutus nimirum Augustinum: idem q̃; fit in Decretis 25. Quæstione 5. cap. Nec mirum. Sed vt Lyrano & Tostato, & ni fallor etiam, B. Augustino, lib. De cura pro mortuis agenda, cap. 15. Sic etiam mihi probabilius est, immo certum est, fuisse veram animā Samuelis quæ Sauli apparuit, exercente quidē Pythonissæ artem suam magicam, sed non eius artis vi & potentia, sed Dei imperio ab inferis excitatam, quæ dispensatione diuina Pythonissam & Saulem latente, ostendit se aspectibus iniqui regis, diuina eum sententia percussuram; vt impius rex, quæ post mortē supplicia suæ im-

pietati debita passurus erat, iam tum acerbissimo doloris sensu prægustaret. Nec ad hoc probandum aut persuadendum opus est testimonijs vel argumentis, cum id in sacra Scriptura perspicue traditum sit. Nam in libro Ecclesiastici. cap. 46. sic est: *Et post hoc dormiuit Samuel, & notum fecit regi, & ostendit illi finem uitæ suæ, & exaltauit vocem illius de terra in prophetia, delere impietatem gentis.* Et sanè B. Augustinus libro illo De cura pro mortuis agenda, & S. Thomas secunda secunda, non obscure significant, si liber Ecclesiastici tãquã sacer & canonicus recipiatur, necessariò sentiendũ esse, verũ Samuelẽ apparuisse Sauli. Loquuntur autem illi conditionaliter de auctoritate libri Ecclesiastici, non quod non eum pro sacro & canonico haberent; sed quia nec Hebræi eum recipiunt & reponũt inter libros Canonicos, & quidã Catholicorũ olim, de eius auctoritate dubitarunt. Quare nobis vt de eius libri fide & auctoritate, sic nec de vero Samuele Sauli post mortem prophetante, dubitare licet. Nec obstat huic sententiæ. quod ille Samuel dixisse legitur Sauli: *Cras tu & filij tui mecum eritis;* cũ certum sit diuer-

Luca 16. las esse sedes post mortem, bonorum & impiorũ, & in Euãgelio legatur Abraã dixisse illi epuloni, inter se, & ipsum, maximum & intransibile chaos intercedere. hoc, inquam, non obstat. Nam illa verba Samuelis, vt benè interpretatur S. Augustinus respondens ad tertiam quæstionem Simpliciani; non ad æqualitatem foelicitatis, sed ad similem conditionem mortis referri debent;

debent: vt sit sensus; Cras & non amplius eris inter viuos, sed inter mortuos, inter quos ego sum, quin etiam & tunc, & vsque ad Christi Domini resurrectionem, omnes tam boni quā mali, apud inferos, licet sedibus disclusi, detinebuntur.

S E D redeo ad Necromantiā, quæ olim multis locis & apud multas gentes celebratissima fuit. Osthanes apud Plinium lib. 30. cap. 2. huius *Antiqua Necromantia vsus.* artis nobilissimus professor, promittebat quorumlibet mortuorum excitationes & colloquia cum viuis: & sanè maioris est admirationis, quod extremo illo capite subdit Plinius: Adolescentibus nobis, inquit, visus Appion grāmaticæ artis, prodidit Cynocephaliā herbam, quæ in Aegypto vocaretur Osyrites, diuinam non in viuos modo, sed etiam in mortuos habere potentiam, eaq. se euocasse vmbas ad percunctandum Homērum qua patria quibusque parentibus genitus esset. Cicus Asculanus in commentarijs quos in Spherā edidit, nominat librū qui olim extabat, & inscribebatur SCRIPTVRA CHAM; opus magicæ ac maleficę impietatis plenum, continens elementa & praxim Necromantiæ. Tertullianus lib. De Anima, vbi de inferis & defunctorum euocatione differit: Publica, inquit, iam literatura est, quæ animas etiam iusta ætate sopitas, etiam proba morte disiunctas, & prompta humatione dispunctas, euocaturam se ab inferorum incolatu pollicetur. Fuerunt quondam multa apud varias gentes loca, Necromantiæ vsu nobilitata, vbi & à defunctis oracula & responsa petebantur. Homerus lib. 11,

Odyssæ Cymmericum oraculum ad Auernum Campaniæ lacum celebrat, quo Vlysses concessit, ut Thyresiam de reliquo itinere suo consuleret, cuius etiam meminit Strabo libro quinto Geographiæ. Thesprotiû in Epiro Orpheus celebre fecit, in eo Manes cantu permulcendo, & Euridicę coniugi ad superos reditum impetrasse creditum fuit. Vnde Virgilius libro sexto Aeneidos.

*Si potuit Manes accersere cōiugis Orpheus,
Treiçia fretus cythara fidibusque canoris.*

Apud Lucanû Eriçtone venefica Thessala mortuum euocat, qui Sex. Pompeio exitum Pharsalicę pugne denunciet. Phigaria Arcadiæ ciuitas, habuit huiusmodi Necromâtas, à quibus occulta & futura sciscitari vñitatum fuit. B. Aug. lib. 9. de ciuitate Dei, c. 11. citat Apuleium affirmantem animas hominum dæmones esse; & ex hominib. fieri Lares, si meriti boni sunt; Lemures autem aut laruas, si mali; qui nullis bonis sedibus in terra vagatione puniuntur, inane terriculi lamentum bonis hominibus, cæterum noxium malis. Cum verò incertum est quæ cuique sortitio obuenerit, utrum lar sit an larua, Manes deos nominant, & fanis atque ceremonijs vulgo admittuntur, ut oracula reddant, ut in Bœotia Amphiaræus, in Africa Mopsus, in Aegypto Osiris, alius alibi gentium, Aesculapius vbique. Hec ex Apuleio: quæ ibi Aug. verè grauiterq. refellit. Et apud Tertullianû in lib. De Anima sic habes; Nosomanas propria oracula, apud parentum sepulchra mansitando captare, Eraclides scribit, Celtas

Celtas apud virorum fortium busta, eadem de causa obnoctare, Nicander affirmat.

VERVM has omnes mortuorum, quæ arte *Confuta-*
Necromantica fiunt, apparitiones, vanas & fal- *tur Necro-*
laces esse non est dubitandum: plerasque enim *mantia.*
ab ipsis Necromantis alijsue fictas esse comper-
tum est. Si quæ aut reuera contigerunt, in his exi-
stimandum est, non animas defunctorum appa-
ruisse viuis, sed ipsos Dæmones tales se ostēdis-
se Necromantis, vel eos consulentibus, tales in-
quam, habitu, specie, ætate, voce, & affectu, qua-
les fuerant olim mortui, cū inter viuos versaren-
tur. Hanc ego opinionem vt proculdubio veram
putem, rationibus testimonijsque & experimē-
tis adducor. Ratio nec obscura nec sanè infir-
ma sit ea, qua Sanctus Thomas prima parte q. *Argumen-*
117. art. 4. hoc ipsum confirmat. Non potest, in- *tatio B.*
quit, anima separata, naturali virtute sua, moue- *Thome cō-*
re aliquod corpus: cum enim sit naturalis forma *tra Necro-*
humani corporis, non habet vim mouendi se- *matiam.*
cundum locum, nisi corpus quod informat & vi-
uificat: nam etiam cum est vnita corpori, si sit
aliquod membrum mortificatum, non obedit
animæ ad motum localem. Quare animæ defun-
ctorum, nec assumere corpora, nec cum illis ad
viuos venire possunt. Deinde, Necromantæ non
habent vim & imperium in animas defuncto-
rum quæ sunt in cœlo, nec quæ sunt in Purga-
torio; non enim conuenit aut decet animas san-
ctorum, impijs Necromantarum artibus subia-
cere: neque in animas quæ sunt in inferno; nam
cum illuc sint à Deo tanquam in carcerem de-
trusæ, vt æternas scelerum suorum pœnas luât,

nulla inde vi possunt efferri, nec nisi Dei manda-
 to egredi: non est autem credibile, Deum id cō-
 cessurum Necromātis, per quos Dæmon satagit
 mortales decipere, & à veri dei cultu auertere:
 sic enim Deus artem Necromanticam & per se
 infamē, & toties à se in sacris literis reprobata,
 extremo quæ mortis supplicio condemnata, non
 solum honoraret, sed etiam fide cultuque apud
 mortales dignam redderet. Profecto, si cui mor-
 tuorum reditus ad viuos concedendus fuit, vi-
 debatur concedendus diuiti illi, cuius mentio
 fit apud Lucam c. 16. qui obnixè rogabat Abraā,
 vt de ijs qui simul erant in inferno, aliquem mit-
 teret ad amicos cognatosque suos monendos,
 vt benè viuendo, diras, & perpetuas Inferni
 pœnas euaderent, nec tamen ei concessum est.
 Non inficior, animas quæ sunt in Purgatorio,
 nonnunquam apparuisse viuis: id enim Beatus
 Gregorius in quarto libro Dialogorum nōnul-
 lis, & quidem certis probat exemplis. Nec equi-
 dem nego, etiam animas Beatas vel Martyrum,
 vel aliorum Sanctorum, descendere in terras
 hominibus eorum auxilium implorantibus,
 opem, & solatium laturas: id enim confirmat B.
 Augustinus in lib. De cura pro mortuis agen-
 da, c. 16. exemplo B. Felicis Nolæ Episcopi, quē
 ciuibz suis Nolanis, cum à Barbaris opugna-
 rentur, apparuisse & subuenisse asseruit Augu-
 stinus, se non incertis rumoribus, sed certis te-
 stibus audiuisse: Hæc, inquam, non nego; sed
 aio animas mortuorum, cum apparent viuis, nō
 id facere sua voluntate & arbitratu, nec natu-
 rali potestate, multoque minus vi & potētia ar-

ſis Necromantica, ſed id fieri ſingulari quodam Dei conſilio, voluntate ac poteſtate. Nec animas defunctorum intereſſe rebus viuorum, minus eſt miraculum ſecundum B. Auguſtinum loco ſupra dicto, & ſecundum B. Thomam prima parte, queſt. 89 art. 8. ad 2. quam vel illuminatio cæci, vel alia quæ in magnis Dei miraculis numerantur. Adſcribam hic in hanc ſententiam B. Auguſtini verba ex eo loco quem proxime indicaui: Verùm iſta, inquit, diuinitus exhibentur, longè aliter quàm ſeſe habet vſitatus ordo, ſingulis creaturarum generibus attributus. Non enim ideo putandum eſt viuorum rebus quoslibet intereſſe poſſe defunctos, quoniam quibusdam ſanandis vel adiuuandis Martyres adſunt: ſed ideo potius intelligendum eſt per diuinam potentiam Martyres viuorum rebus intereſſe, quoniam defuncti per naturam propriam, viuorum rebus inter eſſe non poſſunt. Hæc Auguſtinus.

Auguſtini obſeruanda ſententia.

SED audiamus Tertullianum, qui in libro De Anima, vbi de inferis & animarum euocatione agit, hanc noſtrâ ſententiam grauiffimis diſſertiffimiſq; uerbis comprobauit: Necromantia, inquit, ſecunda eſt idololatria, in qua ſe Dæmones perinde mortuos fingunt, quemadmodum in illa Deos. Quid ni? cum & dii mortui ſint? itaque inuocantur quidem defuncti, ſed Dæmones operantur ſub eorum obtentu. Hanc autem fallaciam Diaboli ſub perſonis defunctorum deliteſcentes (ni fallor) etiam rebus probamus, cum in exorciffimis noſtris, interdum Dæmon aliquem ſe ex hominibus affirmat, interdum

Notabilis Tertulliani ſententia.

dum gladiatorem vel bestiarium, sicut & alibi Deum nihil magis curans quam hoc ipsum excludere quod prædicamus, ne credamus animas vniuersas malorum ad nihilum redigi; vt & iudicij & resurrectionis fidem turbent. Et tamen ille Doemon postquam circumstantes circumuenire tentauit, instantia diuinæ gratiæ victus, id quod in vero est, inuitus confitetur: Sic etiam in Necromancia quæ iam quiescentes animas euellere ab inferis creditur, & conspectui exhibere, non alia fallaciæ vis est, operator planè, quia & phantasma præstatur, & corpus effingitur, nec magnum illi exteriores oculos circumuenire, cui interiorem mentis aciem excæcare, perfacile est: Nulli autem animæ omnino inferos patere, satis Dominus in argumento illo pauperis requiescentis & diuitis ingemiscantis, ex persona Abrahæ sanxit, non posse relegari renunciatorem dispositionis infernæ, quod vel tunc licere potuisset & Moyfi, & Prophetis crederetur. Sed etsi quasdam reuocauit Dei virtus in documentum iuris sui, non idcirco communicabitur fidei & audaciæ Magorum & fallaciæ somniorum & licentię poëtarum: nam in hac mortuorum resurrectione qua Dei virtus in corpora an imas repræsentat, solida & contræstabili & satiata veritate præiudicatum est hanc esse formam veritatis, vt omnem mortuorum exhibitionem incorporalem, præstigias iudices. Hæc Tertullianus. Simulant igitur Dæmones, *Cur Dæmones si- mulent.* animas defunctorum secundum Augustinum & Chrysostomum, quorum testimonia loco supra dicto memorat S. Thomas, quo facilius errores Genti-

Gentilium animis hominum inferat ad eos de- *animas*
 cipiendos. Primum enim sic Dæmon facilius *demor-*
 homini quicquid vult persuadet: namque ho- *tuorum*
 mines animabus defunctorum, vel parentum,
 vel cognatorum, vel amicorum suorum quos
 diligunt, & à quibus se diligere non dubitant, li-
 bentius, & promptius credunt, quàm Dæmoni
 quem naturaliter horrent. Deinde, ita persua-
 det hominibus, infernum non esse carcerem
 perpetuum, ex quo non liceat aliquando egre-
 di: nec esse adeo graues, & perpetuas inferni pœ-
 nas, sicut homines putant. Adhæc sic facit, ut ho-
 mines putent, animas etiam post mortem habe-
 re corpora, uel posse quælibet se in corpora in-
 duere, uel in quælibet hominum aut bestiarum
 corpora migrare: qua re concipitur error Py-
 thagoricus de transmigratione animarum, eoq;
 concepto labascit fides, & spes Christianæ resur-
 rectionis. Præterea, hac ratione faciunt Dæmo-
 nes, ut viui mortuos vel tanquam terrificos, &
 noxios sibi metuant, & varijs superstitionibus
 placare sibiq; conciliare studeant, uel tanquam
 beneficos sibiq; uel amicitia vel necessitudine
 deuinctos, nimium superstitiosè diligant, &
 colant; uel tanquam animas hominum quorun-
 dam apud mortales, aut sapientia, aut fortitudi-
 ne, aut potentia clarissimorum, non humanis
 modo, sed diuinis etiam honoribus prosequan-
 tur atque venerentur.

H V G O Sancti Victoris lib. 6. Eruditionis
 Didascalicæ, c. 5. numerosius, & enucleatius eâ
 de qua disputauimus, Magiæ varietatem enar-
 rans, ad hunc modum scribit: Magicæ repertor
 primus

*Varia spe-
 cies Ma-
 giæ secun-
 dum Huius-
 gonem.*

primus creditur Zoroastres rex Bactrianorum:
 quem nonnulli asserunt ipsum esse Cham filiū
 Noe, sed nomine mutato, hūc postea Ninus rex
 Assyriorum bello victum interfecit, eiusq; co-
 dices artibus maleficiorum plenos igne crema-
 ri fecit. Scribit autem Aristoteles de hoc ipso,
 quod vsque ad bis, & viciēs centum millia ver-
 suum eius de arte magica ab ipso dictata, libri
 eius vsque ad posteritatis memoriam traduxe-
 runt. Hanc artem postea Democritus ampliauit
 tempore quo Hippocrates in arte Medicinæ in
 signis habebatur. Magia, in Philosophia non re-
 cipitur, sed est extrinsecus falsa professione, om-
 nis iniquitatis, & malitiæ magistra, de uero mē-
 tiens: & veraciter ladens animos, seducit à reli-
 gione diuina, culturam Dēmonum suadet, mo-
 rum corruptionem ingerit, & ad omne scelus
 ac nefas mentes sequacium impellit. Hæc gene-
 taliter accepta, quinque complectitur genera
 maleficiorum: Manticem, quod sonat diuinationem,
 & Mathematicam uanam, Sortilegia, Ma-
 leficia, Præstigia. Mantice autem quinque con-
 tinet species sub se: Primam, Necromantiam,
 qđ interpretatur Diuinatio in mortuis. *νεκρὸς*
 enim Græcè, id est, mortuus Latine: & *νεκρὸν*
 cadauer dicitur, unde est diuinatio quæ fit per
 sacrificium sanguinis humani quem Dēmones
 sitiunt, & in eo delectantur effuso. Secunda, est
 Geomantia, id est, Diuinatio in terra. Tertia,
 Hydromantia, id est, Diuinatio in aqua. Quarta,
 est Aerimantia, id est, Diuinatio in aere. Quinta,
 est Diuinatio in igne, quæ dicitur Pyromantia.
 Varro enim quatuor dixit esse, in quibus diui-
 natio

natio constaret; terram, aquam, aërem, ignem, Prima ergo, id est, Necromantia, ad infernum videtur pertinere, secunda ad terram; tertia ad aquam; quarta ad aërem, quinta ad ignem, Mathematica diuiditur in tres species, in Aruspici nam, in Augurium, in Horoscopicam, Haruspices sunt dicti quasi horuspices, id est, horarum inspectores, qui obseruant tempora in rebus agendis, vel haruspices quasi haras inspicientes, qui in extis & fibris sacrificiorum futura considerant. Augurium vel auspicium aliquando ad oculum pertinet: & dicitur auspicium, quasi auispicium, quia in motu & volatu auium attenditur: aliquando ad aures pertinet, & tunc dicitur augurium, quasi garritus aurium, quia aure percipitur. Horoscopia, quæ etiam Constellatio dicitur, est, quando in stellis facta hominū quærentur, sicut Genethliaci faciunt, qui natiuitates obseruant, qui olim specialiter Magi nuncupabantur, de quibus in Euangelio legimus. Sortilegi sunt, qui sortibus diuinationes quærent. Malefici sunt, qui per incantationes doemoniacas siue ligaturas, vel alia execrabilia remedium genera, cooperatione Doemonum atq. instructu nefanda perficiunt. Præstigia sunt, quando per phantasticas illusiones circa rerum immutationē sensibus humanis arte doemoniaca illuditur. Sunt ergo omnes simul vndecim. Sub Mantice, quinque, id est, Necromantia, Geomantia, Hydromantia, Aërimantia, Pyromantia. Sub Mathematica, tres, Haruspicina, Auspicium, Horoscopia. Postea tres aliæ, id est, Sortilegium, Maleficiū, Præstigium, Præstigia dicitur Mercurius

curius primus inuenisse: Auguria Phryges inuenerunt: Haruspicinam & Sortilegia Tages primus Etruscus tradidit: Hydromantia primum a Persis venit. Haftenus Hugo.

CAPVT XII.

AN PER ARTEM MAGICAM verum aurum fieri possit ab Alchimistis.

SI verum & perfectum aurū ab Alchimistis potest effici, haud dubie chymica facultas vna de præcipuis Magiæ partibus censenda est; nimirum tale opus Magiæ, tum propter vim & potetiam artis maximè admirandum esset: tum propter magnitudinem vtilitatis; optatissimū

Scaliger atque gratissimum mortalibus accideret. Audi-
ettraCar diat lector quid eruditus vir Iulius Scaliger ea
danū ex- de re scriptum reliquerit. Triplex est, inquit,
ercitat. Magia; vna hic infima & nostras, sanè & foeda
327. & lordida cū cantiunculis, cadaueribus, & funi-
bus suspendiosorum: quæ si quis atrectare au-
deat, etiam mereatur. Altera ex astris deducit
vires in specula, sigilla, annulos, tabellas: Tertia

Smerdes diuina est. Nomen apud vulgus odiosum fecit
Magus i- colluies impostorum. At Magus apud Persas,
uasit re- nihil aliud quàm sapientem sonat: sed propter
gnū Per- Smerdis prodicionem & perfidiam, nomen Ma-
garum. gorū infensum diu fuit. Hac Magia Dominum
Herodo- Iesum fuisse promissum regem, cognouerunt
us lib. 3. Magi, qui ad eum adorandum longinquis è re-
& Iusti- gionibus profecti sunt. E Syrorū libris hæc de-
nus lib. 3. scripsimus. Aiunt Magiæ & transmūtatoriæ ar-
Matt. 2. tis

tis vires, vias, & fines esse perquā similes. Opus & finem Chimistarum, esse corpus in corpus: Opus & finem Magiæ, esse spiritum in corpore. Magi suas affectiones, violentias appellant, propterea quod vires suas, supra eas quæ naturæ ordine fieri videntur, exercent. Chimistæ suum opus nominant fortitudinem: hoc enim significat decantatum illud, Elixir, in cuius fide omnem opignorant naturam. Sic eo loco Scaliger. Ergo digna cum primis inquisitione ac disputatione res est, utrū non modo ex solis causis naturalibus, & in solis naturalibus locis, atque ordine tantum modoque naturali aurum generari queat, verum etiam per artificialem viam ac rationem, quam iactant Chimistæ, perfectum usquequaque aurum, & tale omnino, quale est naturale, possit effici.

DVPLEX circa hanc quæstionem Philosophorum est sententia: multi negant, quidam vero aiunt. Nos primo loco aliorū sententias enarrabimus ac perpendemus: extremo autem loco etiam quid sentiamus ipsi, & similis vero iudicemus, breuissime indicabimus.

EXPOSITIO SENTENTIA
eorum qui negant verum aurum posse fieri ab Alchimis.

AVICENNA in quibusdā suis commentarijs in libros Meteororū, ut refert Aegidius in 3. Quodlibeto, quæst. 8. de Alchimis. co auro ita scripsit: sciant artifices Alchimie, species metallorum mutari non posse, quamuis

F similia

similia illis fieri possint; & quamuis Alchimis-
queant tingere ipsum æs colore quò volūt, do-
nec sit multū simile auro, & abstergere immū-
dicias plumbi, ita vt uideatur argentum, sem-
per tamen secundum substantiam manebūt æs
& plumbum.

Auerroes

AVERROES in Paraphrasi super primū
librū de Generatione animalium, explanando
primum caput, in eandem sententiam hæc scri-
bit: Similiter etiam si datur aliquid artificiale
valde simile naturali, tanta poterit esse similitu-
do; quod existimabitur esse idē specie, & si ars
Alchimix habet esse, hoc est, quod potest fieri
in ea. Et ibidem Auer. declarat sicut se habent
mures ex putri materia ad mures ex semine, in-
ter eos enim est tanta similitudo, vt quamuis re-
uera inuicem differant species, tamen vulgo pu-
tentur esse eiusdem speciei, ita etiam aurum al-
chimisticum se habere ad verum & naturale
aurum. Idem sensit Auicenna, cuius verba pau-
lò infra memorabuntur initio capitis proxime
sequentis.

B. Thom.

S. Thomas in secunda secundæ conditiona-
liter loquens de auro alchimico quæst. 77. art.
2. ad primum ait: Si aurum quod fit ab Alchi-
mistis, non fit verum & tale, quale fit à natura,
eius venditionem pro vero fraudulentam &
iniustam esse; sin autem fiat verum aurum ab
Alchimis, id licite pro vero auro vendi pos-
se, nihil enim prohibere, artem vtendo causis
naturalibus naturales & ueros effectus produ-
cere. Sed quid ipse simpliciter & absolute senti-
ret de auro alchimico, satis perspicuè declara-

uit

uit in 2 sent. dist. 7 quæst. 3. artic. 1. ad quintum, ita scribens: Potest quidē ars p virtutes naturalium agentium aliquas formas substantiales inducere in materiam; sunt tamen quædam formæ quas nullo modo ars potest efficere, quod propria actiua & passiua earum non potest inuenire atque adhibere, sed benè aliquid simile illis efficere, sicut Alchimistæ faciunt aliquid simile auro quantum ad accidentia exteriora, sed tamen non faciunt verum aurum, quod forma substantialis auri non est per calorem ignis quo vtuntur Alchimistæ, sed per calorem solis in loco determinato, vbi viget virtus mineralis, & ideo tale aurum non habet operationem consequentem speciem, & similiter in alijs, quæ eorum operatione fiunt.

ÆGIDIUS in tertijs Quodlibeto quæst. 8. affirmat Alchimistas posse quidē facere metallum aliquod quod tantum constet ex permutatione aliorum simplicium metallorum, cuiusmodi est electrum, quod dicitur constare ex tribus partibus auri & vna argenti; & quia sæpè in venis metallicis vnum metallum confunditur & permiscetur cum alio, Alchimistæ per actionem ignis segregando & separando aurum, quod erat permixtum cum alio metallo, videbitur de nouo facere aurum, tantum autem abest, vt possit verum aurum facere, vt ne simile quidem vero auro ita effici queat, vt non possit aliquo modo dignosci & discerni. Porro existimat Aegidius aurum alchimisticum non posse sine peccato vendi pro auro naturali; non solum quia incertum pro certo, & falsum pro ve-

Aegidius

*Aegidius
negat au-
rum chi-
micum li-
cite ven-
di posse &
vera.*

ro uenditur, sed etiam quia in medicinis adhi-
betur aurum ad confortandum cor, & morbos
quosdam profligandos; maximum autem peri-
culum esset, ne aurum Alchimisticum propter
diuersam rationem constitutionis, nimium læ-
deret complexionem humani corporis, eiq; in-
figne aliquod detrimentum afferret. Quod autē
verum aurum confici nequeat, Aegidius ita pro-
bat, vel potius declarat. Cernimus in vnoquoq;
genere entium, quædam illius generis esse per-
fecta, alia verò imperfecta; perfectorum autem
generationem esse determinatam tam secun-
dum principium actiuum, & secundum mate-
riam, quàm secundum locum in quo fit: Im-
perfectorum autem minimè. Exempli causa, in
genere animalium, quæ sunt perfectiora, ita se
habent natura, ut equus non generetur nisi ab
equo, & ex sanguine menstruo equæ, & intra
matricem; at mures possunt generari ex semi-
ne, & sine semine, intra matricem, & extra.
Idem perspicitur in plantis; idemque similiter
coningit in elementis, nam purus ignis elemē-
talis, nec generari, nec conseruari potest, nisi in
suo loco naturali, id est, in concauo Lunæ, ergo
similiter etiam eueniet in metallis, quare cum
aurum sit perfectissimum omnium metallorū,
habebit determinatum agens, & materiam, &
locum naturalem, & propriam venam quæ latet
intra sinum, & ventrem terræ, extra quem lo-
cum, aurum nullo modo confici possit. Neque
ualet illud, quod posset afferri contra hoc quod
diximus, nimirum si mures, qui sunt perfectio-
res auro, possunt generari extra matricē, multo
magis

mágis aurum effici poterit extra suum locum naturalem ; & si serpentes fuerunt arte magica producti à Magis Pharaonis, vt legimus in Exo *Exod. 7.* do, cur non etiam poterit effici verum aurum in dultria & beneficio artis ? Hoc inquam non valet, nam eadē ratione probari posset, cū mus sit perfectior qualibet planta, & mus generari queat sine semine, quamlibet etiam plantā posse absque semine procreari; quod falsum est: nihil ergo prohibet, quod est imperfectius alio simpliciter, esse perfectius illo secundum quid. Quamobrem quod aurum requirat determinatum locum suæ generationis, nō arguit ipsum simpliciter esse perfectius aliquo animali, sed tantum secundum quid Hæc ex Aegidio.

CONCILIATOR in differentia 209. sic *Conciliator.* ait: Metallū non potest fieri per artē, & in aliud transmutari; cum ars solum faciat permutationē in accidentibus, non autē in substantia; vel fortasse si possibile est, tamē id est homini ignotum, vnde Commentator tertio De anima, ait; Dicitur de multis artificijs, quod videntur esse possibilia, sed sunt causarum ignotarum, vt v. g. Alchimia, etsi talis ars cōstituatur, fortasse hoc erit per accidens, & inspirationē diuinā potius quā artis humanę sapientia. Non enim (inquit Conciliator) ars eo peruenire potest, vt agentia, & materiam, cū tēpore, modo, & alijs circumstantijs sciat ita proportionare, ut inde nouum constituatur metallum. Quod si apparenter videatur, id erit, quia ars fallaciam eiūs humano ingenio nequit detegere. Vnde aurum arte constructum, vim non putō habere con-

fortandi cor, sicut habet aurum à natura productum. Fideles mihi tamen experti, dicunt argentum decoctione per artem fieri verum, non tamen videtur apparenter lucrari, probationibus omnibus quibus vtuntur, exploratum.

QVIDAM rerum metallicarum peritissimi, de quibus etià subtiliter & accurate scripserunt, dixerunt, primum atque summum fundamentum, quo nititur ac sustentatur ars Alchimie, nullū esse: ex quo licet intelligere, ipsam artem (si tamen ars dicenda est quæ in se nihil veri & certi habet) inanem & fallacem esse. Et enim Alchimistæ putant materiam omnium metallorum esse sulphur & argentū viuum, quam obrem profitentur se ex varia sulphuris & argenti viui inuicem permixtorum temperatione,

*Non esse
materiā
omnium
metallo-
rum sul-
phur &
argētum
uiuum.*

posse quodlibet metallum efficere: in quò sanè vehementer falluntur. Nam si sulphur & argentum viuum est materia auri & argenti, ergo in venis in quibus generatur aurū & argentum, apparerent aliqua vestigia sulphuris & argenti viui; similiter etiam in venis sulphuris & argenti viui, reperirentur aliqua indicia auri vel argenti; sed ipsi qui totam pene vitam curiosissime lustrandis, & cōsiderandis venis, locisq; metallorum consumpserunt, nunquam tale aliquid reperire potuerunt. quare falsa est opinio Alchimistarum, & aurum quod ab ipsis fit ex sulphure & argento viuo, non est verum aurū: non enim, vt dictum fuit, talis est materia veri & naturalis auri. Aurum autem quod fit ab Alchimistis, licet similitum videatur uero auro, falsum tamen esse multis modis cognosci & iudicari

dicari potest, nempe vel ex pondere; vel ex eo, quia non sustinet vim ignis; vel ex eo quia inietum in vrinam, amittit colorem suum; vel quia non est ductile in tenuissimas laminas; vel denique quia non habet naturalis auri proprietates, quarum in primis illa commendatur, confortandi cor humanum. Hæc illi.

CARDANVS lib. 17. de subtilitate hæc *Cardanus.*
 scribit: sunt verò chimica inuenta, vitrum ducere in longissimas lineas, tenax aut prædurum efficere posse. Vidi ego dudum sphaeram exigua ex vitro, quæ omni conatu illisa solo lapideo, non comminuebatur, sed resilliebat ad trabes. Eiusdem facultatis chemicæ est, vitrum albis lineis interstinguere, cælare in eo imagines, falsas fabricare gemmas, purgare caphuram, metalla miscere, immutare, aut nobiliora imitari. Exempla vero fallacis Alchimie vide apud eundem in 10. lib. De varietate rerum, cap. 51. Quo in loco etiam hæc subiungit: aurum & argentum facere, seu ex alijs metallis ea conficere, aut gemmas factitare, aut viles in nobiliores transmutare, nemo non optare debet, vt sciat; at quid horum fieri possit, difficile scitu admodum est; & si hoc etiam sciuerimus, longè difficilius est scire, quomodo fiat. Quæ autem ab Alchimis fiunt, ea vel ad voluptatem pertinent, vel ad vsum; ad voluptatem sunt gemmæ & metalla nobiliora; ad vsum tincturæ, colores, materie vasorum & alia similia. Circa quodlibet autem horum, tria excogitari possunt, vel vt fiât, quod maximum est; vel vt purgentur, vel vt perficiantur. Horum primum, de metallis, adhuc sub

Inuenta & opera artis chemicæ.

*Utilitates
artis chi-
mica.*

iudice lis est an fieri possit; secundum & tertium, ferme inuentum est ad summam perfectionem, ac licet ars chimica non faciat verum aurum, quatuor tamen præstat magnas utilitates. Prima est, quia potest vnum metallum facere simillimum alij, vt ferrum æri, & æs auro & argento, id quæ clarius apparet in gemmis. Secunda, cum id quod in aliquo potentia continetur, per vim ignis excitat, extrahit, & ad perfectionem perducit. Tertia cum ea quæ superflua sunt, vt sua absumendo deregat, vt cum ex calce alumen excipitur, quod non genitum est vi ignis, sed exceptum; ita fit id quod vocant multiplicationem, cum ex terra ipsa quæ aliquid continet quod continetur, excipiunt. Quarta, Ars chimica vi ignis multas facere potest compositiones atque separationes, non minus viles & lucrosas ijs quæ ab Alchymistis tam anxie quærentur & ambitiose promittuntur transmutationibus. Hæc Cardanus. Ex quibus verbis perspicitur eum arbitrari chemicam illam auri generationem, vel esse impossibilem, vel propemodum impossibilem.

DECLARATIO OPINIO EORVM
qui defendunt Alchimiam.

ALBERTVS in libro suo 3. de Mineralibus c. 9. hanc de facultate Alchimie questionem pertractans, primum exponit sententiam *Opinio* Auicennæ, quæ fuit hæc: sciant (inquit *Auicenna*.) artifices alchimie species metallorum permutari non posse, quamuis aliquid illis simile fieri possit; quod enim differentia specifica ali-
quo

quo tollatur ingenio, non credo possibile, sed expoliatio accidentium non est impossibilis, vel saltem diminutio eorum: non enim permutatur species metallorum, nisi prius in primam materiam metallicam reducantur, & sic iuamine artis deducantur in speciem metalli quod voluerit. Atque idem quoque sensisse ait Hassem Philosophum præcipuum in physicis & in mathematicis, deinde Albertus subiungit ea quæ sequuntur: Oportet nos dicere, Alchimicos peritos, non aliter operari quàm peritos medicos, qui per medicinas purgatiuas purgant materias corruptas & nocentes sanitati, & postea per remedia confortantia naturam, iuuant virtutem naturalem, vt digerendo, sanitatem inducant: quæ sanitas est effectus & nature & artis, sed illius effectiuè & principaliter, huius autem organicè & instrumentaliter: sic Alchimistæ primo benè purgantes materiam argenti viui & sulphuris insitam omnibus metallis, confortât, deinde deducunt virtutes elementares, & cœlestes tali materiæ inhærentes ad proportionem mixtionis metalli quod intendunt inducere, & tunc ipsa natura operatur, & non ars nisi organicè iuando & expoliendo vt diximus, & sic verum aurum & argentum educere, & facere videntur: quod enim virtutes elementares, & cœlestes faciunt in vasis naturalibus, hoc etiam faciunt in vasis artificialibus, si artificialia formantur ad modum vasorum naturalium: & quod facit natura calore solis & stellarum, hoc faciet ars calore ignis, dummodo sic contemperetur, vt non excedat virtutem se mouentem & infor-

*Sententia
Alberti
Magni.*

manentem quæ est in metallis: huic enim coelestis inest virtus, quæ primo commiscuit eam, & hæc inclinatur ad hoc vel ad illud per artis iuuamē. Alchimia igitur per hunc modum procedit, id est, corrumpēs vnum, à sua specie remouendo, & cum iuuamine eorū, quæ in materia insunt, alterius speciē inducendo, quare omnium operationum alchimicarum melior est illa quæ procedit ex eisdem, ex quibus procedit natura, sicut ex purgatione sulphuris, per decoctionem & sublimationem & expurgationem argenti viui horumque bona permixtione cum materia metalli, in his enim & ex virtutibus horum, omnis metalli species inducitur. Qui autem per alba albificant, & per citrina citrinant, manente specie prioris metalli in materia, proculdubio deceptores sunt, & verum aurum atque argentum non faciunt; & hoc modo ferè omnes vel in toto, vel in parte procedunt, propter quod ego experiri feci aurum alchimicum quod ad me delatum est, & postquā sex aut septem ignes sustinuit, tandem amplius ignitum consumitur & perditur & quasi ad fecem reuertitur. Hæc Albertus. Ecce supradictis verbis Albertus, non solum docet verum aurum posse fieri per Alchimiam, sed etiam quis modus eius sic efficiendi sit possibilis, & quis impossibilis, manifestè declarat.

Q V I D A M Ianus Lacinius, qui de facultate chimica in transmutandis metallis multa disputationes per sputaui, eiusque disputationis summam memorat Cardanus loco supradictō, probat arte chimica posse confici verum aurū, his rationibus.

Primò,

Primo, metalla sunt quædam pura & concocta, ut aurum & argentum: quædam cocta sed impura, ut æs, ac ferrum: quædam cruda & impura, ut utrumque plumbum; sed impura repurgari, cruda concoqui possunt, igitur ex ære, ferro & plumbo, aurum & argentum fieri potest. Quod autem talia concoqui possint, demonstrat ex sententia Aristotelis 4. Meteororum, ubi de concoctione agit. De purgatione dubium non est, quippe cum proprium sit ignis separando purgare. Deinde propinquitas, paruumque causarum discrimen, hoc idem suadet, cum ab iisdem omnia fiant. Supponit autem omnia metalla constare sulphure & argento uiuo; quæcumque uero similia sunt, facile inuicem transmutantur, eoque magis, quod natura uidetur semper perfectissimum intendere in omni genere, uelut aurum; quæ igitur imperfecta sunt, artis beneficio perfici posse uidentur, tum ut ad finem, tum ut ad motus ipsius perfectionem perducantur. Postea, si ars auctore Arist. in. 2. Phys. & 4. Meteororum est imitatrix naturæ, cum natura concoquendo purgandoque ex sulphure & argento uiuo, aurum argentumque perficiat, cur non etiam idem simili ratione operans ars possit efficere? Ad hæc, ea dici debent secundum naturæ ordinem copulata & inuicem transmutabilia, quæ non habent omnino diuersas operationes sed easdem, in eo tantum differentes, quod quædam habent eas imminutas & imperfectas, uelut fœtus, infantis comparatione, ouum pulli, aurelia papillionis. At plumbum, æs, ferrum, argentum, nullas habent operationes ab auro distinctas,

stinctas, sed quas illud habet, utpote liquefcere, duci, graue effe, nitere, ignibus refiftere; eafdem habent hæc, fed viciatæ & imminutas, nō enim ita fplendent, non funt adeo grauia, minus refiftunt ignibus, non tota liquefcunt, non tam tenuiter ducuntur; igitur hæc dici debent aurum imperfectum, & beneficio artis perducī queunt ad perfectionem auri. Atque hoc putat Cardanus effe maximum argumentum quod pro Alchimiſtis afferri poſſit. Poſtremò, idem aſtruit exemplo ranarum, quæ ſtatim, ob præparationem materiæ, ex puluere generantur. Sunt autē ranæ perfectiores auro, & vt animalia perfecta, non ſolum partium ſimilarium compoſitione, ſed etiam inſtrumentorum compoſitione indiguerunt. Auicennam quoque citat dicentem, vitulum in nubibus generatam ſemiuuium excidiſſe inter imbres. Generantur etiam ex iuenculo ſtrangulato apes, ex Baſilico ſcorpiones, ex exilatura Anatis ſub dio expoſitæ buſones, ex Aſinis veſpæ, ex equis Scarabæi, ex mulis locuſtæ, aquæ, quibuſdam in locis conuertuntur in lapides: aër concuſſus inter duriora corpora, repente tranſit in ignē, fumus metallorū, præcipuè plumbi, cogit argentum viuum, cortex mali punici ferrum mutat in chalybem. Si igitur hæc tam admiranda & pene incredibilia fieri poſſunt, atq; adeò quotidie fieri videmus, cur incredibile videat, poſſe ab Alchimiſtis verū aurū cōſiſci? Hæc ille diſputat pro Alchimiſtis.

Antonius ANTONIVS Miradulanus, Philoſophus
Mirandus noſtræ memoriæ præſtans, & in Ariſtotelis do-
lanus. ſtrina excellenter verſatus, in illo ſuo opere
 quod

quod scripsit de Euerfione singularis certaminis, libro 19. lect. 7. hanc de Alchimistis sententiam pronunciat. Dicimus veram esse Alchimistarum opinionem quod aurum possit fieri, & ab arte, & à natura, quia transmutare possunt argentum viuum, & alia quæ ad id requiruntur, ita ut fiat eadem materia: sicut non solum à natura sed etiam ab arte animalia, ut scorpiones generari possunt. Verum quia illud aurum fit rarissime, & cum maxima difficultate, multa enim quæ ad id concurrunt, facillimè impediri possunt, idcirco non uidetur fieri posse, sed rei difficultas non arguit impossibilitatem. Non est autem danda opera illi arti, non quia non sit vera, sed quia tantæ est difficultatis, ut sit vtilius eam omittere quàm exercere: & multi quidem ditissimi ad magnam inopiam redacti sunt, propterea quod maximis sumptibus impenfis, vel nunquam assecuti sunt, quod hæc ars pollicetur, uel certe raro, & parum, ita ut sumptus longè sit maior lucro, quare satius est alijs artibus certioribus operam dare, quæ maiori ex parte operam suam præstant, quàm huic quæ rarissimè propter res naturæ absconditas, finem suum assequitur. Hæc Mirandulanus,

EXPLICATUR BREVITER

opinio auctoris,

NOBIS autem propositam quæstionem *Seneca au-*
philosophicè considerantibus atque per *Storici de*
pendentibus, tria uidentur hac de re ualde pro- *auro al-*
babilia dici, & firmari posse, unum est, nullà esse *chimi-*
ratio-

rationem philosophicam, vel necessariam, vel etiam admodum probabilem, qua demonstratur rationem chemicam efficiendi verum aurum, esse impossibile. Cur enim putetur impossibile? An quia nihil eorum, quæ fiunt à natura potest fieri ab arte? at hoc in generatione multorum animalium, aliarumque rerum, quæ opera, & ministerio artis non secus generantur quàm à sola natura, falsum esse cognoscitur. An quia (ut volebat Aegidius) nihil eorum, quæ sunt in genere suo perfectissima, potest produci nisi vno modo, id est, solum ab agente suo naturali? Verum si Aegidius verisimili aliqua ratione hoc probaret, aliquantulum fortasse valeret ad persuadendum: cum autem nullam huius rei probationem afferat: qua facilitate ab eo id dicitur, eadem planè à nobis contemni ac reijci potest. An denique quia aurum naturale generatur uirtute caloris coelestis, aurum uerò chemicum efficitur à calore igneo, qui duo calores cum multum inter se differant, non poterunt eundem effectum præstare? sed hæc ratio dupliciter peccat. Primum enim falsum est calorem coelestem & igneum specie inuicem distingui: cum enim ab eodem contrario, hoc est, à frigore similiter corrumpantur, cum ab eadem causa interdum producantur nimirum à lumine, cum se inuicem intendunt atque augeant, cum ad productionem ignis, & mixtorum simili ratione conducant, fieri non potest, ut ea ratione qua colores sunt, specie distinguantur inter se: differunt igitur ea re solum, quòd calor coelestis propter ordinatum, coeli

Calor coelestis, & elementaris non differunt specie.

coeli motum, est valde temperatus & accommodatus ad generationem & conseruationem rerum sublunarium, quam ob causam appellatur salutaris & viuificus; calor autem igneus ex se non est temperatus, sed agit quantum potest agere, & res sibi subiectas tandem destruit atque interimit, quocirca vocatur à Philosophis destructiuus & corruptiuus rerum. Verum si hic calor aliunde corrigatur atque temperetur, nimirum vel à facultate animæ, vt in animalibus contingit, vel ab arte, vt fit in multis mixtis & medicamentis, quæ à calore igneo moderatione artis procreantur; efficietur profectò vt calor igneus talis propemodum euadat, qualis est coelestis. Deinde, experientia manifestè ostendit quædam animalia similiter generari posse calore igneo atque calore coelesti. Nam apud Aegyptios pulli calore igneo ex ouis excluduntur atque procreantur. Quam rem Iulius Scaliger, vir propter excellentem omnium disciplinarum eruditionem admirandus, in ijs quæ scripsit contra Cardanum exercitatione 23. pulchrè describit his verbis: In Aegypto ad Cayrum fumos construunt alij alio multiplici fornice imposito: in quorum tholi supremi medio, foramen est, per quod caloris vis, quæ immodica possit officere, subit atq; exhalat: in imo ignem accendunt temperatum: Quorum multas centurias in fornicu superiore planitie disponunt: statis diebus erumpit pullorum turba, quos illi non numero sed mensura venales habent, modiolum statuunt sine fundo: quem vt implerût, tollût, neque hæc fabula est, sed fabulæ ipsi qui negant,

*Alii agerari
posse solo
calore ignis, argumentu
Iulij Scaligeri.*

*Ex auri-
pigmēto,
teste Pli-
nio, fieri
verum
aurum.*

negāt. Hæc Scaliger. Cæterū posse ex alijs me-
tallis verè aurū effici, probari argumento & ex-
perimēto posset auripigmēti, ex quo perfectū
aurū posse fieri, testis est Plinius, qui rē nō pri-
scis temporibus sed sua ætate facta testatamque
cōmemorans, ita scribit lib. 33. cap. 4. Aurū fa-
ciendi est etiā vna ratio ex auripigmēto quod
in Syria foditur pictoribus, in summa tellure,
auri colore, sed fragili lapidum speculariū mo-
do. Inuitaueratque spes Caium principē auidif-
simū auri; quamobrem iussit excoqui magnū
pondus; & planè fecit aurum excellens, sed ita
parui ponderis, vt detrimentum sentiret, illud
propter auaritiā expertus, quanquam auripi-
gmenti libræ 11. permutarentur. nec postea ten-
tatum ab vllō est. sic Plinius.

*Cui non
videatur
esse vera
ars Al-
chimie.*

ALTE RV M verò, quod eadē de re proba-
bilissime potest asseri, illud est, chemicā ra-
tionem efficiendi verum aurum non quidem
physicè, sed moraliter vt aiunt, loquendo, vel
impossibilem, vel propemodum impossibilem
videri, non propter vllam rationem philosophi-
cā quæ adhuc ab vllō sit allata, sicut ostensum
est, sed propter ipsam experiētiā quæ in rebus
naturalibus, moralibus atq; artificialibus, sum-
mi argumenti firmissimæq; rationis vim debet
obtinere. Etenim cū plurimi in chemicæ faculta-
tis tractatione & exercitatione diu multumque
laborauerint, & in veri auri effectiōnem acerri-
mis studijs atq; incredibili cupiditate incubue-
rint, nemo tamen adhuc fuit præter vnum aut
alterum probatis proditum historijs, quem li-
quido constet verum aurum & omni ex parte
proba-

probatum ac perfectum effecisse. Quod si effectio auri per artem chemicam est possibilis, cur ea cum tamdiu & tam multum optata, quæ sita, & procurata fuerit, nondum tamen reperta & usitata fuit: nam quia possibilis est generatio animalium, medicamentorum, aliarumque multarum rerum non solum per naturam, sed etiã per solertiam & industriam humanam, iam pridem inuentæ sunt artes, quæ huiusmodi res & verè & facillè possunt perficere; cur igitur idem non contingit in auro chimico? nisi quia vel talis modus efficiendi tale aurum simpliciter est impossibilis, vel si est possibilis, nondum tamen is est humano ingenio, & fortasse non potest esse, exploratè perfectèque cognitus. Atque hoc argumentum ab experientia ductum, non solum apud Philosophum naturalem, qui nunquam à rebus sensatis experientiaque comprobatis, uel transuersum (ut aiunt) digitum discedit, sed et apud quemcumque hominem sanæ mentis rectique iudicii plurimum valere debet. Quod si habent isti, ut iactant, veram certamque artem faciendi aurum, cur sibi primum non faciunt tantum auri, ut nulli iusegeant, sed bonis omnibus quæ parari auro possunt, abundant? At enim videre licet istos, semper egentes & mendicos, quique per vanâ promissa, alienis opib. exhaustis, suam quoquomodo egestatem subleuare, suamque famem explere cupiant.

AD extremum, illud non tantum probabiliter dici, sed etiam pro vero certoque confirmari potest, artem chemicam, licet ea fortassis sit utilis in distillationibus & alijs reb. quas superius

*Non esse
permittē
di in Re-
publica v
sum Al-
chimia.*

ex sententia Cardani memorauimus, tamen in eo quod spectat ad effectum veri auri quam illa proficitur atque in primis pollicetur, vanam esse, noxiam, ac perniciosam Reipublicæ. Primò, Quia aut nunquam, aut rarissimè præstat quod promittit, ex quo non semel factum est, vt multi ad extremam inopiam atque paupertatem redacti fuerint; vnde rectè quidā ait, Alchymistas non efficere aurum, sed absumere; non implere crumenas, sed magis deplere & ex haurire. Deinde, quia faciunt falsum aurū falsamq; monetā, atq. falsas gemmas pro veris passim distrahunt, atque diuendunt, ex quo Respublica hominumq; societas magnum caperet detrimentum. Postremò, quia verum aurum non rarò adhibetur in medicinis ad exhilarandū & roborandū cor: aurum autem chemicum cū vel non sit verum aurum, vel certè imperfectius sit auro naturali, vel non vtiq. habebit eiusmodi proprietates, aut certè non ita vitales & salutare humano corpori, quare non sine discrimine salutis & periculo vitæ, in medicinis adhiberetur. Hæc igitur nobis visa sunt de chimica facultate efficiendi verum aurum, probabiliter posse disputari.

CAP V T XII.

DE ORIGINE MAGIÆ ET
ijs qui in ea clari fuerunt.

ORIGINEM Magiæ, præsertim eius q̃ diximus non esse naturalem, variè tradūt scriptores. Philo libro De specialibus legibus
centet

cenſet ex vera, & naturali Magia adulterata, & corrupta, natā eſſe fallacem, & quæ uulgo propriè dicitur Magia, ita ſcribens: Ex hac adulterata, & deprauata, deſcēdunt quas proprio maximè vocabulo malas artes dicimus, circulatorum, ariolorumq; ſtudia, mulierum, mancipiorumq; nequiſſimorū expiationes, & luſtrationes profitetium, mutationesq; amoris in odiū, aut ex aduerſo in amorem odij, per quaſdam paſſiones amatorias, & incantamenta idonea; at que his dolis circumueniunt homines, & ingētium malorum atque ruinarum ſunt cauſa, non priuatis modò hominibus aut familijs, ſed ciuitatibus, regnis, & prouincijs. Quamobrem huiusmodi artes, meritò lege Moſaica, grauiſſimis propoſitis poenis prohibentur. Hæc Philo. Verus tamen opinio eſt plurimorum ſcriptorū probata conſenſu, principem huius Magiæ doctorem, & quaſi parentem fuiſſe Zoroaſtrē, vel Perſam, ut Plinius, & Diogenes Laertius uocāt, vel Baſtrianum, ut Diodorus Siculus, & alij nominant. Et Plinius lib. 30. cap. 1. ita de eo ſcribit: Sine dubio in Oriente orta eſt Magia, in Perſide à Zoroaſtre, ut inter auctores conuenit. Eudoxus Zoroaſtrem hunc, ſex millibus annorū ante Platonis mortem fuiſſe prodidit: ſic & Ariſtoteles; Hermippus, qui de tota ea arte diligentiffimè ſcripſit, & vices centum millia uerſuum à Zoroaſtre condita, indicibus quoq; voluminum eius poſitis explanauit, præceptorem à quo inſtitutus eſt Zoroaſter, tradidit Azonacem quinque millibus annorum priorem bello Troiano. De quo Zoroaſtre mira alijs locis ſcribit

*Philo de
origine
Magia.*

*Zoroa-
ſtres Ma-
gia parēs.*

Nin. lib. 7. bit Plinius: Vnum enim eum, (inquit) mortaliū eodem quo natus est die risisse, cerebrumque ita ei palpitasse, ut impositam repelleret manū, futuræ præfagia scientiæ, viginti annis in deserto Magiæ vacantem, caseo vixisse ita temperato, ut vetustatem non sentiret. Iustinus quoque historicus libri primi initio, inuentorem artis Magicæ facit Zoroastrem: idemq; sentit B. Augustinus lib. 2. 1. De ciuitate Dei, cap. 14. Solum inquit, Zoroastrem quando natus est, ferunt, risisse, nec ei boni aliquid monstruosus ille risus portendit: nam magicarum artium fuisse perhibetur inuentor, quæ quidem illi nec ad præsentis vitæ vanam felicitatem contra suos inimicos prodesse potuerunt; à Nino quippe Assyriorum rege, cum esset ipse rex Bactrianorum, bello superatus est. Suidas etiam ait, Magiam inuentum esse Persarum, apud quos Magi magnam fidem, & auctoritatem habuerunt. Auctor Historiæ Scholasticè enarrans historiam libri Geneseos, cap. 39. Ninus, (inquit) vicit Cham, qui adhuc viuebat, & regnabat in Bactria, seu in Thracia, ut alij uolunt, & uocabatur Zoroaster qui Zoroaster. inuentor artis Magicæ, qui & hanc, & septem liberales artes in quatuordecim columnis scripsit: septem æneis, & septem lateritijs, contra duplex orbis excidium, quod timebatur, vnum per aquas, alterū per ignem. Ninus verò libros eius combussit. hinc etiam orta sunt idola. Hæc ille. Verū de antiquitate Zoroastris non conuenit inter scriptores; nam Eudoxus, & Aristoteles, ut ex Plinio retulimus, uolunt eum antiquiorem fuisse Platone sex millibus annorum, Hermip-

Hermippus autem vel (vt citat Laërtius) Hermodorus Platonicus libro De disciplinis, facit cum quinque millibus annorum bello Troiano vetustiore; è contrario autem Xantus Lydius, vt refert Laërtius, multo recentiore eum facit, hoc est, sexcentis duntaxat annis ante Xerxis transitum in Græciam. Sed illi nimium multos computant annos, hic nimium paucos. Constat enim Zoroastrem fuisse tempore Nini primi Assyriorum regis, quo regnante natus est Abraam: ab ortu autem Abrahæ, vsque ad primâ Olympiadem fluxerunt anni mille centum septingenti, & paulò amplius sexaginta: nam qui plures quam cæteri annos monarchiæ Assyriorum & Medorum vsque ad Cyrum attribuerunt, illi mille trecentos sexaginta, huic trecentos quinquaginta assignarunt. Cœpit autem Cyrus regnare initio quinquagesimæ quintæ Olympiadis: Secundum hanc igitur laxissimam cōputationem, à Nino & Zoroastre vsq; ad primâ Olympiadem, numerantur anni mille quadringenti nonagintaquatuor. Bellū porro Troianum septem & quadringentis annis præcessit Olympiades: Xerxis transitus in Græciam, in 75. excessus Platonis in 108. Olympiadem in currit. Ex quo apparet multitudinē illam annorum, quam Eudoxus, Aristoteles & Hermippus tribuunt antiquitati Zoroastri, vel esse fabulosam, vel annos illos nō quales nostri sunt, sed quales Aegyptij & Arcades habuerunt, hoc est, trimestres, esse cēsendos. Nec dissimile fuit eodē in loco Plinij quippe qui ait Moysen multis annorum millibus posteriorem fuisse Zoro-

*Laërtius
initio Ope
ris.*

altre; cum subtilissima Chronologia ratione compertum sit, paulò amplius sexcentis annis Moyse priorem fuisse Zoroastrem.

*Cassiani
de origi-
ne Ma-
gia opinio
Gen. 6.*

APVD Cassianum Serenus Abbas collat. 8. cap. 21. originem Magiæ & omnium maleficarum artium altius repetit, nimirum etiam ante diluuium, ex eo tempore quo filij Dei, vt scriptura narrat, permitti sunt filiabus hominum, ait enim, scientiam omnium rerum cœlestium & sublunarium quam Adam à Deo acceperat, tradidisse ipsum filio suo Seth, cuius semen eam seruauit incontaminatam, & donec diuisum à sacrilega propagine Cayn perdurauit, eam doctrinam ad Dei cultum, & ad vtilitatem vitæ communis exercuit: cum verò fuisset impiæ generationi permixtum, ad res profanas atque noxias, quæ piè didicerat, instinctu Dæmonis deriuauit; curiosasq; ex ea maleficiorum artes atque præstigias ac magicas superstitiones audacter instituit. Sed quomodo hæc curiosa & malefica doctrina diluuium non perierit, in causa fuit Cham, vt antiquæ ferunt traditiones, qui superstitionibus & sacrilegis artibus fuit infectus, easq; artes, cum in arcam in quam cum Noë patre suo iustissimo, & sanctis fratribus ingressurus erat, inferre non auderet; diuersorum metallorum laminis, quæ scilicet aquarum non corrumperentur iniuria, & durissimis lapidibus, qui vim ignis non sentirent, insculpsit: quæ diluuium peracto, eadem qua ille celauerat curiositate perquirens, sacrilegiorum ac perpetuæ nequitiae seminarium transmisit in posteros. Hac itaque ratione illa opinio vulgi qua creditur

Ange-

Angelos vel maleficia, vel diuerſas artes hominibus tradidiſſe, in veritate completa eſt. Hactenus Abbas Serenus.

SED mihi verius ſentire videntur, qui Diabolum primum Magicarum artium auctorem & parentem faciunt, à quo mortales earum cognitionem acceperint, & uſum didicerint. Et lane primum Magiæ uſum & effectum memoria repetentibus, haud improbabiliſſe videri poſteſt, Magiæ uſum vnà cum mundo cœpiſſe, & quidem in Paradifo, ſalua etiam tunc & integra illibataq. hominis innocentia. Ibi enim Diabolus formam ſibi induens ſerpentis, vel occultè per verum & naturalem ſerpentem Euam alloquens, blandiſſimis deceptam promiſſis, ad vitium potum maximo ſui ſuæq. totius humanæ ſobolis exitio, edendum induxit. Nec mirum videri debet ſi Diabolum Magiæ auctorem faciamus; cùm ipſe, vti apud Ioannem capite octauo Dominus noſter dixit: *Homicida ſit ab initio, & in veritate non ſteterit, quia nō eſt veritas in eo. Cum loquitur mendaciū, ex proprijs loquitur, quia mendax eſt & pater mendaci.* Rectè igitur Laſtantiuſ lib. 2. Diuinarum institutionum, omnium maleficarum artium inuentores & magiſtros fuiſſe Dæmoneſ, confirmat, hiſ verbis: Eorum inuenta ſunt Aſtologia & Aruſpicina & Auguratio, & quæ dicuntur Oracula, & Necromantia & ars Magica, & quicquid præterea malorum exercent homineſ vel palam, vel occultè: quæ omnia per ſe falſa ſunt, vt Sibylla Erythræa teſtatur. Hæc & alia multa in

*Prima ordo
Magi-
carum ar-
tiū à Dæ-
mone.*

*Laſtanti-
uſ.*

*Praclara
Cypriai
sententia.*

eandem sententiam eo loco Laetantius commémorat. Sed nemo grauius & elegantius omnes Magiæ species omnesque fallacias ex Dæmonē profectas esse ostendit quàm Cyprianus in libro de Idolorum vanitate: Nequissimi, inquit, spiritus, sub statuis ac imaginibus consecratis delitescunt hi afflatu suo vatū pectora inspirant, extorum fibras animant, auium volatus gubernant, sortes regunt, oracula efficiunt, falsa veris semper inuoluunt: nam & falluntur & fallunt, vitam turbant, somnos inquietant, irrepunt in corpora, mentes terrent, membra distorquent, valetudinem frangunt, morbos laceffunt; vt ad cultum sui cogant, vt nidore altarium & rogis pecorum saginati, remissis quæ constrinxerant, curasse videantur. Hæc est de illis medella, cum illorum cessat iniuria; nec aliud illis studium est à Deo homines auocare, & ad superstitionem sui, ab intellectu veræ religionis auertere: cum sint ipsi pœnales, quærunt sibi ad pœnam comites, quos ad crimen suum fecerint errore participes. Hi tamen adiurati per Deū vnū à nobis, statim cedunt, & fatentur, & de obsessis corporibus exire coguntur. Videas illos nostra voce & operatione, quasi flagris cædi, igne torreri, eiulare, gemere, deprecari, vnde veniāt, aut quando discedant, ipsis etiam qui se colant audientibus confiteri, & vel exiliunt statim, vel euanescent gradatim, put fides patiētis adiuuat, aut gratia curantis adspirat. Hinc vulgus in odiū nostri nominis cogunt, vt nos odisse incipiāt homines antequam nosse, ne cognitos aut imitari possint, aut damnare nō possint. Hæc Cyprianus.

SED ne christianorum hominum duntaxat hæc videatur opinatio, excitabo etiã testes Philosophos Græcorum, & quidem nobilissimos. Aristoteles in primo de Philosophia libro, vt Laërtius initio sui Operis memorat, Magos Aegyptijs antiquiores esse prodidit, duoque iuxta illos esse principia, bonum Dæmonem, & malum; alterum ex his Iouem & Onomasdem, alterum Plutonium & Arimanium dici: quod Hermippus quoque in primo de Magis ait, atque Eudoxus & Theopompus, qui & reuicturos homines, iuxta Magorum sententias dicit, immortalesque futuros: & vniuersa illorũ mysteria & effectus precationibus quibusdam constare. Ista Eudemus quoque Rhodius tradit. Hæc Laërtius. Verum nihil luculentius testimonio Porphyrij: quod libro 5. De præparatione Evangelica, cap. 7. his verbis refert Eusebius: Magica artis dij Gentilium & inuentores & doctores fuerunt. Vnde namque homines quibus rebus Dæmones colantur & cogantur, quàm ab ipsis Dæmonibus discere potuissent? Neque putes id à nobis tantum dici: Porphyrius testis citetur, qui in libro De responsis sic ait: Non solum fē-

Porphyrius.
us.

licem conuersationem suam, verum etiam quibus rebus gaudeant & quibus alligētur, Dij hominibus significarunt. Adhæc quibus rebus cogantur, & quæ sibi afferenda sint, & quos dies vitare oporteat, figuras quoque ipsas simulachrorum quales esse debeant, & in quibus locis ipsi versentur, & omninò nihil est, quod ab ipsis dijs homines non didicerint. Atque hæc Porphyrius ex varijs Proserpinæ responsis demon-

strat & confirmat. Quid ergo mirum, Magicæ artis & inuentionem & studium & vsum fuisse antiquissimum? Certè nos supra à Mundi vsque primordijs, Magicæ originem repetiuimus, & liber Exodi satis clare ostendit, iam tēpore Moysis, hoc est, plus quam trecentis annis ante bellū Troianum, Magiam claram & celebrem fuisse, Magosque magna apud eam gentem, & sapientia & diuinæ cuiusdam virtutis auctoritate & exultatione floruisse, vtpote qui se Moyse opponere ausi fuerint, similiter illi mira quædam operantes. Nec Deus per Moysen tam graues pœnas aduersus Magos constituisset, nec tam se uerè eorum consuetudinem & congressum Iudæis interdixisset, nisi iam tunc eorum ars, sicut hominibus exitiosa erat, sic nota & celebris fuisset. Porro circa belli Troiani tempora claram fuisse Magicæ famam, non obscurè indicat Homerus, præsertim in Vlyssis erroribus, adeò vt totum opus non aliunde constet. Siquidem Protea & Syrenum cantus apud eum, non aliter intelligi volunt; Circe vtique & inferorum, euocatione hoc solum agi. Deinde apud Thessalas vrbes diu Magia, magna celebritate vigit. Orpheus quoque magnam ei fidem & auctoritatem addidit. Sed primus extat, vt inquit Plinius, de eo commentatus Osthane Xerxem Regem Persarum bello quod Græcis intulit, comitatus, qui velut semina artis portentosæ sparsit, obiter infecto quocunque commeauerat mundo; & hic maximè ad rabiem, non auiditatem modo sententiæ eius Græcorum populos egit. Sed ante hunc, clarissimum in ea arte Pythagoræ nomen fuit,

fuit Is autem quem dixi Pythagoras, & post eū Empedocles, Democritus & Plato ad hanc discendam nauigare, exilijs verius, vt inquit Plinius, quā peregrinationibus susceptis, hanc reuersi prædicauere, hanc in arcanis habuere. Sed maxime omnium Democritus, & aliorum suisq; editis de ea voluminibus, eodem tempore in Græcia, quo medicinam Hippocrates, hoc est, circa Peloponesiacum Græciæ bellum, & annum Romæ conditæ trecentessimū, eam illustrauit. Multis post hos sæculis, Apostolorum temporibus apud Brachmanas Indorum Iarchas, & apud Gymnosophistas Aethiopum, Tespion Magiæ existimatione illustres fuerunt: quo tempore Simonem cognomento Magum, *Simō Magnus.* propter hanc artem multum claruisse, omnis loquitur Ecclesiastica historia. Is Apostolorum æmulus, non apud Samaritanos modo, sed apud *Athor. 1.* Romanorum quoque principes, ad magicas eius præstigias attonitos, honores etiam diuinos obtinuit: ex quo velut parente, multiplex hæreticorum soboles prognata, & sub Christiano nomine magicas artes professa, religionē & disciplinam christianā apud ignaros, infamem & odiosam fecit. Verū omnes ante se postq; eius artis famæ celebres, longè superauit Apollonius Tyaneus, eius perdiscendæ studio totum penè orbem peruagatus, & cum ijs congressus quicunque tunc in ea clari habebantur. Is Magiæ scientia tantam nominis claritatem gloriamq; sibi comparauit, tantaquē sui admiratione hominum animos impleuit, vt à multis eius sapiētiā operaq; æstimantibus, & viuus & mortuus quasi

*Vnde tan-
ta Magia
auctori-
tas.*

quasi Deus haberetur. Taceo hic Plotinum, Porphyrium, Iamblicum, Proclum, Apuleiū aliosq; Pythagoricæ ac Platoniciæ sectæ plurimos, qui Magiam & coluerunt studiosissimè, & pugnantissimè defenderunt, & tanquam inter omnes sapientiæ partes clarissimam, vtilissimamquè, summis laudibus prædicauerunt. Sed quæret aliquis, quomodo Magia artium omnium varnissima & fraudulentissima, tantum in toto terrarum orbe totq; sæculis valuit? Huic quæstioni respondens Plinius primo capite tricesimi libri. Auctoritatem, inquit, ei maximam fuisse nemo miretur: quandoquidem sola, artium, tres alias imperiosissimas humanæ mentis complexa, in vnā se redegit. Natā primum è Medicina, nemo dubitat. ac specie salutari irrepsisse, velut altiore sanctioremq; quàm medicinā: ita blandissimis desideratissimisq; promissis, addidisse vires religionis, ad quas maximè etiam nunc caligat humanum genus. Atque vt hoc quoque suggererit, miscuisse artes mathematicas, nullo non auido futura de sese sciendi, atque ea è cœlo verissimè peti credente. Ita possessis hominum sensibus triplici vinculo, in tantum fastigium adoleuit, vt hodieq; etiam in magna parte gentium præualeat, & in Oriente regum regibus imperet. Hæc Plinius.

*Religio
disciplina
Christi te-
nebras
Magia &
veterum
malefica-*

CEA T E R V M illud hoc loco magno nostro gaudio ingentiq; gloria Christianæ religionis considerandum est, cum primum Euangelicæ doctrinæ lux mundo affulsit, omnium magicarum fraudum caliginem fuisse discussam atq; dissipatam. Simul enim fides Christi prædicata & rece-

& recepta mundo fuit, omnis magicarū artiū, oraculorum, vaticinationum cæterarūque diabolicarum fraudum vis concidit, defecit, euauit. Post Euangelium (inquit Tertullianus in libro de Idololatria) nusquam inuenies aut Sophistas, aut Chaldæos, aut Incantatores, aut Cōiectores, aut Magos, nisi planē punitos. Vbi sapiens? vbi literator? vbi conquisitor huius æui? Nonne infatuauit Deus sapientiam huius sæculi? Sic Tertullianus. Atque hæc ita fore, uti cernimus euenisse, multò antè Christus Dominus discipulos suos docuerat, nam apud Ioannem cap. 12. dixit: *Nunc iudicium est mundi, nunc princeps huius mundi eicietur foras: & ego si exaltatus fuero à terra, omnia trahā ad me ipsum.* Et apud Lucam capite 11. *Cum fortis armatus custodit atrium suum, in pace sunt ea, quæ possidet. Si autem fortior eo superueniens uicerit eum, vniuersa eius arma aufert in quibus confidebat, & spolia distribuit.* Quantum (inquit Eusebius libri primi De præparatione Euāgelica, c. 2.) recepta Christi fide mūdus profecerit, ipsis oculis cernimus. Non enim Persæ, qui eū secuti sunt, matres suas nefandis nuptiis cognoscunt, non humanis vescuntur carnibus Scythæ, nec carissimos, falsa religione impulsī liberos ingulant: nō Massagetæ ac Derbices propinquos atq; affines suos senectute confectos immolant, aut eorum carnes epulantur: nō Tybareni senes suos præcipitare, Hyrcani rapaci auiū gñi, nō Caspij canibus proijcere solent: quæ qdē antea religiosissimè faciebāt: nūc verò euange.

*vñ artiū &
mūdo dē
scussit.*

*Esa. 29.
1. Cor. 1.
Ibidem.*

euangelica virtute vndiq; hæc terra, fæda & immania flagitia explosa sunt. Quis iam doctrinã Christianam amplexus, Deos putat aut inania, & surda simulachra, aut maleficos Dæmões in eis habitantes, aut partes mundi, quæ conspiciuntur, aut mortuorum vmbra, aut etiam animalium vel abiectissima, & nocentissima, quibus tamē rebus uniuersæ penè gentes ante prædicationem Euangelij diuinos honores cultusq; tribuebant. Non satis existimari potest, inquit Plinius lib. 30. cap. 1. quantum Romanis debeatur, qui sustulere monstra, in quibus hominem occidere religiosissimum erat, mandī etiam saluberimum. Quis ergo satis æstimet, quantum debeant Christo, cum aliæ gentes, tū in primis, & gens, & vrbs Romana, cuius fidei ac doctrinæ beneficio, maximis est malis liberata, summisque beneficijs affecta? Roma enim (vt ait B. Leo sermone primo De natiuitate Apostolorū Petri, & Pauli) Deum suum ignorans, cum penè omnibus dominaretur gentibus, omnium gentium seruiebat erroribus; & magnam sibi uidebatur assumpsisse religionem, quia nullam respuebat falsitatem, in qua diligentissima superstitione habebatur collectum, quicquid vīquā fuerat vanis erroribus institutum, vnde quanto est per Diabolum tenacius illigata, tanto fuit per Christum mirabilius absoluta.



AN MAGIÆ STUDIUM ET
vsus sit licitus.

DVPLICEM supra Magiā fecimus, vnā naturalem, alteram non naturalem. Naturalis cum sit doctrinæ Physicæ, Medicæ, ac Mathematicæ pars nobilissima, per se bona & honesta est, hominumque studio & cognitione dignissima. Fortassè autem eius studium & tractatio publica meritò prohiberi posset in Republica, videlicet, si timeretur ne ea in vulgus prodita, multi (quæ est humani ingenij ad mala procliuitas) ad perniciem exitiumq. aliorū abuterentur. Nam licet medicina quoq. abuti possint medici, & ob eandem causam etiam prohibenda videretur, attamē alia est ratio Medicinæ, alia Magiæ: nam Medicina, & eius vsus est per se necessarius mortalib., & abusus manifestior est, quā vt omninò celari queat; ideoq. punitur ac emendari facilius. Magiæ verò, nec vsus societati hominum est per se necessarius, & est abusus occultus: latet enim per quas res & qualiter Magia operetur. Quamobrem valde timeri potest, ne, quò est occultior in operando, eò magis fiducia impunitatis, lubrica sit ad nocendum.

MAGIA verò nō naturalis, præsertim quæ *De studio* commercio & foedere inito cum Dæmone ni- *Magia.* titur, dupliciter addisci potest, vel speculatiuè tantum, vel etiam practicè, hoc est, uel noscēdi tantum causa, vel etiam vtendi & exercendi, Nuda cognitio Magiæ per se mala non est: om-

nis enim cognitio veri bonum quoddā & perfectio est intellectus; si enim cognitio malorum bona non esset, Deus eam non haberet; atqui Deus omnium bonorum pariter atque malorum scientiam perfectissimam habet, si per se mala esset cognitio huius Magiæ, ergo nulli prorsus eam discere aut nosse liceret. Quomodo igitur Ecclesiæ Doctores & rectores, huius Magiæ vanitates, fallacias, maleficia, impiasque superstitiones detegere & confutare possent? quomodo probare, mira illa quæ faciunt Magi, vel esse meras imposturas vel opera Dæmonum, vel occultarum virtutum naturalium effecta? quomodo demonstrare; nullum opus Magorum verè posse dici miraculum? quomodo docere, Christi miracula multum differre ac præstare Magorum miraculis, & nec Magos virtute diuina operari, nec Christum eiusque seruos miracula magicis artibus edidisse? Atque hoc animo & consilio nō nullis magiæ studere concessum est. Nos christiani (inquit Tertullianus libro de Anima) fallacem magiam non socia conscientia, sed inimica sciētia nouimus; nec inuitatoria operatione, sed expugnatoria dominatione tractamus multiformem hanc lucem mentis humanæ, totius erroris artificem, salutis pariter, animæque vastatricem. Itaque mihi quidem videtur recte dixisse Ioan. Picus Mirandulanus: Quò quis est magiæ peritior, eò clarius eum cernere quantum inter magorum & Christi atque sanctorum miracula interfit. Sed studium eius potest tripliciter non esse bonum; vel si quis illud præferat studijs vtilioribus, & tantum propter inanē quam
dam

dam curiositàtem illud capeſſat; uel ſi ad male agendum id referre velit; uel ſi propter imbecillitatem mentis periculum ſit, ne huius magiæ fraudibus & ſuperſtitionibus circumueniatur. Meritò igitur id ſtudiij publicè chriſtianis vetitum eſt, nec ulli niſi permiſſu rectorum Eccleſiæ conceditur.

V S V S autem huius Magiæ in totum dāna *De uſu*
 tus eſt & vetitus, non ſolū lege diuina & Eccle *Magia.*
 ſiaſtica, ſed etiam ciuili, nec chriſtianorum tan-
 rum, ſed etiam Gentilium Non eſt autem uſus
 Magiæ licitus: aut enim ibi eſt peccatum infide-
 litatis, ſi quis Dæmoni credens, tribuat ei diui-
 num numen: aut eſt peccatum idololatriæ, ſi
 oblationibus & ſacrificijs cultum dæmonibus
 adhibeat: aut ſaltem eſt peccatū inobedientiæ;
 quia tam Magus quàm qui opera Magi utitur,
 facit contra prohibitionem diuinam & eccleſia-
 ſticam. Cauſa autē huius prohibitionis triplex
 eſt. Primò, quia is peccat in ſeipſum, coniiciēs
 ſe in maganum deſcrimen, ſcilicet deceptum
 magicis fraudibus in graues errores labendi.
 Deinde iniuriam facit eccleſiæ, cum Dæmone
 habens commercium & familiaritatem, qui eſt
 omninò præciſus ab eccleſia eiꝑ. aduerſarius.
 Poſtremò grauiffimè Deum offendit, dum con-
 fugit ad Diaboli opem & auxilium; quaſi nō ſit
 omnipotens & homini abundè prouidens &
 conſulens Deus Chriſtianorum. Quàm graui-
 bus autem, & minacibuſ; uerbis Deus & uſum *Magia*
 & ſtudiū huius Magiæ prohibeat, ex uarijs ſcri *vetita di*
 pturæ locis liquidò cernitur. In cap. 19. Leuitici *uinis legi*
 ſic habes: *bus.* *Nō augurabimini, nec obſeruabitis*

somnia. Nō declinetis ad Magos, nec ab ariolis aliquid sciscitemini, ut polluamini per eos. Et cap. sequenti 20. *Aīa quę declinauerit ad Magos & ariolos, ponā faciē meā cōtra eam, & interficiā illā de medio populi sui.* Et cap. 18. Deutero. Nō inueniatur in te qui sciscitur ariolos, et obseruet somnia et auguria: nec sit maleficus, nec incantator, neq; qui Pythones cōsulat, aut quęrat à mortuis veritatē. Oīa .n. hęc abominatur Dñs; & pp istiusmodi scelera delebit has gentes in introitu tuo. Et 4. lib. Reg. c. 1. Ochozię regi Israel qui miserat nunciū ad consulendū Beelzebub Deū Accaron de ægritudine sua: Elias hęc renunciari iussit: *Nūquid non est Deus in Israel, vt eatis ad consulendū Beelzebub Deū Accaron? Quamobrē hęc dicit Dominus; De lectulo super quē ascendisti, non descendes, sed morte morieris.* Et li b. 2. Paralipom. cap. 33. inter alia scelera regis Manassis, hęc connumerantur: *Observabat somnia, sciscitabatur auguria, maleficis artib. inserviebat, habebat secū magos & incantatores; multaq; mala operatus est corā Dño, vt irritaret eū.* Cuius seuerissimi præcepti hęc rōnē reddit Philo in lib. De specialib. legibus: Non finitoster legislator procrastinari veneficorū supplicia, sed absq; mora vult exigi: qđ dilatio, noxijs opportunitatē peccandi præbeat, cæteris merū afferat, existimantib. q. c. quid illorū vitæ accedit suæ securitati decedere, Idcirco sicut viperas, scor-

Egregia
Philonis
sententia

Scorpios, aliasq; venenosas bestiolas, priusquā mordeant aut saucient, aut etiam se commoueant, sine mora ad primum aspectum occidimus, præcauendo naturalem eorum malitiam priusquam noceant, eodem modo eiusmodi homines plectendi sunt, qui magicis suis artificijs & maleficis artibus incautos homines non solū errore implicāt sed in graues calamitates intrudunt. Sic Philo. Quā essent autem hæ artes magicae, & Apostolis, & nascentis Ecclesiæ Christianis abominabiles, & exosæ, uel vnus locus, qui est in 19. capite libri De Actis Apostolorum, apertissimè declarat, ubi sic legimus: *Multi ex his, qui fuerant curiosa sectati, contulerunt libros, & cōbusserunt coram oībus.* Vt autē, & multitudinē, & pretiū librorū intelligeremus, subditur eos quinquaginta denariorū millibus fuisse æstimatos, illos autem libros de rebus curiosis, Chrysostomus, Augustinus, Beda, Oecumenius alijq; de rebus magicis scriptos fuisse interpretantur. Restat ut de magis Pharaonis, qui se opposuerunt Moyse, nonnulla disputemus.

DE MAGIS PHARAONIS,

Exodi 7.

SACRA Scriptura narrat Pharaonē aduersus Moysen iussisse accersiri sapientes, & maleficos, qui per incantationes Aegyptiacas, & arcana quædā similia fecerūt, tribus prioribus prodigijs à Mose factis: sapientes uocat, uel Astrologos, uel Philosophos, præsertim Magiæ na-

turalis peritos: Maleficos autem, qui Magiam illam quam supra nominauimus, nō naturalem, renebant, & exercebant. Itaque horum nomine significantur præstigiatores, Necromantici, & qui magicis artificijs abutuntur ad patranda scelera, velut adulteria, furta, homicidia, atq; ob id dicuntur malefici: nam & faciunt mala, & malo modo, nimirum Dæmonum auxilio cū multis item fraudibus, mendacijs, & hominum deceptionibus. Dicuntur autem, ut refert Iosephus lib. 2. Antiquitatum, illi Magi fuisse sacerdotes: apud Aegyptios enim tales erant existimatione omnis sapientiæ sacerdotes, quales apud Indos Brachmanes, apud Aethiopes Gymnosophistæ, apud Græcos Philosophi, & apud Iudæos Prophetæ. Dicit autem Scriptura, eos operari solitos per incantationes Aegyptiacas, & per quædam arcana: nam operabantur cantando quædā verba modo carminum: sed quia vel verba illa erant secreta, Onkelus vertit, susurrations: uel modus quo operabantur, erat secretus, & occultus, idē vocantur arcana. Dicuntur autem Aegyptiaca, non quod primum in Aegypto inuenta fuerint, sed quia verbis, & ritibus Aegyptiacis constabant, uel quia nō idem est genus, & modus incantationum apud omnes gentes, sed alius alibi gentium. Septuaginta interpretes uocant Sophistas, & Pharmacos, id est veneficos, & incantatores, Onkelus Magos, Aquila vertit *μυσταιστές*, id est, occultorum cognitores, & patratores.

*QUI FVERVNT ILLI MAGI
qui restiterunt Moyfi coram Pharaone.*

SCRIPTVRA neminem eorum nomina-
tim appellat: Sed B. Paulus posterioris Epi-
stolę ad Timotheum cap. 3. ait Ianne & Mambre
restitisse Moyfi. Chrysostomus illum locum ex-
ponens ait, Paulum illorum duorū nomina cō-
perta habuisse ex antiqua certaq; Hæbreorum
traditione, uel ex Spiritus sancti reuelatione.
Sic etiam Theodoretus & Theophylactus. Alij
dicunt fuisse librum quendam apocryphum,
qui inscribatur liber Iannis & Mambres, ex
quo libro uolunt Paulū transcripsisse illorum
magorum nomina. Quod probare uidetur O-
rigenes Tractatu 35. in Matthæum, ubi exponēs
verba illa Pauli, ait nomina illa Magorum non
inueniri in scripturis publicis, sed in secreto
quodam libro qui inscribitur, Liber Iannis &
Mambres. Quapropter nonnulli epistolam illā
Pauli reijcere ausi sunt, tanquam apocryphis
utentem testimonijs: cum tamen, inquit Orige-
nes, nemo adhuc ausus sit reijcere priorem epi-
stolam ad Corinthios, in cuius capite 15. citatur
sententia quædam ex menandro Poëta. Hactē-
nus ex Origene. à quo non discrepat vulgo pu-
tatus Ambrosius, eundem illius epistolę locum
explanās, exemplum, inquit, hoc de apocry-
phis est: Iannes enim & Mambres fratres erāt
magi vel venefici Aegyptiorum, qui arte Ma-
gię suę, uirtuti Dei quę per Moylen operabat̃
emulatione cōmēticia resistere posse putabāt.

Sed cum Moyſi uirtus operibos creſceret, hu-
miles facti, cum dolore vulnerum fateri coacti
Exod. 8. ſunt Deum in Moyſe operari. Gelafius Papa Di-
ſtinct. 15. ſancta Romana Eccleſia, hunc librum
Iannes & Mambres inter apocryphos numerās
reprobat. Horum etiam Magorum meminit
Plinius lib 30. cap. 1. & vocat Iamne & Iotape,
falſò dicens eos fuiſſe Iudæos: ſed in eo præte-
rea fallitur, quòd iſtos multis annorum milli-
bus fuiſſe dicit poſt Zoroaſtrem; cum Iuſtini
libro primo conſtet Zoroaſtrem fuiſſe tempo-
re Nini primi Aſſyriorum regis, quo regnan-
te natus eſt Abraā, à cuius ortu uſque ad tem-
pus iſtorū prodigiorum, non niſi quingenti-
quinque anni fluxerunt, quin ab ipſo diluui-
o non amplius ſeptingentis nonaginta ſepem præ-
terierunt. De his quoque Numenius Pythago-
ricus in 3. lib. De bono, ita ſcribit; Iannes & Mā-
bres, Aegyptij erant, magicis artibus adeò præ-
potentes, ut Muſeo Iudeorum duci viro Deo cō-
iunctiſſimo, ſoli reſiſtere poſſe à cunctis Aegy-
ptijs iudicati ſint: multas enim calamitates quas
Muſæus Aegypto intulit, ſoluere viſi ſunt. Hæc
reſert Eusebius lib. 9. De præparatione Euan-
gelica, cap. 3. Hos autem Magos fratres fuiſſe,
& Ambroſius loco ſupradictò affirmat, & ex
narratione B. Macharij Palladius commemo-
rat. Sed quia in Macharij & Palladij mentio-
nem incidimus; non alienū fuerit hoc loco quæ
Memora- narrat Palladius, vitam Macharij ſcribens de mi-
bi liſ hiſto- rabili horum Magorum ſepulchro ab ipſo Ma-
ria. chario viſa & comperta, & deinde narrata Pal-
ladio, hic adſcribere. Dicebat Machari⁹ Iāné, &

Mam.

Mambrem fuisse fratres, propter magicæ artis excellentiam, maximam apud Pharaonem & Aegyptios tunc temporis habentes auctoritatē atque potestatem: qui dū viui essent, intra quamdam Aegypti solitudinem, in hortis quibusdam sepulchrum sibi construxerunt ex lapidibus quatuor pedum magnitudine, multumque auri illic condiderunt, & omnis generis arbores plantauerunt, & maximum aquæ puteum foderunt, sperantes fore ut post suum obitum in illo paradiso delicijs fruerentur. Hic autem locus, ut communi illius regionis fama ferebatur, à Dæmonibus tenebatur atque custodiebatur. Incessit Macharium cupido visendi locum profectusque; cum iam propè accessisset, obuiam illi occurrerunt ad septuaginta Dæmones varijs formis, alij clamantes, alij exiliētes, alij magno cum fremitu in eū stridentes dentibus, alij figura coruorum in eum inuolantium, quibus euanescentibus, ingredienti iam in paradisum, occurrit Diabolus cum distrieta romphæa ei minitans: quem facto crucis signo repellens, ingressus est locum; omniaque contemplatus, reperit cadum æneum catena ferrea pendentem ex puteo, iam tempore consumptum, & fructum malorum punicorum, quæ nihil intus habebant, fuerant enim arefacta sole; & plurima aurea donaria. Hæc Palladius de sepulchro horum Magorum ex Macharij relatione.



CAPVT XVI.

*AN PRODIGIA QVÆ MAGI ILLI
fecerunt, fuerint vera, an tantum
simulata.*

MAGNA quæstio est, varijs scriptorum
sententijs in vtramque partem agitata,
an serpentes illi seu dracones, in quos scriptura
narrat virgas à Magis proiectas, fuisse Aegyptia
cis incantationibus atque arcanis cōuersas, (fue
rint veri & naturales serpentes, non minus quā
is in quem virga Aaron mutata fuit, an potius
fuerint simulachra quædam tantum & imagines
serpentum qui à Dæmonibus, serpētum modo
*Exod. 7. mouebantur. Quod autem de serpentibus Ma-
g. 8. gorum diximus, de aqua mutata in sanguinem,
& ranis productis itidem intelligi volumus.*

*Prima opi-
nio, fuisse
veros ser-
pentes.* MVLTI & graues scriptores existimarunt
serpentes illos fuisse naturales: hoc enim docet
Theodoretus in Quæstionibus suis in Exodū,
quæst. 18. idemque apertius & copiosius B. Au-
gustinus libro 3. de Trinitate, c. 7. & 8. & in lib.
oëtogintatrium quæstionum, quæst. 79. quem in
hoc ferè secuti sunt Theologi Scholastici. San-
ctus Thomas affirmatissimè hoc tradit in Com-
mentarijs super 24. c. Euangelij secundum Mat-
thæum, & prima parte, quæst. 14. art. 4. in eandē
inclinat sententiam Beatus Bonauentura 2. Sen-
tentiarum, distinct. 7. quæst. 2. Caietanus adeo
clarum id esse inquit in scriptura, vt in dubium
minimè verti possit, hoc etiam sentiunt Lyr-
nus, Tostatus, & Paulus Burgensis, & confirmari
potest

potest argumētis B. Thomæ desumptis ex prima parte, loco supra citato.

VERVM ex aduerso multo plures & antiquiores, nec minus doctrina & antiquitate præstantes, prodigia illa Magorum non fuisse veros & naturales effectus, sed tantum simulatos, & apparentes, & artificio quodam magico ac diabolico spectantium oculis imponētes, & senserūt, & scriptis suis prodiderunt. Nam Iosephus lib. 2. Antiquitatum ait illos serpentes Magorum, specie verorum serpentum repperisse, sed fuisse præstigias, veritatis specie hominibus non admodum cautis imponentes. Simile quippiam innuit Philo lib. primo De vita Moyſis hoc factū Magorum enarrans. Iustinus martyr in libro Responsionum ad quæstiones Orthodoxorum, in responsione ad quæstionem 26. Quæ, inquit, à Moyſe facta sunt miracula, quia diuina virtute sunt edita, facta sunt mutatione rei propositæ, in naturam eius quod efficiebatur: at, quæ à Magis, opera Dæmonis sunt facta, spectantium oculis præstigias offundebant, vt qui serpens non esset, eum viderent quasi serpentem, & non sanguinem quasi sanguinem, & non ranas quasi ranas. Tertullianus in libro De anima: Possunt, inquit, & solent Dæmones phantasmata præstare, & corpora fingere, quibus exteriores oculos circumueniant. Corpora enim videbantur Pha-raoni & Aegyptijs magicarum virgarum dracones: sed Moyſis veritas, mendacium eorum deuorauit. Gregorius Nissenus: Qui ex virga Moyſis, inquit, factus est serpens, verè animatus, Magorum virgas reuera ligna, visus autē deceptione

Altera opinio nō fuisse veros serpentes.

serpentes, facile deuorauit. Græcus interpres, quem citat Catena in Exodum ait, illos serpentes Magorum fuisse meras præstigias, nihil verorum serpentum præter speciem & imaginem habentes, hoc etiam super cap. 7. Exodi affirmant Rupertus, Rabanus, & Hugo de S. Victore. Idem quoque satis indicat Ambrosius interpretans cap. 3. posterioris epistolæ ad Timotheum: Iannes, inquit, & Mambres virtuti Dei quæ per Moysem operabatur, commeticia æmulatione resistere conati sunt. Eundem Pauli locum explanans Beatus Hieronymus: Sicut, inquit, illi Magi artis magicæ præstigijs Moyse, sic nonnulli argumentorum fallacijs, christianæ veritati ac simplicitati resistere, ac illudere conantur.

Auctoris sententia fuisse veros illos Magos serpentes. NE V T R A hæc opinio euidenter ex sacris literis, aut humanis rationibus, vel probari vel reprobari potest: videtur tamen aliquanto probabilius B. Augustini sententia. Scriptura enim Exodi 7. ijsdem verbis eodemque modo narrat virgam Aaron veram esse in serpentes, & item virgas Magorum: ergo si ille Aaron fuit verus serpens, pariter etiam serpentes Magorum veri fuisse videntur. Ibidem quoque dicitur virgam Aaron deuorasse virgas Magorum, hoc est, serpentem ex virga Aaron factum, deuorasse serpentes ex Magorum virgis factos, non dicetur autem deuorasse illos, nisi fuissent veri serpentes. Deinde sequenti capite octauo traditur Magos defecisse in tertio signo, nec potuisse producere ciniphes: ex quo satis intelligitur, verè & non in speciem tantum eos duo priora signa fecisse.

fecisse. Moyses item detexisset fallaciam, si non fuissent veri serpentes. Quid quod scriptura vocat simpliciter serpentes, & ex nulla circumstantia narrationis colligi potest eos non fuisse veros serpentes: nec repugnat fuisse veros, ergo probabile valde est veros & naturales serpentes fuisse.

CAPVT XVII.

QUOMODO MAGIEFECERINT
illos serpentes.

QUATVOR vel quinque modis cogitare possumus Magos fecisse serpentes, sanguinem, & ranas; duobus vel tribus in specie tantum & simulatè, duobus alijs, vere. Primo enim species & phantasmata virgarum & serpentum, quæ & sanguinis & ranarum quæ erant in phantasia & imaginatrice facultate, Demones commouendo & turbando spiritus in quibus erant illæ species, potuerunt facere ut illæ species refluerent ad sensum communem vel etiam ad sensum visus; verbi gratia, primò species virgæ mox ea sublata, species serpentis: ita ut uideretur virga conuersa in serpentem. Vide hæc tractata apud S. Thomam prima parte, quæst. 114. & 111. artic. 3. & 4. idemque in alijs fieri cernitur. Namque in somno motu vaporum ascendentium in cerebrum, atque descendentium, refluentibus speciebus rerum sensibiliū ad primum sensum, dormientes videntur sibi & uidere & audire, & vi morbi idem contingit phreneticis. Deinde potuit fieri, ut Dæmon virtute aliqua naturali occulta, spectantium visum ita inficeret

ret vel turbaret, vt viderentur esse quæ non erant, & non esse quæ aderant: quemadmodum ægrotus corrupto palato & gustatu, dulces cibos iudicat amaros. Tertio modo potuerunt Dæmones virgas illas Magorum subito conuertere in serpentes, applicando illis inuisibiliter aliqua agentia naturalia nobis ignota, ad producendos serpentes potentissima & efficacissima. Quarto modo fieri potuit vt Dæmones non aduertentibus qui spectabant, virgas à Magis proiectas, subito è conspectu illorum clam auferrent, & pro illis serpentes mole æquales ipsis, vel ante præparatos, vel aliunde tunc celerrimè asportatos, intuentium oculis subijcerent, ita vt virgæ in serpentes viderentur esse conuersæ. Potuit etiam quinto modo illud fieri, vt Dæmones virgas illas in modum & formam serpentum figurerent, vel figuram serpentum illis affingerent, & in illis motum qualis est verorum serpentum, ipsi efficerent.

QVI negant illos serpentes magorum, fuisse veros & naturales, eos necesse est sequi vel duos priores modos, vel certè quintum modum. Sed contra priores duos modos illud pugnat, quod scriptura ait factos esse serpentes: non igitur solum erant in imaginatione vel aspectu intuentium, sed extra quoque erant serpentes: nõ enim dixisset scriptura, Magorum virgas veras esse in serpentes. Contra quintum modum facit quod scriptura dicit, serpentem factum ab Aaron deuorasse serpentes Magorum: quomodo autem deuorasset illos, nisi fuissent veri serpentes. B. Augustinus, S. Thomas, Bonauentura, Caieta-

Caietanus, & Burgenſis ſequuntur tertium modum; qui tamen ſicut nec Lyrano, nec Toſtato, nec mihi ſit probabilis. Certum enim eſt, nec Dæmones potuiſſe immediatè producere ſerpentes, ſed tantùm adhibendo cauſas naturales eorum productrices. Certum etiam eſt, nullum agens naturale naturaliter operando poſſe ſubito producere formam ex materia non ante diſpoſita, & præparata. Certum etiam eſt, diuerſas formas exigere diuerſas materię præparationes, & quò formæ ſunt nobiliores, eo plures, & operoſiores præparationes depoſcūt: maior n. præparatio ſit materiæ ad formam mixti quàm ad formam elementi, & maior ad formam animalis perfecti, quàm vel mixti inanimati uel plantæ. His poſitis, quæ ſecundum veram Philoſophiam negari non poſſunt, quæramus an Dæmones produxerint illos ſerpentes immediatè ex uirgis: at materia virgæ eſt admodum remota, & aliena recipiendæ formæ ſerpentis. Si dicant non immediatè ex uirga productos eſſe ſerpentes, ſed varijs tranſmutationibus præmiſſis: at tot, & tam variæ tranſmutationes ſubito fieri non potuerunt, ſtatim enim atque Magi proiecerunt virgas, apparuerūt ſerpentes. Quid qđ, cum naturaliter producitur ſerpens, non ſtatim producitur magnus, ſed primo paruus, deinde paulatim acquirit iuſtam magnitudinem: at illi ſerpentes ſtatim producti ſunt magni, nimirum æquales uirgis Magorum, non enim uiſum fuiſſet virgas mutatas eſſe in ſerpentes, niſi ſerpentes fuiſſent æquales uirgis.

CAIETANVS vt uim harum rōnum ab ipſo

*Caieta-
nus refel-
litur.*

ipso, ut arbitror, præuisam effugero, duo repe-
rit effugia: altera est, eo tempore quod effluxit,
dum Pharaon uocauit Magos, & ipsi ad eum a-
dierunt, Dæmones ultimam dispositionem pro
forma serpentis induxisse in illas virgas, atq; ita
cum proiectæ fuerunt, statim potuisse produci
serpentes: alterum est, licet agens naturale per
se non possit ex virga, & subito producere ser-
pentem, tamen ut est instrumentum Dæmonis,
illud posse, sicut motus, & lumē coeli multa pro-
ducunt quæ sunt ipso nobiliora, quatenus sunt
instrumenta intelligentiæ mouentis. Sed contra
primum effugium facit illud, quod sic non fuis-
sent illæ virgæ, non enim potest manere forma
virgæ cum vltima & proxima dispositione ma-
teriæ, & formæ serpentis, præterea dubium est
an illi serpentes seu ut alij uertunt, dracones, po-
tuerint aliter generari quàm ex semine. Secundū
effugium nihil ualet: nam licet agēs naturale ut
est instrumentum uel hominis, uel Angeli, possit
uel citius uel melius aliquid facere, tamen non
ob id potest ex qualibet, & in qualibet mate-
ria effectum suum producere, nec potest poste-
riorem formam inducere non inductis priori-
bus. Posterior enim, & nobilior forma, præ-
supponit necessario priores, & sicut inter for-
mas, ita inter earum dispositiones est ordo na-
turaliter immutabilis, ut non possit esse poste-
rior in materia nisi antea fuerit prior. Præte-
rea verus sanguis naturaliter non potest pro-
duci nisi in animali, & per calorem animalis,
& per certa instrumenta quæ in solo sunt ani-
mali.

RESTA igitur quartus modus supra expo-
 situs, qui & Lyrano & Tostato mihiq; sit verifi-
 milior: nam secūdum eum modum defendimus
 fuisse veros serpentes, atque ita euadimus dif-
 ficultates obiectas contra primum, secundum *Auctoris*
 & quintū modum: nec tamen dicimus eos pro- *snia, quo*
 ductos fuisse ex virgis, ne vrgeamur illis ratio *facta sit*
 nibus quibus tertius modus premitur. Vnus tā- *à Magis*
 tum scrupulus hæret, quomodo si nō fuerūt ser- *illa vir-*
 pentes producti ex virgis, dicantur virgæ con- *garum in*
 uersæ in serpentes? sed respondendum est, scri- *serpentes*
 pturam id dixisse, non quod ita fuerit secundū *mutatio.*
 veritatem, sed quia ita videbatur & æstimaba-
 tur spectantium iudicio. Nam & hoc quoq; di-
 cere oportet eos qui negant illos fuisse veros
 serpentes, & Caietanum qui vult illas virgas ha-
 buisse vltimam dispositionem pro forma serpe-
 tis: sic enim non poterant esse veræ virgæ, ut
 ostendimus, sed secundum speciem tātum, qua-
 re secundū eū, nec magi proiecerunt veras uir-
 gas, nec veræ virgæ sunt cōuersæ in serpentes.

SED dicet aliquis, cur p̄miserit Deus ut magi q̄ *Cur De-*
 cōtradicebāt Moyſi prodigia facerēt, cū ea res *us sit p̄f-*
 & diuinā virtutē q̄ p̄ Moysem operabatur, ob- *sus illa p̄*
 scurare videretur, & Pharaonis animū magis in *digia fieri*
 perfidia & inobediētia obfirmatū & destinatū *à magis.*
 redderet? Ad hoc Chrysost. homil. 46. in Acta
 Apostolorū, ita respondet: Permisit Deus magis
 aliqd aduersus Moysem, ne magus putaret esse
 Moyſes: permisit illos docere omnes quātū ma-
 gia imponat sensibus: vltra aut nō deceperunt,
 sed ipsi se victos confessi sunt: & non potest, in-
 q̄t, sine certamine clara esse victoria, & quo po-
 ten-

rentior est hostis, eò illustriorē reddit eius gloriam à quo se victū esse ipse confitetur sicut Magi victos se à Moyse cōfessi clariorē eius gloriā effecerunt. Theod. in Quæst. suis in Exod. q. 18. Ne q. s. inquit, suspicaretur Moysen arte magica mira illa fecisse; p. misit Deus Magos similia aliqua facere, vt quantū inter diuinā virtutem & magicas operationes interesset, tum euidentia rerū, tum ēt Magorū confessione, clarissimē innotesceret. Mutat Aaron virgā in serpentem, mutant etiam Magi virgas suas in serpentes: sed serpens Aaron præualens, Magorū serpētes deuorauit. Mutant Magi aquam in sanguinem: sed nō rursus possunt sanguinem mutare in aquā, sicut fecit Moyses: p. ducūt ranas, sed eas auferre sicut Moyses nō possunt: & qui maiora animalia fecerunt, minora, id est, ciniphes, facere nō potuerūt. Deniq. nec vlcera ipsi cauere, nec vlcerū dolorē quo vehemēter afflictabantur mitigare, nedum auferre potuerunt. Quamobrē Moysen lōgē superiorē q̄ ipsi essent, & diuinā uirtutē quæ operabatur, artib. suis magicis præstātiorem confessi, dixerunt: *Digitus Dei est hic.*

Exodi 8. Verūm nos quia hunc de Magia librum, ut perspicuitate orationis, & varietate atque ordine disputationum, delectuq; probabiliorū sententiarum, firmiterūq; rationum; sic breuitate (quæ magna est legendi discendiq; illecebra) commendatum lectori & probatum esse cupimus, expositis iam quæ ad propositi a nobis argumenti tractationem & explicationem pertinebant, hic ei finem imponamus.



BENEDICTI

PERERII,

LIBER SECVNDVS,

qui est

DE OBSERVATIONE

Somniorum.



NON vnum est genus nec vna somniorū ratio; quocirca nec par est omnium causa, vt æque oīa vel approbari vel improbari debeant. Multa quidem somnia derident sacræ literæ: alia etiā damnant: quædam verò cōmendant ac venerantur. Sunt n. plerāq; inania: nec pauca sunt naturalia, ex certis naturæ causis profecta. Sunt idem alia Demonis caliditate ac malitia mortalibus iniecta: denique nonnulla diuinitus hominibus data sunt. Diligens porro somniorū tractatio, pulcherrimam per se ac iucundissimam parit cognitionem, & ad obscuros diuinæ scripturæ cōplures locos illustrandos valet plurimum: regendæ verò ac moderandæ hominum vitæ utilissima esse potest. Sed in primis ad redarguendam quorundam hominum inscitiam (sed verius dixerim stoliditatem & vecordiā) qui nimis curiosè &

anxiè ac superstitiosè obseruât somnia , perma-
gno est adiumento . His ego rebus adductus, de
somniaiorum natura, varietate ac veritate nōnul-
las quæstiones scitu maximè dignas atque vtilis
hoc libro explicandas suscepi.

INDEX QVÆSTIONVM
libri Secundi qui est de Somnijs.

PRIMA.

- Q**uestio; *An somnijs habenda sit fides.*
II. *De causis verorum somniorum.*
III. *Quibus signis dignosci queant somnia diuina
à non diuinis.*
IIII. *Cur Deus in somno arcana homines doceat*
V. *Cur à Deo somnia dentur indoctis hominib
sapius quàm sapientibus.*
VI. *Cur diuina somnia nonnunquam sint obscura
& perplexa.*
VII. *An licitum sit homini christiano obseruare
somnia.*
VIII. *Cuius hominis sit ritè interpretari somnia.*
IX. *An in somno usus rationis & voluntatis liber
esse queat.*
X. *De somnio Salomonis, in quo donum sapientia
à Deo promissum ei & tributum est.*



QVÆSTIO PRIMA,

AN VLLA SOMNIIS

habenda sit fides.

IN diuersa, vulgi ac sapientū super hac re distrahuntur sententiæ: quamquam vno verbo ea quæstio posset expediri facta somniorum distinctione: nōnullis enim somnijs sine dubitatione fides habenda est: plerisque tamen penitus deroganda. Nimirum, aut omnibus, aut nullis credere somnijs, par est vecordia, & videtur extremæ utrūque uel stoliditatis, uel contumaciæ. Sed profecto, & scitum, & uerum est illud Ciceronis dictum: nihil tam absurdè dici posse, ut non ab aliquo Philosophorum dicatur. Quid enim esse potest magis *ἀλογον* & *ἀδύνατον*, quàm omnia somnia uera, & credenda esse arbitrari? Ecce tibi Prothagoras, unus sanè ex illo priscorū philosophorum senatu, omnibus somnijs fidem arrogat, magna auctoritate decernens, ueritatem, & falsitatem nō ipsa natura rerum, sed sola existimatione hominum constare: hominem esse mensuram omnium, & tale unumquodque esse, quale uidetur homini, siue sobrio, siue uinolento, siue sano, siue infano, siue uigilanti, siue dormienti. Affines huic errori fuere quidam Stoici, nimio plus superstitiosi, ac penè fanatici Philosophi. quia nulla reiiciunt somnia, in omnibus esse rati uim significandi, ac denotandi aliquid. Existimari tamen aiunt, quædam somnia inania, & falsa, q̃ sint admodū tenuiter expressa,

*Cic. in 2.
de Diuina-
natione.*

*Omnia
somnia es-
se uera,
Protha-
gora, &
Stoicorū
opinio.*

Xenophanes, & Epicureorum opinio omnia somnia esse vana.

ob idq; obscura, & ad intelligendum difficilia: & quia propter ambiguitatem, varias ad res videntur posse applicari, propterea nihil certum ex eorum obseruatione nobis constare: præsertim verò, quòd ad eorum somniorum vim discipiciendam, par hominum solertia, & sagacitas non facilè inueniatur. Ex aduerso, his contraria sentientes Xenophanes Colophonius, vel ipsa vetustate memorabilis Philosophus (nascentis enim in Græcia philosophiæ propemodum equalis fuit) mollis item ac delicatæ Epicuræ disciplinæ sectatores, omnium somniorum fidem & auctoritatem sustulerunt. Non esse autem visis credendum somnijs, sic illi argumentabantur. Vna vis est, eademq; natura omnium somniorum: par igitur credendi aut omnibus, aut nullis ratio esse debet. Sed plerisq; somnijs nō esse credendum, confessio est omnium: nihil ergo causæ est, cur plerisq; reiectis, aliquibus præcipuè credere debeamus. Adijce, quòd si quædam somnia vera, & certa sunt, aliquas esse certas ipsorum effectrices causas necesse est. At quas? naturam, inquiunt, & Deum. Sed natura quidē amica est ordinis, & constantiæ; in somnijs nullus ordo inest, sed plena temeritatis inconstantia. Dei autem maiestate alienum, & indignum viderur, obire Deum lectos dormientium, concurrere grabatos, & stertentibus iniicere somnia, quæ illi expergiscentes, uel non recordentur, uel non intelligant, uel etiam contemnant, uel si curanda sibi putent, stulta impleti superstitione, dies noctesq; animi pendeāt, aut inani impendentium malorum metu perterriti, aut fallaci

fallaci futurorum expectatione bonorum elati. At, quantò & rationi conuenientiùs, & Dei præstantia dignius, atque utilitati hominis consultùs fuisset, uisà dare non sordidis & indoctis hominibus, sed optimis & sapientibus uiris, nò dormientibus, sed uigilantibus, nempe magis ad intelligendù idoneis: nec per circuitiōem, & anfractus, atque ænigmata, sed propriè, apertè, & explicatè significare Deum, quod ab homine uellet intelligi.

H A E C isti de somniis balbutiunt, in totum ea uel approbantes, uel damnantes; uidelicet *Vera sententia de somnijs.* per extrema, ueritati deuia, inerrantes. Sed uera sententia de somnijs, quasi media insitens uia uaria facit so-

mniorum genera; quorum plurima tanquam inania, & ab omni ratione uacua; nec ulla fide digna planè abiudicat & reijcit. Hoc, cum luce *Pleraque somnia esse uana.* olis clarius sit, superuacaneum est argumenta-

ri. Id enim quotidiana docet experientia, rotas *se uana.* quotidie noctes somniamus, quorum igitur quotq; de tot somnijs, verum euadit? Euadit quidem aliquod nonnunquam verum, sed quia id rarissimè, ac siue ratione ulla contingit, nihil afferri potest, cur non casu & temerè accidisse credatur. Idem quoque ratio ipsa fateri cogit. Nam quæ alia est istiusmodi somniorum causa nisi quia spiritus, sentienti animæ, præsertim autem phantasæ, cuius est fingere somnia, deser-

Causa somniorum. uentes, in quibus insident atq; inhærent, rerum in uigilia perceptarū reliquiæ, ac uestigia, quas in scholis appellamus species, eiusmodi inquâ spiritus, in somno vaporib. cibi potusq. caput subeuntibus agitati, & huc illac iactati, uaria

reddunt visa & somnia, sed propter inordinatā eorum spiritum iactationem, valdè incomposita, sæpè etiam turbulenta & distorta, denique talia, vt nullam vim significandi aliquid habere queant. Sic profectò sunt somnia, vt quæ in nubibus variè figurantur, vel animantium, uel aliarum rerum similitudines & imagines, quas cernimus breuissimo tempore in alias, atque alias commutari, & mox dissolui omnes, ac penitus euanescere. Has imagines, qui certam vilius rei significationem facere putaret, obtusus & excors haberetur, at non minoris videtur incitiæ, certas significandarum rerum notas, & signa eiusmodi somnijs attribuere. Si ebriorum, phreneticorum, & insanorum visa negligimus, & pro nihilo ducimus, æque profectò ridenda, & contemnenda sunt somnia, quin eo magis, quod plerūque magis ipsa sunt inordinata, cōfusa, & monstrosa, Facetè quidam, sed verè tamen dixit, si natura sic esset comparatum, vt ea dormientes agerent, quæ somniant, fore omnino necessarium, ut alligarentur omnes, qui cubitum irent, quippe magis ridicula & absurda, magisq; incredibilia, quàm vlli faciant insani, facturos esse somniantes. Hanc quoque sententiam confirmat diuina scriptura, deridens leuitatem & vanitatem eorum, qui somnij, hoc est,

Testimo- rebus futilissimis ac mendacissimis credendo,
nia diui- dignos se præbent, qui omnium irrisione ludan
na scriptu tur. Itaq; in libro Ecclesiastæ capite quinto sic est:
ra de va- *Vbi multa sunt somnia, plurimæ sunt vanita*
nitare sō- *tes, & innumeri sermones. In lib. itē Ecclesiast.*
niorum.

capite

capite 34. ita legimus: *Somnia extollunt imprudentes, quasi qui apprehendit umbrā, & persequitur vêtum, sic & qui attendit ad insomnia, multos errare fecerunt somnia, & exciderunt sperantes in illis.* Denique, cum scriptura vult significare aliquid vanum, instabile, fugax, & fallax, somniorum comparatione, ac similitudine persæpè declarat.

CAETERVM, vt plurimis somnijs abesse veritatem, fidemque, non est negandum, ita quædam esse vera, & certa somnia, fatendum est. Nā si nullis insomnia, qui idquam veri & certi esset, inscientser profectò, ac supersticiosè clarissimi medicorum, somnia, quæ frequenter agris contingunt, ad eorum morbos dijudicandos curandosque rā subtiliter & curiosè obseruarèt. Stulto item labore physiologi se fatigarent, somniorum causa, vires, ac significationes rāto studio, & diligentia venando ac speculando. Mendaces præterea essent tot superiorum temporum historia, clarissimis testatæ consignatæque monumentis, refertæque exemplis verorum somniorum, quæ ad verbum cum rerum euentis mirificè conuenerunt. Quid in sacris literis quot memorantur somnia, non vera & certa modò, sed etiam diuinorum mysteriorum plenissima, repetat memoria lector somnia Abraæ, Abimelech, Iacob, Laban, Ioseph, Pharaonis, Salomonis, Regis Nabuchodonosor, Danielis, Mardochei, Iudæ Machabæi: in nouo autem Testamen- *Multa somnia est se vera.* *Matt. 1. & 27.*
to, somnia Beati Ioseph, Magorum, vxoris Pili-
ti, denique somnium D. Pauli, quod à Luca in

Aff. 16. li b. de Actis Apostolorum narratur. Hanc somniorum distinctionem, etiam Homerus poëtico more, fabularum integumentis velatam, significauit, cum duas finxit portas, vnā corneam per quam emitterentur ad homines vera somnia: alteram eburneam, per quam ederentur falsa. Homerum imitatus, vt ferè solet, Virgilius lib. 6. Aeneidos, eandem sententiā expressit his versibus:

*Homeri
cōmētum
ad signi-
ficandam
verorum
atque fal-
sorū som-
niorū di-
stinctio-
nem.*

Odyf. 7.

*Sūt geminae somni portae, quartū altera fert
Cornea, qua ueris facilis dat exitus umbris,
Altera candenti perfecta nitens elephāto,
Sed falsa ad cælū mittunt insomnia manes.*

*Mac. lib.
1. c. 3.*

Cur autem poëta, ueris somnijs corneā portam, falsis eburneam assignauerit, causam exponit Macrobius in eo commentario, quo somniū Scipionis explanauit.

Q V Æ S T I O I I.

D E C A U S I S V E R O R V M Somniorum.

*Varia de
somnia-
rum
causis, au-
ditorum sē-
tētia.
Hippocra-
tes.*

DI C T V M est, alia esse somnia falsa, & alia vera: reiectis igitur falsis, vera contemplemur: Verum, quia quæ sint vera somnia, & quo insigni atque nota internoscantur à falsis, planè intelligi non potest, nisi verorum somniorum causas omnes rimemur, & aperiamus, propterea quid ab alijs de huiusmodi causis creditū & proditum sit, hoc loco docere conuenit. Hippocrates in libro de Insomnijs, duo statuit somniorum verorum genera, alterum nominat diuinum

uinum, alterum naturale. Diuina somnia, inquit à Deo mitti, & semper memorabiles aliquos casus, insignesque vel ad lætitiā & tristitiā, vel ad foelicitatem & miseriam, siue priuatā, siue publicā, euentus portendere, horum autem somniorum interpretationem, ex vatibus, rerumq. diuinarum interpretibus petendam esse. Tale fuisse dicitur somnium Cyri maioris, qui monarchiam Persarū condidit ad cuius pedes dormiētis, sol visus est, terque ab illo appetitus manibus, ter se conuoluens, elapsus est. Quo somnio magi Persarum sapientes, significari responderunt, eum triginta annos, & ita sanè contigit, imperio potiturū. Naturalia somnia, ex causis ferè intra corpus dormientis latētibus, existere putat Hippocrates, atque hisce somnijs affectiones ipsius corporis aut bonas, aut malas, indicari, hoc est vel plenitudinem ac redundantiam, vel cōtra inopiam atque inanitatem, vel aliquē eorum, qui sunt in corpore humorum, aut corruptum, aut suo loco motum, aut inordinatè & immoderatè agitatū. Horum verò somniorū obseruationem & coniectationem spectare ad medicum, eamque ad dirigendas ordinandasq. curationes permagni referre arbitratur. Plato in conuiuio, somnia vera & prænuntia futurorum, à dæmonibus proficisci existimat: dæmones enim esse medios inter Deum, qui est immortalis & incorporeus, atque homines corporatos & mortales. quippe cum sint ipsi & corporei, quales nos sumus, & immortales, qualis est Deus. Deū nāque censet Plato non immiscere se rebus humanis, nec proximè cū homini.

*Somnium
Cyri.*

Plato.

*Dæmonū
natura &
munus se-
cundum
Platonē.*

bus societatem aliquam & consuetudinem habere, sed comercia & colloquia inter Deum, hominesque, siue vigilantibus ipsis, siue dormientibus, per dæmones agitari & confici. Nimirū, dæmonum munus & officium esse inquit, preces & vota hominum referre ad Deum, & Dei munera & auxilia deferre ad homines: per hos, vaticinia, incantationes, magia, omnisque diuinandi ratio, & prodigiorū effectio, ad homines peruenit. Itaque dæmones esse Dei huncios, interpretes, & administratos: hominum verò esse quasi patronos, aduocatos, magistrōs, & vt fictio Apulei verbo dicam salutigerulos. Atq. hæc non solius Platonis, sed ante Platonem etiam Empedoclis & Pythagoræ fuit sententia: de qua, & contra quam, in libro 8. de ciuitate Dei. cap. 20. & 21. & in lib. 9. acutè docteq. disputat Augustinus.

Aristoteles.

Aristoteles in libello quem inscripsit de Diuinatione ex somnijs ducta, negat vlla dari hominibus à Deo somnia. Vera autem somnia, inquit, vel esse naturalia quædam signa, & ex naturalibus causis profecta, quæ scilicet periti Philosophi & medici vtiliter obseruant: vel esse quodammodo principia quædam eorum, quæ postea vigilantes acturi sumus: nonnunquam enim in quiete quædam occurrunt, quæ videntur ad aliquid agendum posse conducere, quibus post, a somno excitati ad benè agendum accommodatè vtimur, & iuuamur.

Stoici.

Stoici tres causas verorum somniorum constituunt. Primam Deum, qui cum sit rerum omnium scientissimus & prouidentissimus, hominiquè beneuolus ac beneficus, quo sit homo cautior, dat ei somnia,

quæ

quæ sint ipsi futurorum incidia, & eorum, quæ agenda ipsi cauendaq; sunt, documenta. Alterâ causam ponunt fatum, quo cuncta sunt velut æterna quadam serie, nexuq; colligata: siquidem rerum omnium futurarum, putant Stoici, & antecedentes causas, & præcurrentia signa, tū alijs in rebus, tum etiam in ipsis somnijs præmitti. Tertiâ causam faciunt naturam animi nostri, quæ diuina est: animus enim hominis, exterioribus sensibus per quietem consopitis, & ab omni actione vacatibus, ipseque negotijs curisque omnibus solutus ac liber, vegetior fit, & habilior ad intelligendum, tunc enim clarius præterita meminit, præsentia sentit, futura prouidet.

Porphyrus, veritatem somniorū refert, partim ad innatas animis hominum notiones, & velut insignitas rerum omnium notas, quas ex altera vita detulit animus, ad hoc corpus veniens: sed eo vehementer obrutus, atque oppressus, non potest eas vigilantibus sensibus cernere: in quiete vero clarius ei apparent, atque innotescunt.

Partim refert somnia ad dæmones: ad bonos quidem bona: & veracia: ad malos autem, praua, foeda, & fallacia. Synesius multa disputat de spiritu phantastico, quod est vehiculū animæ, eo namque medio, ceu quodam vinculo, cum terrestri hoc corpore colligatur & copulatur: in quo item solutus corpore animus, ex vno loco in alium mouetur, atque in eo maleficiorum poenas persoluit apud inferos, nec sine eo dum est in corpore, quicquam potest intelligere: In hunc porrò spiritū, omniū quæ sunt, fuerunt, eruntq; simulachra imprimuntur, & in eo lucet

tanquam

Porphyrus quid de veritate somniorum senserit.

Synesius mira sed falsa tradit de spiritu phantastico.

tanquam in speculo, præsentium quidem rerum, clariora, præteritarum autem, quo sunt vetustiores, minus perspicua, minima uero futurarum, quæ scilicet nec sunt, nec fuerunt unquam. Sed quia futuri effectus, in potestate causarum cohibentur, quasdam habent prægressiones, & præcurssiones signorum, quæ hoc minus manifesta sunt, quo illa longius absunt, atque in hoc genere, ponenda censet somnia. Quapropter, ferè obscuris imaginibus & similitudinibus, res per somnia significantur, non æqualiter tamen, sed prout uaria est illius phantastici spiritus temperies & ratio similiter ut in speculis, pro uarietate eorum materiæ aut figuræ. uariæ ac dissimiles redduntur imagines, Monet præterea Synesius non parum conferre ad quietam & ueraciam in somno usui percipiendam, benè præparare hunc spiritum phantasticum, moderato nempe uictu honestis studijs, & actionibus, sedandisque animi perturbationibus. Pythagoras certè iturus cubitum, cantu & sono lyre somnum caprabat, atque hac ratione ad bona lætaque somnia accipiendam se ipse comparabat: ob eandemque causam, esu fabæ suis interdicebat: quod haberet is cibus inflationem magnam, tranquillitati mentis uera querentis contrariam. Verum hæc de spiritu phantastico à Sinesio prodita, nugæ sunt, & Pythagoræorum ac Platoniorum figmenta, uel ipsis poetarum fabulis inania ueritatibus, atque incredibilia.

Mos Pythagora.

SED, ut aliquid èt ex auctoribus Ecclesiasticis delibemus, B. Gregorius in quarto libro Dialogorum cap. 48. sex causas colligit somniorum:

Aut

Aut enim, inquit, ex plenitudine, uel inanitate corporis somnia existunt, aut ex antecedentibus diurnis cogitationibus, & curis: aut ex illusione demonis, aut ex reuelatione Dei, aut denique ex cogitatione hominis simul, & reuelatione Dei. Eisdem sex casus somniorum, cum idem Gregorius commemorasset in lib. 8. Moraliū, c. 13. mox eas aptis diuinæ scripturæ sententijs, & exemplis illustrat atque confirmat. Duo, inquit, prima, quæ diximus somniorum genera, omnes experimento cognoscimus: quatuor autem reliqua in sacris literis inuenimus. Nisi enim somnia plerumque ab occulto hoste per illusionem fierent, nequaquam scriptura dixisset, Ecclesia. 34. Multos errare fecerunt somnia, & illusiones vanæ, uel certè in Leuit. cap. 19. non esset scriptum, Non augurabimini, nec obseruabitis somnia. Quibus verbis, cuius sint detestationis, ostenditur, quæ augurijs coniunguntur. Rursum nisi aliquando ex cogitatione simul, & illusionem procederet, Salomō minimè dixisset Eccle. quinto capite, multas curas sequuntur somnia. Et nisi aliquando somnia ex mysterio reuelationis orirentur, Ioseph Geneseos trigesimo primo, præferendum se fratribus, per somnium non uideret, nec Mariæ sponsum, ut ablato puero in Aegyptum fugeret, per somnium Mat. 2. Angelus admoneret. Rursum, nisi aliquando Dan. 2. somnia ex cogitatione simul, & reuelatione

D. Grego.
sex cās sō
niorū tra
dit.

procederent, nequaquā Daniel uisionē Nabuchodonosor edisserēs, a radice cogitationis inchoasset, dicēs: Tu rex cogitare cepisti in stratu tuo qd esset futurū post hęc. Hęc ibi Grego. De causis igit somniorū, sic ab alijs proditū est.

Quatuor cause ve- EGO cās sōniorū, q̄ ad finandū aliqd valēt, &
torū som- dignæ sūt obseruatione, diligēter scrutatus, eas
niorum. ad quatuor p̄cipuas reuocari posse aīaduerti.

Prima cā PRIMA cā continet aliquā corporis affectio
aliquacor- nē, quæ in ipso corpore p̄æ pollet, ac p̄æualet,
poris affe- vt si flaua, vel atra bilis, pituitosusve humor, aut
ctio. sanguis redundet, aliudve aliquid viciatum, & corruptū immoderatē iactetur in corpore. Galenus in libr. de Præfagijs, quæ ducūtur ex somnijs, narrat quendam somniasse alterū crus factum esse sibi lapideum, mox autem cepisse illū ea parte corporis fieri paralyticum. Præterea, qui inltāte crisi sudaturi sunt, sæpē somniant se sudare, aut in balneo calidis aspergi aquis, aut in flumine lacu ve natare. Illud quoque nonnūquā vsu venit, vt quod dormientes agimus, aut patimur, etiam somniemus, vt qui in somno sudant, aut feбри corripuntur, itidem se affici somniēt. Proditum est à Plinio in libro 7. capite 50. P. Corneliū Ruffinū dormientē amisisse visum, idq; cum sibi accideret, etiā ipsum somniasse.

Secunda ALTERA causa somniorum spectat ad ali-
animi ve- quem uehementem concitatumque animi affe-
hemēs per ctum, & perturbationem, amorem dico, spem,
turbatio. metumque, & odium. Nam qui ardēter amant, frequenter amores suos somniant: qui timent, minacibus, & terrificis in somno visis sæpē turban-

bantur. Huc etiam pertinet vetus consuetudo, & vitæ, quā agimus, exercitatio. Piscator enim ferè somniat maria, lacus, flumina, retia, pisces; venator, nemora, saltus, montes, ferasq; miles tubarum sonitus, fragores armorū, vulnera, sanguinem, cædes. Lepidè quidam apud Theocritum piscator, *omnis*, inquit, *canis panes somniat, & ego pisces*. Continet eadem cā antecedentes vigilantium curas, & sollicitudines, & quæcunque nos vehementer premunt, & angunt: quarum rerum, sæpius in somno, similia visa contingunt. Quamobrem in lib. Ecclesiastici, c. 5. scriptū est *Multas curas sequuntur somnia*. In hoc genere somniorum, equidem reponerè somnium illud Annibalis, & proditum, & creditum a multis. Ardebat Annibal insatiabili odio Romani nominis omniq; cupiditate perdè di funditus imperiū Romanum flagrabat; quò autem facilius id perficeret, bellū ex Hispania transferre in Italiam cupiebat, arcem imperij Romam, petiturus: Cum igitur varijs super ea re cogitationibus ac deliberationib. æstuarer, visum habuit in somno, mirè proposito suo, votoq; respōdens. Visus ipsi est iuuenis, specie supra humanam, qui se diceret à Ioue missum du cem ei ad inuadendā Italiam, iussitq; ne res piceret, quid retrò & a tergò fieret. Pavidus primo Annibal, nō est ausus oculos ab illo quoquam deflectere. Sed, prout est humanū ingenium ad vetita pronum, diu temperare oculis nō quivit, respiciensq; vidit, horrendum nō visu modo, sed etiam dictu ostentum, belluam vastam & immanem, multis circumplicatam serpentib.

*Somnium
Anniba-
lis Italia
vastitatē
ptendens.*

qua-

quacunque incedebat, omnia proterentem, atque peruertentem: cœlum item nigerrimis undequaque occæcarum nubibus, densosq; ac fulguribus mixtos præcipitare nimbos. Attonito Annibali, percontantiq; ex illo suo duce, quid illud monstri & portenti esset, respondit ille, vastitatem esse Italiæ, pergeret ipse porrò ire, quò parabat, nec præterea quicquam inquireret, sineretquè in occulto esse fata. Atque hoc quidem somnium ex antegressis in vigilia Annibalis cogitationibus & curis exitit: sed eius tamen somnij veritatem, rei euentus satis superque comprobauit plus enim mali Annibal Italiæ attulit, quàm illo fuerat viso præmonstratum.

*Tertia de
monū cal-
liditas.*

TERTIAM causam somniorum, ego potestati & calliditati dæmonis adiudico. Is enim multa dormientibus inspirat, & suggerit somnia, semper insidiosè ac malitiosè, quo videlicet quacunque possit ratione incommodet, ac noceat homini. Esse autem quorundā somniorum dæmonem architectum, atque effectorè, eò liquet, quòd ex sacris literis planè intelligitur, obseruationem somniorum adeo exosam esse Deo, ut ~~ea~~ magorum, augurum, & incantatorum maleficijs aggregata, extremis damnetur supplicijs. Nimirum non aliam ob causam, ut interpretatur Beatus Gregorius in lib. 4. Dialogorum, cap. 48. nisi quia dæmon plerumque se somnijs immiscet, implens noxia superstitione hominum animos, eosq; non tantum variè deludens, sed etiam perniciosè decipiens. Hoc genere somniorum solitum esse olim dæmonem

*Quadam
somnia mit-
ti a dæmo-
ne.*

genti-

gentibus impietate cæcis multifariam illudere, constat argumēto Aesculapij, Serapidis, & Amphiarai: nam vt apud Philostratum, Pausaniam, & Strabonem scriptum est, templa eorum ad-
euntibus, qui varijs morborum generibus affli-
ctabant, fama erat tres illos vulgò existimatos,
quasi Deos singulorum morborum curationes
per somnia præscribere consueuisse. Ex hoc ge-
nere fuisse reor nobile illud somnium Alexan- *Somnium*
dri Magni, scriptorum, qui res eius prodiderūt, *Alexād.*
auctoritate, apud multos fidem promeritum. *Magni.*

Cum enim in quodam prælio Ptolemæus, qui
primus post Alexādrum Aegypti rex fuit, vene-
nato telo ictus, summo cum dolore ex eo vul-
nere moreretur: assidens ei Alexāder, somnoq;
sopitus, vidit in quiete draconem radiculam o-
re ferentem, simulq; commonstrantem, quò il-
la loci nasceretur, quæ scilicet præsentissimam
vim haberet Ptolemæum, multosq; milites eo-
dem teli genere vulneratos, protinus sanandi.
Quæ sita est herba, inuenta, adhibita, mox con-
secuto, qui promissus fuerat effectu. Sūt autem
duo somniorum dæmonis præcipua genera, al- *Duo gene-*
terum pertinens ad occultarum rerum demon- *ra somnio-*
strationem & significationem. Potest enim dæ- *rum dæ-*
mon naturales effectus ex certis causis aliquan- *monis.*
do necessariò prouenturos, potest quæcunque
ipse met postea facturum est, potest tā presentia,
quam præterita, quæ hominibus occulta sunt,
cognoscere, & hominibus per somnium indica-
re. Alterum somnij genus vim habet cōcitandi
perturbationes animi, agitatæ turbatisq; qui
sunt in corpore humoribus & spiritibus, quò

nimirum inflammentur homines, vel ad libidinem, vel ad odium & vindictam, vel alios prauos animi affectus.

*Quo in-
ternosci
possint so-
mnia dæ-
monū ab
alijs som-
nijs.*

DVPLICITER porrò, & quidē satis p-
babiliter, coniectari potest, quæ somnia missa
sint à dæmone: primò quidē, si frequenter acci-
dant somnia significantia res futuras, aut occul-
tas, quarū cognitio nō ad vtilitatem, vel ipsius,
vel aliorum, sed ad inanem curiosæ scientiæ o-
stentationem, vel etiam ad aliquid mali facien-
dum conferat: eorum somniorum auctorem
esse dæmonem, non temerè crederetur: quippe
qui ea ratione tentet animos hominum vana im-
buere superstitione, quin etiam crimine impie-
tatis obstringere. Deinde, si sobrijs, castis, & re-
ligiosis viris, tetra, obscæna, plenaq; crudelita-
tis, & impietatis somnia sæpenuerò contin-
gāt, ea proficisci à Dæmone, nō immeritò exi-
stimabitur. Dæmon. n. conatur impuris somnijs
polluere ac foedere dormientium corpora, ut
eius foeditatis, etiam animos expergiscentium,
quodammodo participes faciat. Quod si ne hoc
quidem assequi potest, illud saltē curat, vt pios
homines talibus visis contristando, perturban-
do, & affligendo, ad orationem, ad charitatis of-
ficia, ad diuinorum sacramentorum perceptio-
nem, tegniores, frigidioresq; reddat. Cuius dia-
bolicę calliditatis & malitiæ, luculentissimum
in vigesima secunda Collatione cap. 6. Cassia-
nus narrat exemplum. Verum hac de re Iusti-
nus Martyr, in responsione ad quæstionem vige-
simam primam Orthodoxorum; disertè doctē-
que sententiam suam exposuit. Nam cū hæc
sibi

sibi ab illis posita esset, quæstio, ad eam ipse quæstionem ita respondet, ut nos hic diximus. Restat quarta, & vltima somniorum causa, quam diuinam rite nominare possumus: cuius potissimum gratia omnis hæc nostra instituta est disputatio, huic enim; uel declarandæ, uel illustrandæ, adhuc prædicta deseruiunt. Somniorum autem, quæ à Deo missa sunt, exempla, passim in diuinis libris sunt obuia: nos suprà ex sacris libris multa protulimus, pluraq; possent afferri; si quis omnia uellet colligere. Caterũ ut uis, & natura diuinorum somniorum plenius planiusque cognoscatur, quæstiones aliquot more scholastico, distinctè quidem, sed carptim, breuiterque perstringam, multa etiam, breuitati seruienti, lectoris cogitationibus integra illibataq; reseruabo.

*Quarta
causa somniorum
diuina.*

QVÆSTIO III.

*QUIBUS SIGNIS COGNOSCI
queat, sit aliquod somnium à Deo
missum, necne.*

DVPLICITER, prout nunc mihi succurrit, deprehendi potest, quodnā à Deo sit missum somnium. Primò quidem, ex præstentia rerum, quæ per somnium significantur: nimirum, si ea per somnium innotescant homini, quorum certa cognitio, solius Dei concessu ac munere potest homini cōtingere, huiusmodi sunt, quæ uocantur in scholis Theologorum; futura

*Duplex
rō cognoscendi diuina somnia.*

contingentia, arcana item cordium, quæq; intimis animorum inclusa recessibus, ab omni penitus mortalium intelligentia obliuiscunt, demum

que præcipua fidei nostræ mysteria, nulli, nisi Deo docente manifesta. Somnium igitur, quod eiusmodi rerum cognitionem, & demonstrationem continebit, diuinū esse existimari poterit. Deinde, hoc ipsum maximè declaratur interiori quadam animorum illuminatione atq; commotione, qua Deus sic mentem illustrat, sic voluntatem afficit, sic hominem de fide, & auctoritate eius somnij certiores facit, ut Deum esse ipsius auctorem, ita perspicuè agnoscat, & liquèdò iudicet, ut id sine dubitatione vlla credere, & velit, & debeat. Huc spectat memorabilis illa in lib. 4. Dialogorum, cap. 48. B. Gregor. snia: *Sancti uiri, ait Gregorius, inter illusiones, atq; reuelationes, ipsas visionum voces, & imagines, quondam intimo sapore discernunt, ut sciant quid à bono spiritu percipiant, et quid ab illusore patiantur. Nam si erga hæc mēs hominis cauta nō esset, per deceptorē spiritum, multis se uanitatibus immergeret, qui nonnūquam solet multa vera prædicere, ut ad extremum ualeat animam ex una aliqua falsitate laqueare. Hactenus Greg. apud quē hāc ipsā sniam, sed plenius ac luculētius tractatā, in lib. 8. Moralium, cap. 13. lector inueniet. Quemadmodū igitur naturale mentis nostræ lumē facit nos euidenter cernere veritatē primorū principiorū, eamq; statim, citra vllā argumentationē, assensu nostro cōplecti: sic in somnijs à Deo datis, lumē diuinū aīs nostris affulgens, pficit, ut ea somnia, & vera, & diuina esse intelligamus,*

*Memorabilis snia
D. Grego-
rij.*

DE OBSERVATIONE SOMNIORVM 143

certoq; credamus, Rectè igitur illud traditur in libro Ecclesiast. cap. 3 4. *Nisi à Domino missa fuerit visitatio, ne des in somniis cor tuum.* ex quo significatur, nonnulla somnia dari hominib. à Deo, animos eorum mirabiliter visitante.

H A E C autem Dei per somnia visitatio, sicut ex diuinis literis colligitur, multis & diuersis fieri solebat, Nonnunquam enim Deus per somnia turbabat, & terrebat hominem, sicut de Abimelech, & Laban narratur in libro Geneseos; *Terrebis me.* inquit Iob 47 *per somnia, & per*

Varijs modis Deus afficit homines per somnia.
Gen. 20
& 31.

visiones, horrore concuties me. Aliquando in somno hortatur & incitat hominem Deus ad magnum quidpiam & arduum subeundū, certā spem prosperi exitus præsignificando: uelut in Gedeonis & Iudæ Machabæi somnijs euenit. Sēpè monet & docet, quid hominem agere, aut fugere oporteat, talia fuere B. Ioseph & Magorū somnia: huc spectant illa verba, quę sunt in c. 33. libri Iob. *Quando homines dormiunt in lecto, tunc aperit aures virorum, & erudiens eos, instruit disciplina.* Quin etiā solebat olim Deus spiritū propheticū nonnullis in somno largiri: nā in lib. Numerorū, c. 12. ait Deus. *Si quis fuerit inter vos Propheta Domini, apparebo illi in uisione, aut per somniū loquar ad illum.* Et apud Ioelem in c. 2. inter alia Spiritus sancti dona, numerantur somnia. Legimus et in 3. Reg. Salomoni fuisse à Deo promissum in somno prudentiæ & sapientiæ donum, Interdum quoque futura alicuius viri excellētia, dignitatis &

Iud. 7.

2. Mach.

11.

Matth. 2.

3. Reg. 3.

Genes. 37. gloria, præmonstrata est per somnium, id quod
Esth. 11. adolescenti Ioseph, & Mardocheo accidisse legimus in sacris literis. Quibusdam præterea in somnis patefacta sunt diuina mysteria, cuiusmodi fuit somnium Iacob de illa mystica scala, & Danielis de regno Christi, Denique præsignificauit aliquando Deus, & prædocuit futuros rerum humanarum euentus: cuius generis fuere somnia Abrahæ, *Genes. 15.* Pharaonis, *Genes. 41.* & Nabuchodonosor, *Danielis 2. & 4.*

Varijs modis diuina continentur somnia. VARIIS item modis diuina somnia hominibus contigerunt, interdum cum magna corporis & animi commotione & horrore, sicut accidit Abrahæ, & Nabuchodonosor. Nonnunquam datum est alicui somnium, sed non eius somnij intellectus, sicut in somnijs Pharaonis & Nabuchodonosor animaduertere licet. *Danieli* tamen ceterisque prophetis, simul cum somnijs, intelligentia eorum diuinitus suggerebatur. Quamquam duorum somniorum, quibus Ioseph supra fratres ipsius futura dignitas & potestas præsignabatur, nulli tunc datus est intellectus: sed postea ipso euentu, successuque rerum veritas eorum somniorum cognita est, atque comprobata. Illa quoque in somnijs diuinis varietas cernitur: alia enim clara sunt, & aperta, euidenter res ipsas significantia; ut fuere somnia beati Ioseph, trium Magorum, & D. Pauli: alia vero sunt inuoluta, & obscura, per varias similitudines re ætæ aliquid insinuantia, huiusmodi fuere somnia Pharaonis de septem spicis, & bobus, & Nabuchodonosor de statua & arbore, nec non & pincernæ, acque pistoris ipsius Pharaonis, Adhæc, inter-

interdum videtur in somno loqui cum homine, vel Deus ipse, vt in somnio Iacob, & Salomonis, vel angelus, vt in somnijs beati Ioseph, vel homo aliquis, vt in somnio D. Pauli. Præterea sepe Deus vltro mittit somnia, nonnunquam etiã rogatus, quemadmodum interpretationem somnij, quod acciderat Nabuchodonosor, Deus in quiete tradidit Danieli, qui eam ab ipso vigilas intentissima precatatione postulauerat. Quin fuisse quondam apud Hebræos admirabilem quandam rationem & consuetudinem in rebus maximè dubijs atque grauissimis, cõsulendi Deũ, vt quod verum esset, aut quod factum esset opus, per somnia indicaret, ex c. 28. primi libri Regũ, intelligitur. Postremò quædam somnia diuinitus data respondent antecedentibus in vigilia hominum cogitationibus & curis, ad hoc genus referri debet primum somniũ Nabuchodonosor, à Daniele 2. capite narratum, itemque primum beati Ioseph, quod in capite primo narrat Diuus Matthæus, atque illud Annibalis supra memoratũ, illud quoque Scipionis Aemiliani, à Cicerone, vel acutè confictum, vel disertissimè narratum.

Genes. 27.

3. Reg. 3.

Matt. 1.

c. 2.

Act. 16

Daniel. 2.

QVÆSTIO IV.

*CVR DEVS IN SOMNO ARCANNA
sua hominibus referet.*

CVM animus hominis in somno, minimè docilis, minimeque habilis ad percipiendas res diuinas esse videatur, dignũ sanè videt inquisitione, cur Deus per somnia & arcana sue

*Quinque
causae cur
dormiēti-
bus mul-
ta diuini-
tus reue-
lentur.*

*Habilior
animus
noster in
somno ad
percipien-
das diui-
nas reue-
lationes.*

providentiæ, & mysteria rerum coelestium non rarò docere homines voluerit. At enim verò, multas eius rei, variasque causas afferre possumus. Primam causam tãgit Hippocrates in principio libri de Insomnijs, animam hominibus in vigilia varijs distingui occupationibus, grauib. distineri negotijs, curisque distrahi: per sensus item exteriores euocari ad ea, quæ extra ipsum sunt, & per varia eorum sensuum spectacula diuagari, multiplicique rerum humanarum strepitu interpellari, & à sui, rerumque coelestium cōsideratione auocari, incertis præterea fluctuare deliberationibus, varijsque studijs & affectibus æstuarè, qui non sinunt eum, quod verum & rectum est, id aut liquidò cernere, aut incorruptè iudicare. Contrà verò in quiete & somno, ab eiusmodi omnib. interpellationib. & impedimentis vacuus & liber animus, sibi totus præsens & prælo est, sibi que attendit, in se suas omnes vires, atque facultates collectas & cōiunctas habet, expeditus & acer ad intelligendum, atque omnium que illi extrinsecus obiecta sint, amplissimè ac facillimè capax. Alteram eiusdem rei causam hanc ponere licet, quæ vigilantes accipimus, ea solemus subtiliter ratiocinando discutere & examinare, reuocare ad calculos, atque humanæ rationis trutina diligenter expendere: ad rationis enim normam exigimus omnia: cui si congruant, quæ nobis oblata sunt, à nobis approbantur, si discrepent, abiudicantur atque reiiciuntur. In somno autem res sibi obiectas animus hominis citra examen accipit, paratior propriorūque ad visis diuinitus datis credendum, atq.

ob-

obsequendum. Constat autem inter omnes qui de reb. diuinis scripserunt, ad eas res non tantū intellectu, sed etiam affectu, & quodam animi quasi sensu, gustuq. percipiendas, satius esse agi & regi hominem extrinsecus, quam ipsum agere se, & auditorem esse potius, quam arbitrum, & existimatorē, denique simpliciter credere potius, quā causas credendi disquirere & expendere. Tertia cā ex Aristotelis libello, qui inscribitur de Diuinatione, quæ fit ex somnijs, desumpta est: ait ille, *Quemcunque motum, quo animus dormiētis extrinsecus pulsatur & cietur, quāuis leuem & exiguum, magnam tamē habere vim commouendi animum, vehementerque in ipsum imprimi, atque altè in eo inherere: id autem fieri propter noctis silentium, & sensuum exteriorum vacationem & quietē, atq. omniū, quæ animi intentionem remittere solent, vacuitatem, tunc enim sensibus somno consopitis, languenteque corpore, quæ extrā sunt nequaquam sentiuntur.* Quapropter opportunissimè Deus eo tpe docet hoīem sine vlla eius perturbatione, sine aliorū hominum obseruatione, denique sine vllius rei interpellatione. præsertim autē, quia quò magis animus noster à sensu cōsociatione, & corporis cōtagione abstrahitur, tātò vī effici vegetior, & acrior ad res diuinas intelligendas. In somno aut, qui est imago quæda & representatio mortis, videtur animus quodam modo seiugari à consortio corporis, eiusque vinculis, si non omninò, certè

aliquatenus relaxari. Quartam causam esse arbitror, ut ea re ostendatur, quantum sit Deus potentior, & efficacior ad hominem docendum & erudiendum, quam sit alius quivis homo: quippe homo hominem docere, nisi vigilantem, audientem & attendentem non potest: Deus autem, et altissimè dormientem, atque somniantem. Quo satis declarat se in omnes humani animi vires, ac facultates summum imperium, & efficacitatem habere. Quintam causam equidem posuerim, ne videlicet quispiam existimaret, mortem auferre homini omnem scientiam: aut non esse aliam viam rationemque cōparandi scientiā, quam per sensum, discursumque rationis, & ex

*Contra
Auerro-
nem.*

antecedenti aliarum rerum cognitione. Auerrores quidē super libello Aristotelis de Divinatione per somnia, in cōmentario suo, non audent inficiari prophetiā posse homini accidere, vel in somno, vel per reuelationē, negat tamē ea ratione vel artes, vel sciētias speculatiuas posse ulli contingere. *Vna*, inquit, *est natura hominis: vnus igitur duntaxat erit intelligendi, & discendi modus, scilicet internūtijs sensibus, varijs item praeceptis, experimentis, diligentique ratiocinatione. Nam si prater cōem, & vsitatum discendi modū, esset hic alter per somnia, vel reuelationem, cum is multo sit facilior, atque praestantior, ille alter quò difficilior & laboriosior est, eò magis fuisset supernacaneus, non igitur datus esset homini. Deus namque, & natura nec frustra quicquam faciunt, &*

de ijs, quæ possunt fieri, quod melius & præstabilius est, nunquam non faciunt. Sic ille. Quæ sanè argumentatio, non esset planè infirma, si quisquam diceret, nemo tamen nostrum id dicit, modum illum discendi per somnia, vel per reuelationem, aut esse homini naturalé, aut esse frequentem, & vsitatum. Verùm hæc Auerrois commenta, vt alia eiusdem, de scientia, potentia, & prouidentia Dei, & humani animi natura, ex inscitia diuinarum rerum, & impietatis fonte redundantia, quam sint inerudita, obrusa, falsa; satis liquet vel solis exemplis, quæ memorantur in sacris literis, Adami, Salomonis, Danielis, multorumq; Prophetarum, quibus multarum rerū scientia subito data est à Deo: *Cen. 2. I. Reg. I. Exod. 31.* quin et Beseleel, & Oliab, quos in libro Exodi proditū est, subito diuinitus edoctos, Moysacū tabernaculū, simul cū omnibus eius instrumentis atque ornamentis, summa arte p̄fecisse.

Q V A E S T I O V.

*CUR A DEO SOMNIA DENTVR
obscuris & indoctis hominibus, non
autem sapientibus.*

VEL hac vna ratione Aristoteles & Cice- *Error A. Aristotelis. & Ciceronis.*
ro omniū somniorū, quæ diuina creduntur, fidem & auctoritatem eleuari, & eludi posse putauerūt. Nā, si quæ somnia, inquit, darentur hominibus à Deo, ea non obscuris & indoctis hominibus, sed viris sapientia prudentiaq; præstātib. dari, par erat. In quo fefellit eos q̄ distinctionē diuinorū somniorū, eorū dico quæ
verè

*Cur dæ-
mones sō-
nia olim
dare soli-
ti fuerint
non do-
ctis &
prudenti-
bus, sed
imperitis,
& contē-
ptissimis
hominib.*

verè diuina sunt ab ijs, quæ non sunt, esse tamen falsò putantur, planè ignorauerunt. enim vero Dij Gentilium, quos fuisse dæmones nobis Christianis nequaquam dubium est, quemadmodum futuros rerum humanarum casus & euentus certò providere, ac scire non poterant, id enim solius Dei est, ita nec eos certis aut verbis, aut signis prædicere, ac præmonstrare poterant: Quapropter somnia, quibus præsignificabantur futura, non dabant viris doctis & prudētibus, videlicet ne illi eorum somniorum vanitatem, ac falsitatem deprehendentes, auctoritatem ipsorum Deorum apud alios contererent, eorumq; oracula tanquā diuinitatis vacua, & inania veritatis, in publicū etiā vulgi ludibrio & contemptui exponerent: dabant igitur ea sōnia indoctis, & veri falsiq; discernendi imperitis, maximè vero superstitiosis, ob idq; ad credendum qui dūis, satis per se paratis atque propensis. At vero somnia, quæ à verò Deo missa sunt, ea legimus plerumq; data viris sanctitate, ac sapientia eximijs, vt Abrahæ, Iacob, Salomoni, & Danieli. Data sunt tamen etiā nonnulla viris nō admodum doctis, sed pietatis tamen, ac innocentie præstantia clarissimis: excellens autem virtus & pietas, dociliorem reddit hominis animum, aptioremq; ad rerum diuinarum perceptionem, quàm humana vel prudentia, vel sapientia. Qui enim mundana excellunt potentia, vel sapientia, hi ferè sunt aut impij, aut superbi, aut turpissimis inquinati flagitijs: quæ res cœlestibus doctrinis, diuinisq; illustrationibus, aditum ad animos hominum, penitus occludūt.

Nec

DE OBSERVATIONE SOMNIORVM. ISI

Nec me fugit, etiam quibusdam sceleratis atque impijs hominibus, ut Pharaoni, & Nabuchodonosor, quædam diuinitus somnia contigisse, sed hæc illis, nec ipsorum præcipuè causa, neq; cū intelligentia eorū somniorū data sunt: quo scilicet illi, eorū interpretationē, cū apud suos sapientes inuenire nō possent, à veri Dei cultoribus eā petere cogerentur, atque ea ratione uerū Deum agnoscerent, ac venerarentur, eiusq; seruos in admiratione, & honore haberent: id quod somnia Pharaonis, & Nabuchodonosor à Iosepho, & Daniele interpretata, manifestè declarant.

Cur quædam somnia èt impijs hominibus à Deo sint data.

QVÆSTIO VI.

CVR DIUINA SOMNIA

nonnunquam sint obscura, & perplexa.

SED cur diuina somnia non sp̄ sint clara, & aperta, sed obscura, & perplexa, & aliarum rerū imaginibus, ac similitudinibus inumbrata, & offuscata, nec alijs tm̄ occulta, sed èt ijs, quibus dantur, minimè conspicua, cās rimemur, & aperiamus. Dij gentiliū, hoc est demones, quia certā futurorū euentuū scientiā hñe nō poterāt, ad significāda futura, dabāt illi quidem non rarò somnia, sed obscura tm̄, & ambigua, quæq; ad diuersos, etiā cōtrarios euentus faciliè detorqueri, & applicari possent, ut ad quodcunq; accidisset, somniū quadrare videretur. Quod si somnia euentis minimè rñderent, id non falsitati somniorum, sed interpretum inscitiz, qui somnia

Asutia demonū è dādis sōnijs futura signifi- cātibz.

pro-

propter obscuritatem, & ambiguitatem non rectè essent interpretati, adscriberetur. At verò sōnia, quorum auctorem fuisse Deum ex sacris literis cognouimus, sæpenuerò distinctè, & explicatè tradita sunt, qualia legimus fuisse Abimelech, Laban, Iudæ Machabæi, Salomonis, B.

*Quatuor
causa cur
interdum
diuina sō
nia sint
ualde ob-
scura.*

Ioseph, & trium Magorum. Non est tamen negandum quædam somnia esse data rectè, & obscurè, sed hominibus gentilibus, ad eum nempe finem, vt intelligerent eorum somniorum, cum non ab alijs, quàm à viris sanctis accipere possent, & ipsos Dei seruos honorarent, & summa Deum reuerentia, ac veneratione prosequeretur. Si quæ uerò somnia etiam seruis Dei obscura data sunt, propterea id factum est, ut eorū sensum atque intellectum, summo illi studio, assiduis precibus, multisq; lachrymis à Deo flagitantes, tandem impetrarent, & propter difficultatem impetrandi, pluris facerent, & cariorē haberent. Denotatur præterea obscuritate somniorum, earum rerum, quæ significantur somnijs, obscuritas. Adde quòd p̄ imagines, & similitudines, breuissimè plura, & sublimiora mysteria significantur, quam si apertis, & proprijs fuissent expressa vocabulis. Nam q̄ multa, quàm varia, quàm profunda mysteria, vna illa statua Nabuchodonosor in quiete visa, adūbrauit, quæ si fuissent proprijs verbis efferenda, vix longissima oratione declarari potuissent. Denique vult Dens nonnunquam, somnia esse ad aliquod tempus occulta, & incognita, quo ad nimirum, ipso euentu, rerumq; successu, eorum ueritas agnoscatur, & comprobetur: quod in

duobus

DE OBSERVATIONE SOMNIORVM. 153
duobus illis Iosephi somnijs, promotione eius
ad summam potentiam & dignitatem præsigna-
tibus, liquidò cernitur.

QVAESTIO VII.

AN LICITVM CHRISTIANO
homini, obseruare somnia.

DVAE tanguntur his uerbis difficultates,
& prior quidem est, an sit fas Christianis,
curiosè somnia obseruare: ad quam facilis est,
& in pròptu responsio. Etenim quædã somnia
licitum est obseruare; quædam verò minimè.
Principiò, somnia quæ bonam, vel malam cor-
poris affectionem aliquam, morbosq; tam ani-
mi, quàm corporis significat, utiliter a medicis
tam animi, quàm corporis obseruantur & ex-
penduntur. Tum, somnia, quæ nos crebrò infe-
stant, territant, conturbant, & vexant, animad-
uertere quibus ex causis accidant, ut vel noti ef-
fectus ignotas nobis causas scrutemur, ac tenea-
mus: vel ut rationem aliquam ineamus eam à
nobis molestiam depellèdi, licitum est, & a san-
ctis viris sæpè vsurparum. Legimus enim apud
Cassianum in Collatione 22. veteres illos mo-
nachorum magistros & rectores, in perquiren-
dis, & excutiendis quorundam somniorū cau-
sis, diligenter esse versatos. Postea obseruare so-
mnia, quatenus in illis pernotescit homini ueri-
tas aliqua pertinēs ad sciētias speculatiuas, vel
ad res gerendas conferens, nec vt superstitio-
sum, nec vt vanum damnari debet. Deniq; som-
nia quæ nos sæpè cōmouent, & incitant ad fla-
gitia,

*Quatuor
genera so-
mniorum, si-
ne vitio
possunt
obseruari
& cura-
ri.*

gitia, considerare num à dæmone nobis subij-
ciantur, sicut contrà, quibus ad bona prouoca-
mur & instigamur, veluti ad cælibatum, largi-
tionem eleemosynarum, & ingressum in reli-
gionem, ea ponderare num à Deo nobis missa
sint, nō est supersticiosi animi, sed religiosi, pru-
dentis, ac salutis suæ satagentis, atque solliciti.

A T verò, cuiuscunque somnij, quoquomo-
do nobis contingat, etiam si rarò, si temerè, si
fortu itò eueniat, putare habēdam esse rationē,
curamq; suscipiendam, stolidi hominis est, ne
dicam stulti. Supra enim ostensum est, maximā
patrem somniorum nihil veri, & certi habere,
sed vanitatis, ac temeritatis esse plenissimam.
Præterea obseruare somnia, quasi esset in ipsis
aliquid diuinum, scilicet quale Gentiles existi-
mabant esse in garritu, volatu, cibatuq; auium,
& in extis animantium, atque ex illis prænosce,
ac diuinare velle futura, non modò non est lici-
rum, sed est in scriptura grauissimè reprehē-
sum, damnatum, & interdictum, non minus sa-
nè quàm magorum, & incantatorum maleficia,
quod ex cap. 19. Leuit. ex 18. Deuteron. ex 33.
posterioris libri Paralipomenon, alijsq; sacro-
rum voluminū locis perspicuè intelligitur. Et
verò, scire velle futura, quæ Deus in sua solius
potestate posuit, arrogās & impia est curiositas.
Putare autem certa futurorum signa contineri
in somnijs, quæ nullam cum rebus futuris con-
nexionem & conuenientiam habent, fatuum
est: parum dixi, planè impium, & stultum est,
hoc enim arguit eiusmodi somniorum obser-
uatores, stultis, impijs, & absurdis opinionibus
esse

esse infectos, atque deprauatos. Nam, vel isti putant res omnes futuras, ex naturalibus causis pendere, & hoc falsum est; vel eas res quibuslibet somnijs significari posse, quod plane stultum est; vel futura omnia certo prouideri, & sciri à dæmone, quod est perquam impium: vel denique à Deo promiscuè, atque indiscretè per quolibet somnia, & quibuslibet hominibus, præmonstrari futura, quod esse absurdum, nemo non uidet. Ad extremum, tanti facere somnia, & usque adeo pendere ex illis, ut ad eorum quasi normam dirigat quis omnem vitæ suæ rationem, & respectu habito ad somnia, actiones, & negotia, uel suscipiat, vel omittat, non modo præstantia hominis indignum est, sed olet etiam fatale illam Stoicorum, toties in ecclesia damnatam, & à melioribus philosophis explosam reiectamque necessitatem. Quod si meritò vituperantur, & à sapientibus redarguuntur astrologi, qui res humanas ex astris, quasi iuspensas & religatas omnino pendere arbitrantur; eo magis profectò, reprehendendi sunt superstitiosi somniorum observatores, quò magis astra dignitate naturæ æquabilitate motus, constantia ordinis, amplitudine potestatis, & præstantia efficacitatis, somnijs antecellunt.

Maior

vanitas

est obser-

uantium

somnia,

quam a-

stra.

QVÆSTIO VIII.

CVIVS HOMINIS SIT RITE
interpretari somnia.

AD posteriorem quæstionem, qua quæritur,
cuius hominis sit bene interpretari som-

L

nia,

nia, hunc in modum respondemus. Somniorum quæ vim habent ad aliquid significandum, & obseruatione, atque interpretatione digna sunt, ea non cuiusuis hominis est interpretari. Tria enim huiusmodi somniorum genera distinguere possunt, nam multa sunt naturalia, quædam humana, nonnulla etiam diuina. Naturalium somniorum interpretatio, non est dubium, quin solertiū & doctorum physicorum, ac medicorum sit propria: eorum maximè, qui norunt similitudines in somnijs ostensas comparare inter se, & quarum rerum similitudines esse, & ex quibus causis proficisci soleant, discernere: similiter, ut qui figuras aliquas & imagines dilaceratas sumens in manus, earumque partes dissipatas, benè componens inuicem, apteque conformans, cuius rei fuerint similitudines, hominis uè, anequi, an aliarum rerum, acutè dispicit, vereque iudicat. Humiorum autem somniorum, ita erit quisque sagacissimus coniector, & idoneus, ac ueridicus interpres, ut fuerit rerum humanarum peritissimus, & callidissimus, & in geniorum item, studiorum, morum, & propensionum, quæ in varijs hominibus magnam quoque uarietatem habent exquisitam, multisque confirmatam experimentis notitiâ sit adeptus, quasi uenas omnes rerum ciuiliū & humanarum tenens. Cuius autem sit exponere diuina somnia, in promptu est intelligere: patet enim, neminem interpretari ea posse, nisi diuinitus afflatū & eruditū. *Nemo enim nouit, inquit Paulus primæ ad Corinth. secūdo, quæ Dei sunt, nisi*

nisi spiritus Dei. Præsertim vero cum diuinorū
 somniorum significationes, ex solius Dei consi-
 lio, & voluntate sint institutæ, ob idque solius
 Dei reuelatione, notæ hominibus esse possint.
 Quocirca regem Nabuchodonosor somnij sui,
 quo maxime territus fuerat, sollicitum, & ani-
 xum, quod eius somnij rationem ex nullo suo-
 rum sapientum cognoscere potuisset, sic affatus
 est Daniel, *Mysteriū, qđ rex interrogat, magi, Dan. 2.*
arioli, aruspices, & sapientes nequeunt indicare
regi: sed est Deus in cælis reuelans mysteria.

IAMBLICVS existimat diuina somnia *Iamblici*
 fere non cōtingere hominibus: nisi aut primo, *opinio, de*
 aut extremo somni tempore, videlicet, quia tūc *tempore*
 animus hominis, aut nondum est cibi potusq; *quo diui-*
 saporibus occupatus, & oppressus: aut iam eua *na som-*
 nescente somno, vaporumq; discussa caligine, *nia contin-*
 ex illis sordibus emerſus animus, purior & ac *gant ho-*
 crior est ad diuinas illustrationes accipiendas. *minibus*
 Quapropter vates, ac somniorum interpretes, *refuta-*
 in more habebāt, ex deferentib. ad ipsos som- *tur.*
 nia sciscitari, quo ea tempore ipsis contigissent:
 nā si profundo somno accidissent, ea planè abij-
 ciebant, rati nō esse consentaneum, animo tunc
 obruto, & demerso, dari cœlitus somnia: sin au-
 tem somnia illis accidissent, exeunte somno, &
 animo ad suas functiones propè iā expergiscen-
 te, tunc ea somnia diuinitus missa, Deoque au-
 ctore digna iudicātes, ponderanda sibi, & inter-
 pretanda suspiciebant. Legendus etiam est Phi-
 lolstratus in cap. 14. lib. 2. de vita Apollonij. Ve-
 runtamen Iamblici documenta ex superstitionis

Aegyptiorum sacerdotum obseruationibus, vel
vt dicam veriùs, figmentis, quorum fuit ille stu-
diosissimus, exprompta sunt. Deus nempe, istius
modi temporum legibus non est alligatus, nec
opportunitate temporum eget ad operandum,
vbicunq; .n. vult, quandocunq; , & quibuscunq;
vult, sua inspirat somnia: potest .n. quouis tem-
pore, imò etiam sine tempore, sedare subito agi-
tationem humorum, tranquillare spirituum ani-
malium iactationem, purgare phantasiā, men-
tem illustrare, animumq; ad percipiēda diui-
na somnia idoneè comparare.

QVAESTIO IX.

AN IN SOMNO, LIBER VSVS
rationis, & voluntatis esse queat.

*Sapē in
somnia li-
ber est ra-
tionis v-
sus.*

SAE PENVMERO in somnijs, praesertim
quæ doctis, prudentibus, & sanctis viris cō-
tingūt, aīus hoīs, quod pertinet ad vsum ratio-
nis, & agitationem mētis, solutus, expeditus, ac
liber est. Etenim nōnunquā ratio dormientis pla-
nè cognoscit res simplices, easq; vel cōponit in
uicem, vel disiūgit, rōcinatur, iudicat, miratur,
noua quædā inuenit: quin et ad se ipse aīus cō-
uertitur, & ad suas actiones cōsiderādas, & diju-
dicandas aciem suam, vimq; reflectit, cūctatur,
hæret, dubitat, secū ipse disceprat, an tunc hō
dormiat, nec ne. Hæc autem liberum esse tūc ra-
tionis vsum, manifestè demonstrant. Non p̄pea
tamen existimandum est, quia in somno inter-
et⁹ liberi dum soluta est vis rationis, esse itidem perfectū
liberi

*Nunquā
in somno
est perfe-
ct⁹ liberi*

DE OBSERVATIONE SOMNIOŖVM. 159
liberi arbitrij vsum. Nam ad plenum & perfe- ^{arbitrij}
ctum liberi arbitrij vsum, opus est perfecta ho ^{usus.}
minis libertate, hoc est, solutione omnium sen-
suum, & potentiarum, ita vt sit ipse homo, qui
tunc agat, nec aliundè agatur, sitq; dominus sui,
atque suarum omnium actionum, & in potesta-
te eius sit tunc hoc, vel illo modo agere, aut
etiam nihil agere: id quod in somno nequaquã
euenit.

Q V A E S T I O X.

DE SOMNIO SALOMONIS, IN
quo donum sapientiæ à Deo promissum
ei, & tributum est.

C A E T E R V M nonnihil habet difficul-
tis, quod legitur in 3. lib. Regum, cap. 3.
Deum in somno visum esse Salomoni, iussisseq;
vt peteret ab ipso quodcunque omnium ma-
ximè optaret: ipsum autem petiisse sapientiam,
& prudentiam benè regendi populum, cui præ-
erat, posthabitis omnibus alijs bonis, quæ tamè
principibus huius mundi, super omnia, concu-
piscenda, & expetenda videntur: eam porrò pe-
titionē vsq; adeo placuisse Deo, vt summam ei
se daturum sapientiam, & præterea quæ nō po-
stulasset bona, cumulatissimè largiturum pollicè
retur. Ex qua narratione ipsius scripturæ, satis
intelligi videtur, Salomonem in illo somno so-
lutè ac liberè, non tantum ratione, sed etiam vo-
luntate esse vsum: neque enim illa eius petitio
facta in somno, tatopere Deo placere, tantum

*Solutio
triplex.*

que sapientiæ munus pro mereri potuisset, nisi esset ex libera voluntate profecta. Hæc difficultas tribus modis posset discuti, ac dissolui. Nam primò quidem responderi posset illam Salomonis in somno petitionem, placuisse Deo, non per se, sed propter antegressam eiusdem in vigilia similem quandam petitionem, ex qua scilicet illa in somno exitit. Salomon enim ardentissimè expetierat, & à Deo postulauerat donū sapientiæ, ac prudentiæ: hanc eius petitionem, Deus illo somnio declarauit fuisse sibi gratissimam, & optatum habituram effectum. Sed hæc fortasse cuiuspiam videbitur nonnihil dura, & cōtorta responsio. Quocirca subijciam alterum responsum: posset enim dici, à principio fuisse illud quidem somnium, sed postea Deo mirabiliter operante, conuersum esse in ecclasiā seu raptum, qualis nempe diuo Paulo, & Prophetis sæpe contigit: in quo animus Salomonis, licet à corporis, & rerum externarum sensu abstractu & similis dormientium esset, per Dei tamen potentiam factum est vt solutus, & liber tunc fuerit ad exercendas actiones tum rationis, tum liberi arbitrij, ita vt liberè peteret à Deo Salomō quod vellet, & petendo, quæ grata erant Deo: ea quoque mereretur ab ipso consequi. Sed non placet hoc respōsum. Mitto nunc examinare, an in raptu & ecclasiā, perfectus liberi arbitrij vsus esse queat: tantum dico, huic responso minimè suffragari diuinam scripturā, quippè, supra dicto loco narratura visionem illa Salomonis, præfatur, Deum apparuisse Salomoni per somniū, & narrata iā visione, subiungit, *igitur enigi-*


euigilauit Salomon, & intellexit, quod esset somnium. quo perspicuè significatur, illā uisionem nullatenus fuisse raptum, vel ecstasim, sed totam fuisse somnium, diuinum tamen somniū, scilicet à Deo ad erudiendū docendumque Salomonem datū. Atque duas hasce solutiones propositæ quæstionis tradit D. Thomas in 1.2. quæst. 113. art. 3. ad 2.

ERIT igitur, nisi fallor, similis & proprius vero tertium responsum, quod etiam Tostado super 3. cap. lib. 3. Regum, in quæst. 12. maximè probatum est. Dicimus, cum Salomon tunc uerissimè dormierit, & illa eius uisio fuerit somniū, quemadmodum scriptura testatur, hinc necessariò effici, quicquid ibi factum esse dicitur, non reuera, sed per imaginariam tantum dormientis uisionem esse factum. Videbatur igitur tunc sibi Salomon petere sapientiam à Deo, videbatur etiam ei Deus petitionem ipsius approbare, cum reuera tamen nulla fuerit tunc petitio, nullum meritum Salomonis, nullū item responsum, nullumque Dei promissum. Cur igitur, inquires, somnium illud à Deo datum est Salomoni? Videlicet, nisi mea errat cōiectura, tres ob causas. Primò, ut intelligeretur omnium bonorum auctorem, & largitorem esse Deum, & ab eo esse omnia bona expetenda & postulanda. Deinde ut manifestum fieret, quæ bonorum electio, & petitio, grata esset, & accepta Deo: ea nimirum, qua spiritualia bona corporalibus, cælestia terrenis, denique ad communem aliorum utilitatem & salutem pertinentia, inanibus & infructuosis præoptantur, atque præferuntur.

Cur somniū illud datū fuerit Salomoni.

Ad extremũ , vt exemplo Salomonis appareret
 & extaret, quanta sit Dei benignitas & munifi-
 centia erga seruos suos, quorum optata & po-
 stulata non solum impleat, sed etiam longè su-
 peret, & abundanter excedat. Ecce Salomon so-
 lam à Deo sapientiam postulauerat, præ hac cę-
 teris bonis, quæ hominibus pretiosissima, & ca-
 rissima sunt, contemptis: cui tamen Deus, & sa-
 pientiam supra ipsius votum, & reliqua bona,
 præter votum ipsius, largissimè donauit. Verum
 hæc nostra de somnijs disputatio, hunc habeat
 terminum: vereor enim ne si longius producta
 sit, molesta & odiosa lectori esse incipiat. Quę-
 admodum enim somnus, quoad quietus & pla-
 cidus est, mēbra dulcissimè refouet ac recreat,
 viresq; reficit, ac redintegrat, si tamen in eo ni-
 mis longa nimisq; seria, & grauiā contingāt so-
 mnia, corpus pariter atque animum languefa-
 cit, & debilitat: sic omninò cauendum nobis
 fuit, ne nostra hæc de somnijs disputatio, præ-
 ter modum longa, gratiam perderet legentium,
 & quam ex ipsa fortasse voluptatem cœperat,
 in fastidium odiumq; conuerteret.





BENEDICTI

PERERII,

LIBER TERTIVS,

qui est

DE DIVINATIONE ASTRO-
logica.

TANTA est Astrologorum (qui
vulgo Iudiciarij appellantur) vel
impudentia, vel amentia, vt etiã
sibi diuinam scripturam suffraga-
ri, suæque Altromantiæ fidem &
auctoritatem firmare iactent. Etenim verba illa
quæ dixit Deus creans luminaria cœli; *Et sint Genes. 1.*
in signa, & tempora, &c. ad suam referunt di-
uinationem astrologicam, per quam ipsi profi-
tentur ex obseruatione siderum futura rerum
euenta posse prædici. Quocirca B. Basilius &
Ambrosius aliq; permulti Patres in explanatio-
ne eorum verborum, benè longam & accura-
tam in refellendis istiusmodi Astrologorū præ-
dictionibus orationem posuerunt. Quorū nos
Patrum exemplis prouocati, & grauissimis Dei
sententijs contra Astrologos multifariam in di-
uina scriptura proditis permoti, quin etiam iu-
stissimo aduersus Astrologos odio, ppter frau-
dulenta

dulenta, & pernicioſa eorum ſigmenta, incenſi, librum hunc ad confutandas eorum prædictio- nes à nobis ſcriptum, gratum multis atque uti- lem fore exiſtimauiſimus. Scripſit aduerſus Astro- logos copioſè quidem & eruditè Io. Picus Mi- randulanus; ſed multos ab eius lectione deter- ret prolixitas operis. Nos, licet in prædiuini atq- vberi verſemur argumento; eo tamè breues eri- mus, quod non omnia quæ diſputari poſſent, ſed aptiora duntaxat cauſæ firmioræque tracta- bimus. Quinque autem erunt huius libri & di- ſputationis aduerſus Astrologos capita: Primò enim docebimus, ſacræ & Eccleſiaſticæ doctri- næ diuinationem Astrologicam eſſe cōtrariam: Tum oſtendemus, Astrologos eſſe rerum cèle- ſtium imperitos: Deinde, diuinatricem iſtam ar- tem rectæ rationi ac philoſophiæ aduerſari de- monſtrabimus: Adhæc, probabimus, aſtrà nō ſo- lum non eſſe cauſas efficientes rerum futurarū, verum nec eſſe certa ſigna quæ res futuras præ- notent ac præmonſtrent: Ad extremum, cur nō- nulla Astrologorum prædicta ſint vera, cauſas exponemus.

INDEX DISPUTATIONVM
*Quæ ſingulis in prædictis capitibus
 explicantur.*

C A P. I.

1 **S**ententijs diuina ſcripturæ; antiquis item Ec- cleſiæ inſtitutis & exemplis, rationibus etiā theologicis reſelluntur Astrologi.

2 De vanitate oraculorum Appollinis.

DE DIVINATIONE ASTROLOGICA. 165

3. *Cur Dæmones pradicendo futura sapè fallant.*
4. *Non posse veritatem Christiana religionis cohære cum veritate astrologia iudiciaria.*
5. *Quàm seuerè olim Ecclesia in istiusmodi Astrologos animaduertit.*
6. *De multis perspicuè falsis & impijs Astrologorū sententijs.*

C A P V T II.

7. *Astrologos iudiciarios esse rerum cœlestium imperit os.*
8. *Aduersus fictitiā antiquitatē observationum quam iactant Astrologi.*
9. *De noua stella qua superioribus annis vasa est.*
10. *Quā sit difficile aspectum siderum in ortu cuiusque hominis exactè annotare.*

C A P V T III.

11. *Probat̃ octo rationibus, non posse Astrologos ex arte & scientia sua pranosse ac pradicere futura contingentia.*
12. *Prater causas cœlestes, necessariam esse notitiā causarum particularium ad pranoscehdos eorū effectus.*
13. *De simili ortu & dissimilibus euentis Geminorum.*
14. *Pulcherrima disputatio Barthesanis aduersus Astrologos.*
15. *Vtrum sit facilius, diuinare quid facturus sit vir bonus, an vir improbus.*
16. *Quām sit vana ac futilis predictio Astrologorum de aliquo, quod sit futurus summus Pontifex.*
17. *Nullam posse esse scientiam vel artem istius Astrologia.*
18. *Vanitas & falsitas multarum predictionū astrologicarum.*

19. *Errores Astrologorum in Chronologia.*
20. *Astrologiam iudiciariam omni tempore à prudentibus & sapientibus viris esse contemptam & damnatam.*
21. *Cui generi hominum arrideant prædictiones Astrologica, quas S. Ambrosius comparat telis aranearum.*
22. *Disputatur contra tria fundamenta Astrologia iudiciaria.*
23. *Vtrum astra natalitia cuiusque, possint esse certa causa omnium qua ei euentura sunt.*
24. *Vtrum sit plus momenti in conceptu, an in ortu hominis ad diuinandum.*
25. *De vanitate Astrologorum diuinationem suam extendentium etiam ad ciuitates, non solum ad homines.*
26. *Cu Astrologi non, ut de hominibus, sic etiam de stirpibus & alijs animantibus ex obseruatione astrorum vaticinentur.*
27. *De antiquitate istius Astrologiæ apud Aegyptios & Chaldaeos.*

CAPVT IIII.

28. *Vtrum astra, si non sunt causa, saltem sint certa signa omnium futurorum.*
29. *Vtrum secundum Augustinum astra sint signa omnium rerum humanarum.*
30. *De natura & varietate signorum.*
31. *An cometa signa sint humanarum rerum.*
32. *An qui astra faciunt signa rerum futurarum, simul & necessario inducant & astruant. Fatum.*

CAPVT V.

33. *De Quatuor causis propter quas euenit ut nonnumquam Astrologi vera predicant.*
34. *Instinctu Dæmonum agi nonnumquam homines ad diuinandum.*

35. Quos

35. Quot modis Dæmon futura prænoscit, & hominibus pramonstrare soleat.
36. Quod modis, & quàm grauitè peccent, qui Dæmonum vel istorum Astrologorum opera utuntur ad diuinandum.
37. Istiusmodi Astrologos ferè improbos, & flagitiosos esse.
38. De usu sortium apud Antiquos ad diuinandum futura.
39. Permissu Dei, nimis cupidos sciendi futura, laqueis Dæmonum irretiri, & varijs ac perniciosis erroribus implicari.
40. Multos diuinare futura; magis ex prudentia, & usu rerum humanarum, quàm ex arte Astrologica.
41. Nimiam credulitatem ac leuitatem consulenti um Astrologos, interdum conducere ut eorum prædicta vera cadant.

D I V I N A T I O N E M

Astrologicam diuinæ Scripturæ, di-

scipline Ecclesiasticæ, ac doctri-

næ Theologicæ esse

contrariam.

C A P U T P R I M U M.

§. I. Sententijs diuinæ Scripturæ; antiquis itè Ecclesiæ institutis, & exemplis, rationibus etiam Theologicis refelluntur Astrologi.



L A M A T multis in locis diuina Scriptura certâ futurarum rerum præsciëntiâ, & prædictionem, & non esse hominum sed ne dæmonum quidem, verum vnius Dei propriam. Quapropter apud Isaiam cap. 41. ita scriptum est, *Annunciate quæ*

ven-

*ventura sunt in futurum, & sciemus quia di-
 estis vos: & cap. 44. Ego sum Dñs irrita faciēs
 signa diuinorum, & hariosos in furorem ver-
 tens, conuertens sapientes retrorsum, & scien-
 tiam eorum stultam faciens ? cap. aut 47. deri-
 dēs Deus Babylonios, & Chaldaeos syderalibus
 suis obseruationibus præsidentes, Sta, inquit, cū
 incantatoribus tuis, & cum multitudine male-
 ficiū tuorum, in quibus laborasti ab adole-
 scentia tua, si fortè quid profit tibi, aut si possit
 fieri fortior. Defecisti in multitudine consilio-
 rum tuorum: stent, & saluent te Augures cæ-
 li, qui cōtemplabantur sydera, & supputabāt
 menses, ut ex eis annunciarent vëtura tibi. Et
 paulò ante dixerat: Sapientia tua, & scientia
 tua, hæc decepit te. Hieremias quoq; c. 10. mo-
 net Iudæos, vt Astrologicas obseruationes pro
 nihilo ducant, nihil. n. sibi à stellis vel sperandū
 vel timendum esse, sic aut ait: Iuxta vias gen-
 tium nolite discere; et à signis cæli nolite me-
 tuere, quæ timent gentes, quia leges populorū
 vanæ sunt. Salomō aut Eccl. c. 10. scientiā futu-
 rarū rerū denegat homini, Ignorat hō, ait ipse,
 quid ante se fuerit: et quid post se futurum sit
 q̄s poterit indicare? idem c. 8. eiusdem lib. Ho-
 mo, inquit, ignorat præterita, et futura nullo
 scire potest nuncio. Liqueat igitur diuinationē
 astrologicam in sacris literis contemni, deride-
 ri, ac reprobari.*

Cum doctrina sacrarum literarum, etiam iudicium Ecclesiæ, ut par erat, mire congruit. Semper enim Ecclesiæ inde usque à primordiis suis, Iudiciarios Astrologos odit, fugit, damnauit. Ex tant aduersus ipsos plurima & seuerissima decreta Ecclesiæ, quæ legere licet in secunda parte Decretorum cap. 26. per primas quinque quæstiones, & in Cōcilio Bracarensi I. cap. 9. & 10. & in Toletano I in assertionē Fidei contra Priscillianistas. Fertur Alexander Papa huius nominis I I. I. quendā presbyterum qui semel duntaxat consuluerat Astrologum de quodam furto in Ecclesiā sua factō, in vnum annū priuasse altaris ministerio. Crebras item reperimus in scriptis sanctorum Patrum aduersus Astrologos, quos illi nunc Chaldeos vel Genethliacos, aliās Mathematicos aut Planetarios appellant, disputationes, ex quibus apparet quā fuerit maiorib. nostris genus hoc hominum exosum & abominatum. Multa contra illos disputat Basiliius hom. 6. in Genesim, Chrysostomus & Gregorius Magnus in cap. 2. Matth. sed præter ceteros Augustinus lib. 2. super Genesim ad literam cap. 17. lib. etiam 2. de doctrina Christiana cap. 21. & aliquot proximè sequentibus capitibus, subtiliter tamen & copiosè primis aliquot capitibus lib. 5. de ciuitate Dei. Eodem pertinet quæ contra Mathematicos in lib. 14. cap. 4. & in lib. 6. cap. 9. de Præparatione Euangelica argumentatur Eusebius.

Ridiculus fuit, vel potius amens Iulianus Apostata, q̄ in libris quos aduersus Christianos effutiuit, pbare voluit, ex his quæ scripta sunt

*Decreta
Ecclesiæ
contra Astrologos
Iudiciarios.*

*Alexan.
Papa.*

*Basiliius.
Chrysost.
Greg. homil. 10.
sup. Euan-
gel. Augu-
stin. Euseb. Cas.*

*Iulian. Apostata
calūnia.*

in cap. 15. Genes. Abraamum & Astrologiam & aruspicinam coluisse. Astrologiā quidem eius, significari putat illis verbis: *Eduxit Deus Abraā foras, & ait illi, Suspice cælū et numera stellas si potes: Sic erit semen tuū*. Aruspicinæ verò scientiā eius, illis ēt verbis denotari ait, *Sume mihi vaccā triennē, & caprā trimā, & arietē annorū trium, turturem quoq; & colūbam*. Qui tollens vniuersa hæc, diuisit ea per mediū, & vtrasq; partes contra se altrinsesus posuit: aues autē non diuisit. Descenderunt

Iulia. A- que volucres super cadauera, & abigebat eas
postata ca Abraā. Deinde, subiicitur prædictio peregrina-
lumnia à nationis & seruitutis posterorum eius per qua
Cirillo re dringentos annos. Sed hunc Iuliani errorem vel
pulsa. potius furorem, egregiè cōfutat Cyrillus extre-

Matt. 2. mo lib. 10. eius opēis quod aduersus Iulianum
Chrys. ho edidit. Alij fidem huic vanissimæ astrologiæ as-
mil. 6. in serere & astruere conātur ex illa stella quæ na-
Matth. to Christo apparuit, cuius aspectu excitati tres
Greg. ho- illi Magi, ductuq; ad adorandum Christum ve-
mi. 10. in nerant. Sed istos manifestis argumentis Chryso-
Euang. stom. & Gregorius in homilijs super illud Euā-
Argumē- gelium scriptis, redarguunt & conuincunt.
tis ex sa-

era Theo Cæterum, errorem Astrologorum etiam ra-
logia du tionib. ex doctrina Theologica contextis refu-
ctus, astro tare possumus. Principiò, Nemo, vt ait Pau. 1. Co-
logica di- rint. 2. *Nouit quæ sunt hominis, nisi spiritus ho-*
minatio minis, sed homo nescit quid ipsemet postmul-
refelli- tos annos aut etiam dies acturus sit: nam vt in-
tur. quit Scriptura, Prouerb. ca. 27. *Ne glories in*
crasti-

crastinum, ignorans quid superuentura pariat dies: &c. Non est via hominis in manu eius: homo enim proponit, Deus autem disponit. Est namq; non modò quorùlibet hominù, sed et Regum cor in manu Dei, & flectit illud quocumq; vult. Si igitur ipsemet homo necit quid futuro tēpore facturus sit, quanto minus id scire pōt Astrologus? Deinde, ne ipse quidem diabolus certò pōt nosse res futuras: si. n. futura omnia dæmon sciret, nunquā profecto impulisset Iudæos ad crucifigendum & occidendum Christum Dominum, quippe prēuidisset per crucem & mortem Christi, imperium quod tamdiu habuerat in homines, fore labefactandum & funditus euertendum. nec sanè dæmon tentaret & infestaret seruos Dei a quibus in tēratione vincitur, ne videlicet propter victoriam tentationum crescente Sanctorum gloria, magis ipse, quæ eius est superbia & inuidia, torqueretur.

§. 2. *De vanitate oraculorum Apollinis.*

HOC etiam patet argumento oraculorum, quæ olim reddebant dæmones, cuiusmodi erāt responsa & oracula Apollinis Delphici, quodā apud Græcos nobilissima & clarissima; quæ ad diuinationem astrologicā pertinuisse, locuples auctor & testis est Porphyrius in libro de Oraculis (refert autem hoc Eusebius lib. 6. de Præparatione Euāgelica, cap. 1.) vbi tradit, quæcunque dii ceu fati definita prædicunt, ea ipsos stellarum motu ita esse futura significare, id quod maxime Apollo multis respōsis aperuit In hisce aut oraculis & diuinationib. sæpè mentitū

Porphyrius.

esse Apollinem, idem auctor est Porphyrius, ex quisitam enim futurorum cognitionem ait nō hominibus modo, sed multis etiam deorum in comprehensibilem esse. vnde interrogati mentiuntur nonnunquam, sed non sponte: solent enim prēmouere, se tunc vera respondere non posse, homines tamen ex amentia perseverant urgere & cogere eos ut respondeant. Apollo igitur Delphicus, cum eiusmodi esset cœli & cōtinentis affectio ut verum prœuidere non posset, retine, dicebat per Vatem, uim istam, & potentia verba hæc ne proferas, falsa enim dicam, si coges. Et in alio responso, Nihil hodie, inquit Apollo, stellarum mihi via dicendum præstat. Deinde concludens Porphyrius ait, Manifestū iam fecimus vnde falsitas ad deorum oracula subrepat. Hæc ex libro Porphyrii de Oraculis, in libro sexto de Præparatione Euangelica. cap.

*Oenomaus
us vehemens
disertus
oraculo
vū Apol-
linis con-
futator.*

4. Eusebius commemorat. Fuit etiam olim qui-
dam Oenomaus, vir apud Græcos tam philoso-
phia quam eloquentia nobilis, qui respōsis del-
phici Apollinis sæpè delusus atque deceptus, di-
ligenter & curiosè collegit quamplurima eius
oracula, eaque ut vana, futilia, & falsa cōfuta-
uit, ut refert Eusebius lib. 5. de Præparatione E-
uangelica, cap. 10.

§. 3. Cur Dæmones prædicando futura sæpè fallant.

Q V A T V O R porrò ob causas vsu uenit in prænuntiando futura falli dæmonem. Primò, quia nimis asseueranter affirmat quæ pendent ex libero arbitrio hominis, quod cum sit admodum

dum mutabile, & ad omnia flexibile, & planè liberum, nonnunquam extraordinaria quadam ratione operatur. Deinde, quod nos sæpè diuinitus incitari, & adiu ti Dei gratia, contra facimus quàm antea facere cogitabamus, & quàm nostro ingenio nostroq; arbitrati facturi eramus. Fit èt interdū, ut quod dēmon agere constituerat, & prædixerat, prohibente impediēteque Deo, non possit exequi. Denique, multa Deus solet aliquando præter cōmunem ordinem naturæ, præterque gñalem suam & ordinariā providentiam agere. Atque his rebus crebro dēmon in errorem inducitur. Quis ergo crederet Astrologos prædicendis futuris rebus veraces esse, cū in eo uel dēmones falli sæpè contingat? Sed qd ego de dēmonibus loquor? Theologi docent, ne ipsos quidem spiritus cēlestes ac beatas mentes, q̄ liquidò cernūt, & clarissimè vident Deū, tenentq; perfectissimā cognitionē cēlorū cūctarūq; rerū naturalium, certò scire futura, quæ nimirum pendent ex libero arbitrio, nisi earū rerū Deus singularem ipsis notitiā impertiat. Cuius aut amentia est, Astrologis tribuere, quod nec Angelis nec beatis mentibus cōcessum est?

§. 4. *Non posse veritatem Christianæ religionis coherere cum veritate Astrologiæ Iudiciariæ.*

SED illa in primis fortis est argumentatio. Si Christiana religio, & disciplina vera est, ut est profectò verissimā, non potest esse vera, nec Christianis probari potest illa opinio Astrologorum.

Egregia
ratio ad-
uersus A-
stroman-
tiam.

gorum, vñ quā illa vanitatis, falsitatis, & impietatis persapè damnauit: sin autem falsa est doctrina Christiana, cum ipsa totum ferè orbem complexa sit, omnesq; propemodum gētes suo Imperio subiecerit, & plus mille quingētos annos vigeat, & regnet in mundo, si omnia quæ apud homines fiunt ex cēlo proueniunt ac pendēt, necesse est tātā hominū ad fidem Christi accipiendam tuendamq; propensionem tantūq; studium, ex insigni aliqua, & prapotēti constellatione prouenire: quare cēlum inclinaret, & induceret homines ad malum. Si enim fides Christi esset falsa, magis profectò esset falsa, & detestabilis, quā alia quælibet secta: ea namque docet de Deo, & rebus diuinis, quæ si falsa sunt, nefariam sanè superstitionem, & execrandam impietatem contineant necesse est. At verò, cum vita, quæ ad normam fidei Christianæ agitur, sit optima, & inculpara, nec laude tantum sed summa etiam admiratione dignissima, hinc necessariò efficeretur, ab eadem constellatione proficisci bonum, & malum: malum quidē, propter falsitatem doctrinæ Christianæ: bonum autem, propter vitæ, quæ ad eius doctrinæ regulam informatur, & dirigitur, probitatem atque præstantiam.

*Præclara
argumē-
tatio.*

Ad hæc, maxima probatio, & confirmatio fidei nostræ, & clarissimum diuinæ prouidentię argumentum illud est, quæcumque circa Christum Dominum, & eius Ecclesiam euenerunt, ea multis ante sæculis fuisse per Prophetas, ad vnū oīa propriè, distinctè, explicateq; prædicta: si autem eiusmodi prædictio per Astrologiam fieri

fieri posset, rueret funditus & ad nihilum recideret firmissimum nostrę religionis fundamentum. Ne multa, istiusmodi Astrologorum doctrinā veram Philosophiam moralem, nedum sacram Scripturam & Theologiam, quantum in ipsa est, planē peruertit qui enim certum habet omnia pendere è cœlo, ob idq. cuncta hominum opera facta, casus, & euenta ex cœli obseruatione præsentiri & prædicti posse, huic quoque necessariò persuasum esse debet, materialem & mortalem esse animum nostrum, nullūq. esse liberum arbitrium, nec talem esse prouidentiam Dei qualem Fides nostra prædicat; mysteria item Christianę religionis pendere è cœlo, cunctaque miracula tam in veteri quàm in nouo Testamento edita, licet dicantur, vt re vera sunt, supernaturalia, ad cœlestes nihilo minus causas & virtutes reuocari. Huic quoque opinionationi cōsequens est, neglectio & prætermisio bonorum operum, licentia omnium cupiditatum, quorumlibet flagitiorum excusatio, denique inutilitas atque crudelitas humanarum pariter atque diuinarum legum. Caietanus in Summula vbi agit de astrorum obseruatione, similima docens eorum quę diximus, verē magis & doctē quàm eleganter & ornate ita scribit, Astrorū obseruatio circa natiuitates hominum & occurrentia humana tripliciter peccato subijci potest. Primo, si ea quę fidei Christianę misteria sunt, tanquam subsint cœlestib. causis, habeantur: secundo, si futura contingentia quæratur vel habeantur vt certa ex cœlestib. causis; tertio, si electiones suas quis subijciat cœle-

*Caietani
breuis,
sed vera
& memo
rabilis ad
uersus præ
dictiones
astrologorum
sententia.*

stibus causis tanquam legi illarum ita vñ vitam & actiones suas regulet secundum cœlos. Et quodlibet horum trium est ex suo genere peccatum mortale: quia primum est contra spiritualitatem Christianæ religionis, quæ super cœlos est, immutare pontens etiam ipsos cœlorum cursus iuxta id quod scriptum est in Psal. 148. Confessio eius super cœlum & terram: & hoc experientia testata est. Secundum verò, est contra veritatem doctrinæ Christianæ & liberi arbitrij, quo domini sumus nostrorum operum. Tertium est contra dignitatem gratiæ, legis divinæ, ac humanę mentis, qua super omnia corporalia sumus constituti. Et sicut erraremus subiiciendo nos passionibus iræ, odij, spei, timoris, ita quod haberemus impetus passionum, p lege: ita vilificamus nos, si inclinationes cœlorum pro lege habeamus: corpora enim sunt, & per modum passionum inclinant nos Hæc Caietanus.

In actis autem Apostolorum cap. 19. refert Lucas, multos de his qui Ephesi concionibus & sermonibus B. Pauli conuerſi erant ad Christum, & curiosa prius fuerant sectari, attulisse libros suos, & coram omnibus combussisse: fuisse autem eos libros de rebus ad iudiciariam Astrologiam pertinentibus, grauis auctor in Commentariis super Psalmos dixit Augustinus qui etiã Mathematicum quendam, hoc est, istam Astrologiã professum, postea poenitentem professionis suæ cupientemq; recõciliari Ecclesiæ, nisi publica & solenni penitentia præmissa, non recepit, verum sententiam Augustini, quod ea
maxi-

maximè attingit id quod nunc agitur, totidem verbis hic ascribam. Post enarrationem igitur 61. Psalmi, cum Mathematicus ille veniam publicè petens coram siteretur, hæc dixit Augustinus: Iste ex Christiano, & fideli penitens redit, & territus potestate Domini conuertitur ad misericordiam Domini: seductus enim ab inimico cū esset, fidelis diu Mathematicus fuit, seductus seducens, deceptus decipiens, illexit, fefellit, multa mendacia locutus est contra Deū qui dedit hominibus potestatem faciēdi, quod bonum est, & nō faciendi quod malum est. Iste dicebat, quod adulterium non faciebat voluntas propria, sed Venus; & homicidium non faciebat voluntas propria, sed Mars: & iustum nō faciebat Deus, sed Iupiter: & alia multa sacrilega non parua. Quā multis eum putatis Christianis nummos abstulisse? Quā multi ab illo emerunt mendacium? quibus dicebamus, Filij hominum vsquequo graui corde, vt quid diligitis vanitatem, & quæritis mendacium? Modo sicut de illo credendum est, horruit mendacium, & multorum hominum interitum: se aliquando à diabolo sensit illectum, conuertitur ad Deum penitens. Nostis in Actibus Apostolorum esse scriptum, capi. 19. quia multi perdit, id est, talium artium homines, & doctrinarum nefariarum sectatores, omnes codices suos ad Apostolos attulerunt, & incensi sunt libri tam multi, ut pertineret ad scriptorem æstimationem eorum facere, & summam pretij conscribere. Hoc utique propter gloriam Dei, ne tales et perdit desperarent ab illo qui nouit querere

*Notabilis
orō quam
habuit
August. 3
reconci-
liatione
cuiusdā
Mathe-
matici cū
Ecclesia.*

Psalm. 4.

quod perierat. Perierat ergo iste, nūc quæsitus inuentus, adductus est: portat secum codices incendendos, per quos fuerat incendendus, vt illis in ignem missis, ipse in refrigerium transferet. Ante Pascha enim cœpit petere de Ecclesia Christi medicinam, sed quia talis est ars in qua exercitatus erat, quæ suspecta esset de mendacio atque fallacia, dilatus est ne tentaret, & aliquādo tamē admissus est ne periculosius tētaretur. Hactenus Augustinus.

§. 5. *Quā seuerè olim Ecclesia in istiusmodi Astrologos animaduernerit.*

B. Epiphanius.

Origenis
egregia co-
tra Astro-
logos di-
sputatio.

CERTÉ in primitiua Ecclesia istiusmodi astrologia non secus quā ars magica, reprobata, vetita, & damnata erat. Narrat Epiphanius in libro de mensuris & ponderibus, Aquilam Ponticum Scripturę interpretem ob eam maximē causam fuisse à patrib. ex Ecclesia pulsum, quod natiuitatum obseruationibus cæterisq; diuinationibus astrologicis studiose vacaret. Non est pro derelicto habendum, cum sit admodum memorabile, quod Origenem in commentarijs super Genesim de ista astrologia prodidisse, libro 6. de Præparatione Euangelica, capite 9. tradit Eusebius, sic enim scripsisse illum ait: Non solum Gentiles stellarum coniunctione atque aspectu quæ in terris sunt, necessariò accidere credunt, quā vim Fatum appellant, verum etiā multi ex fidelibus conturbantur, impossibile aliter fieri credentes quā stellarum cursus effecerit. vnde sequitur nullam in nobis esse libertatem, nullam operationem nostram lauda-

ri aut

DE DIVINATIONE ASTROLOGICA. 179
ri aut vituperari iure posse, ita prædictum a Scri-
pturis Dei iudicium quo alij ad æterna suppli-
cia, alij ad æternam beatitudinem prædestinan-
tur, falso fore prædicaretur. Quid plura? ipsa
quoque fides & Saluatoris nostri aduentus, &
omnis Prophetarum labor, ac Apostolorum in
constituendis Ecclesijs prædicatio, inania erunt,
nisi forte Christum quoque quis audeat dicere,
coelestium corporum vi coactum fecisse quæ fe-
cit, passumq; fuisse quæ passus est, nec eius deita-
tis potentia sed stellarum virtute cuncta euenis-
se: his impijs verbis etiam illud conficitur, ut fi-
deles Fato ducti in Christum credant: denique,
ut vel nullum sit boni & mali discrimen, uel et
malorum auctor sit Deus: nullusq; hominum
propter bene uel male facta præmio aut pœna
dignus censeri debeat, nec orationibus, votis, &
Dei obsecrationibus locus aliquis relinquatur.
Sic Origenes.

Eat igitur nunc Petrus de Aliaco¹, & istam A- *Animad-*
strologiam amplectetur, exosculetur, præfracte *uersio in*
que defendat, atque obnixè conetur eam cum *Petrus de*
philosophia, quin etiã (si Deo placet) cū Theo- *Aliaco.*
logia confociare atque coniugare; scilicet falsi-
tatem cum veritate, tenebras cum luce, doemo-
nem cum Deo qui nec veritus est scripto pro-
dere, diluuium Noëticum, & ortū Christi Do-
mini, aliaq; summa prodigia & miracula, etiam
syderalis scientiæ peritia ex astrorum observa-
tione prænosci ac prædici potuisse.

*§.6. De multis perspicuè falsis, & impijs
Astrologorum sententijs.*

SE D quo manifestius appareat quàm sit im-
pia, & execranda istorum doctrina, ponam hic
paucas quasdã eorũ snias, & decreta, è quibus
iudicium fiet de illius artis impietate. Quidam
istorum, ex Marte in nona coeli regione felicità-
ter constituto, tantum præstare nobis cõrendũ,
vt ab obfessis corporibus sola præsentia demõ-
nes expellamus. Alij iactant se hac arte, de eius
qui nascitur conscientia arcanis, & secretis si-
ne errore iudicatueros. Vulgatum quoque apud
illos est, duos esse planetas auctores felicitatis
humanæ, Venerem quidem præsentis, Iouẽ au-
tem post hanc vitã futuræ. *Mater-* *nus.* Maternus porrò eius
modi figmentorũ, & mēdaciorũ studiosissimus,
& curiosissimus, cum multa memoret quæ à Sa-
turno constituto in Leone accidunt hoĩbus, sub-
dit, eiusmodi hoĩes lōgæuos fore, & post mor-
tem animas eorum in celũ dijs applicatas euo-
laturas, Saturnus enim, inquit, in Leone positus
aĩas eorũ, qui sic se habuerint in terra, inume-
ris angustijs liberatas, ad celũ, & originis suæ
primordia reducet. Deniq; Albumazar scribit,
Albuma- *Zar.* qui Luna Ioui coniuncta in capite Draconis,
Deo supplicauerit, eũ quicquid petierit à Deo,
Petrus certissimè impetraturum: id qđ Petrus Apponẽ
Apponen- *sis.* sis expertum se esse cõfirmat, nã cum vigente il-
la cõiunctione, scientiam rerum à Deo postu-
lasset, ait se post eã diem, magnã sibi factã esse
scientia accessionem, sensisse. Hæc autẽ, & alia
eorum

DE DIVINATIONE ASTROLOGICA. 181
eorum similia, quàm sint nefaria, detestanda, &
Christianæ religioni exitialia; quantumq; va-
leant ad eleuandam, uel potius delendam fidem
eoram quæ diuina Scriptura docet immediate,
supernaturaliter, ac miraculose fieri a Deo, ne
mo est tam hebes ingenio & tardus intelligen-
tia, ut non clarissime intelligat. Si quis aut hæc
plenius atq; subtilius scire auet, legat quæ in
hanc sententiam cum alibi, tū lib. 2. c. 5. & in lib.
5. cap. 11. & inde usque ad finem eius libri, Pi-
cus Mirandulanus diligenter & copiose tractat.

ASTROLOGIAM IUDICIARIAM A
Philosophia redargui & conuinci, primò
quidem ea ratione, quod istiusmodi
Astrologi cœlestium rerum sint.
imperitissimi.

C A P V T II.

DIVINATIONEM Astrologicā futi- Multi-
plex &
praua
contra
Astrologos
ex Philo-
sophia ar-
gumenta-
tio.
lem esse nulloq; nixam fundamento, Philosophus quidem ad hūc modum argumen-
tabitur, Astrologi nec certò sciunt omnes astro-
rum uires, defluxus, & effectus; nec si eas res
scirent, satis id foret ad certam rerum futurarū
præsentionem; ergo prædictiones astrologi-
cas inanes & fallaces esse necesse est. Duo in
hac argumentatione sunt posita, explicatius à
nobis tractanda & confirmanda: alterum est im-
peritos esse Astrologos rerum cœlestium, alterū
vero est, ut essent illi peritissimi earum rerum,
non propterea tamen posse eos futura omnia
prænosse, de priori autem dicamus prius.

§. 7. *Astrologos Iudiciarios esse rerum cœlestium imperitos.*

ESSE igitur Iudiciarios Astrologos syderalis doctrinæ ignaros, patet ex his quæ subijciā, Principiò, valde arduum & operosum est, etiam quæ de cœlo videntur minus difficilia magisque nobis obuia, perfectè cognoscere: veluti quæ sit cœli natura, magnitudo, numerus orbium, & inter eos ordo & differentia dignitatis, varietas motuum, denique astrorum numerus, eorumque inter se in magnitudine, luce, potestate & effectu comparatio, atque huius difficultatis facit clarissimum indicium tanta opinionum varietas quantam esse his de rebus inter maximos Philosophos cernimus. Aristoteles certe, Philosophorum omnium facile princeps, iugene fatetur se multarum rerum cœlestium non exquisitam scientiam, sed opinabilem, & coniecturalem tantum notitiam tenere: Et quia manifestis certisque rationibus destituatur, cogi se non raro probabilibus duntaxat argumentis & coniecturis. Vdere hæc licet apud ipsum Aristotelem in secundo libro de Cœlo textu 17. 34. 60. & 61. hoc si est, quis credet Astrologis, quos solis luce clarius est nulla re comparandos esse maximis illis philosophis, quod est in cœlo abstrusissimum, & iudicio summorum Philosophorum mortalibus incomprehensibile, veritatem pice rerum omnium futurarum, esse liquidò cognitam exploratèq; perceptam? Deinde, rogemus istos Astrologos, ut faciliores quasdam quæstiones de cœlo nobis enodent: per-

cuncte-

cunctemur ex ipsis, an cælum sit natura quædam simplex, an composita ex materia, & forma, vtrum talis sit materia cæli qualis est rerum omnium sublunarium, an omninò diuersa; sitne cælum animatum an inanimum; num sua vi, & à se moueatur, an extrinsecus ab Angelo; unde potissimum in cælis æstimari & iudicari debeat dignitatis eorum præstantia: quid causæ sit cur non omnes orbes vno motu circūagantur, sed alij vnò tm̃, alij pluribus, alij vero paucioribus: aperiant nobis quā habebant propria vim, & potentiam singulæ stellæ in elementa, metalla, stirpes, atque animantes, hæc, inquam, & alia horum similia sciscitemur ex istis Astrologis, profecto reperiemus ipsos doctrinæ harum rerum planè rudes, & prorsus expertes.

Qui sit igitur credibile, planiora hæc, & apertiora ignorantibus, mortalium intelligentiæ remotissima, & occultissima, esse comperta, & explorata? Postea, doceant nos isti defluxus, & effectus, qui nunc ex varijs attris dimanant ad diuersas, & diffitas mundi regiones, sic enim fortasse credemus illis futuros syderum effectus prænunciantibus, quis enim nescit procliuius, & propensius esse præsentia nosse quàm futura, præsertim mutabilia, & quæ variè possunt contingere, ob idq; incerta? Exponant item nobis occultas proprietates, & vires quas habent res sublunares, quas miramur magis quàm intelligimus in multis lapidibus, herbis & animalibus: hæc. n. cum proxima sint, atque nobis coniuncta, & cunctis penè sensibus nostris subiecta, & q̃ quotidianis experimētis puestigari, & explo-

explorari possunt; planiorem intelligentiam, & faciliorem habent explicatum: cognitio verò rerum coelestium maximi laboris, & difficultatis est, cum tam longè distet à nobis celū, nec alio quàm vnico oculorū sensu mortalibus pateat: quem tamen sapè falli contingit propter tãtam interualli longinquitatem, vel summam vertiginis coeli velocitatem, vel prauam affectionem medij aut visus, vel propter vitium astrolabij, tabularum, & instrumētorum astronomicorū. Atque hoc etiam apud sacras literas in c. 9. lib. Sapientiae testatum legimus: *Corpus, inquit, quod corrumpitur aggrauat animam, & terrena inhabitatio deprimit sensum multa cogitationē. Et difficile estimamus, quæ in terra sunt, & quæ in prospectu sunt inuenimus cum labore, quæ autem in celis sunt, quis inuestigabit? Sensum aut tuū quis sciet, nisi tu dederis sapientiam, & miseris spūm sanctū tuū de altissimis. Extremum autem huius snīæ, omninò redarguit Astrologos, qui humana omnia euēta quorum multa ex secretissimo Dei consilio, & voluntate pendent, diuinare se posse profitentur.*

§. 8. Aduersus fictitiā antiquitatem observationum quam iactant Astrologi.

PRAETEREA, iactant Astrologi, habere se innumerabilium annorum observationes rerum euētis comprobatas, è quibus ars ipsorū collecta, & confecta sit: nam cum in omni præteriti temporis spatio, penè innumerabiles res eodem modo euenirent, ijsdem signis antegres-

sis;

sis, ars est effecta eadem sæpè animaduertendo atque notando : quare Chaldaeos ferunt quadringenta septuaginta millia annorum, monumentis huiusmodi obseruationum astrologiarum comprehensa habuisse. Verùm, hoc quàm sit commentitium & improbabile, uel ex eo liquet quod Astrologi non potuerunt eiusmodi obseruationes & experientias, nō dico millies ut ipsi iactitant, sed ne ter quidem bisue colligere & comparare potuerunt. nam cœli facies, & omnium signorum cœlestium positura quæ semel fuit, eadem omnino vel nunquam, uel nō nisi post immēsa annorum spatia redire potest: quippe octauus orbis in quo sunt inerrātes stellæ, non ante sex & triginta annorum millia circuitum suum absoluit. quin doctissimi quidam Mathematici, optimis rationibus probarunt, motus cœli esse inter se incommēsurabiles, ob idq; eandem cœli faciem, eundemque stellarū positum sæpius euenire non posse.

Hanc rationem Phauorinus philosophus a- *Phauori-*
 pud' Gellium lib. 14. cap. 1. paulò enucleatius, *nus cōtra*
 certè luculentius & elegantius tractat his uer- *Astrolo-*
 bis, Si Chaldaeorum isto modo cœpta fieri ob *gos.*
 seruatio est, ut animaduerneretur quo habitu, qua forma, quaque positura stellarum aliquis nasceretur: tum deinceps ab ineunte vita, fortuna eius & mores & ingenium & circumstantia rerum negotiorumque, & ad postremum finis etiā vitæ spectaretur; eaque omnia, ut usu venerant, literis mandarentur: ac postea longis temporibus, cum ipsæ illæ eodem in loco eodemque habitu forent, eadem cæteris quoque

quoque euentura existimaretur qui eodem illo tempore nati fuissent : Si isto , inquit , modo obseruari cœptum est , ex eaque obseruatione cōposita quædam disciplina est , nullo id pōto potest procedere. dicant enim quot tandem annis , vel potius quot sæculis orbis hic obseruationis perfici quiuerit . Constare quippe inter Astrologos dicebat , stellas istas quas erraticas dicerent , quæ esse omnium rerum fatales dicerentur , infinito propè & innumerabili numero annorum ad eundem locum , cum eodem habitu simul omnes vnde profectæ sunt , regredi ; vt neque vllus obseruationis tenor , neque memoria vlla , neque effigies literarum tanto æuo potuerint edurare. sic Phauorinus. Adhæc , licet Astrologi cognoscere possent singulares vires & defluxus cuiuslibet astri separatim , tamē quā vim habeant sydera , cum defluxus diuerforum astrorum vnā coeunt & permiscentur , vt in coelo vel in aere vel in terra vel etiam cum causis sublunaribus earumque actionibus , ab ipsis nequaquam sciri potest. Audiat lector Origenem , cuius ex Commentarijs super Genesim , hanc Eusebius extremo lib. 6. de Præparatione Evangelica citat sententiam : Quæ autem , inquit , commitione , compositione , ac temperie diuerforum aspectuū fieri asserunt , profecto concedent nullo modo sciri posse. Quomodo enim quantum diminuatur de læsione maligni aspectus propter aspectum benigni syderis percipies ? & vtrum auferat malignus quod a benigno conceditur , quoniam locum eius aspexerit ; aut mutet , aut imminuat , aut mistura quædam

Origines.

dam inde fiat, quis percipiet? quæ omnia si quis altius inspiciat, facile credat non posse ista humano ingenio penitus percipi. Vnde si quis harum rerum periculum fecerit, videbit in pluribus errare, quam veritatem consequi Genethliacos. Quamobrem Elaias etiam quasi hæc omnibus impossibilia sint, ad filiam Chaldeorū qui maxime ista proferunt ait, *Ad sint & sal* *Esa. 47.*
na te faciant Astrolegi, cæli Augures annuncient tibi quid euenturū sit. His enim uerbis docemur, vel diligentissimos in hac re Chaldeos, non posse prædicere quæ velit unicuique genti Deus attribuere. Hactenus Origenes.

His accedit, multas esse stellas quæ vel non clarè cernuntur, vel etiam nullatenus cernuntur: earum verò quæ cernuntur, paucas sibi esse cognitās, permultas verò necdum exploratas fatentur Astrologi. qua ratione igitur ex paucis astris, quorum vires norunt tam confidenter prænunciant futura, cum per aliorum syderum quæ nesciunt influxus, notorum sibi syderum effectus, aut impediri aut variari possint? nisi fortè astrorū quæ latent ipsos, nullas esse vires nullosq; defluxus, impudenter & absurdè mentiantur. Certè constat inter Astrologos numerari in octauo cælo mille præterq. viginti duas stellas, quarum cum quælibet maior sit terra, necesse est ingentem esse earum vim & potentiam. huiusmodi stellarum, vel nullam uel perexiguā notitiam habent Astrologi, quippe cum ars eorum iudiciaria ferè cōstet ex planetarum obseruationibus, in quibus tota propemodum

versetur & consumitur. Vidit hoc, quæ erat perspicacia ingenij Seneca, & in libro 2. Natural. quæstionum, cap. 3 2. eleganter exposuit, Quid est aliud, inquit, quod errorem incutiat peritis natalium, quàm quod paucis nos syderibus assignant; cum omnia quæ supra nos sunt, partem sibi nostri vendicent? Submissiora forsitan in nos propius vim suam dirigunt, & ea quæ frequentius mota, aliter nos, aliter cætera animalia prospiciunt. cæterum, & illa quæ aut immota sunt, aut propter velocitatem vniuerso mundo parem, immotis similia, non extra ius dominiumque nostri sunt. Hæc Seneca.

§. 9. De noua stella, quæ superioribus annis visa est.

·SUPERIORIBVS annis vidimus stellâ: nouâ ante illud tēpus nunquā in cælo visam, & iudicio Astrologorum in eodē loco vbi stellæ fixæ lucent positam: hæc cum ad aliquod tempus conspicua fuisset, repente tota ex aspectu nostro discessit & prorsus evanuit. hanc stellam necesse est vel in cælo esse generatâ & postea corruptam, idemq; in alijs læpius euenire, longis ramen temporum interuallis verisimile est: vel esse supra septem planetas alia sydera errantia quæ proprios quidem meatus, sed nobis ramen ignotos habeant: vel denique quas nos in octauo orbe stella inerrantes, & infixas putamus, eas quoque proprios circuitus & motus agere. de quo addubitalse olim Hipparchū nobilissimum in astrologia virum, locuples auctor & testis est Plinius, in cap. 26. lib. 2 Hipparchus,

Hipparchus.

parchus, inquit, nunquam satis laudatus nouam
 stellam, & aliam in æuo suo genitam deprehendit:
 eiusque motu qua die fulsit, ad dubitationem
 est adductus, anne hoc sæpius fieret, mouereturq;
 & ex quas putamus affixas. Quid quod
 permagni ad artem suam referre centent Astrologi,
 conuenientiam, & discrepantiam quæ est
 inter duos Zodiacos, alterum octauum alterum no-
 ni cœli, exploratam habere? quæ tamen ipsis nota
 esse non potest: quippe cum nonnum cœlū omni
 ni stella luceq; careat, nec aliud de ipso quàm
 motus, isque ex motu octauum cœli deprehendi
 possit. Latet etiam Astrologos quemadmodū isti
 duo Zodiaci se habuerint in exordio mundi,
 quod tempus ab origine mundi ad hanc diem
 exactum, certo teneri nequeat: nam ut annorū
 eius tēporis ratio aliqua iniri, & numerus col-
 ligi possit, dierum tamen, & horarū non potest:
 quorum tamen subtilis, & certa computatio,
 isti doctrinæ Astrologicæ opus est.

*Duplex
 Zodiacus
 apud A-
 strologos.*

10. *Quàm difficile sit, aspectum syderum qui
 in cuiusque hominum ortu uiget
 annotare.*

IAM verò vix potest sine errore vllō nota-
 ri, & cognosci positus astrorū, qui est in eo mo-
 mento quo quisque nascitur. Etenim difficilli-
 mum est, vel punctum temporis, in quo quispiā
 oritur, uel in eo ipso puncto aspectum syderū
 omnium, qui tunc uiget, obseruare: sæpè nam-
 que cœli, & stellarum aspectum, nubila & crasso-
 rum vaporū interpositus, vel adimunt nobis,

vel interturbant, & infuscant; & quod caput est, rapidissima coeli vertigo facit vt constellatio prius transuolet, quàm à nobis propriè annotetur: quippe per singula ferè momenta, alia, & alia coeli facies, & identidem diuersa astrorum positura existit. Profitentur isti Astrologi se cuiusuis hominis euenta omnia prænunciare posse, dummodo sibi ortus eius certum tempus per notescat: at eiusmodi tempus subtiliter, & propriè, ita nimirum vt opus esset Astrologo, ferè nescitur. Nam vt dicatur, exempli causa, Petrum esse natum vigesimo ab hinc anno, die Septembris vltimo, hora noctis decima, uel ineunte vel media vel iam exeunte, at momentum illud, vel potius minimum illud tempus quo Petrus aluo matris fusus, & in lucem editus est, nec obstetrix, nec parentes seu cognati, subtilissimè annotatum, & perspectum habent: qua tamen temporis illius subtilissima obseruatione, & cognitione, ad diuinandum eget Astrologus.

*B. Basilij
argumen
tatio con
tra Astro
logos.*

Non possum facere, ut adscribere hoc loco prætermittā verba Basilij quibus ipsa hæc ratio quam nos strictim attigimus, latius ab eo explicatur, & acrius vrgetur. Sic enim ille homil. 6. super Genesim scriptum reliquit, Genethliacæ artis inuentores, cum in temporis amplo spatio complures figuras suam ipsorum scientiam fugere percepissent, in angustum admodum temporis contraxere mensuras, ut minutissimo quoque, & subitaneo articulo, quale est quod Apostolus 1. Cor. 15. stolus dicit: *In momento tēporis, in īcū oculi.* plurimum differentia sit inter natiuitatē, & natiuitatem. Vt is quidem qui hoc in momento

genitus

DE DIVINATIONE ASTROLOGICA. 191
genitus est futurus sit Rex ciuitatum, populo-
rumq; princeps, locupletissimus, præpotens : Is
autem qui natus est temporis sequentis momē-
to, pauper quidam sit futurus, aut mendicus cir-
culator, vel præstigiator, ex ostijs ostia permu-
tans quotidiani consequendi causa victus, quā-
obrem eo orbe qui signifer appellatur duode-
cim in partes diuiso, cum in triginta dierum spa-
tio partem Sol eius globi transeat duodecimam
quem inerrantem appellant, triginta in portio-
nes singulas illas duodecim partes secuerunt,
tum singulis portionibus illis in sexaginta mi-
nuta diuisis, minuta hæc singula rursus in alia
sexaginta modo simili diuisere. Posito igitur
enixu eorum qui in lucem eduntur, videamus,
obsecro, si hanc exactissimam temporis diuisio-
nem Auctores hi sibi valeant conseruare. Nam
simul atque editus pusio est, mas an femella sit,
obstetrix explorat : tum vagitum expectat in-
fantis, nimirum iudicium vitæ eius qui natus
recens est. Quot hoc tempore vis sexagesima
præterijisse minuta? Dicit obstetrix deinde Chal-
dæo partum qui editus est : quot minutissima
momenta vis interea dum obstetrix loquitur
prætercurrisse? præsertim si fortè fortuna fue-
rit non in conclauī mulierum Chaldæus ille
præsens, sed in ædium atrio, aut vestibulo, tem-
pus horamq; reponere. Et cum eum qui dissi-
natus est diligenter tempus ac horam, explora-
toria nimirum horarum percipere oporteat in-
strumenta, siue diurna sint siue nocturna : quot
minutorum hoc quoque tempore, quæso, præ-
teruolat præteritq; examen? Compertam enim

eam esse stellam qua tempus horaq; sit exploranda, non solum quanta in parte sit duodecima, sed etiam quàm iuxta duodecimæ portionem partis, in quotoque minuto sexagesimæ eorum, in quæ subdivisa sunt singula sexagesima illa prima, necesse est. Atque hanc tamen adeo tenuem subtilemque temporis inuentionem, quam attingere nequeunt, singulis in stellis errantibus faciendam esse necessariò dicunt, ut qualem ad coelo adfixas stellas ipsæ dispositionem habitudinemue haberent, qualisq; ipsarum esset inter sese figura, cum in lucem ederetur foetus, compertum sit tandem ac exploratum. Quæ cum ita sint, si fieri non potest ut tempus illud exactissimè quisquam attingat, variationeque vel breuissimi temporis sit ut tota via penitus aberretur; deridendi profectò non mediocriter esse videntur, tam ij qui studio huius indulserunt artis quam in ratione rerum nusquàm esse constat, quàm illi qui hiantes ab illorum ore pendent intenti, perinde quasi omnia illi scire possint quæ ipsis sunt euétura. Hactenus sunt quæ Basilius eo loco aduersus Astrologos disputat.

*ETIAM SI ASTROLOGI SVMMAM
rerum celestium cognitionem teneant,
non posse tamen eos futura diui-
nare, probatur octo rationib.*

C A P V T III.

SED concedamus Astrologis quod ipsi falso & impudenter sibi arrogant, perfectam videdi-

DE DIVINATIONE ASTROLOGICA 193
delicet astrorum & cæli scientiam: hanc ipsam
nunc contendo non posse certam futurarum re-
rum prænotionem & diuinationem efficere;
idq; multis & validis rationibus confirmo.

II. *Octo rationes, quibus probatur ex cogni-
tione astrorum etiam perfecta, non posse di-
uinari omnia qua futura sunt.*

PRIMA RATIO. Vera & trita est in scho-
lis illa Philosophorum sententia, Sicut res se ha-
bet ad esse, ita quoque se habet ad cognitionem,
hoc est, propter quas causas quæque res fit & est
per eas cognosci debet, si quidem perfectam e-
ius rei scientiam adipisci volumus: ad genera-
tionem autem futurorum effectuum particula-
rium, non modo concurret cælum sed etiam
causa particularis, & enim cælum causa vniuer-
salis, quo fit ut eius vis & efficientia sit etiam v-
niuersalis & indeterminata ad producendum
quoslibet effectus particulares: determinatur
autem vis cæli per causas particulares. quam-
obrem verissimum est illud quod dixit Aristo-
teles, Sol & homo generant hominem. quin effe-
ctus particulares, licet quod attinet ad eorum
effectiōem & conseruationem, maximè pen-
deant ex causis vniuersalibus, tamen quod per-
tinet ad propriam cuiusque eorum naturam &
ad naturales proprietates, tam specificas quàm
indiuiduales, magis particularem causam
quàm vniuersalem emulantur.

*Prima ra-
tio.*

atque imitantur.

12. *Præter causas cœlestes, necessariam esse notitiam causarum particularium ad prænotandos earum effectus.*

Sicut ad generationem rerum futurarum non tantum concurrat cœlum sed etiam causa particularis, ita ad certam earundem rerum prænotionem, non solius cœli notitia satis esse posse.
B. Augu.

C V M igitur præter causas cœlestes, ad produ-
 ducendos effectus futuros opus sit etiam causa
 particulari efficiente, & materia idonee præpa-
 rata, quorum si desit alterutrum, prorsus nul-
 lus futurus est effectus, ex his necessario con-
 cluditur, ad prænotionem futurorum effectuum,
 cœlestium causarum notitiam non esse satis. At-
 que hoc etiam quotidianis & manifestis experi-
 mentis constat. cernimus enim agricolas eodem
 tempore & sub eodem syderum aspectu varia
 seminum genera in terram iacere, ex quibusta-
 men diuersa nascuntur: quæ sanè diuersitas nõ
 ad causas cœlestes, sed ad diuersas tantum spe-
 cies & vires seminum referri potest, Ad hanc
 eandem sententiam, in libro secundo de Genesi
 ad literam, cap. 17. ita scribit Augustinus: Cum
 multa corpora diuersorum generum, vel ani-
 mantium, vel herbarum & arborum, vno si-
 mul puncto temporis seminantur, vnoque pun-
 cto temporis innumerabiliter multa nascantur,
 non tantum diuersis sed etiam iisdem terrarum
 locis, tantæ sunt varietates in progressibus, in
 actibus, & passionibus eorum, vt verè isti (sicut
 dicitur) perdant sidera, si ista considerent. Quid
 autem insulsius & hebetius, quàm cum istis re-
 bus conuincuntur, dicere ad solos homines sibi
 subiiciendos fatalem stellarum pertinere ratio-
 nem? sic Augustinus: cuius extremum dictum
 paulo vberius tractat apud Gellium libro 14.

capite

DE DIVINATIONE ASTROLOGICA. 195
capite 1. Phauorinus: Si vitæ, inquit, mortisque
hominum rerumque humanarū omnium tem-
pus, & ratio, & caula in cœlo & apud stellas fo-
ret, quid de muscis aut vermiculis aut echinis,
multisque alijs minutissimis terræ marisq; ani-
mantibus dicerent? an ista quoque ijsdem, qui-
bus homines legibus nascerentur, ijsdemq; iti-
dem extinguerentur? vt aut ramunculis quoque
& culicibus nascendi Fata sint de cœlestium sy-
derum moribus attributa, aut si id non puta-
rent, nulla ratio videretur cur ea syderum vis in
hominibus valeret, si deficeret in cæteris.

13. *De simili ortu & dissimilibus euentis
Geminorum.*

SECUNDA RATIO. Si vera esset istiusmodi *Secunda
ratio.*
Astrologorum doctrina, necesse esset Geminos
qui vno tempore concepti & nati sunt, simili-
mos omninò fore: quod falsum esse, satis per-
spicuum est. nam vt cætera eorum dissimili-
tudinem taceam, euenit nonnunquam vt alter
sit mas, alter verò femina. Cicero quidem in
altero libro de Diuinatione, Proclum & Euri-
sthenem reges Lacedæmoniorum fratresque ge-
minos commemorat, quorum tamen & exitus
vitæ dissimilis, & gloria rerum gestarum di-
spar fuit. Verùm, in sacris literis luculentissi-
mum eius rei habemus exemplum: Iacob enim
& Esau eodem cōcubitu, vt inquit Paul. Rom.
9. sati eodemque tempore nati, dissimillimis ta-
men ingenijs, studijs, moribus, & euentis fue-
runt. Nec verò firmum est illud præsidium in
N 5 quod

*Similitu-
do Nigi-
dij Figuli*

*B Grego.
homil. 10.
super E-
uangel.*

Augusti.

quod refugiunt Astrologi, cum hoc argumento
vrgentur, videlicet breuissimam illam moram
quæ inter Geminorum ortus intercedit, licet ea
nobis perexigua videatur, in cœlo tamen, ob e-
ius vastitatem & rapidissimam conuersionem,
esse admodum insignem magnamq; facere va-
riationem. Hoc Nigidius Figulus declarabat
exemplo rotæ, quam incitatissimè contortam,
cum his eodem loco signare atramento vel per-
cutere summa celeritate conatus esset, cessante
ipsius rotæ circumactione, reperta sunt duo illa
loca ab ipso percussa vel signata, haud paruo in-
ter se interuallo disiuncta. Hoc, inquam, præ-
sidium & refugium infirmum est, parumque
tutum Astrologis. Etenim, licet in ortu Gemi-
norum aliqua fuerit mora, in eorum tamen con-
ceptu prorsus nulla fuit. Deinde, si tam breui
variatur ratio constellationis sub qua quisque
nascitur, erit profecto proprium tempus ortus
cuiuslibet, Astrologis incomprehensibile. De-
nique, valebit hoc loco aduersus Astrologos ar-
gumentatio illa Beati Gregorij: Si propterea Ia-
cob & Esau non censentur nati sub eadem con-
stellatione, quod non simul nati sunt, sed vnus
post alterum; ob eandem profecto causam iu-
dicandum erit, nullum hominum sub eadem cō-
stellatione totum nasci. non enim totus simul
ex utero procedit, sed particulatim & membra-
tim: primo enim effert caput, tum collum, de-
inde pectus, postremò pedes. Iacob enim
proximè natus est post Esau manu plantam pe-
dis eius tenens, perinde quasi, sicut inquit Au-
gustinus libro secundo de Genesi ad literam, ca-

pice

pute 17. vnus infans instar duorum vel duplo longior nasceretur.

Verum, hanc rationem admodum disertè Phauori-
 Phauorinus aduersus Chaldaeos disputans, ex-
 quutus est. Atque id velim etiam, inquit, vt re-
 spondeat, si tam paruum atque rapidum est mo-
 mentum temporis in quo homo nascens Fatum
 accipit, vt in eodem illo puncto sub illo circu-
 lo coeli, plures simul ad eandem competentiam
 nasci non queant: & si idcirco Gemini quoque
 non eadem vitæ sorte sunt, quoniam non eo-
 dem temporis puncto editi sunt: peto, inquit,
 respondeant, cursum illum temporis transuolā-
 tis qui vix cogitatione animi comprehendi po-
 test quonam pacto aut consulto assequi que-
 ant, aut ipsi perspicere & deprehendere; cum in
 tam præcipiti dierum noctiumq; vertigine, mi-
 nima momenta ingentes facere dicant mutatio-
 nes? Sic Phauorinus. Ipsum hoc argumentum
 de Geminis diligenter & subtiliter pertractat
 August. lib. 5. de Ciuit. Dei primis aliquot capi-
 tibus; atq; in 2. lib. de doctrina christiana, c. 22.
 & vero maximum faceffit negotium Astrologis
 si enim tā breui temporis momento mutantur
 oīa, vt nō diuersa modo, sed et aduersa plerū-
 que eueniant, quis de nato puero possit quic-
 quā certi prædicere, cū illud ipis punctū quo
 vel cōceptus vel natus est ita vti est, nemini pos-
 sit esse cognitū? Itaq; , vt magna in homines vi
 & potestate pollerent astra, quid ea tamen in
 singulorū hominum generatione & ortu. effice-
 rent, in compertum esset nobis: quippe cum a-
 spectus cœli & positus astrorū qui est tempo-
 re quo

Phauori-
 nus apud
 Aulum
 Gell. lib.
 14. cap. 1.

Augusti-
 nus.

re quo quisque nascitur, certo deprehendi nequeat: incitatissimus enim cœli & astrorum motus, tarditatem nostræ considerationis & observationis præteruolat & anteuertit.

Tertia ratio.

TER TIA Ratio. Missos nunc facio Geminos, quorum interruptus partus aliquam præbuit labebram Astrologis, consideremus in præsentia quamplurimos prorsus eodem tempore, & in eadem regione, eodemque syderum aspectu & positura, ex diuersis tamen parentibus progeneratos: de istis non potest Astrologus ex obseruatione syderum, non eadem euenta prænunciare; cum simul concepti & nati fuerint, & sub eadem constellatione. At longè secus esse, quotidiana demonstrat experientia, quam multi enim toto orbe simul & generantur in utero & in lucem eduntur, quorum deinde maxima est ingenio rem, studiorum, morum, religionis, casuum, denique uitæ ac mortis euentorum dissimilitudo? Omnium Romanorum qui Cannensi pugna quamplurimi cæsi sunt ab Annibale, idem fuit vitæ exitus & interitus: quis autem existimet, eodem illos omnes stellarum aspectu, posituque fuisse natos? Idem dico de tot millibus Turcarum qui nauali pugna ab hinc octo & decem annos, memorabili ad immortalitatem victoria, à Christiana classe profigati, & internecione deleti sunt: quorum omnium eandem fuisse rationem ortus, eandemque in generatione eorum viguisse cœli constellationem, stultum est dicere, An quo tempore natus est Homerus, Hippocrates. Aristoteles, & Alexander Magnus, non eodem quoque alios

alios complures natos esse putabimus? at quis, illorum similis adhuc extitit? Phauorinus sic argumentationem hanc contexebat. Quàm multi homines vtriusq; sexus, omnium ætatum, diuersis stellarum motibus in vitam editi, regionibus sub quibus geniti sunt longè distātib; omnes tamen isti, aut hiantibus terris, aut labentibus rectis, aut oppidorū expugnationibus, aut eadem in naui fluctu obruti, eodemque genere mortis, eodemq; ictu temporis intererunt? Qd̄ .s. nunquam eueniret, si momenta nascendi singulis attributa, suas vnumquodque leges haberent. Quod si quædam in hominum morte atque uita et diuersis temporibus editorum, per stellarum pares quosdam postea conuentus paria nonnulla, & consimilia posse dicuntur obringere, cur non aliquando possint omnia quoque paria vsu venire, ut existant per huiuscemodi stellarum concursiones, & similitudines, Socrates simul, & Antisthenes, & Platones multi, genere, forma, ingenio, moribus, uita omni, & morte pari? quod nequaquam, inquit, prorsus fieri potest. Non igitur hac causa Chaldæi probe uti quæunt aduersus hominum impares ortus, interitus pares. Hæc Phauorinus.

Phauorinus apud Aulum Gellium lib. 14. cap. 1.

14. *Pulcherrima disputatio Bardesanis aduersus Astrologos.*

QUARTA RATIO. Bardesanes Syrus in doctrina rerum cælestium excellenter versatus, in eo dialogo, quem rogatu amicorum de Fato, & aduersus Chaldæos conscripsit, futilissimas esse

Quarta ratio.

esse Astrologorum obseruationes, & rarò non
ementientes eorum prædictiones, ad hunc ferè
modum (vt memorat Eusebius lib. 6. de Præpa-
ratione Euangelica, c. 8.) demonstrabat: Apud
Seras lex est prohibens occidere, fornicari, &
adorare simulachra: vnde in illa regione nullũ
templum conspicitur, nulla mulier meretrix,
nulla adultera, nemo fur, nemo homicida: nec
voluntatem alicuius illorum ardentissima stel-
la Martis in medio cœli constituta ad cædem
hominis coëgit; nec Venus Marti coniuncta vt
alienam quispiam sollicitaret vxorem potuit ef-
ficere. Atqui, singulis etiam apud eos diebus in
medium cœli Martem peruenire necesse est, &
in tanta regione singulis horis nasci homines
non est negandum. Apud Indos autem, & Ba-
ctros, multa millia hominum sunt, qui Brach-
manes appellantur: hi tam traditione Patrũ q̃
legibus nec simulachra colunt, nec animatum
aliquid comedunt, uinum aut ceruissiam nun-
quam bibunt, ab omni demum malignitate ab-
sunt, soli Deo attendentes. At verò, cæteri om-
nes Indi in eadem ipsa regione adulterijs, cæde,
remulencia, simulachrorum cultu inuoluuntur:
inueniunturque ibi nonnulli, immò verò gens
quædam Indorũ est in eodem climate habitãs,
quę homines venantes atque sacrificantes deuo-
rant: nec ulli planetarum quos felices ac bo-
nos appellant, à cæde ac sceleribus istis eos
prohibent: nec maligni, Brachmanas pellere ad
malefaciendum potuerunt. Apud Persas lex e-
rat, filias, sorores, matres quoque ipsas in ma-
trimonium ducere, nec in Perside solum, ve-
rum-

rumetiam quicunque Persarum ad alia climata orbis è patria exiuerunt, nefanda hæc diligenter matrimonia celebrarunt: quos, aliæ gentes hoc scelus abominatæ, Magusæos appellant. Sntq; vsque ad hodiernum diem in media Aegypto, Phrygia, Galatiaq; plurimi Magusæi successione patrum, eisdem sceleribus contaminati. Nec dicere possumus in terminis & domo Saturni, cum Saturno ipso in natiuitatibus omnium, Marte aspiciente Venerem fuisse. Amazones viros non habent, sed tempore veris fines suos egredientes cum vicinis conueniunt. Vude omnes naturali lege eodem tempore pariunt, masculisq; interfectis solas feminas alit, bellicosæque omnes similiter sunt, magnam exercitationis bellicæ curam gerentes. Stultum autem est opinari, omnes istiusmodi foeminas prorsus iisdem natalitijs astris esse genitas. Fit hoc confirmatius argumento exemploque Iudæorum, qui vbicumque terrarum & gentium sint nati aut versentur, inuiolabili obseruatione & infantes suos octauo die circūcidūt, & omnem diem sabbathi feriatum festumque religiosissimè agunt. Non sunt autem Iudæi omnes sub eadem cōstellatione procreati, nec eos à patrijs legibus & institutis vlla vis & potētia cēlestium corporū abstrahere potest. Sed quid dicemus de Christianis? qui innumerabiles toto orbe sparsi, idem vitæ genus atque doctrinæ custodiunt, nec à disciplina quam ipsis Christus Dominus tradidit vel promissis ullis, vel minis aut supplicijs vel latum vnguam amoueri possunt, an dicturi sunt, Christianos omnes eodem

astro

astro esse natos? Sed illud maximum est argumentum, qui ante susceptam Christi disciplinam patrias leges & instituta studiosissime acerrimeque tenebant, eos postea factos Christianos, illis desertis abiectisque longè diuersam vitam agere, diuersos mores induere, & diuersissimam religionem & doctrinam colere. Itaque nec multas Parthi Christiani ducunt uxores, nec Medi canibus mortuos obijciunt, nec Indi mortuos suos cremant, nec Persæ cum sororibus aut cum filiis nefario matrimonio miscentur, nec Aegyptij Apin, aut canem, aut hircum, aut selem colunt; sed vbicumque sunt, eisdem legibus, moribus & institutis viuunt. Quid plura? singulis horis apud omnes gentes homines nascuntur; ubique autem leges atque mores propter liberam hominis potestatem præualere videmus. Nec natalitia sydera nolentes Seras ad homicidium, compellunt, aut Brachmanas ad esum carniū, nec Persas a sceleratis nuptiis remouent, nec Medos prohibent vitam defunctos canibus exponere, nec Parthos multas ducere uxores. Singulæ namque gentes, ut volunt & quando volunt, libertate sua vtuntur, legibus, moribusq. obediētes. Hactenus sunt quæ ex disputatione Bardefanis aduersus Astrologos commemoranda hoc loco censuimus.

*Quinta
ratio.*

QVINTA RATIO. Stante libero arbitrio hominis & immortalitate animi nostri, ars ista nullo modo stare potest? Si autem ea stet, illa funditus corruere necesse est. quo intelligere licet qualis istiusmodi ars existimanda sit, quæ
nisi

nisi pessundata & obtrita, sublataq; nostrorum animorum libertate atque immortalitate, nihil progredi, nec vlllo modo cōsistere queat. Quod autem, si animus noster immortalis & in agendo liber sit, diuination astrologica nulla esse possit, his argumentis concluditur. Primò, Astrologi profitentur se futuras hominum actiones euentaque, ex suæ artis obseruationibus præsentire & prænuntiare posse: hoc autem falsum est; futura enim quæ ex libera hominis voluntate proficisci debent, nullo modo possunt esse nota Astrologis. nam vel cognoscerent futura in se ipsis, quod fieri non potest, quippe, quæ futura sunt, nondum per se actu sunt; quod autem non est, prout non est, non intelligitur, sed prout aliquo modo est; nimirum potestate in suis causis. Nec prænosci queunt futura in ipsorum causis quæ tres sunt, Deus, coelum, voluntas humana, quæ autem ex Dei proposito, consilio & absoluta volūtate euentura sunt, ea nulli mortaliū vel ex coelo, vel alia quacunque rōne nisi cui Deus ea voluerit aperire, cognita esse pñt. *Quis enim, inquit Scriptura, cognouit sensum Domini? aut quis cōsiliarius eius fuit? & vt scriptū est in 9. cap. lib. Sapiētie: Quæ in prospectu sunt, inuenimus cū labore, quæ autē in cœlis sunt, quis inuestigabit? sensum aut tuum quis sciet, nisi tu dederis sapientiā, & miseris Spiritū sanctū tuum de altissimis? Exc oelo autem futura quæ pendent ex volūtate hominis non possunt cognosci, tum quia coelum est cau*

Ro. II. &

Esa. 40

sa vniuersalis, quare futuri effectus particulares non nisi vniuersaliter & indeterminatè in coelo contineri & cognosci possunt: tum etiam quia coelum est causa corporalis & materialis, quare animus noster qui per se incorporeus & expers materiæ est liberque in agendo, coeli efficientiæ ac operationi directè & necessariò minime subiacebit. Voluntas porro humana quæ est proxima causa humanarum actionum, respectu futurorum quæ ex ipsa proficisci debet, per se indifferens & indeterminata est: multa enim acturi sumus, de quibus nihil dum cogitauimus, nedum deliberauimus: quomodo igitur causa indeterminata & indifferens potest de finitam certamque futuri effectus cognitionem parere? Confirmatur hoc: exteriores actiones hominis pendent ex interioribus, ex deliberatione dico & electione, non potest igitur futura hominis actio exterior prænosci, nisi cognita sit futuræ voluntatis electio vnde illa proficisci debet: at futura hominis electio non potest alteri homini esse cognita; si enim propositum animi & deliberationem quam quis in præsens habet mente conceptam, nemo alius scire potest, quanto minus scire poterit consilium, propositum, & voluntatem alterius hominis, quæ multos post annos futura est?

15. *Vtrum sit facilius, diuinare quid facturus sit vir bonus, an vir improbus.*

DEINDE, aut cōsideratur homo vt viuit & opera-

operatur secundum rationem, aut secundum sensum, & appetitum; si secundum rationem, sic homo non pendet à cœlo, est enim mens & ratio expers materiæ, & incorporea: nullum autem corpus per se agere potest in id quod est incorporeum. ratio item libera est, suarumque actionum domina, & suo arbitratu ac voluntate potest ad hoc vel illud agendum se ipsa applicare. nam quamvis uel à cœlo, uel ex naturali constitutione, & réparatione sui corporis, uel à diabolo, vel aliunde instigetur ad malè agendum, potest ea tamen reniti, & vi sua omnes instinctus, impulsus, & irritamenta extrinsecus ei obiecta, comprimere, & irrita facere: quin etiam contra quàm incitatur agere. Hoc manifestum fit vel vnius Socratis exemplo, qui ex naturali corporis affectione, & comparatione, & bardus, & mulierosus erat; sed eiusmodi vitiosas naturæ propensiones, adeo animi robore, & diligentia magnitudine emendauit, ut omnium sui temporis prudentissimus, & continentissimus sit habitus. Homo autem viuens secundum sensum, & appetitum carnalem, tam variabilem, & incertam vitam agit, ut qualis futurus sit, nullo modo prædici queat. Quamobrè Salomon (quod est in 30. capite libri Prouerbiorum) dixit: Alia quædam sibi esse cognita difficilia; illud autem esse prorsus ignotum, qualis sit via adolescentis in adolescentia sua. Est enim ea ætas adeo lubrica ad quodlibet vitium, adeo mollis, & flexibilis in omnes partes, adeo vagans, & errans per omnia, & nulla in re

*Hominē,
ut opera-
tur secun-
dum rōnē
nō è cœlo,
nec alia
ex cā vl-
la præter
Deū, per
se ac na-
cessariò
pendere.*

Quā sit instabilis vita, & actiones hominis uiuentis non secundum rationem sed secundum sensum. diu perseverans; ut nulla certa ratione modoque regi & duci, sed quocūque impellit cupiditas, illic inconsultē, & temerē rapi videatur: quo fit, ut facilius sit diuinare quid acturus sit qui uiuit secundum rationem, & virtutem, quā quid sit acturus, qui rationis, & virtutem regula, & lege polthabita, suas duntaxat cupiditates sectatur. Sic etiam facilius est diuinare quid facturus sit Rex, qui secundum rectam rationem iustasque leges imperat, quā quid facturus sit Tyrannus, qui omnia pro suo commodo, & libidine administrat. Qua ratione igitur Astrologi certa scientia consequi possunt ea quæ nihil ratum, firmum, fixumque, & certum habent?

Pulchrum dilemma aduersus Astrologos. Adhæc, aut istud Fatum cœleste, & potentia syderum potest ab homine impediri ita ut effectus eius non eueniat, aut nullo modo impediri potest: Si potest impediri, & non euenire, ergo sicut effectus est incertus, ita prædictio eius certa esse non potest. Si non potest impediri, ergo nullum est liberum arbitrium; & ex eo conficitur animum nostrum esse materiale

Si Astrologorum prædictiones veræ, & certæ essent, profecto inuitæ, & odiosæ essent hominibus. atque mortalem, utpote syderum potestati necessariò subiectum. Nec verò si ita res se haberet, quicquam prodesse hominibus prædictiones Astrologorum: quid enim iuuaret nosse tanto ante futura, si ea nullo modo declinari, & caueri possent? quin, ut ego censeo, plus malis quā boni afferrent nobis, quos necesse esset non solum præsentibus malis torqueri, sed etiā tam longinqua, & inenitabili eorum expectatione

DE DIVINATIONE ASTROLOGICA ¶ 207
statione acerbissimè cruciari. Probè hoc intel-
lexit Seneca, licet non minorem quàm Astro-
logi syderibus in homines vim & potentiam tri-
bueret: in libro enim decimo tertio epistolarū,
octogesima nona epistola ita scripsit: Venio nūc
ad illum qui cęlestium notitia gloriatur.

*Frigida Saturni quo sese stella recepit,
Quos ignis cęli Cyllenius erret in orbes.*

Hoc scire, quid proderit? vt sollicitus sim, cum
Saturnus & Mars ex contrario stabunt, aut cum
Mercurius vespertinum faciet occasum viden-
te Saturno. Potius hoc dicam, vbicumque sunt
ista, propitia esse nec posse mutari. Agit illa con-
tinuus ordo Fatorum, & ineuitabilis cursus.
Per statas vices remeant effectus rerum omniū,
aut mouent sydera, aut notant: sed siue quic-
quid euenit faciunt, quid immutabilis rei noti-
tia proficiet? siue significant, quid refert provide-
re, quod effugere non possis? scias ista, nescias,
fient. Hęc Seneca. Sed vide quàm argutè ac phi-
losophicè hanc ipsam sententiam breuissimis
verbis cocludit Phauorinus: Aut aduersa inquit, *Phauori-*
euentura dicunt, aut prospera. Si dicunt pro- *nus apud*
spera, & fallunt, miser fies frustra ex- *Aulum*
pectando. Si aduersa dicunt & mentiuntur, *Gellium,*
miser fies frustra timendo. Si vera respondent, *lib. 14. c.*
eaque sunt non prospera, iam inde ex animo 1.
miser fies antequam è Fato fias. Si fęlicia pro-
mittunt, eaque, euentura sunt, tum planè duo
erunt incommoda; & expectatio te ipse suspen-

sum fatigabit, & futurum gaudij fructum spes tibi iam difflorauerit. Nullo igitur pacto vtendū est itiusmodi hominibus res futuras præfagientibus: Sic Phauorinus.

16. *Quàm sit vana ac futilis prædictio Astrologorum de aliquo, quod sit futurus summus Pontifex.*

VERVM, illud maximè arguit prædictionum astrologicarum vanitatem: etenim audent etiam Astrologi prædicere & promittere, aliquem futurum verbi gratia summum Pontificē: atqui prouectio alicuius ad summum Pontificatum, non ex ipsis vel alterius vnus hominis voluntate aut potestate pendet, sed ex voluntate atque suffragijs plurimorum Cardinalium, quorum munus est creare summum Pontificē. Quapropter vt certò prænunciari possit. Petrum, verbi causa, fore Papam, non satis est nosse compositionem astrorum quæ in cœlo fuit nascente Petro, sed simul etiam opus esset, Astrologo perspectos & cognitos esse omnes syderum positus & constellationes, sub quibus nati sunt quorumcunque voluntatum & suffragiorum concursus ad creandum illum Papam futurus est necessarius. Quare, si verum est quod narrat in Augusto Suetonius. Nigidium Figulum eiusmodi astrologia nobilissimum apud Romanos, accepta hora partus Augusti, obseruatisque natalitijs eius astris, exclamasse, Dominum orbis esse natum; profecto existiman-

*Inanis
prædictio
Nigidij
Figuli de
futuro
Augusti.
domina-
tu.*

mandum est id eum nec scienter, nec certa aliqua ratione; sed temerè ac fortuito dixisse, & casu factum esse vt ita contigerit sicut ille prædixerat: Promotio namque Augusti per multos honorum gradus ad summum vsque principatum & Monarchiam, ex multorum hominum studio, gratia, & opera pendeat; vt ad tantum Augusti dominatum & imperium certò prænosendum atque prænunciandum, solius Augusti generationis & ortus consideratio satis esse nequaquam potuerit: neque enim natalitia Augusti sydera vim vllam habere potuerunt in eos qui fuere Augusti suffragatores adiutoresque ad consequendum principatum; scilicet multi eorum compluribus annis, vel ante vel post Augustum nati fuerant.

17. *Nullam posse esse scientiam vel artem istius Astrologiæ.*

Sexta ratio

SEXTA RATIO. Omnis scientia, & ars ver

fat in ijs rebus quæ aut semper, aut certè frequenter ita contingunt vt ab ea docentur: quæ autem extra hæc sunt, & rarissimè accidunt, ea quia nihil habent fixum & certum, propterea nullam possunt scientiam vel artem efficere. Cum igitur prædictiones Astrologorum ferè sint fallæ, nec nisi perquam raro veridicæ sint, satis liquet eas non ex arte aliqua & certis observationibus proficisci, sed inscienter & inconsultè ac temerè ab illis effutiri. Quamobrem Phauorinus identidem commonebat, vt caue-

Ars et scientia in his versatur, quæ sæper aut plurimū eueniunt, qualis non est Astrologia. Phauorinus apud

*Aulū Ge-
lium lib.*

14 c. I.

rent homines ne quā ipsis Chaldæi ad facien-
dam fidem irreperent, quod viderentur quæ-
dam interdum vera effutire aut spargere. Non
enim comprehensa, aiebat, neque definita, ne-
que percepta dicunt, sed lubrica atque amba-
giosa coniectatione nitentes, inter falsa atque
vera pederentim quasi per tenebras ingredien-
tes eunt: & aut multa tentando incidunt repen-
tè imprudentes in veritatem, aut ipsorum qui
eos consulunt, multa credulitate ducente per-
ueniunt callidè ad ea quæ vera sunt: & idcirco
videntur in præteritis rebus quàm futuris, ve-
ritatem facilius imitari. Ista tamen omnia quæ
aut temerè aut astutè vera dicunt, præ ceteris,
inquit, quæ mentiuntur, pars ea non fit millesi-
ma. Hæc Phauorinus apud Gellium. Sed audi
quid in eandem sententiam libro secundo de
Divinatione scriptū sit apud Ciceronem. Quid
plura, inquit? quotidie refelluntur Chaldæi.
quàm multa ego Pōpeio, quàm multa Crasso,
quàm multa huic ipsi Cæsari à Chaldæis dicta
memini, neminem eorum nisi senectute, nisi
domi, nisi cum claritate esse moriturum: vt mi-
hi permirum videatur, quenquam extare qui
etiam nunc credat ijs quorum prædicta quoti-
die videat re & euentu refelli. Seneca in eo li-
bello cuius inscriptio est: Ludus in mortem
Claudij Cæsaris, initio introducit Mercurium
apud Parcas mortem Claudij procurantem; &
vt obiter Chaldæorum illudat vanitati, inter
alias rationes quib. conatur Mercurius Parcas
inducere ad necem Claudij, hanc affert, ne to-
ties

*M. Tal-
lius.*

Seneca.

ries videlicet miseri Chaldæi mentiantur: Patere inquit, Mathematicos aliquando verum dicere, qui illum postquam princeps factus est, omnibus annis, omnibus mensibus efferunt. Prædicebant enim illi Mathematici Claudium singulis annis & mēsis moriturum: quod etiam nostri temporis Astrologis contingit, à quibus mortes summorum Pontificum in singulos annos atque adeo menses prænuntiari audimus, & ridemus. Beatus Ambrosius lib. 4. in Hexameron, cap. 7. Cum, inquit, ante dies paucos esset sermo de pluvia, quæ fore utilis diceretur, ait quidam, Ecce Neomenia dabit eā. & quamvis cupidi essemus imbrium, tamen eiusmodi assertiones veras esse nolebam. Denique, delectatus sum quod nullus imber effusus est, donec precibus Ecclesiæ datus, manifestaret non de initijs Lunæ sperandum esse, sed de providentia & misericordia Creatoris; quo exemplo & vanitas istius astrologiæ confutata est, & efficacia Christianæ pietatis visque religiosarum precum re ipsa comprobata. B. Amb.

18. *Vanitas & falsitas multarum prædictionum Astrologicarum.*

ALBVMASAR princeps huiusce superstitionis, astrologica ex observatione & præceptis huius artis, prædixit Christianam legem duraturā non plus annos mille quadringētos sexaginta. sed bene habet, quod post id temporis, exacti iam anni centum viginti octo falsam esse illius

*Abraam
Iudæus.*

prædictionem apertè demonstrant. Abraam Iudæus prænunciavit ex observationibus astrologicis, expectatum à Iudæis Messiam venturum anno post Domini nostri ortum millesimo quadringentesimo sexagesimoquarto; quod nimirum futura esset eadè astrorum cōpositio, quæ fuerat olim cum Moses ex Aegypto populum Hebræum eduxit: cuius prædictionis vanitatem dies ipsa redarguit.

*Petrus de
Aliaco.*

Petrus de Aliaco scriptum reliquit, quo anno generale Concilium celebratum est Constantiæ ad tollendum schisma quod multos annos afflixerat Ecclesiam, prædixisse Astrologos eius temporis, nullam fore in Ecclesia pacem & concordiam, sed habitum coeli & conformatione astrorum præsignificari maximas fore dissensiones ingenti cum religionis Christianæ detrimento & exitio. Atqui, per illud Concilium Constantiense, diuturnum illud & perniciosum schisma eo anno extinctum est, pace ac tranquillitate Ecclesiæ redita. qui euentus planè contrarius prædictionibus Astrologorum, sanè multum mouere debuerat Petrum Aliacensem, ut is nullam deinceps isti astrologiæ fidem haberet: præsertim verò, cum ipsemet vel suis deceptus observationibus, vel alienis occupatus & circumuētus opinionibus, veritus fuerit ne illud tam graue & odiosum schisma breui Antichristum mundo pareret.

Albuma.

19. *Errores Astrologorum in Chronologia.*

Zar.

ALBVM A Z A R istorum Astrologum coryphæ-

ryphæus, nescio. quas Saturni reuolutiones dilaudat: affirmat enim, quoties Saturnus denas sui orbis conuersiones perfecit, hoc est expletis annis trecentis, semper magnas quasdam res & admodum insignes euenire. Post Alexandrū enim, inquit, annis trecentis apparuit Arelasor filius Bel qui Persas contriuit: & proximè post transactis alijs trecentis annis apparuit Iesus magister & dux Christianorum. O turpem *ἀνιστορησίαν*, O incredibilem temporum inscientiā. nam nec tunc fuit iste filius Bel qui Persas fregerit & Affixerit; & Christus Dominus non sexcentis annis post Alexandrū ut iste mentitur, sed trecentis duntaxat & viginti annis post Alexandri mortē natus est. Quamquā quis miretur in hoc lapsum Albumazarē, cum tam insigniter errauerit in Ptolemæo Mathematico, quem facit vnum de Ptolemæis Aegypti regib. qui post Alexandrum Magnum Aegyptijs imperarunt? cum in confesso sit, nec Ptolemæum Mathematicum fuisse regem, & cum Hadriano Imperatore floruisse, nouissimo Ptolemæorum Aegypti regum plus centum & sexaginta annis posteriorem. Iactant item Astrologi, nullam fuisse apud homines vlllo tempore mutationem legum, nullius Propheta nobilis aduentum, nullā nouæ religionis introductionem, nullam magnorum regnorum conuersionem, denique nullum insignem & memorabilem casum aut euentum, quin magna aliqua coniunctio syderum; præcipue verò Saturni & Iouis præcesserit. Hæc, inquiunt, constellatio, nascen-

*Aliquot
errata cir
ca Chro-
nologiam
Albuma-
zaris.*

nascentem orbem initiauit : illa præparauit diluuium, alia Abraam vel Mosyem genuit : illa Iesu aduentum prænuntiauit, alia Mahumeci legem antecessit. quæ quàm sint futilia, commentitia, & erroris plena, vel vno hoc argumento constare potest.

Quã multa peccauerit contra verã Chronographiã Petrus Aliacensis in suis rationib. Astrologis.

Petrus Aliacensis istiusmodi figmentis stultissimè credens ac vanissimè gaudens, in libro suo de concordia historiæ & astrologiæ, ad id quod ex sensu Astrologorum proximè docuimus probandum, hoc quasi fundamentum supponit: Ab initio mundi vsque ad diluuium fluxisse annos bis mille ducentos quadraginta duos: à diluuiio autem ad Christi Domini aduentum & ortum, ter mille centum & duos annos hoc posito, probare nititur quicquid in orbe terrarum valde memorandum & insigne quocunque tempore acciderit, eodem tempore magnam aliquam constellationem in coelo apparuisse. At enimvero, cum perspicuè falsa sit cõputatio annorum qua velut fundamento illorum ratio & doctrina fulcitur, nonnè consequens est quæ ducuntur & pendent ex illa computatione esse falsa? Etenim ab Adamo ad diluuium, non plus mille sexcentos quinquaginta sex annos præterisse constat ex sacris literis; pauciores nempe quam illi numerant, annis propè sexcentis: quo fit, vt constellationem, quam aiunt isti fuisse in exordio mundi, sexcentis annis mundum præcessisse necesse sit. Deinde tempus quod inter diluuium interfuit & Christi Domini aduentum, ne numerum quidem bis

bis millequadringentorum annorum impleuit. Ex quo efficitur vt coniunctio astrorum quam aiunt ducentis annis antegressam diluuium, nō nisi sexcentis octogintaquatuor annis post diluuium potuerit existere. Præterea, dicunt quartam coniunctionem maximam fuisse annis nongentis quadraginta duobus post diluuium, sexdecim nimirum annis ante natum Abrahā; quem tamen liquet ex sacra Chronologia, ducentis nonagintaduobus annis natum esse post diluuium, quare necesse est, quartam illam coniunctionem sexcentis triginta annis post Abrahæ ortum contigisse. Adhæc, notarunt illi sextam coniunctionem magnam ducentos viginti quinque annos fuisse ante Christum; nimirum falso: nituntur enim supradicta computatione annorum à diluuiō ad Christi aduentū, quam nos mendosam esse ostendimus, quin, si veram sequamur Chronologiam, necesse esset sextam illam coniunctionem sexcentis fermè annis post Christi Domini ortum contigisse. Potremo, quā fuerit Petrus Aliacensis veræ Christianæ Chronographiæ rudis, & prorsus expertus, vel hoc vno indicio manifestum esse potest: affirmat anno ab ortu Christi septingentesimo, ad quod tempus septimam coniunctionem magnam refert, natam esse in Ecclesia pestem Hæreticorum, maximè vero eam quæ fuit Arrianorum, quorum tamen hæresis circa annum Domini trecētesimum exorta, ante sexcentesium extincta est. Quis igitur tam multas istorum prædictiones nixas mendacissimis

Chro-

Chronologijs , inanes & mendaces esse dubitet ?

Sed quid ego falsarum prædictionum exempla colligo , quorum plena est , & historia omnium temporum , & referta uita communis ? Equidè reor , quàm difficile est prædictiones aliquas Astrologorum de futuris rerum humanarum euentis , etiam casu ac fortuito , veras inuenire ; tam faciliè reperiri posse innumera eorum prædicta perspicuè falsa , & rebus ipsis euentisque confutata. Scitè dixit Cato , mirari se quod non deret Aruspex , Aruspicem cum vidisset : quota enim quæque res euenit prædicta ab his ? aut si euenit quippiam , quid afferri potest cur

*Lepidum
Catonis
dictū ut
refert Ci-
ce. lib. 2.
de Diui-
natione ,
in Astrolo-
gos bellè
competēs.*

non casu id euenerit ? Quod de Aruspicibus Cato dixit , id profecto per quam belle quadrat in Astrologos , ut nimirum uideri debeat , cum mendaci homini ne verum quidem dicenti credere soleamus , quo modo illis , si vel unum eorum prædictum verum euasit , simpliciter credamus ; & non ex multis potius falsis uni fidem derogemus , quàm ex vno quod casu verum euenit velimus innumerabilia falsa confirmare. Verùm dicet aliquis , Astrologos nonnunquam esse ueridicos , & ea prædicere quæ rei confismet euentus . prædicunt sanè ; sed inconsultè , inscièter temere , quis enim est qui totam diem iaculans , non aliquando collimet ? Verissimè dici potest de Astrologis , quod olim dixit quidam de oraculis Apollinis ; quæ vera fuisset memoria teneri , & prædicari , quæ autem falsa , neminem recordari , aut taceri ab omni.

*Notet hoc
Lector.*

omnibus. nam qui veritatem illorum oraculorum descendebant, pauca quædam vera crebro sermone vsurpabant, pleraq. falsa silentio premebant, qui autem omnia contemnebant, nec vera nec falsa curabant. Sed causas prædictæ Chaldæorum sæpè vera esse videantur, extrema hac disputatione aperiemus.

20. *Astromantiam omni tempore à viris sapientibus, & prudentibus esse contemptam & damnatam.*

SEPTIMA RATIO. Si hæc diuinatrix *Septima*
astrologia vera esset & certa, sine dubitatione vl *ratio.*
la pars esset philosophiæ omnium nobilissima
& hominibus optatissima atque honoratissima:
tum propter materiæ quam tractat, coelum dico & sydera, dignitatem atque præstantiam.
tum propter futurarum rerum, potissimè autem vitæ hominum & mortis casuum & euentorum prænotionem, quas res noscendi avidissimi sunt & curiosissimi mortales. at cum ea doctrina omni tempore à præstantissimis quibusque Philosophis, quinetiam Astrologis, cõtempta, derisa & damnata fuerit; maximum profecto argumentum est, eam futilem & inanem, & ab omni ratione, fide ac probabilitate vacuam ab illis esse iudicatam. Xenophon in libro de dictis Socratis, quod etiam refert Eusebius lib. 14. de Præparatione Euangelica, capite 4. tradit Socratem dicere solitum, cognitionem futurarum rerum quæ in potestate Dei sunt, nõ esse

*Democri-
tus.*

Plato.

Xenophō,

Socrates.

*Pythago-
ras.*

esse hominibus procurandam : neque enim posse homines eas res cognoscere, nec Deo gratum esse, si quæ ille occultavit, ea mortales velint nimis studiosè curioseq; rimari. Pythagoras, Democritus & Plato longissimis peregrinationibus susceptis, Persarum magos, sapientes Chaldæorum, Aegyptiorumque sacerdotes adierunt; à quibus occultiora quædam vel ad disciplinas mathematicas, vel ad religionem cultumque deorum pertinentia cognouerunt; diuinatricem autem astrologiam, vel discere ab illis neglexerunt, vel si eam quoque didicerūt, certè nunquā ea vfos esse ipsos, ex eorum scriptis manifestè perspicitur.

Aristoteles.

ARISTOTELES, qui vir & quantus? quàm solers, quàm subtilis & copiosus in doctrina rerum coelestium? quam cum aliquot libris diligenter explicuerit, nusquam tamen de istiusmodi Astrologia verbum vllum fecit.

Cum autem in libris Meteororum, & de Partibus atque Generatione animalium, præsertim autem in libro Problematum, multarum rerum obscurarum & admirabilium causas perquirat; ad nullius quæstionis enodationem vel admirandi cuiusquam effectus explicatio-

*Senia Ari-
stotelis, q̃
Astromā-
tiā è me-
dio tol-
lunt.*

nem, istius astrologiæ opera & præsidio est vusus. Quin, multa sunt in eius scriptis quæ istam Astrologorum doctrinam omnino conuellant, veluti est illud, Futurorum contingentium non esse certam & definitam veritatem: Quæ per accidens quæque rarò vel ad vtrumlibet contingunt, non posse scientia comprehendì: Versari in rebus humanis casum &

fortu-

fortunam quæ fugiant certam hominis intelligentiam : Particularium & corruptibilium effectuum, causas proximas & proprias esse particulares atque corruptibiles, ob idque ad perfectam eorum cognitionem non satis esse coelestes & vniuersales causas contemplari: Cœlum non aliter agere in ea quæ sunt infra lunam, nisi per motum & lumen. Nec vsquam ferè indicauit Aristoteles præter solem & lunā, vim & efficientiam aliorum syderum. illud quoque docuit decretis Astrologorum valde contrarium, coelestia signa etiam corporeorum & sensibilibus effectuum, per alias causas aueri & impediri posse.

Cicero libro 2. de Diuinatione, laudat Eudoxum ætate Platonis & Aristotelis principem Astrologorum: irem Panætium Stoicum, Archelaum etiam & Cassandrum, ac Scylacem Halicarnasseum, Astrologorum sui temporis nobilissimos, qui totam hanc rationem astrologiæ repudiarunt. Auicenna qui post Hippocratem & Galenum principatum medicinæ obtinet, libro ultimo primæ Philosophiæ, negat Astrologis esse credendum in diuinatione futurorum, quia ipsi nec puncta coelestia teneant, neque naturas rerum inferiorum planè necessarias ad faciendum iudicium de rebus futuris, perspectas habeant, neque nitantur demonstrationibus sed probationibus oratorijs & poeticis. Ptolomæus, quem isti huius artis principem & ducem sequi se dicunt, in libro primo de Iudicijs, cap. 2. Non est, inquit, putandum, omnia a

Eudoxus.
Panætius
Auicenna.

Ptolomæus.

P

super-

supernis causis directo deriuari necessitate quadam inuiolabili, vt nulla alia vis quin ita operentur obsistere valeat. Idem tractatu suo quem vulgo appellant Centiloquium, hoc est, Centum sententiarum, prima eius sententia sic habet, Soli numine diuino afflati prædicunt futura particularia. Quinta vero sententia huiusmodi est, Potest is qui sciens est multos stellarum effectus auertere quando naturam earum nouerit, ac seipsum ante illorum euentum ritè præparauerit. vnde manauit illa multorum sermonibus trita sententia, Sapiens dominabitur astris. Porphyrus in libro de Oraculis confessus est, exquisitam rerum futurarum scientiam ex inspectione syderum, nõ mortalibus modò, sed multis etiam deorum esse incomprehensibilem. Idem in vita Plotini scribit, eum, cum in ista astrologia satis multum temporis, studij, & operæ posuisset, deprehèdisse tandem, Astrologorum iudicijs & diuinationi futurarum rerum non esse credendum; eamque diuinationem tũ sermonibus tum scriptis cõfutauisse. quod manifestum est cuius legenti eius libros de Fato & de Prouidètia, maxime verò eum qui inscriptus est, An stellæ aliquid agant.

Porphyr.

Plotinus.

21. *Cui generi hominum prædictiones Astrologorum arrideant & probentur, quas S. Ambrosius comparat telis aranearum.*

SI hæc porrò Astrologia vera esset & certa, plurimum sanè adiumenti asferret, prouisione futuro-

futurorum, ad bene regendam, & administrandam rempublicam, ob eamque causam magno in honore, & gloria fuissent Astrologi apud Reges, & rerum publicarum Principes: at contra prorsus euenit; nam seuerissimis multorum Principum decretis, & edictis explosam, & damnatam, & grauissimis supplicijs addictam eam artem inuenimus. Quoties Astrologi seu Chaldaei Roma eiectioni sunt principe Tiberio, Diocletiano, Constantino, Theodosio, Valentiniano, praesertim autem Iustiniano, quibus huius artis studium, & exercitatio, non solum ut inanis, & veritatis expers iudicata est, sed etiam ut ciuitatibus, & societati hominum noxia, & pestilens, semper visa est detestabilis? Sed quid attinet in re manifesta, quae turbam testium non desiderat, longiorem orationem ponere? Audeo dicere, post hominum memoriam vix fuisse quendam vlllo tempore vel magnitudine ingenij, vel praestantia doctrinae, uel prudentiae ciuilem excellētia, vel eximia morum integritate, vel denique insigni aliquo nobilem ac memorabilem virum, qui natalitia Chaldaeorum praedicta non quasi meras nugas, & quisquilias floccifecerit, penitusque contempserit. Vulgus modo stolidum, ad intelligendum hebes, infirmum ad iudicandum, facile credulum, & noua miraque audiendi, & noscendi curiosum, istis nugatori bus, & aures, & fidem libenter adhibet. Gaudent etiam hisce commentis leuissima quaedam ingenia, lucri magis, quam veritatis cupida, in republica literarum, turbulenta ac seditiosa,

*Professo-
res diui-
nando fu-
tura ex
astri: pu-
blicis mul-
torum Prin-
cipum de-
cretis esse
ciuitatib.
eiectiones.*

*Cui gene-
ri hominum
praedictio-
nes Astro-
logorum
arrideant,
& proben-
tior.*

& sapientiæ optimatibus semper infensa, rerum
que vtilium, & alijs notarum fastidiosa, nouarū
autem, & ignotarum, atque adeo etiam incom-
prehensibilium auidissima: denique quibus nō
tam cordi, & curæ est vera nosse, quā videri
vulgo ea ipsos scire, quæ summi philosophiæ
antistites nescire se consentunt.

*B. Ambro-
sius pradi-
ctiones A-
strologorū
comparat
tela ara-
neæ.*

Hanc rationem egregio S. Ambrosij dicto
concludam. Ita scribit Ambrosius lib. 4. Hexame-
ron, cap. 4. Sapientia Chaldæorum telæ aranæ
comparatur, in quam si culex aut musca incide-
rit, exuere se non potest: si vero validiorum
animantium vllum genus incurrisse visum est,
pertransiuit, & casses rupit, infirmos atque ina-
nes laqueos dissipauit. Talia sunt retia Chaldæo-
rum, vt in his infirmi hæreant, validiores sensu,
offensionem habere non possint. Itaque vos qui
ualidiores estis, cū videritis Mathematicos, di-
cite: Telam aranæ texunt, quæ nec vsus aliquē
potest habere, nec vincula, si tu non quasi culex
aut musca lapsu tuæ infirmitatis incurras, sed
quasi passer aut columba casses inualidos præ-
petis volatus celeritate dissoluas.

22. *Disputatur contra tria fundamenta A-
strologiæ Iudiciariæ.*

*OCTAVA
ratio.*

OCTAVA RATIO. Fundamenta, & firma-
menta huius artis, aut nulla sunt, aut certe infir-
missima, & fragilissima: hæc igitur ars nulla ra-
tione firma, & stabili vitur ad diuinandum,
quamobrem nullam quoque apud homines au-
ctorita-

auctoritatem, fidem, ac probabilitatem habere de-
 bet. Primum fundamentum istius doctrinæ est,
 astra habere qualitates omnes elementorum;
 partim enim esse frigida, partim humida & sic-
 ca, si non formaliter, saltem virtualiter, hoc est,
 si non actu saltem effectū, si non in se habendo
 eas qualitates, certè habendo facultates earum
 qualitatum effectrices: Saturnum aiunt esse fri-
 gidum, Martem siccum, Lunam humidam. Ve-
 rùm hoc, & ratio confutat & experientia, Ra-
 tio quidem, quoniam sicut astra omnia sunt lu-
 cida & ex se lucem fundunt, ita quoque calida
 esse omnia & calefacere necesse est: lux enim,
 non sicut omnis per se calefacit, ita frigefacere
 aut per se humectare vel exsiccare potest. Ste-
 mus decretis Astrologorum aientium. ut Lu-
 nam, itidem cætera sydera luce à sole mutuata
 fulgere. Si igitur omnium astrorum vna est ea-
 demque lucis origo & ratio; qui potest esse tā
 multiplex, dissimilis atque discrepans ratio &
 potestas agendi? Experientia item hoc ipsum
 redarguit: in plenilunio enim, cum est lumen
 Lunæ plenissimum, noctes quoque, Aristotele
 & experientia teste, calidiores existunt. Sed
 Astrologi præter lucem, alias in cœlo & syde-
 ribus vires atque facultates, & à luce & inter se
 multum diuersas, mirandorumq; operum cau-
 sas; quas influentias appellant, commenti sunt.
 Nouitium sanè inuentum; nulli veterum vel
 Philosophorum vel Astrologorum vnquā pro-
 batum: ac si licet ex eorum scriptis coniectu-
 ram facere, ne notum quidem illis. Postquam

*Aristote-
 les. Non
 esse poren-
 das in cre-
 las influen-
 tias.*

verò à recentioribus Astrologis influentiæ in-
uentæ & palam probatæ, ab alijs quoque doce-
ceri & defendi cœptæ sunt quis ex Lyceò paulo
gravior & probatior Philosophus non eas repu-
diavit atque damnavit? Festinè quidam Asylum
ignorantiæ eas appellavit? ad influencias enim
quasi ad vnicum perfugium sese recipiunt, &
hanc se in latebram conijciunt quicumque mira-
bilium effectum proprias & naturales causas,
vulgaribus ingenijs nec in Philosophia exerci-
tatis occultas, solerter inuestigare ac reperire
non possunt. Et verò, si admittuntur influentiæ,
vix dici potest quâtooperè debilitetur robur Phi-
losophiæ, deteratur eius dignitas, auctoritas
eleuetur, minuatur existimatio, denique studium
eius apud homines cultusq; languescat, Quid
enim attinet in occultis rerum causis perqui-
rendis & eruendis præclara ingenia Philosopho-
rum tanto studio & conatu laborare, cum in
procliui sit, cuiuslibet effectus ex cœlestibus in-
fluentijs rationem petere & afferre? quis enim
effectus est, cuius naturalis & vera causa paulo
obscurior & abstrusior est, quem non per istius
modi influencias nullo negotio liceat explica-
re? Cur magnes ferrum ad se rapit? confestim
respondebitur, quia propria eius influentia
cœlestis eam illi virtutem indidit. Vnde Re-
mora tantulus piscis vim habet sistendi incita-
tissimum nauigium? in promptu est responsio,
nimirum à cœlesti quadam influentia, quæ tan-
ta pisciculum illum vi ac potestate roborauit.
Quid moror? nullum erit problema, nihil in
natura

DE DIVINATIONE ASTROLOGICA 225

natura rerum adeo reconditum, & ab intelligē-
tia nostra remotum, denique nihil de his quo-
rum peruestigatio summorum Philosophorum
ingenia fatigauit, & torfit, quod non quiuisset cir-
culo Astrologorum, & indoctorum hominum
vno verbo, scilicet per istas influentias expedi-
re queat.

Verū labor equidem longius, reuertar igi- *Argumē-*
tur ad propositum. Si Saturnus quia lucidus est, *tatio con-*
per lucem calefacit, quomodo idem per influē- *tra influē-*
tiam frigefacit? nonne absurdum est in eodem *tias.*
astro duas esse facultates, vnam calefaciendi, al-
teram frigefaciendi, non diuersas modo sed
etiam aduersas, & contrarias? cernimus ita
else natura comparatum, ut omnibus in rebus
in quibus duæ insunt differentiæ, uel proprieta-
tes (ut more Philosophico loquar) vna genera-
lis, & quæ vni rei communis est cum alijs mul-
tis, altera specialis, & propria eius rei (cuiusmo-
di sunt in homine sentientem esse, & rationalē)
ut semper differentia, & proprietas specialis, no-
biliores, & perfectiores sit generali, ut quæ illam cō-
trahit, & determinat, nouæ perfectionis gradū
& rationem ipsi adiungens: sicut patet in præ-
dicto exemplo hominis, in quo rationale nobi-
lius est quam sentiens. At contra omnino se ha-
bet res in hac mirabili Astrologorum doctrina.
Etenim docent ipsi, in Saturno, exempli causa,
duas esse proprietates seu facultates agendi, v-
nam generalem, & communem ei cum omni-
bus atriis, quæ est uis illuminandi, & per illumi-
nationem calefaciendi: alteram specialem, &

propriam Saturni, qua ratione differt ab alijs astris, quæ est facultas frigefaciendi, vel aliqua alia vis alicuius influentiæ. Certum autem est, lucem cœlestem multo nobiliorem esse quacūque alia qualitate cœlesti, & facultatem calefaciendi præstantiorem esse facultate refrigerandi. Præterea, duas esse in re quapiam facultates & proprietates ei rei naturales, quarum altera, vt diximus, sit generalis, altera particularis, inter se contrarias, quales sunt in Saturno secundum istos potestas calefaciendi per lucem, & refrigerandi per influentiam; nec fert natura rerum, & id fieri non posse ratio ipsa decernit. Nam vt in corpore multiformi, & quod Græci vocant Heterogeneum, secundum diuersas partes inesse queant contrariæ qualitates, & facultates, quemadmodum contingit corpori humano in cerebro, & in corde; id tamen conuenire non potest in astrum Saturni quod est secundū omnes partes vnius formæ ac naturæ: neque. n. vna pars eius habet lucem, altera vero influentiam, sed vt totum est præditum luce, ita conuenit in eo toto esse influentiam. Ne multa (non enim consentaneum est alieno loco de Influentijs aduersus Astrologos subtiliter disputare) satis argumenti est ad tollendas influentias omnium quæ in natura rerum efficiuntur, tametsi noua, singularia, & mirabilia videantur, veras, naturales, & proprias causas, atque rationes ex duobus principijs cœlestibus, q̄ omnibus sunt conspicua, & experimentis quotidianis explorata, motum dico, & lucem, plenè cumulateq;

ac probabilissimè peti & duci posse. Figuras porro & effigies stellarum quas designant Astrologi in Zodiaco, similitudinem reddentes quorundam animalium vel hominum, magnâ vim habere in ortu cuiusque censent Astrologi; cū tamen per se ac natura sua non sint tales, sed sola eorum imaginatione constent, ab ipsis eo modo confictæ & figuratæ: possent enim fingi etiâ ad similitudinē aliorum animalium, domuum, turtium, mensarum, aliarumvè rerum. quare valde friuolum & ridiculum est, in eiusmodi figuris quicquam momenti ad diuinandum esse positum existimare.

23. *Vtrum astræ natalitia cuiusquam, possint esse certæ causæ omnium quæ ei euentura sunt.*

SECUNDVM fundamentum Astrologorum est; natalitia cuiusq; astra esse obseruanda: ex his enim omnes vitæ casus & euentus prodici & prænotari posse. Sed quis non videt fundamentum hoc esse infirmissimū? cur enim Astrologi non potius obseruent tempus, & cœli atque syderum statum quo quisque in vtero conceptus, formatus, & animatus est? cum in eo plus momenti esse videatur ad diuinandum: quippe tunc primum existit homo, & tunc primum vis cœlestis in homine recipitur & immititur: Etenim, ante ortum per nouem menses quisque fuit in vtero, potestati & actioni cœlorum subiectus. Cur item non considerant Astrologi alias constellationes & defluxus cœlestes,

*Alterum
Astromia
cia fun-
damentū
Quam in
ano sit,
natalitia
cuiusque
hominis
astra ob-
seruare
ad diui-
nandum.*

qui contingunt homini sapius post ortum? Cū plerumque vltu veniat vt illæ virtutes cœlestes insigniores sint effectu, & valentiores ad immutandum hominē, quàm quæ tempore ortus eius fuerunt: effectum enim illum & defluxum altorum nascenti homini impressum, necesse est variari commutata sapius humani corporis temperatione, vel ob alias potentes cōstellationes, vel ob educationem, vel ob variam uiuendi cōsuetudinem & rationē, vel ob leges patrias, ad quarum normam cogitur quisque vitam, mores, studia, & actiones conformare. Quid quod fortasse nihil illius materiæ primogeniæ quam quisque in ortu habuit, reliquum sit in extrema ætate? hoc enim visum est & multis & magnis Philosophis, nec S. Thomas in 1. par. quæst. ult. art. 1. abnuere videtur. Quo concesso, vis illius primi defluxus & effectus cœlestis in ortu hominis ei indita & impressa, necessariò tandem euanescet tota, nisi fingat quispiam eiusmodi virtutem cœlestem migrare ex subiecto in subiectum, tanquam ex domo in domum mutando domicilia: aut cum præsentit interitum suum, aliam pro se sui similem & quasi vicariam virtutem substituere.

*An ali-
quid pri-
migenia
materia
hominis
maneap
totam vi-
tam.*

S. Thom.

24. *Vtrum sit plus momenti in conceptu hominis, quàm in eius ortu: ad diuinandum.*

PLVS autem esse ponderis, aut certè non minus, in conceptu hominis quàm in ortu, magister istorum Ptolemæus locuples testis est. Is enim in tertio Apotelesmarum ita scribit: Cum prin-

principium temporale hominis aliquod statuatur, natura quidem & per se illud erit principium cum semen vtero genitali admittitur; potentia verò & secundum accidens cum hora partus infans egreditur. Qui igitur horam admissis feminis vel casu vel obseruatione deprehendit, illam sequi potius debet in proprietatibus corporis & animi dignoscendis, considerando quæ sint eo tempore stellarum configurationes, cum enim semel à principio semen ex ambientis aëris affectione, certa qualitate disponitur, licet per consequentis conformationis tempora varietur, quoniam tamen propriam cognatamque materiam naturaliter sibi asciscit, magis etiam primæ suæ qualitatis dispositioni assimilabitur. Hæc inibi Ptolemæus. Quibus verbis non obscure docet, primum & naturale atque efficacissimum hominis principium, esse feminis admissionem hominisque conceptum; atque huic principio potissimè insistendum & inhærendum esse ad prænoscentas hominum affectiones & euentus, tam qui ad corpus quam qui ad animam pertinent. Sed quia benè nouerat Ptolemæus, punctum illud temporis vel admissi feminis, vel conceptus, vix cognosci posse ab Astrologis; ne illorum iudicia & diuinationes quas ipsi ducunt ex ortu hominis infirmare videretur, mox subiecit, Qui autem horam ignorant principij seminalis, eos necesse est sequi principium natiuitatis. Haly nobilis Astrologus in eo libro quem scripsit de electionibus, ingenue fatetur, efficaciam decernendi Fatum homi-

hominis esse in hora conceptionis; sed quia hæc nescitur ab Astrologis, protētea eos ad horam natiuitatis confugisse. Quin cum Astrologi præmuntur argumento Geminorum, quorum cum idem sit ortus, dispar tamen euentus & exitus est; respondere solent diuersitatem euentum qui sunt in Geminis, ex diuersitate conceptus eorum esse profectam.

25. *De vanitate Astrologorum diuinationem suam extendentium etiam ad ciuitates, non solum ad homines.*

S E D vide quousque progressa sit istorum audacia & impudentia: etiam urbium, non hominum modo, facta profitentur hac arte posse prænosci & prænunciari: obseruata enim astorum compositione quæ fuit cum vrbes conderentur, posse earum casus euentusq; omnes prospici ac prænotari. Fecit hoc in vrbe Roma ro-

Tarutius Mathem-
aticus, lib. 2. de Diuinatione his verbis Cicero enarrat,
 oīa qua **Quidam L. Tarutius Firmanus** familiaris noster
 vrbi Ro- in primis Chaldæis rationibus eruditus, vrbis
 ma conti- etiam nostrę natalem diem repetebat ab ijs
 gerunt ad Parilibus, quibus eam à Romulo conditam ac-
 vim astro- cepimus; Romamque, cum esset in iugo Lu-
 rum, sub na natam esse dicebat, nec eius fata canere dubi-
 qua ea vr- tabat. O vim maximam erroris. etiamnè Vr-
 bs à Ro- bis natalis dies ad vim stellarum & lunæ perti-
 nulo con- nebat? fac in puero referre, ex qua affectione
 dita est re-
 ferebas. coeli

DE DIVINATIONE ASTROLOGICA. 23
cœli primum spiritum duxerit: num hoc in la-
tere aut in cæmento ex quibus Vrbs effecta est,
potuit valere? Ita Cicero-

26. *Cur observatio Astrologica non valeat
æque in stirpibus, & animalibus,
quàm in hominibus.*

VERVM, quærerem equidem ex istis Astro-
manticis, num velint eorum diuinationem etiã
in animantibus & stirpibus valere, vt in homi-
ne? Si negent, prodent scilicet suam inscitiam, &
suæ artis infirmitatem, inanitatem atque falla-
ciam. Cur enim non æqualiter valeat in stirpi-
bus atque in homine? immò cur non plus va-
leat? stirpes namque multo magis quàm homo,
à cœlestium corporum potestate, & efficientia
naturali necessitate pendent. Et cum minus mul-
ta, & varia atque incerta stirpibus quàm homi-
ni soleant accidere, facilius profecto esse debe-
ret eorum diuination, quæ stirpibus quàm quæ
homini sunt euentura. Sin verò annuunt, simili-
ter in stirpibus vt in hominibus valere astrolo-
gicam diuinationem: amicè rogarem ipsos, vt
diligentissimè obseruarent statum cœli, & astro-
rum, eo videlicet tempore, quo uel prunus, vel
cerasus, uel pyrus fereretur, aut cum sementis
tritici fieret, & ex illa cœli obseruatione pro-
merent etiam prognostica de illis arboribus,
scilicet vt diuinarent quantã illæ arbores pru-
norum, cerasorum, & pyrorum copiam essent
laturæ: quantus item ex illa tritici semine spi-
carum,

carum, & in singulis spicis quantus granorum numerus esset prouenturus, hæc si negent à se posse prænosci, fateantur etiam necesse est, non posse ab ipsis futuros hominum casus euentus-que prouideri.

27. *De antiquitate istius Astrologiæ apud Aegyptios, & Chaldaeos.*

Tertium . TERTIVM fundamentum eorundem Astro-
fundamē logorum est, artem hanc suam certissimis innu-
tū Astro- merabilium sæculorum experimentis, & con-
mantia. stantissimis obseruationibus esse comprobatā, aiunt enim, hanc disciplinam profectam esse ab Aegyptijs, & Babylonijs seu Chaldaeis, mortaliū omniū antiquissimis. tradit. n. Aristoteles in lib. 2. de Cœlo, textu 60. & extremo lib. 1. Meteororū, Aegyptios omniū hoīum vetustissimos haberi: & in principio operis Metaphysicorum affirmat, Aegyptios omniū hominū vetustissimos Mathematica studia tractare, & colere cœpisse. Iactabāt ēt olim Astrologi. Chaldaeos quadingenta, & septuaginta annorum millia in periclitandis experiendisq; pueris quicunq; nascerentur, posuisse. Verū adeo in aperto, & in promptu sunt omnibus istorum mendacia, vt a nobis ea vel confutari vel etiam indicari non sit opus. Etenim ab exordio mundi ad hanc diem, nec dum sex millia annorum effluxerunt. Ab origine verò gentis Chaldaæ, hoc est, post euer-
 sionem turris Babel, facta nempe linguarum diuisione, non sunt adhuc quatuor millia anno-
 rum

rum completa Picus Mirandulanns in cap. 2. li- *Picus Mi*
 bro 12 aduersus Astrologos, testes ad redarguē *randula-*
 dam Astrologorum mentitam vetustatem adhi- *nus.*
 bet Hipparchum & Ptolemæum, principes sa-
 nè astronomiæ; qui vbi pro dogmate aliquo cō-
 stituendo veterum obseruationes afferunt, nul-
 las profecto afferunt vetustiores ijs quæ sub Na-
 buchodonosor Chaldæorum rege apud Aegy-
 ptios & Babylonios fuere, ab initio autem im-
 perij regis Nabuchodonosor ad præsentem an-
 num qui ab ortu Domini nostri agitur millesi-
 mus quingentesimus octogesimus octauus, nō
 plus bis mille ducentos & triginta annos præ-
 teriisse constat Porro commentitiam Aegyptia-
 carum obseruationum antiquitatem, perbelle
 ridet & redarguit Augustinus in cap. 40. lib. 18. *August.*
 de Ciuitate Dei: ita enim scribit: Frustra vanissi-
 ma præsumptione garriunt quidam dicentes. ex
 quo rationem syderum comprehendit Aegy-
 ptus, amplius quam centum annorum millia nu-
 merari. In quibus enim libris istum numerum
 collegerunt, qui non multum ante annorū duo
 millia literas inagistra Iside didicerunt? non. n.
 paruus auctor est in historia Varro qui hoc pro- *M. Var-*
 didit. sic Augustin. Sed huic disputationi in qua *ro.*
 octo rationibus probare voluimus diuinationē
 astrologicā esse contrariam veræ philosophiæ,
 finem hoc loco statuemus.

NON MODO ASTRA NON
esse causas, sed nec esse signa rerum
futurarum.

CAPVT IV.

BEATVS August. in lib. 5. de Ciuitate Dei,
cap. 1. tradit fuisse opinionem quorundā
non mediocriter doctorum hominum, quibus
visum est non esse quidem astra causas huma-
norum euentuum, sed esse tamen eorum vera
& certa signa.

28. *Vtrum astra, si non sunt cause, saltem sint
certa signa omnium futurorum.*

ORIGENES quidē certē in tomis suis
super Genesim, (sic enim memorat Euseb. lib.
6. de Præparatione Euangelica, cap. 9.) cum ex-
planaret verba illa quæ sunt in primo capite li-
bri Geneseos. *Et erunt in signa,* è quibus videli-
cet verbis huius nostræ disputationis argumen-
tum pertexuimus, prodidit astra esse à Deo po-
sita in cœlo, vt per varios aspectus & coniun-
ctiones præsignificarent quæ consequentibus
temporibus tum vniuersè, tum sigillatim euen-
tura essent, non tamen ea efficerent. Itaque cœ-
lum esse dixit velut quendam librum in quo
Deus depinxit atque descripsit quæcunque in
toto mundani æui decursu, suo quæque tempo-
re futura sunt. Ad hoc probandum, citat Ori-
genes librum quendam cui titulus erat, *Narra-
tio Ioseph*, olim apud multos in auctoritatē &
fidem receptum: in quo Iacob Patriarcha indu-
citur

*Liber, q
inscribe-
batur
Narratio
Ioseph,*

citur filios suos alloquens hunc in modum, Le-
 gi, inquit, in tabulis cœli quæcunque contingent
 vobis & filiis vestris. Plotinus autem condisci-
 pulus Origenis idem sensit; idq. docet in libro
 qui inscriptus est, Vtrum stellæ aliquid agant:
 in libro autem de Fato, c. 6. hunc præterea stel-
 larum vsum esse tradit, ut qui illas suspiciant &
 quasi literas considerent, qui nimirum huius-
 modi literaturam nouerunt, futura legant; ex
 ipsis figuris comparatione quadam analogica,
 eorum significationem & intellectum solerter
 indagantes. Quin, Porphyrius affirmat, cum ip-
 se de se interficiendo vehementer cogitaret, Plo-
 tinum hoc cœlitus prouidisse, & à tanto facino-
 re eum prohibuisse.

Hanc sententiam Iulius Sirenus libro 9. de
 Fato, c. 35. minimè damnandam censet: & quo
 probabilem esse ostendat, aliquot ex diuina Scri-
 ptura productis sententijs, eam ornat atque cō-
 firmat. Hoc enim, inquit, non obscure indicat
 Elaias cum ait in capite 34. *Complicabuntur
 sicut liber cœli*: qua oratione significatur, cœ-
 los post diem iudicij conuoluendos esse atque
 complicandos: quasi nunc cœli instar cuiusdā
 libri sint explicati & aperti nobis, haud dubie
 ad legendū. Eodem pertinet illud quod est in
 Psalmo 21. *Annunciabūt cœli institutam eius*,
 & in Psalmo 18. *Cœli enarrant gloriā Dei*, &
 quod est in primo capite libri Geneseos de stel-
 lis, *Ut sint in signa*, & in Ps. 88. *Confitebuntur
 cœli mirabilia tua Dñe*. Nec verò, inquit Ori-
 genes

ab Origenis
 citatus.
 Plotinus.

Porphyrius.

Iulius Si-
 renus.

Origenes. genes, hæc opinatio tollit liberum hominis arbitrium, non magis profecto quam prædicta futurarum rerû à sanctis Prophetis edita, vel præ-

Plotinus. scientia omnium rerum quæ est in Deo. Plotinus scientiam astrorum ea ratione ut astra signa sunt humanorum euentuum, contingere homini aiebat vel singulari quodam Dei munere, vel propter eximiam astrologiæ peritiam; ad eam enim comparandam, opus esse acerrima indagatione, summaque solertia.

Iulius Sirenus.

Iulius autem Sirenus ne Augustinum quidè ab hac opinione abhorruisse putat: quippe in 2. lib. contra Manichæos. c. 21. cum is ageret de hominibus, quorum dum sunt in corpore mortali occulta sunt corda, ita scribit: Neque enim in illis corporibus cœlestibus sic latere posse cogitationes credendum est, quemadmodum in his corporibus latent, sed sicut nonnulli motus animorum apparent in vultu, & maximè in oculis; sic in illa perspicuitate ac simplicitate cœlestium corporum omnes omninò motus animi latere non arbitror. Hæc ibi Augustinus.

29. *Vtrum secundum Aug. astra sint signa omnium rerum humanarum.*

*Excursus
sive locus
Augusti-
ni.*

VERVM, si quis locum hunc non prorsus inconsideratè legat, planè comperiet Augustinum per cœlestia corpora non intelligere orbes cœlestes, sed corpora beatorum hominum, post resurrectionem cœlesti gloria & immortalitate donata; & ponere eum discrimen inter homines in hisce caducis corporibus viuètes, & eosdem

dem post resurrectionem in glorificatis corporibus immortalem, & beatam vitam agentes: quod illi arcana cordium multiplici simulatione callide tegant, & occultent, ideoque sæpe alios fallat: in his verò manifesta erunt omnium corda omnibus, omnisque prorsus aberit simulatio, fictio atque deceptio. Atque hunc esse verborum Augustini germanum intellectum, ex proximè consequentibus eius verbis palam est: hæc. n. sub-
subtrexit, Itaque illi merebuntur habitationem illam, & commutationem in angelicam formam, qui etiam in hac vita cum possint sub tunicis pelliceis occultare mendacia, oderunt tamen ea, & cauent flagrantissimo amore veritatis; & hoc solum tegunt quod illi qui audiunt ferre non possunt, sed nulla mentiuntur. Veniet. n. tempus, ut nihil etiam contegatur. Nihil est enim occultum quod non manifestabitur. sic Augustinus. Quare cum Augustinus satis explicatè, & aperte loquatur de corporibus hominum glorificatis, non autem de coelis vel astris; demiror sane Iulium Sirenium tam incogitanter, & oscitanter legisse hunc locum, ut propter eum maximè, Augustino assinxerit huiusmodi sententiam, cuius nec ullum eo loci vestigium apparet, & extat apud eundem in lib. 5. de Ciuit. Dei copiosa & grauis confutatio.

30. De natura, & varietate signorum.

CAETERVM, astra esse signa rerum futurarum, censeo equidem non solum esse alienum à *Astra non esse certa*

Q 2 vera

*signa ve-
rum futu-
rarum.*

vera philosophia, sed etiam sacris literis cōtra-
rium. Ac licet complures earum rationum quas
superiori capite tractauimus, etiam valeant ad
hoc probandum: nouis tamen aliquot argumē-
tis quæ propriè eiusmodi sententiam refellant,
hoc loco vtendum est. Principio, quod est natu-
rale signum alicuius rei, id vel eius rei causam
vel effectum esse, vel vtrumque ab eadem supe-
riori & communi causa proficisci necesse est.
nam quod, præter hæc, quantum membrum fin-
gi posset, videlicet vt illud signum necessariò sit
coniunctum cum causa rei ab illo significatæ, id
non est diuersum à tertio membro: talis enim
connexio, & coniunctio non aliter esse potest,
quam vt causa illa prius ex se pariat id quod est
signum: deinde id quod est signatum, aut vt idē
quod causam excitat vel admouet ad agendum,
simul etiam adhibeat, & applicet id quod est si-
gnum ad præsignificandum: vtrumque autem
horū ad communem causam refertur. Hinc igitur
argumentari licet ad hunc modum: Si cœli
& sydera sunt signa omnium rerum subluna-
rium, vel sunt earum rerum causa, sed hoc
negat ista opinio: uel sunt effectus, quod nec il-
li dicent, nec ullus hominum sanæ mentis au-
debit dicere: aut, quod tantummodo reliquum
est, tam cœlestia quam sublunaria ab eadem
superiori, & communi causa proueniunt:
quemadmodum Iris signum est serenitatis,
non quia sit eius causa vel effectus, sed quia
eadem est communis vtriusque causa. At cau-
sam communem cœlestium corporum, & sub-
luna-

lunarium, necesse est esse vel corpoream vel incorpoream: corpoream quidem nullam, opinor, ponent isti, nullum enim corpus superius cœlis est: relinquitur igitur ut omnia referant ad causam incorpoream, hoc est, vel Deum, vel Angelos, qui mouent cœlos: ita ut, dum Angeli cœlos mouent, in ipsorum cœlorum statu habituque, & in syderum positu & conformatione, quasi quibusdam suis nutibus, & tanquam notis atque signis inibi descriptis euenta rerum humanarum prænotent atque præmonstrent. At enim uero id multis de causis non est credibile. Etenim qui sic opinantur, fateri eos oportet induci homines ab Angelis ad maxima scelera & execranda flagitia.

AD hoc, Philosophia docet, necnon & Theologia idem tradit; Angelorum nullam esse actionem quam vocant transeuntem, & quæ proximè ab ipsis prouenit, aliam quàm motum localem, nec Angelos posse quicquam proximè agere, præterquam mouere motu locali. Angelos verò qui circumuoluunt orbes cœlestes, nō aliter circa res sublunares operari censent Philosophi & Theologi, quam per motum & lumen cœli; nam influentias à lumine omninò diuersas paulò superius sustulimus. Per motum autem & lumen cœli, omnes futuros effectus rerum sublunarium, clare distinctè certoque præmonstrari, nemo dicet qui uerisimilia & credibilia loqui velit. Deinde, cum eiusdem causæ duo effectus se inuicem necessariò indicant, ut ab eadem causa, sic eodem quoque modo ab il-

la prouenire debent: alioquin fieri non potest vt se inuicem certo indicent: a Deo autem & Angelis quę in corporibus cœlestibus fiunt, ea necessariò & inuariabiliter se habent, quę autem in his quę sunt infra lunam, valde mutabiliter, & vt ita loquar, defectibiliter contingunt.

Hinc alia quoque subtexuntur argumenta. Etenim, quomodo astra quę sunt certo numero comprehensa, & semper vniusmodi & necessariò ac immutabiliter ita se habent, signa esse possunt omnium rerum futurarum, quę prope modum infinitę sunt multitudine ac varietate, & inter se plurimum differentes atque discrepantes? quomodo eadem syderum positura & conformatio, sub qua vel Gemini, vel alij quā plurimi eodem puncto temporis nascuntur potest esse certum signum propriè & distinctè præsignificans tot tamque varios ac dissimiles casus & euentus qui in illis cernuntur? quare, si astra sunt signa rerum futurarum, earundem quoque causas esse fatendum est: quod si causas esse negamus, etiam signa esse negandum est.

31. *An Cometę signa sint humanarum rerum.*

DICES, Cometas qui in sublimi aëre generantur, signa esse quę insignes admodum casus futuros portendant, quorum tamen Comete nec causę sint nec effectus: quare idem quoque astris accidere respectu rerū sublunariū, nō esse incredibile. At ego, Cometas certa signa humano-

manorum casuum, & eventuum nunquam concedam, licet hoc tam vulgo persuasum sit, quã est à Sapien-
tibus improbatum. Qd si hoc, cù vulgo consentiens opinarer, dicerẽ Cometas à stellis rerum futurarum effectricibus excitari, ut eas res antegressi præmōstrent. De stellis aut se-
cus est, his n. nulla est corporea causa superior.

32. *An qui astra faciunt signa rerum futurarum, simul etiam necessariò inducant
& astruant Fatum.*

SED quid multis moror? coguntur istius opinionis Auctores, quanquam id minimè velint, Fati necessitatem inducere: & sanè, magis etiam quàm qui stellas faciunt causas rerũ sub lunarium. Etenim, ut stellæ causæ sint eorum quæ fiunt infra lunam, non ideo tamen Fati necessitas existet, quod n. illarum afflatu defluxu-
que in terris esset efficiendum, id posset vel cōtrarijs materiæ affectionibus, uel obstantibus causis particularibus impediri. At si astra naturaliter futurarum rerum signa sunt, omninò enenire necessarium est quod ab illis significatur: alioquin essent signa inania, & fallacia. Et cum Deus ea instituisset ad significandum, & in coelo tanquam in quodam volumine ea descripsisset veluti notas futurarum rerum indices; si euentus rerum cum illarum significationibus non congruerent, vel Deus earum auctor, & institutor ignorans esset, futurorum euentuum,

vel fallax. Denique, si astra præsignificant quæ futura sunt; aut præmonstrant quæ faciēda sunt à causis particularibus, non quidem omnibus sed aliquibus tantum: sed hoc improbable est ac figmenti simile; cur enim stellæ prænotent futuros effectus aliquarum particularium causarum potius quam aliarum, vel cur non similiter præmonstrent omnes, cum omnium similis ratio sit; aut stellæ præsignificant omnes futuros effectus causarum omnium particularium: hoc si est, nullæ profecto reliquæ fiēt causæ per quas quo minus eueniat quod à stellis præsignificatur, impediri & prohiberi queat. Ex quo fit necessario, ut omnia quæ infra Lunam fiunt, immutabili necessitate Fati nexa vinctaque teneantur: quod nec istius sententiæ defensores sentiunt, & id sentire impium est.

*Explicatur locus
Isaia ex
cap. 34.*

*Iustinus
martyr.*

Testimonium autem illud Esaiaæ productum ex 34. capite, *Cæli sicut libri complicabuntur*: quod inter cætera Scripturæ testimonia paulò superius commemorata, solum habere aliquid difficultatis, & non nihil negotij faceßere videt; varie interpretatum reperio: ita tamen, ut nulla interpretatio quæ modo vel probati sit Auctoris, vel sit ipsa probabilis, quicquam illi sententiæ suffragetur. Iustinus martyr respondens ad quæstionem nonagesimam quartam Orthodoxorum, qua quærebatur quemadmodum intelligendum esset quod dicitur ab Esaia, fore ut cælum aliquando velut liber complicaretur, sic ait. Quemadmodum cæli creationem diuinæ literæ per similitudinem conferunt aliquando cum

eum pellis extensione, dicentes: *Qui extendit
cælum sicut pellem*, aliquando cum firmato fu- *Psal. 103.*
mo, *Cælum*, inquit, *ceu fumus firmatum est*,
aliquando cum rotunditate cameræ. *Qui exten-
dit*, inquit, *cælum uelut cameram*: Sic è diuer-
so, cœli dissolutionem per comparationem cō-
ferunt cum alijs rebus, vt apud Esaiam cum vō *Esaiā 51.*
lumine inuoluendo & implicando, sicut apud *iuxta 70.*
Dauidem Psalmo 101, cum vestimento vetera- *Interpre-*
scente & commurando. Sic Iustinus. Hierony- *tes.*
mus verò illis verbis hæc scribit, consideran- *Esaiā 40.*
dum, quod non dicat interire cœlos, sed repli- *iuxta 70.*
cari siue complicari quasi librum; vt postquam *Interpre-*
omnia peccata aperta fuerint & relecta, com- *tes.*
plicentur qui prius aperti fuerant; vt nequa- *B. Hiero-*
quam vltra scribantur in eis delicta multorum *nymus.*
In Scriptura enim dicuntur cœli annunciare iu-
stitiam Dei, reuelare iram eius, & probare ac-
testificari hominum scelera.

Sanctus Thomas & Nicolaus de Lira aliter *B. Tho-*
exponunt, Complicabuntur, inquiunt, cœli *mas.*
tanquam liber, hoc est, non exercebunt vltra
Ethnici astromantiam suam; nec post hac ex
astris diuinare audebunt euent a hominū, quasi
legerent in syderibus descriptos casus & euen-
tus futuros. Alij sic interpretantur: Non pate-
bit amplius introitus in regnum cœlorum, sed
ianua cœlestis clausa erit. Sunt etiam qui ex-
planent hoc modo. Ministerium & vsus cœlo-
rum atq; syderum exhibitus homini ante diem
iudicij, postea esse desinet; nam licet, non pror-

sus interibunt celi, alio tamen statu erunt, & quibus nunc funguntur ministerijs, & obsequijs hominum causa, ab illis post diem iudicii quoquo modo vacabunt: quæ uacatio pulchrè declaratur ab Isaia similitudine libri, quæ posteaquâ eo vsi sumus, nec amplius nobis vsui futurus est complicare, & claudere solemus.

Nec displicet mihi interpretatio eorum qui aiunt, illa similitudine declarari; tantam fore diuinæ iræ, & vindictæ demonstrationem aduersus gentes de quibus illic Esaias loquitur; tantam rerum omnium perturbationem, & confusionem; tantam denique hominum tristitiam, dolorem, & conflictationem, ut præ magnitudine mœroris atq; doloris, & præ animi perturbatione, & oppressione, videantur hominibus cœlestia lumina restringui, stellæ de cœlo cadere, motus quæ earum conturbari, denique cœlum complicari, & recedere, nam quod hic dicitur complicari, in Apocalypsi dicitur recedere vel abire, sic enim habes in capite sexto, *Et cœlum recessit sicut liber inuolutus.*

Sed quo planior sit, & facilior ad intelligendum etiam non valde doctis similitudo libri qua vsus est Esaias, sciendum est, apud Hebræos antiquitus libros sacros diuersa forma scribi, & compingi solitos esse, quàm nunc scribuntur libri apud nos. Habebant enim vnum duntaxat folium siue membranam oblongam, quæ circa cylindrum siue axem ligneum circumplicabatur, instar lineæ telæ radio textorio circumuolutæ. Videbantur autem huiusmodi, libri ali-

quam

*Antiquus
mos He-
braorum
scribendi.*

quam referre cœlorum similitudinem & imaginem; quia sicut axem illum ligneum qui in medio voluminis est, complures ipsius membranæ ceu spiræ, altera super alteram ambiunt & circumdant: ita hanc terram quæ medium totius vniuersi axem tenet, cœlestes orbis alter super alterum, collocati in orbem circumplectuntur. Verùm de testimonio Esaïæ satis dictum sit; cuius cum tam multæ ac variæ sint expositiones, nulla earum tamen mirificos istos astrorum Lectores, Interpretes, ac Vates adiuvat.

*QUA RATIONE NONNULLI
Astrologi multa verapradixerint.*

C A P V T V.

RESTAT, quò tandem ad exitum hæc disputatio finemq; perducatur, vt causas aperiamus, cur permultæ quorundam Astrologorum prædictiones veræ fuerint, & cum rebus ipsis euentisque mirabiliter congruentes, hanc enim quæstionem, cum eius mentio supra incidisset, quo melius, commodiori scilicet loco tractari posset, in extremam hanc disputationem reiecimus.

Licet igitur prædictiones Astrologorum plerumque falsas esse verissimum sit, & à nobis supra satis explicarum; quoniam tamen & olim proditum est à multis, hodieq; admodum vulgare est, quinetiam à grauib; viris, quibus nō credere difficile est, pro certo traditur, fuisse quosdam

quosdam Astrologos quorum pleręque omnes prædictiones ueræ fuerunt, vsu ipso euentuque comprobata: & vix vnum aut alterum de plurimis eorum prædictis secus euenit quàm illi prænuñciauerant: age, nos etiam hoc credere in animum inducamus, ne peruulgatæ hominum opinioni quasi publica fide & auctoritate confirmatę, aduersari videamur. Concessa autem veritatē huiusmodi prædictionū, causas eius disquiramus, videlicet qua ratione certò potuerint ab Astrologis futura prænuñciari, quæ quod incerta sunt, vim & notionem humanæ intelligentiæ fugiunt. Non longum faciam: equidem asseueranter affirmo, si quæ prædictiones Astrologorum veræ fuerunt, earum veritatem non ex veritate firmitateq; artis astromanticæ quam nullam esse satis superque ostensum est. sed alijs ex causis proficisci: quæ autem sint huiusmodi causæ, breuibus explicabo.

33. *Quatuor causæ, propter quas nonnumquam prædicta astrologorum vera carent.*

34. *Instinctu dæmonum agi nonnunquam homines ad diuinandum.*

PRIMA causa. Veritas istarum prædictionum nonnunquam prouenit ex pacto & societate quàm iniuit Astrologus cum dæmone, vel ex occulto eius afflatu & instinctu, quo etiam nescientes homines ad diuinandum instigan-

ganturi Hoc tradit August. extremo c. 7. lib. 5. de Ciuitate Dei: Nō immerito, inquit, creditur, cū Astrologi mirabiliter multa vera respondent, occulto instinctu fieri spirituum non bonorū, quorum curā est has falsas, & noxias opiniones de astralibus fati, inferere humanis mentibus atque firmare, non horoscopi notati, & inspecti aliqua arte, quæ nulla est. Sic Augustinus.

35. *Quot modis Dæmon futura, aut ipse præsentire, aut homini præmonstrare soleat.*

DEMON autem suggerit homini quod ab eo diuinetur, vel palām se oculis eius aspectabilem, & conspicuum offerens, eumque futura humanis verbis prædocens: uel formatis in aere uocibus præsignificantibus futura, citra ullam corporis speciem, & figuram: vel immissa scriptura aliqua quæ futurarum rerum prædictiones continet, uel dormienti per somnia aut vigilanti afficiendo, & commouendo phantasiam, fingendoque phantasmata idoneè ad repræsentandum id quod diuinandum est, atque incitando hominem ad prædicendum id quod repræsentant phantasmata. Scire autem potest dæmon futura, quæ prædocet hominem, reuelatione Dei per bonos Angelos ei facta: nonnunquam enim Deus ad agendum aliquid utitur demonum ministerio. Solet etiam dæmon prænūciare homini futura quæ ipsemet postea factu-

facturus est: solet ob incomparabilē sui motus celeritatem, quæ in longinquis locis remotisq; mundi regionibus geruntur, ea ad homines qui longissimè absunt deferre. Potest item doemon ex clandestinis consilijs, verbis, scriptis, ex signis quæ in corpore tā exterius quam interius apparent, occultas hominum cogitationes, & deliberationes tam præsentēs quam futuras, solertissimè coniectando, cognitās habere. Idemque coniicit ex præparatione causarum aliarūque rerum, quæ ad gerendum aliquid debent concurrere. Denique, ob incredibilem subtilitatem, & solertiam mentis, ob tantam tot milliū annorum experientiam, propter perfectam rerum omnium naturalium absolutamque scientiam; callidissimus atque sagacissimus est ad præsentendum & prænosendum futura.

August.

Hoc ipsum quod hic docuimus, quia enucleate aperteq; tradit Augustinus in libro 2. de Genesi ad literam, capite 17. libet verba eius adscribere, De fatijs inquit, syderum, qualeslibet eorum argutias, & quasi de mathesi documentorum experimenta, quæ illi Apotelesmata vocant, omnino à nostræ fidei sanitate respuamus, Talibus enim disputationibus etiam orādi causas nobis auferre conantur, & impia perversitate malis factis, quæ rectissimè reprehenduntur, ingerunt accusandum potius Deum auctorem syderum, quam hominum scelera. Ideoque fatendum est, quando ab illis vera dicuntur, instinctu quodam occultissimo dici, quem nescientes humanæ mentes patiuntur. Quod cum ad
deci-

decipiendos homines fit, spirituum seductorum operatio est: quibus quædam vera de temporalibus rebus nosse permittitur, partim quia subtilioris sensus acumine, partim quia corporibus subtilioribus vigent, partim experientia validiore propter magnam longitudinem vitæ, partim à sanctis Angelis, quod ipsi ab omnipotente Deo discunt etiam iussu eius sibi reuelantibus, qui merita humana occultissimæ iustitiæ sinceritate distribuit. Aliquando autem iidem nefandi spiritus etiam que ipsi facturi sunt, velut diuinando prædicunt. Quapropter bono Christiano, siue Mathematici, siue quilibet impiè diuinantium, maximè dicentes vera, cauendi sunt, ne consortio dæmoniorum animam deceptam, pacto quodam societatis irretiant. Hactenus sunt Augustini verba.

36. *Quot modis & quā grauiter peccent, qui Dæmonum vel istorum Astrologorum opera vtuntur ad diuinandum.*

CETERVM, grauiissimo se obstringunt scelere, quicumque cupidi futura noscendi consulant dæmones, vel Astrologos dæmonum opera vetentes ad diuinandum, Multis autem modis in eo ipso peccari potest: primò si quis consulat dæmonem de futuris, vel dæmonis discipulum Astrologum, ratus esse dæmoni futura omnia exploratè percepta. hoc enim cum vnius Dei proprium sit nosse futura, si quis eandem cognitionem etiam dæmoni tribueret, impietatis

tis & idololatriæ crimē esset. Deinde, si crimini vertitur cum excommunicato ab Ecclesia communionem & societatem habere, quantum crimen erit cum diabolo acerrimo Dei & Ecclesiæ inimico & implacabili hominum hoste, pacto & societate cōiunctum esse? & quem Deus ab omni societate fidelium ablegavit ad inferas & tartareas sedes, æternisq; supplicijs mancipavit, eo & amico, & magistro atque doctore vti velle? Postea, qui dæmonis familiaritate utitur, in magnum certumque periculum animam suam objicit, utpote quam dæmon eiusmodi prædictionum illecebris circumvenire ac perdere vehemēter cupit. Peccat etiam gravissimē, quisquis Astrologos consulit, quo per illos aliorum hominum occulta peccata cognoscat. His accedit, immane flagitium esse, propterea dæmonem vel astrologum consulere, ut eorum consilio vel auxilio magnum aliquod scelus perpetrari queat.

37. *Istiusmodi Astrologos fere improbos
& flagitiosos esse.*

ISTOS autem veridicos, ut ferunt Astrologos dæmonum esse familiares & discipulos, multa nec obscura sunt indicia: Primum, improbitas morum vitæq; impuritas & sordes: tum, contemptus omnium quæ ad Christianæ disciplinæ ac pietatis cultum exercitationemque pertinent: Postea, odisse lucem, fugitare conspectum congressumque hominū, rarò versari

in publico, ferè in obscuro & abdito, proculq; arbitris viuere: Ad hoc, de ipsorum fide ac religione, mala, nec sanè immerito ac temerè, hominum existimatio: Denique multi de istis capti à censoribus fidei nostræ, quos Inquisitores vocant, vel vltro, vel coacti, habita scilicet quæstione, ad motisque cruciatibus, suam cū demone societatem & familiaritatem confessi sunt. verum de prima causa satis.

SECUNDA CAUSA. Astrologos diuinare futura, nonnunquam accidit ex occulta diuinæ prudentiæ dispositione quæ, vt in 4. & 7. libro Confessionum inquit Augustinus, cæcas & improbas mentes consultorum aliquoties ignoto quodam instinctu sic agitat, vt nescientes proferant, quæ consulentes vel ex eorum meritis vel ex abyssu iusti iudicij Dei oporteat audire.

August.

38. *De vsu sortium apud antiquos ad prænosceda futura.*

HVC referre etiam conuenit sortes antiquis vsitatas, quando videlicet versib. alicuius poëtæ sortitò acceptis, quid eis futurum portenderetur, inquirebant: quo modo nonnunquam contingebant illis carmina vel præsentibus, vel futuris negotijs mirè congruentia: velut Alexandro Seuero etiamnum adolescenti, nec imperium speranti, dum Virgilianas sortes scrutatur, versus ex libro Aeneidos 6. exiëre, qui futurū illi Imperium præsignificabant his verbis.

R

Tu

*Tu regere imperio populos Romane memento
 Ha tibi erunt artes, pacisque imponere morem;
 Parcere subiectis, & debellare superbos.*

Nec mirū ita euenire, Deo volente ideoque
 mente mouente, linguam moderante, & fortes
 aptè ad id quod præsignificari vult miscente ac
 temperante; qui nō solum ex ore Balaam arioli
 23. & 24. & falsi vatis, sed etiā ex ore asinae qua ille ario-
 lus vehebat, verissima futurorū edidit oracula.

39. *Permissu Dei, nimis cupidos sciendi futu-
 ra, laqueis demonum irretiri; & varijs ac
 perniciosis erroribus implicari.*

*Augusti-
 nus.*

*Valde ob-
 seruanda
 beati Au-
 gustini sē-
 tentia.*

NON est hoc loco in præteritis relinquen-
 dum, quod valde sapiēter & salutariter monet
 Augustinus in libro 2. de Doctrina Christiana,
 cap. 22. & 23. ait enim permissu Dei nonnun-
 quam vsu venire, vt dæmones vel per ipsos et
 homines multa vera prædicant, quod nonnulli
 eiusmodi diuinationum, etiam cum superstitio-
 ne atque impietate nimium studiosi atque cu-
 riosi, noxia p̄suasione seducti, in maiora & ma-
 gis execranda flagitia, ita se derelinqui à Deo
 promeriti præcedentibus suis peccatis prola-
 bantur. Sed præstat hic Augustini verba sub-
 scribere. Hinc fit, inquit, vt occulto quodam
 iudicio diuino cupidi malarum rerum homi-
 nes, tradatur illudendi & decipiendi, pro meri-
 tis voluptatum suarum illudentibus eos atque
 decipientibus præuaricatoribus Angelis; qui-
 bus

bus ista pars mundi infima secundum pulcherrimum ordinem rerum, diuinæ prouidentiae lege subiecta est. Quibus illusionibus, & deceptionibus euenit, ut istis superstitiosis, & perniciosis diuinationum generibus, multa præterita & futura dicantur, nec aliter accidant quam dicunt: multaque obseruantibus secundum obseruationes suas eueniant, quibus implicati curiosiores fiant, & sese magis magisque inlerant multiplicibus laqueis perniciosissimi erroris. Hoc genus fornicationis animæ salubriter diuina Scriptura nō tacuit, neque ab ea sic deterruit animam, ut propterea talia negaret esse sectanda, quia falsa dicuntur à professoribus eorum, *Sed etiam si dixerint uobis, inquit, & ita eue-* Deut. 13.
nerit credatis eis. Non enim quia imago Sa- 1. Reg. 27.
 muelis mortui Sauli regi vera prænuñciauit, propterea talia sacrilegia quibus imago illa præsentata est minus execranda sunt: aut quia in Actibus Apostolorum ventriloqua femina ve- Act. 16.
 rum testimoniū perhibuit Apostolis Domini; ideo Paulus Apostolus pepercit illi spiritui, ac non potius illius demonij correptione atque exclusionem mundauit. Omnes igitur artes huiusmodi vel nugatoria vel noxia superstitionis, ex quadam pestifera societate hominum, & demonum, quasi pacta infidelis, & dolosæ amicitiae constituta, penitus sunt repudianda, & fugienda Christiano. Sic Augustinus. His causis adiungunt quidam alias duas, minus fortasse probabiles, non minus tamen frequentes vsuque compertas.

40. *Multos diuinare futura, magis ex prudentia, & usu rerum humanarum, quàm ex arte Astrologica.*

TERTIA CAUSA. Non pauci diuinant non tam pericia artis Astromanticæ, quæ nulla est, quàm singulari quadam sagacis ingenij solertia, & multiplici humanarum rerum pericia vsuq; & exquisita eorum hominum quibus diuinatio fit, negotiorum, morum, studiorum, & ingeniorum obseruatione atq; notitia. Etenim quidam sunt, qui perspectis quorundam hominum temperamētis, & affectionibus corporū, studijs item, exercitationibus, institutis, familiaritatibus, denique virtutibus aut uitijs, multa euentura eis prouident, ipsisque magna asseueratione, & auctoritate prænunciant ac plerumque diuinant. Ad hoc genus diuinationum pertinet, si quis principem tyrannicè tractantem ciues, & crudeli dominatu prementem, à suis eum occisum iri prædixerit; hominemque frequentissimum in furtis, & rapinis, suspendio periturum; religionis contemptorem, falsæque doctrinæ proleminatorem contra veritatem fidei, & Ecclesiæ catholicæ auctoritatem, ignis supplicio mulctatum iri. Hoc genere diuinationis vsus est Annibal, qui perspecta imperitia atque temeritate Terentij Varronis, & C. Flamminij Romanorum Coss. & Imperatorum, Afris victoriam, Romanis insignem cladem valde fidenter, & asseueranter prædixit;

eam-

DE DIVINATIONE ASTROLOGICA 255
eamque prædictionem mox certaminis exitus,
plurimis Romanorum millibus interfectis, cō-
probavit.

41. *Nimiam credulitatem ac lenitatem con-
sulentium Astrologos, interdum conduce-
re ut eorum prædicta vera cadant.*

QUARTA Causa. Non raro Astrologorum
diuinitas vera existit ob stultam consulentium
credulitatem: multi namque facillime credunt
quæ dicuntur ipsis de rebus quas vel maximè
optant, vel timent vehementer atque perhor-
rescunt. Solet enim eiusmodi credulitas insti-
lare animis cōsulentium magnam spem rei bo-
næ à diuinis promissæ, vel ingentem metum in-
ijcere tristem & acerborum casuum calamita-
tisq. ab illis prænunciatæ. Hi autem duo affe-
ctus animi, cum potentissimi sint ad efficiendū
& commonendum hominem, crebro efficiunt,
certè multum proficiunt, ut humana negotia
ad prædictos fines perducantur. Etenim ve-
hemens quædam spes ardensque desiderium
excitant atque incitant homines ut ad bona ip-
sis promissa sedulo se comparent, & omnibus
suis opibus viribusq. contendant: quo fit, ut ob
rem plerumque quò intendunt, optatorum suo-
rum & alienorum promissorum compotes fa-
cti, perueniant. Ex aduerso autem metus, pa-
uor, horrorq. prædictorum malorum atque ca-
larnitatum, sæpè faciunt homines cunctanter
ac dubitanter egredi negotia, timide ac negli-
genter persequi, & quocumque obiecto impe-

256 LIBER III. DE DIVINAT. ASTROLOG.

T. Liuius.

dimento turpiter & infelicitate deferere, eaq; ratione in prænunciata ipsis mala delabi. Luculenta eius rei exempla reperimus in Romano exercitu, cui (ut scribit Liuius) cum auguria & auspicia secreto inspecta in faustum belli exitum minarentur, auspices & duces ne militem in arma euntem funesto nuncio consternarent, versis in contrariam partem auspicijs, omnia fausta & triumphalia portendi & à Dijs promitti mentiti sunt. quo mendacio utiliter decepti milites, alacriter prælium inierunt, fortiter pugnarunt, & hostes quos auguria victores fore præmonstrabant, feliciter vicerunt. Contra ve-

*Nicias dux
cis Athe-
nienſium
exitialis
inſcitia.*

ro cum Nicias dux classis Athenienſium, incognita sibi lunæ defectione portendi ratus classis naufragium, si ea nocte portum egredereetur, cū stulto metu occupatus oppressusque discessum differt, à Siracusanis cum tota classe captus est. Verum ne disceptatio hæc longius quam initio promissimus, & quam fert instituti nostri ratio producat, hic finem disputandi de diuinatione astrologica faciemus.

F I N I S.





Libros hos tres R. P. Benedicti Pererij ad-
uersus fallaces, & superstitiosas artes, &c.
non modo propter breuitatem, perspicuita-
tem, elegantiam, verum etiam propter ortho-
doxam, & accuratam pulcherrimarum, &
vtilissimarum questionum explicationem,
tū luce tū laude dignissimos iudico.

Albertus Hungerus, S. Theologiæ
D. Professor, & Procancellarius,
atque Theologici Collegij pro
tempore Decanus in Catholica
Academia Ingolstadiana.



INDEX RERVM PRAECIPVARVM INTRACTATV

de Magia contentarum.

A.

A rchimedis sphaera.	fol. 18
Archimedis scientiae potentia.	20
Actio Demonum est duplex.	33
Apollonij fabula leonis.	37
Astronomica Magia quid sit.	55
Aurum Chemicum non potest vendi pro ve- ro.	78
Argentum viuum non est materia omnium metallorum, sicut nec sulphur.	80
Authoris sententia de auro alchimistico.	87
Animalia gnari possunt solo calore ignis.	89
Auripigmentum est species veri auri.	90
Alchimiae ars cur non videatur esse uera.	90
Alchimiae vsus non est permittendus in Re- publica.	92
An aliquid primogeniae materiae hominis ma- neat per totam vitam.	228
Annibalis somnium de vastatione Italia.	137
Alexandri Magni somnium.	139
Animus noster cur sit habilior in somno ad percipiendas reuelationes diuinas.	146
Argumenta S. Scripturae quibus Astrologica diuina-	

INDEX.

diuination refellitur.	170
D. Augustini notabilis oratio in reconciliatio ne cum Ecclesia cuiusdā Mathematici.	177
Animaduersione in Petrum de Aliaco.	179
Argumentatio valida cōtra Astrologos.	181
Astrologorum prædictiones si essent veræ, es- sent odiosæ hominibus.	206
Astrologorum prædictiones cui generi homi- num arrideant.	221
Astrologorum fundamenta.	222. 227. 232
Aristotelis sententiæ tollunt è medio Astro- mantiam.	218
B. Ambrosius comparat prædictiones astrolo- gorum telæ araneæ.	231
Astra non esse certa nūq̃ vudij futurarū.	239
Annibalis diuination.	254
Auctoris sententia quomodo facta sit à Ma- gis Pharaonis virgarū in serpentes mu- tatio.	121. 116
Amnes retrofluentes.	38
B.	
Boëtij opera mira.	20
D. Basilij argumētatio contra Astrologos.	90
C.	
Columba lignea volans.	20
Caput æneum loquens.	20
Calor cēlestis & elementaris nō differūt spe- cie.	88
Cham fuit idem qui Zoroastres.	94

INDEX

Cassiani opinio de origine Magie.	96
Causæ quinque; cur dormientibus multa diuini- tus reuelentur.	146
Causæ quatuor cur diuina somnia sint aliquan- do obscura.	152
Cæcilianus sententia aduersus prædictiones astro- logorum.	175
Catonis dictum in Astrologos.	216
D	
Dæmones cur simulēt animas demortuorum.	70
Deus cur sit passus prodigia fieri à Magis.	121
Dæmonū natura & munus scdm Platonē.	131
Dæmones cur olim non doctis sed imperitis somnia dederint.	150
Dæmonum astutia in dandis somnijs.	151
Deus varijs modis afficit homines per somnia.	143. 144
Decreta contra Astrologos iudiciarios.	169
Dilemma aliquod contra Astrologos.	206
E	
Epicureorum opinio de somnijs.	126
G	
Gregorius sex somniorū causas tradit.	135
Eiusdem memorabilis sentētia de somnijs.	142
H	
Historia Iannis & Mambri Magorum Pha- raonis.	112
Homeri commentum pro distinctione vero- rum somniorum.	130
Habre-	

I N D I E X.

Hebræorum antiquus mos scribendi. 247

L

Lamiarum ingenium & libido. 11

*Liberi arbitri vsus nunquam est perfectus in
somno.* 158

Magorum figmenta. 8

Magorum opera varia. 5

Magi Persarum quales. 18

Magia naturalis. 14

Magia naturalis triplex. 14

Magie varietates species. 28

Magi quomodo dæmonibus imperent. 53. 71

Magie usus. 107

Magia uetita diuinis legibus. 107

Magie unde tanta authoritas. 102

Magie origo prima à Demone. 97

Miraculorum quid sit. 48

Miraculorum uerorum tres gradus. 49

*Miraculorum uerorum quinque differentie à
falsis & simulatis.* 50

Mortuos nulla uim magica posse reuiscere. 13

N

Necromantie usus antiquus. 65

Necromantie confutatio. 67

Nicia ducis Atheniensium inscitia exitialis.

256

O

Opera quæ possunt dæmones facere. 34

*Opiniones tres de serpentibus Magorum Pha
raonis.* 114. 115. 116.

Oeno-

I N D E X.

*Oenomaus confutator oraculorum Apol-
linis.* 172

Origenis disputatio contra Astrologos. 178

P

*Porphyrij dubitationes nouem, quomodo Ma-
gi dæmones inuocent.* 29

Philonis sententia de origine Magiæ. 93

*Porphyrius quid senserit de veritate somnio-
rum.* 133

Pythagoræ mos & consuetudo. 134

*Petrus Aliacus plurimum peccauit contra
chronographiam.* 214

*Professores diuinandi futura, aliquando fuis-
se eiectos è ciuitatibus.* 221

R

Remora piscis. 16

Refellitur ars Cabalistica tanquam inanis. 58

Rationes quinque pro Alchymistis. 84

*Religio & disciplina Christi tenebras Magi-
carum artium è mundo discussit.* 102

Ratio cognoscendi somnia duplex. 141

Ratio quedam contra Astromanciam. 173

S

Salomnnis Magia naturalis. 21

Statuæ per se incedentes. 35

Statuæ loquentes more humano. 36

*Samuel an fuerit verus qui per Pythonissam
repräsentatus est Sauli.*

Smerdes Magus inuasit regnum Persarū. 74

Sub-

I N D E X.

<i>Sulphur non est materia metallorū omniū.</i>	80
<i>Somnia omnia esse vera Stoicorum, et Pythago- gora opinio.</i>	125
<i>Sententia quædam vera de somnijs.</i>	127
<i>Somniorum causæ.</i>	127. 136. 138. 141
<i>Sententiæ variæ de causis somniorum.</i>	130
<i>Somnium Cyri.</i>	131
<i>Synesius mira sed falsa de spiritu phantastico tradit.</i>	133
<i>Somniorum dæmonis duo genera.</i>	139
<i>Somnia quædam impijs hominibus data sunt à Deo.</i>	151
<i>Somniorum quatuor genera sine uitio possunt obseruari.</i>	153
<i>Somnium Salomonis cur illi fuerit datū.</i>	161

T.

<i>B. Thomæ sententia de operibus Magorum.</i>	
--	--

II

<i>B. Thomæ argumentum contra Necroman- tiam.</i>	67
<i>Testimonia scripturæ de somnijs.</i>	128
<i>B. Tertulliani sententia de Necromantia.</i>	69

V.

<i>Voces quomodo possint esse causæ efficientes rerum aliquarum.</i>	25
<i>Vtilitates artis Chimicæ.</i>	82
<i>Vanitas maior eorum, qui obseruant somnia quàm astra.</i>	155
<i>Vsus rationis sæpe est liber in somno.</i>	158

Vita

I N D E X.

*Vita hominis est instabilis, qui non secundū
rationem sed sensum uiuit.* 206

X.

*Xenophanis, & Epicuræorum opinio de som-
nijs.* 126

Z.

Zoroastres Magiæ parens. 93

Zodiacus apud Astrologos duplex. 189



